



W W




Edvard v. d. Feicht.

H. Klein

u





Digitized by the Internet Archive  
in 2017 with funding from  
Getty Research Institute

Меню

6. 7. 1933

- 742 -

edit. Paris. 1657-4. vid. Bibl. Salzer II. pag.  
297. Bibl. Feuerlin. p. 277.  
7. Placii theatr. anonymus. pag. 209.

gehört unter die seltenen Bücher.

DEFENSIO REGIA,

P R O

CAROLO I.

A D

*Serenissimum Magna Britannia*

R E G E M

CAROLVM II.

Filium natu majorem, Heredem  
& Successorem legitimum.



*Sumptibus Regiis.*

---


ANNO MDCLXXIX.

CAROLO I.

1614

CAROLO II.

1625



1629





P R Æ F A T I O  
D E F E N S I O N I S .

**H**Orribilis nuper nuntius au-  
res nostras atroci vulnere,  
sed magis mentes, perculit, de  
parricidio apud Anglos in  
persona Regis sacrilegorum  
hominum nefaria conspiratione admissio.  
Quosunque infandus hic rumor attigit,  
haud secus ac si fulmine adflati essent, de-  
repente his arrestæque horrore comæ, &  
vox faucibus hæsit. Si qui molliore inge-  
nio nati sunt, lacrymas etiam non tenuerunt,  
nec abstinuere gemitu. Fortius verò  
animati, tanta indignationis flamma ex-  
arserunt ut vix se caperent. Nemo certe  
non diras imprecatus est tanti sceleris, tam  
inauditi, tamque inusitati auctoribus.  
Ut enim improvisa magis feriunt, ita ino-  
pinatos cum oppressisset res adeo nova, ne-  
mo sic ferus ac ferreus repertus est atque ab  
omni sensu humanitatis alienus, vel à re-  
gia majestatis respectu aversus, cujus in pe-

ctore luctum privatum cum publico mœ-  
rore conjunctum non excitaverit misera-  
bilis tam sacri capitis & mirabilis cadēs.  
Fatendum quippe est, ex quo regium in or-  
be nomen gubernandis populis natum no-  
tumque fuit ad hæc usque tempora, qua-  
cunque in medio sæcula fluxere nullum si-  
mile huic factum vidisse nec audivisse. E-  
iusmodi certe est ut inter probra sæculi nunc  
memorari debeat, inter portenta olim nu-  
merandum, nisi fides historiæ nostræ laboret  
apud posteros, vix credituros quicquam ta-  
le hoc ævo contigisse. Enimvero vel ad se-  
curitatem suam temporum sequentium  
interest ut pro fabula habeatur, quod ge-  
stum hodie negare non possumus. Nam si  
reperita nunc sunt belluæ tam immanes sub  
humana facie, quæ eousque vesaniæ nullo  
exemplo prioris ævi incitata processerunt,  
quid putamus olim futurum ubi exem-  
plum proditum fuerit quod sequantur ali-  
quando gentes aliquæ, quæ sciant & cre-  
dant nostræ ætate rem eam fuisse perpetra-  
tam, quam ipsæ videantur posse cum venia  
imitari. Longe itaque magis expediet ve-  
nientium post nos annorum hominibus, si  
in monumentis nostris hanc historiam le-  
gerint eodem modo & pari incredulitate,  
quæ boves loquutos, amnes retro versos,  
statuas

statuas sudantes, pluuias sanguineas, hodie in priscis memoriis videmus. Hoc vero interest quod prodigia ejusmodi per se innoxia, sed tanquam futura alicujus cladis prænuntia cum voluptate & risu transire solemus. Nam pleraque eorum quæ pro ostentis apud antiquos habita sunt, causas interdum habuere suas naturales, quamvis sint ex raro contingentibus. Istud vero quod factum jam detestamur, quia nunquam factum fuisse miramur, cum instar prodigii sit habendum, quod nec in homines posse cadere putaremus nisi jam cecidisse videremus, si pro incredibili non est habitura posteritas, cum male id suo maximo creditura est. Quod enim fidem superat, præcipue si contra bonos mores fiat, si humanitati bellum indicat, si in crimen nefandum cedat, quando mox fidem nancisci incipit, quasi obice sublato fas omne abrumpit, & quod vetitum antea fuit, præjudicio quodam ut licitum esse videatur, quia factum sit, facit. Inde est quod cum majore excusatione peccant qui ad peccandi magistrum exemplum provocant, quique patrociniū sceleris sui in scelere simili quod antea commissum fuisse constiterit, reperiunt. Hac ratione quod in Anglia factum facinus cum horrore accepimus, quia ex-

emplo caret, tanto minus ignoscendum, magisque adeo execrandum, curandumque enixius ne hoc ipso tempore penetret ad plures, & ne pro exemplo sit perniciem trahente veniens in ævum. Digni itaq; omnium odio & insecratione qui fecerunt, dignissimique porro quos flamma ferroque persequantur non solum quotquot sunt in Europa reges & principes jure regio imperantes, sed etiam omnes magistratus, omnesq; adeo resp. bene constituta & morata. Hæc enim fanaticorū factio non sola regū solia appetere gēstit, sed omnes potestates quas ipsa nō fecerit conatur subvertere, cum nihil aliud nisi rerum mutationem capter & cupiat, non solum in repub. sed in Ecclesia, cum perpetua novandi libidine qua sibi imperādi omnibus nulliq; parendi licentiam adstruat. Dum id assēquantur quod volunt, pari studio de repub. regnū constituere parati, ut de regno remp. nunc efficere contendunt. Non solum regni subversionem, sed etiam legum eversionem sibi cordi esse satis ostendunt. Nec enim regē suum legitimum tollere alia via potuerunt nisi per omnium legum quibus regnum illud erat fundatum abrogationem. Ne quis autē errat, non pro regio regimine popularē constituere gubernationem in animo unquam aut voto habuerunt. Res ipsa indicat quid volue-

voluerint. Pro uno rege quadraginta tyrannos imposuerunt, cum triginta sibi sufficere crediderit olim Atheniensium civitas, plus satis onerata si vel unum perpeffa esset. Nam quanto rei mala plus est, tanto gravius & pejus est onus. Cui autem dubium est quin si unus ex illis Triumviris Anglicanis, scelestæ in regem factionis ducebatur & antesignanis, in republica natus esset, quin eundem animum ad eam everte-  
 tendam allaturus fuerit, quem attulerunt ad regem tollendum? Regem quidem appareret eos sustulisse, sed nec minus manifestum est regnum sibi retinuisse, dum quod sub uno erat in plures dividerunt, & triginta ac septem socios tyrannidis adscivere qui imperium secum tenerent, gravi-  
 que & intolerando servitio cives suos premerent. Nam sub specie libertatis tyrannidem sævissimam velle eos exercere vel cæcis clarum est. Vocari illi se quidem libertatis publicæ custodes in actibus publicis postulant. Æque bono jure latro qui viatorem spoliasset, se crumena ejus custodem appellari vellet. Ita draco gaze custos est cui incubat, à nemine tangenda. Ita avarus pecunia pauperibus extorta curam gerit, quam arca conditam servat nulli erogandam. Ita fur custodiam ac tutelam

*habet rerum, quas domino surripuit. Egregios scilicet libertatis conservatores & vindices, quam regi primum eripuerunt, deinde & Senatui! Nec libertatem eripuisse contenti, vitam etiam porro pluribus procerum injusto iudicio ademerunt, postremo & regi, nequid ad summam deesset sceleris, quod una hac impietate suprema cumulatam reddiderunt. Regnum nolunt nisi suum sit. Reges abominantur nisi ipsi sint. In republica si essent, magistratum avversarentur quem ipsi non constituissent. Ita rempublicam amant in regno, in republica regnum, sed utrobique imperium affectant, nec quemquam regnare aut imperare præter se iustum atque æquum existimant. Inde est quod Independentium nomen adoptarunt, utpote qui à nemine pendere & à se omnes volunt. Ex secta sua præscripto nullum bonum regem putare possunt qui vel optimum non ferrent, cum salam profiteantur, dominatum regium cujuscunque principis, licet in eo virtutes omnes rege digna eminenter elucerent, rei-publica inutilem esse, immo gravem. Tantum eos odium regie appellationis tenet, cum potestas ipsa perplaceat, ut ab ipso Deo oblatum regem non recepturi videantur, jam datum deturbaturi; sanctiorem quin-  
immo*

immo ipso Davide, Salomone sapientior-  
 rem nullo modo toleraturi. An miretur  
 iam aliquis si regem, nulli veterum Chri-  
 stianorum regum pietate, iustitia, religio-  
 ne, & clementia secundum, regno & vita  
 privarunt; praterea suum & legitimum,  
 postremo eum cui fidelitatem iuramento  
 non semel nec vice simplici promiserant?  
 Quia regnum extinctum voluere, ideo re-  
 gem extinxerunt, cujus maximum apud  
 eos fuit crimen quod rex esset. Nec porro  
 etiam mirum si innocentia vita non potuit  
 eum tueri, qui nocens erat eo ipso quod re-  
 gnabat, non quod male regnaret. Non mul-  
 tis argumentis colligendum, nec longa &  
 difficili conjectura quarendum quid factio-  
 sos istos ac rebelles in tantum furorem im-  
 pulerit. Non sanè crimen regis hoc fecit,  
 sed suum. Nempe affectatio tyrannidis. Si  
 id solum spectassent, si de eo tantum cogita-  
 sent quo modo forma status publici mutan-  
 da sibi in melius foret, satis illis esse debuis-  
 set, ablatore rege, & abolita regia dominatio-  
 ne rempublicam qualis erat relinquere,  
 penes Senatum cujus proxima semper à re-  
 ge fuit auctoritas, summam potestatem pa-  
 ti residere. Absque ulla alia novatione,  
 status hic popularis fuisset. Democratiam si  
 duntaxat optassent, non alia melior consti-



tui potuit, quam ex tribus populi ordinibus, ex quibus compositus ille Senatus fuit. Nonne ex Episcopis constabat qui Ecclesiam; ex Optimatibus qui Nobilitatem; ex Deputatis urbium qui Plebem representarunt? Sed Ecclesiasticum ordinem in Episcopis præcipuè consistentem non solum Senatu ejiciendum, sed etiam penitus abjiciendum censuerunt. Non dicam jam quo consilio & qua mente, nec quam recte id fecerint. Mitto etiam dicere de antiquitate eorum, de institutione ad hoc primum facta ut schismata de Ecclesia tollerentur. Non addam in ipsa Reformatione apud Anglos fuisse servatos. Sed illud constat necessarios vel inde videri oportere, & omnino vel fatentibus multis ipsis Presbyterianis retinendos, quod quandiu fuit Episcopatus mille pestifera secta & hæreses in Anglia non pullularunt, & inter eas vel teterrima ista cui nomen Brunistarum, & Independentium. Illi ipsi sunt qui Episcopos primo, deinde & Optimates è Senatu extorres dederunt, mox & regem è regno ac vita. Saltem nobiliorem populi partem, jus suum sedemque in Senatu retinere passissent, si veram ac genuinam Democratiam consituere laborabant. An Democratia est quæ ex vilissima tantum plebe con-



conflata est, exclusis Optimatibus? Hanc vero ὀχλοκρατίαν Græci veteres dixere. Quam & vitium Δημοκρατίας ita esse statuerunt, ut Tyrannis est excessus vera ac legitima Monarchia. Sed non ea cura quietem horum Reipublica turbonum sollicitavit, ut meliori regimine, quale esse popolare sibi videri simularunt, mutari cuperent statum qui tunc in Anglia ab uno regebatur. Plebis nomen in quo supremam auctoritatem quasi de jure naturali residere affirmant, ambitioni suæ prætenderunt, ut hoc specioso prætextu ipsi arripere tyrannidem possent, ad quam tanto ambitu, tanto conatu jam dudum viam affectabant. Idque eventus planissime docuit. Pro uno quippe plures inde reges, sive tyranni potius, exorti sunt. Immo vel ad unum summam rerum rediisse exinde videre est. Quem enim alium dare merito possumus titulum præsidi illi Consilii supremi, quod nunc vice & loco Regis qui jam nomine nullus est, omnia pro arbitrio temperat ac gubernat? Rex ille quidem vere censendus, quamvis nomen absit, quia res adest quæ sine titulo minus habet invidia, sed non minus habet auctoritatis. Nonne ad eundem plane modum, & similem prorsus imaginem cum

*Augustus Cæsar rempublicam occupasset, sub nomine Principis imperium tenuit, quo nomine tunc temporis Romani eum qui primus esset Senatus, appellare consueverant. Ita iste præses & princeps Consilii non regio nomine, sed regia potestate, adsumptis quasi adsectoribus & consiliariis, illis ipsis quibus auctor ac dux fuit conjurationis sceleratae sectariorum, regem non alia causa neci dedit, quam ut sella non quidem Regia sederet, sed cum auctoritate plus quam Regia ac verè Tyrannica. Ita ille inquam nequissimus latro quasi tyrannum occiderit, pro præmio tyrannicidii fruitur ipsa tyrannide, cum ob regem parricidaliter obtruncatum nefarii sceleris poenas meritas sustinere deberet. Sic pretium facinoris ejusdem sæpe alter crucem patitur, pro quo alter potitur diadema. Ne quis vero dixerit hos cum duce suo sicarios, faces ac facem patriæ suæ, regali tantum potentia niti, cum à nomine regio tantopere abhorrere videantur. Si ipse iste rex, quem morti infontem adjudicarunt, vel centesimam partem eorum facinorum commisisset in legibus divinis & humanis violandis, quæ isti scelerati commiserunt, tam merito tyranni nomine dignum eum ducerem, quam immerito in sententia capitali contra eum lata*

lata hoc elogio donatus est. Per Angliæ regni vetera statuta non licuit regi legem ullam condere citra populi assensum. Quam legem hi scelerati ac perditī latrones non temerarunt, cum omnes etiam illas quibus tanquam fundamentis regni iura stabilita videbantur, plane abrogaverint? Nulla lex est qua regem fieri reum liceat, accusari, condemnari, capitis supplicio affici. Hæc illi tyranni omnia sine lege fecerunt. Quanto ergo fastigio regiam potentiam ista potentia supergressa est, quæ regem ipsum, legum auctorem conditoremque cunctarum quibus populus tenetur, iudicio nullo, nulla lege, nullo jure morti addixit? Si rex quemlibet ex superiore vel inferiore domo augusti illius Consilii sui Senatorem tali supplicio, non rite, ac sine juris ordine curasset afficiendum, tyranni notam non effugisset. At isti regem ipsum mactandum carnifici publico tradiderunt, nulla sibi in eum competente jurisdictione. Quanta vero est potentia, quam infinita ac plusquam Tyrannica, non unam aut alteram legem abolere, sed per mille amplius annos receptam, probatam, usitatam regiminis formam repente evertere, & in alium statum transmutare? Hoc cine fieri potuit, absque legum omnium, & veterum regni institu-

torum

torum everfione? Quinimmo & nomina-  
 tim leges omnes civiles & criminales qui-  
 bus per tot annos ufa eft Anglia, refigen-  
 das fanxit, nevasque figendas. An hoc  
 fine maxima reipublica perturbatione &  
 omnium rerum confufione peragi potuit?  
 Quis olim Roma dictator five ad tempus,  
 five perpetuus, tantum potuit impune,  
 quantam ifti poteftatem per vim & vio-  
 lentiam armorum ufurparunt? Cafar cum  
 armis libertatem civium oppreffiffet rem-  
 publicam & quis legibus antea temperatam  
 in perpetua Monarchia jus ab uno difpen-  
 fanda convertit. Hoc alicui Cornelio Syl-  
 la, hoc Iulio Cafari licuiffe, principibus fua  
 ætatis viris generis & virtutis merito, for-  
 tafle minus intolerandum. At idem Ma-  
 nios aliquos, terra filios, vix domi nobiles,  
 vix fuis notos, licere fibi credidiffe quis fe-  
 rat? Nec eft quod quis dicat contrarium  
 Cafari inftitutum eos tenuiffe, & pro Re-  
 gno vel Monarchia rempublicam & qua-  
 tili jure adminiftrandam fubftituiſſe. Pro  
 legitima quippe, proque juſta regia poteſta-  
 te, tyrannicam invexere popularis ſtatus  
 fuco coloratam. Quid enim de populi regi-  
 mine in Anglia ſtabiliendo jactarunt, ad  
 populum facta phalera fuere. An Democra-  
 tia eſt in qua quadraginta homines nefarii,  
 regis

regis sui carnifices, summam habent rerum potestatem, à qua non licet provocare? Ne quidem Aristocratia est, in qua optimates & primores populi cum summo jure plebem regunt. At ista sicariorum viles. & impura anima optimatum confessum aboleverunt, locum ei nullum in parte procuranda reipublica esse voluerunt, ad plebem in speciem totum regendi jus transtulerunt, sed revera sibi vindicarunt, id est paucis è face plebis ortis reservarunt, immo vel uninebuloni, fanatico, homini obscuro, turbarum omnium qua per tot annos Angliã dilacerarunt, auctori, incentori, promotori. Non & quiores fuerunt confessui plebis, qua alteram partem habuit auctoritatis in administranda sub rege republica. plerisque eorum in carcerem & vincula conjectis quos tyrannidi sua minime favere animadvertunt. Idque post in seßam armatis urbem, post direptum ararium publicum, post tractum è carcere ad causam capitis dicendam Regem. Priusquam hac omnia tyrannice violentia facta edidissent, scriptum emiserrant ad Senatum ex utroque confessu optimatum & plebis etiam tunc compositum, quo edicebant, pro imperio scilicet, quid sua voluntatis esset statuere de Regis condemnatione, de Principis VVallia ad  
judi-

*judicium citatione , de Senatus finienda potestate , de novo reipublica gubernanda statu instituendo. Hanc eo scripto sibi placere formam gubernationis ostendebant , qua supremum Senatum , sicut erat antiquitus , haberet , non perpetuum , sed annuum aut in singula biennia renovandum , tam ex plebei ordinis viris quam ex proceribus congregandum. Hic status aliquam spem ostentabat aequabilitatis , & non falso gaudio libertatis nova populum lactare videbatur. Democraticum saltem apparebat hoc regiminis genus. Nullum in ea declaratione quam eo tempore dederunt de quadraginta viris imponendis verbum , qui summam rerum tenerent , & cum regio imperio omnia pro libitu administrarent. Ad hoc tyrannicum institutum devenerunt postquam urbem in suam potestatem armis rede gere , postquam è Senatu aliosejecerunt , partim incarcerarunt quibus volentibus non futuram esse novam tyrannidem sciebant , postquam denique regem nefando judicio condemnatum , capite truncandum carnifici tradiderunt. Et cum hæc fecerint perditissimi nebulones , audent tamen rempublicam nominare , qua tyrannica est gubernatio. Audent magnum sigillum insignire libertatis publicæ*  
elogio,

elogio, quam ipsi nomine tantum tenus populo reliquerunt, reapse vero vi & armis oppresserunt. Hæcine est æquam libertatem facere omnibus, & in populo dicere summam potestatem atque à Deo datam residere, cum nulla ad eum provocatio à quadraginta tyrannis detur? cum legum ferendarum nullum jus habeat? cum magistratum creandorum penes eum potestas non sit? Hæc nempe omnia jura sunt quæ Democratiam constituunt, quæ imperium summum populo conservant. Cum populus Romanus, regni sede dejecto Tarquinio Superbo, recuperata libertatis vindices & custodes duos consules pro rege creasset, æ tantum & tam merum penes eos stetit illud annuum imperium, ut non fasces summitterent populo pro concione, & jus provocationis adversus ipsos darent? Populus suffragiis suis magistratus omnes majores minoresque creabat, leges omnes à Senatu latus confirmabat. Nonne ex eo Rogationes dictas constat, quod consules populum in concione rogabant, an illam legem ferri vellet? Inde verba illa solennia quibus ad populum inferendis legibus utebantur, velitis, jubeatis, Quirites. Si tale imperium & talis hodie potestas populo permittitur. Anglicano ab illis quadraginta tyrannis.

tum:



tum concessero eam novam quam instituerunt reipublica formam nomine dux regias esse signandam, ipsos rite appellandos libertatis populi vindices & custodes, ut fue-  
re primi consules apud Romanos post reges abdicatos. Nihil hic par aut simile, sed omnia diversa & contraria. Duces exercitus rebellis regem Senatui suo ereptum in duriore carcere captivum diu detinuerunt, urbem regni sedem armis occuparunt, armatis militibus civium domos repleverunt, ararium publicum spoliaverunt, ex regni Consilio utriusque ordinis Senatores in vincula conjecerunt, confessum judicum selectorum ex sola inferiore domo contra iura ac leges regni ad regem condemnandum propria auctoritate constituerunt, manu deinde carnificis infami pegmati impositum & publico spectaculo populi sui expositum capite minuendum curarunt, quadraginta latrunculos cum summo imperio ad regnum obtinendum & jus dicendum crearunt, leges civiles omnes abrogarunt quibus per plures atates usa fuit Anglia, & alias ad libitum subrogarunt, pœnas arbitrarias criminibus irrogarunt, ut sic major esset judicum & magis infinita potestas. Excepto eadiscrimine nullum est delictum quod ca-  
pite



pite puniendum decreverint. Si non sunt  
 hac tyrannica, & quidem supra omnes ve-  
 teres tyrannos exempla, quid sit Tyrannis  
 neminem ego scire arbitror, nec ipse scio.  
 Raptum vi & armis imperium armis nunc  
 tueri contendunt, ut videantur prorsus  
 Turcico more hodierno velle imperare, aut  
 antiquo Romano, sed qualis in usu esse cœpit  
 post eversam ab Augusto rempublicam &  
 pessundatam populi libertatem. Imperii ille  
 Romani usurpator certum legionum nu-  
 merum instituit opportunis orbis ab ipso gu-  
 bernandi locis constitutarum, quas opponeret  
 externis bellorum motibus si qui ingruerent  
 à gentibus nondum subactis. Præter has co-  
 pias habuit & Prætorianas cohortes intesti-  
 nis rebellionibus retundendis in urbe collo-  
 catas & castris ibidem positis semper para-  
 tas, nunquam à militia dimittendas. Ad  
 eundem usum Turcarum quoque imperatori  
 sui sunt præsto Ianissarii, Prætorianis illis  
 Romanis militibus similes qui nunquam  
 militia munere vacant, sed semper excubant  
 ad regis custodiam, quem & sæpe solio per se-  
 ditionem deficiunt, & tumultuario iudicio  
 alium imponunt, eodem plane more quem &  
 illi Romani exercitus in destituendis & con-  
 stituendis suis Caesaribus non raro usurparunt.  
 Placuit hoc exemplum Romana Turcicaque  
 con-

*consuetudinis edecumatis religionis non Reformatoribus, sed decoctoribus, non tamen ex illa parte quæ regem tollit, & regnum servat. Nam Pagani Muhammedanique milites longe melius quam Christiani, rege uno sublato alterum suffecerunt, nec statum reipublicæ mutarunt. Novitii vero Christi sectatores, immo impuri potius Sectarii, regium nomen pariter cum regno sustulerunt, ut specie publica libertatis propriam tyrannidem adumbrarent. Tûrcarum & Paganorum militum tam studiosis & seriis imitatoribus in regibus suis interficiendis, non miror & alium ex utraque infidelium natione arripisse morem, præter receptos publice ceremoniarum ritus, quaslibet alias extraneas admittendi religiones. Hoc fecere Romani, hoc faciunt Turcæ. Illi Græcas superstitiones, Iudaicas & Ægyptiacas cum patriis sacrorum ritibus introductas coluerunt, hi Christianos & Iudeos tolerant, quos tamen damnant, cum unam apud se esse fidem veram à Muhammede acceptam iactent. Anglicani propheta quam magis religionem probent, incertum est, cum nullam improbent, & colluviem omnium sectarum recipiant, & in magistratu non requirant certam, cui permittunt credere quod-*

quodlibet, dum in ipsorum verba juret. Hanc unam videntur amplecti & colere religionem, quasi veram, quasi optimam, & quasi suam, qua nullum agnoscit superiorem neque in Ecclesia neque in republica. Cum tales sint isti Fanatici nebulones in religione, in conversatione, in administratione reipublica, quis non eos patria publicos hostes dixerit? Hoc parum est, communes generis humani hostes judicandi sunt. Putes eos tantum regibus insensos & infestos esse quos per summum nefas necare ludum habent? Nullus est in orbe Christiano magistratus, nulla in terris potestas, quantumlibet ordinaria, quantumlibet à Deo ordinata, ut omnes quæ sunt, inde esse constet, quam non pari odio prosequantur & persequi parati sint, quam non æque exterminatam omni ope cupiant, quia ubiq; apud eos eadem imperandi effrænata libido, eadem parendi imperita contumacia. Inde Independentes vocantur. Vt disciplina philosophorum ex præcipuo aliquæ doctrina sua dogmate nomen adsciverunt, Sceptici quia dubitant, Dogmatici quia affirmant, Critici quia judicant, sic isti quia pro principali axiomate habent sectæ suæ nefariæ, nullis magistratibus, nullis regibus, nullis legibus subjici velle, Inde-

pen-

pendentiæ ideo appellationem adamaverunt, ut rem ipsam qua nomine signatur præ omnibus ambierunt. Magistratus cujuscunque generis & potestatis eodem eos loco habere quo reges vel uno argumento evinci potest. Cum regem suum ignominiose trucidarunt, non à se regem occisum præ se tulerunt, sed primarium populi Magistratum. An si in aliqua republica libera viverent, & tantum possent quantum in Anglia potuerunt, magistratui civitatis magis parcerent quam regi pepercerunt? Si bene mihi noti sunt non aliter eum tractarent quam regem suum acceperunt. Forsitan ut aliquo colore deturbare illum possent, tunc regium nomen ipsis allubesceret quod arriperent, aut sub alia saltem appellatione imperium sibi simile adrogarent. Omnis sane mutatio illis placcret qua omnibus adprobare possent id quod sunt, & quod vocantur. Ut nunc res est, vexillum erectum cōstentarunt omnibus Nationibus qua regio dominatu gubernantur, ad reges suos non solum expellendos, sed etiam ignominioso & infami mortis genere publicè detruncandos. Nec quid velint aut quid optent dissimulare amplius sustinent, nempe, ut quod in Anglia ad effectum perduxere, ubique terrarum parem exitum sortiri videant.

videant. Omnes quippe exteros reges votis suis interficiunt, ut proprium securi percusserunt. Enimvero si precibus eorum locus esset, aut si tam improbas Deus soleret audire, nullus hodie rex usquam Christianis populis imperitaret. Nec enim dubitant Fanatici quasi calum stet pro partibus suis, aut quasi eventura vaticinari noverint, nullum caput coronatum intra decennium ulia in parte terrarum amplius repertum iri, affirmare. Adeo nimirum potens & efficax exemplum id sequuturis se monstrasse opinantur, aut adeo pronos ad sequendum qua praeiverunt via populos futuros sibi persuadent. Quid ergo cessant reges si tuti esse volunt, si securi, si salvi, ex toto orbe concurrere & convolare atq; in unum convenire, ut junctis copiis & viribus arma expédiant ad illas regnorum rerumque publicarum pestes exterminandas? Isti sunt qui regum capita quasi pilas habent, qui de coronis quasi trocho ludunt, qui non pluris faciunt sceptrum imperiale quam bacula morionum capitata, quiq; viliores sordidis ac laceris pannis summorum magistratuum infulas ducunt. Ad hæc, magni Magna Britannia Regis sanguis immuni scelere perduellium effusus ad ultionem sui vocat omnes Christiani orbis Monarchas ac

Prin-

*Principes. Hujus Manibus dignius illi parentare non poterunt, quam si in integrum restituant legitimum beati ac gloriosi martyris haredem & successorem, solioque paterno eum reddant, inferiis datis, ac mactatis pro victimis ad sepulcrum defuncti sanctissimi regis belluis illis efferatissimis, quæ in tanti regis necem conjurarunt, tam crudele ausa nefas, ausoque potita. Proprii etiam periculi ratione ad hanc vindictam de impuris latronibus sumendam provocari debent, si honoris sui, si salutis aliqua eos tangit cura, si cogitatio ulla sollicitat. Enimvero si regia Majestas ad crimen & accusationem civium rebellium vesania passim pateret, actum esset de regibus. Pejor evadet eorum quam subjectorum conditio, nisi maturè obviam eatur adeo effrenata licentia, quæ jam in aliis locis Europa grassari incipit, latiusque serpere porro perget, exemplo regibus nimium pernicioso. Sine intermissione, immo sine missione, cum his belligerandum est, donec institutum fuerit ad sempiternam memoriam punitionis fontium exemplum, sicut contrarium huic rebellionis & impunitatis jam ostendi coeptum est, & ne ubique propagetur, cautio est cum improborum exultatione & bonorum gemitu. Vos igitur, Angli, Scotique,*

que, vos Hiberni, vos etiam universi Christiani populi, in visam hanc stirpem sectamque nefandam, & genus omne futurum exercete odiis. Nullus amor cum his vobis, nec fœdera sunt. Nam quæ pax, quæ pæctio, quæ amicitia, quæ societas, cum talibus regi ulli aut Principi unquam Christiano potest esse, qui nullis legibus tenentur, nulla religione alligantur, nullius potestatis sive civilis, sive Ecclesiastica auctoritate moventur? Alia etiam ratione cum his in amicitiam coire & fœdera jungere regum nullus, nulla respublica, nullus Magistratus jam queat aut velit, qui toties perfida dixere sacramenta, toties fidem fregere, si modo fregisse dicendi sunt, quam nunquam habuerunt. Non classicum cano, non bellum suadeo, nisi quatenus paci graves homines, rei publicæ turbatores, seditionum faces, regum vel bonorum osores, boni publici interesse ut non sint amplius, dico. His positis quæ necessario visa sunt optimi regis defensionem præmunienda, quem pro sceleratissimo illi de quibus loquor, sicarii impurissimi trucidarunt, nunc ad eum defendendum descendere tempus est, cuius causam cum aliorum regum causa conjunctam esse, necesse est ipsi reges intelligant. Cui autem vivo ac videnti  
per



*per iniquitatem confessus sanguinarii, à quo judicatus est, pro se dicere non licuit, pro eo mortuo nunc sic dicam ut oratorio more non mihi agendum videatur, nec adeo ita agere sit necessarium. Ornari pigmentis rhetoricis tam bona & justa causa non debet, doceri contenta. Nam simpliciter rem ut gesta est narrare regem defendere est. In qua defensione hoc ordine procedemus ut primum de facto ipso prout meretur ejus indignitas & atrocitas, quale sit dicamus. Deinde de jure pertractemus. Tum demum illud argumentum persequemur an justa cuiquam subditorum causa esse possit contra regem suum arma ferendi, eum in jus vocandi, accusandi, condemnandi, & supplicio ultimo afficiendi. Idque negabitur. Postea ostendam Regē Magnæ Britannia supremam in suos subditos potestatem habere, qua nulli alii potestati obnoxia sit nisi divina: ac proinde ea qua dicta fuere de quovis alio rege à subditorum accusatione, judicatione & condemnatione vindicando, ea regi Angliæ optimo jure competere. Postremo ubi constiterit accusari nullo jure potuisse, quaeretur an ita vixerit & regnaverit ut cū accusari jure non potuerit, condemnari merito debuerit. Hac autem causa agetur toto orbe*



orbe audiente & quasi ad iudicandum sedente, non in illo confessu infamium & scelerorum iudicum disceptabitur, quos ab ejusdem factionis & sceleris sociis constitutos constat non ad cognoscendum de crimine, sed ad omnimodo condemnandum innocentem, & quidem regem, & quidem suum. Horum ego injustitiam, impietatem, perfidiam, crudelitatem proclamabo Cælo & Terra, ipsosque auctores convictos posteris tradam, reosque peragam, talis tantique facinoris, cui simile nec præterita sæcula viderunt, nec ventura forsitan videbunt.



## CAPVT I.

**D**E facto dicturus, tot novitatum monstris me circūdari ac ter-  
 reri sentio, ut quid primum  
 exequar in eo exponendo, quid  
 deinde, quid postremo, nesciam. Inter  
 difficultates quæ occurrunt ad exprimen-  
 dam ut par est tam incredibilis flagitii im-  
 manitatem, hoc unum facile dictu sup-  
 petit, quod iterum iterumque repeti de-  
 bet, idemque verissimum: Nempe solem  
 ipsum dum annum conficit cursum ini-  
 quius & atrocius factum nunquam adspe-  
 xisse alterum. Nam si per se confidere-  
 tur, ab orbe condito quo primus homo  
 simul à Deo creatus est, & rex ac domi-  
 nus super omnia ab illo creata constitu-  
 tus, memoria non extat facinoris iniqui-  
 tate & atrocitate huic comparandi. Inde  
 enim origo regum regūque regiminis  
 petenda est. Hæc cum primo homine &  
 cum solo novo cœpit, quoniam primum  
 parentem numerosus ex eo descendens  
 nato-

natorum & qui ex his nati sunt populus pro rege habuit & observavit ut primum sui generis auctorem. Ad hoc instar reges postea alios, nihil pertinentes ad genus stirpemque & cognationem priorum, à gentibus electos vel sumptos liquet à quibus regerentur & quos pro patribus colerent, qui & *Patriæ Patres* exinde nuncupati sunt. Ut patres veri, ita reges qui pro patribus sunt, non ejusdem moris & naturæ omnes esse possunt. Alii indulgentes, mites, faciles, clementes: alii asperi, severi, duri, partim etiam crudeles. Qui patrem natus occideret etiam dyscolum & durum, pro parricida merito esset puniendus. Parricidii crimen an minus ille incurrit qui regem id est patriæ parentem interficit, quamvis morosum, iniquum, impotentem, crudelem, & tyrannum? Immo magis. Quanto & magis pro parricida foret culleo insuendus, qui bonum patrem filius necaret, & civis qui bonum regem? De facti hujus qualitate inde æstimandum est, quod rex bonus, justus, clemens, religiosus, pius, pacificus de medio sublatus est. Sed nulla hic prodigio similis facinoris novitas notari debet, inquiet aliquis. Summum hoc quidem nefas, sed fieri solet. Multa utrius-

que generis parricidia novit hæc ætas, veteri non ignorata. Quam multi olim reges, & quidem tales de quibus nihil queri poterant subditi, seditione vulgi, factione procerum, aut tumultu militum occisi fuere? Enimverò in hoc facto spectandum non est tantum, ut ejus enormitas infanda propius meliusque appareat, quæ personæ id fecerint, aut in cujus necem id factum sit, vel quomodo. Sed hæc omnia simul, & alia insuper quæ extrinsecus circa hoc negotium contingere. Circumstantias vulgo vocant. In his igitur, in agendi modo, in personis tam quæ facinus peregerunt quam quæ passæ sunt, prodigiosa & nunquam alias visa vel audita facinoris magnitudo consistit. Ad personas quod attinet quæ grande & incredibile hoc scelus admiserunt, constat & plures olim, nunc, & omni tempore similis peccati affines fuisse repertas, sed gentiles, infideles, Romanas, Turcicas, non Christianas. Si de ea quærat quæ passa est, cum regia sit majestas, non utique & hoc novum, ut regi cruentas manus intulerint cives sacramento fidelitatis ei obstricti, sed ut non solum Christianum, verum etiam reformatam Religionem profitentem, Reformati & ipsi, tali  
sup-

supplicio mactaverint, res est novis annalibus inferenda quam nulli veteres habent ex quo reformatio religionis introducta est. Si agendi modus inspiciatur, plurimi non sicca morte reges ad generum Cere. ris, ut cum poëta loquar, descenderunt. Aut gladius privati parricidæ aliquem luce privavit, aut miles ab aliquo procerum subornatus vitæ principis insidias fecit, aut potio veneni alium exanimavit, aut carceris mala mansio pædore & fame alium cruciatum sustulit, alium in carcere carnifex strangulavit. Sed quis unquam audivit, quis legit, regem legitimum, hæreditarium regnum possidentem, Christianum, Reformatum, accusatum à suis subjectis, causam capitis dicere coactum, condemnatum, securi percussum? Causa etiam commissæ in regia persona cædis aut summæ sceleris detrahit aut ad summam addit, quo minus aut magis scelestum existimari queat quod actum est. Si per tumultum aliquis occisus est militarem, si per seditionem popularem, si per factionem optimatum extinctus est, non alia causa quæri solet quam quæ oculis patet, tumultus, factionis, seditionis. Furor itaque rebellium mentes præcipites egit in tale facinus. Irati milites ob gra-

vem militiam, infensi populi ob tributorum onera, proceres vel odio vel metu vel studio dominandi incitati in regem conspirant. Causa furoris in his omnibus partes suas agit. Post factum eos qui fecere plerumque pœnitentia capit. Si id non sit, ipsa amentia quæ venia digna non est, miserationem saltem mereri videtur, ut qui per ebrietatem aliquid mali committere, culpam vino solent imputare. At illi qui considerate & cum ratione peccant, quique ad immane aliquod facinus via & ordine progrediuntur, defendere semper tanquam justum id quod egerunt parati, nunquam facti pœnitentiâ ducuntur. Vetus & profunda improbitas suisque quasi radicibus nixa perditas & profligatas mentes occupat. Hæc summa vitiorum ac scelerum immanitas, si modo eam sequatur impunitas, pro innocentia est. Consuetudo male faciendi ipsis in naturam vertit. Tales sunt de quibus nunc loquimur. Fallitur enim si quis putat cæco animi impetu & nescio quo præcipiti insanæ mentis ardore explicuisse illos tantum nefas. Consilio & ratione meditatum diu ante facinus peregerunt. Ne longe hujus rei argumenta petere necesse habeamus, quod agunt nunc, & quod antea egerunt, inspi-

inspiciamus. Regem amovere & regium dominatum amoliri cum se in animo habere semper præ se tulerint, hodie regnant. Non odio igitur regis, non metu, non criminibus ejus adducti de eo tollendo cogitarunt, sed quia Reges ipsi esse voluerunt. Nulli parere & omnibus imperare jam pridem didicerant. Hæc eorum disciplina, hæc secta. Multorum annorum molitionibus, machinationibus, meditationibus ad hoc detestandum & horrendum facinus patrandum sese compararunt. Ne casu putemus in execrationem omnium incurrisse. Hoc voluerunt. Egregiam quippe laudem gloriamque magnam quasi ob rem bene gestam sibi deberi statuunt, tanquam præclarè de re publica meriti. Ultro etiam jactant, molestum esse ac grave populis regium imperium. Quoties moleste & odiose regnant, impune posse regno exui. Ab hac doctrina inducti si mille rebus meliorem regem habuissent quam habuerunt, non ei vitam conservassent. Decreverant dudum cum rege ipso regnum funditus extirpare. Sed tempora modosque diu ac multum captarunt quibus ad optatum sceleris finem pervenire possent. Non rebellio concitati populi ea simplex fuit,

subita seditione & factione vel procerum vel militum ad regem suum occidendum inflammata. Torserunt prius variis crucibus ac morte gravioribus suppliciis, quem tandem ignominioso & ultimo conficerent. De carcere in carcerem eum traduxerunt, custodiis sæpe mutatis, sæpe novatis, libertatis interdum spe ostensa, interdum & restitutionis per pactiorem inter partes faciendam. Dum de hac tractatur, & cum jam rex omnia promississet quæ ab ipso postulabantur, repente totum negotium disturbatur. E carcere rex educitur, in domum Regiam adducitur, coram iudicibus selectis sistitur, causam dicere tanquam reus cogitur, non respondens condemnatur, securi percutitur. Sed quomodo? Eo cetero modo quo nullus unquam rex supplicium capitis passus est. Ut latro, ut sicarius, ut parricida, ut proditor, ut tyrannus ante domum suam, id est regiam Aulam, populo suo spectante, in infami pegmate positus, inter duos carnifices constitutus, & quidem larvatos, quasi ad rem faceret hoc in duobus his servatum esse ut personati starent, cum tot alii carnifices ore non tecto, palam locum supplicii armis circumdatum custodirent, quot nempe pedites & equites armati circum-



cumstabant. Nam & ex eorum numero duo illi spiculatores sumpti sunt, qui regi caput amputarent, excubantibus & curantibus cæteris ut tutò posset amputari. Quid dicam quot & quantis ille armorum lanionum numerus vexationibus & injuriis spectatores è populo affecerit, si qui visi sunt tristiores cum cruentæ illius tragœdiæ crudelissimus & ultimus actus perageretur? Qui oculos clausit, qui aversos tenuit ne tam horrendo spectaculo eos inquinaret, non impunè hoc illi fuit. Qui miratus est, qui stupuit, qui expalluit ad ictum nefariæ illius securis, ictum ipse pugnæ vel calcis vel fustis reportavit. Qui mœstitiã deniq; vultu aut gestu aliquo vel voce declaravit, male mulctatus recessit. Verbera inflicta sunt ingemiscantibus & flentibus. Et quasi scelus esset admittere, tantum scelus non siccis oculis intueri, non tulit hoc impia sceleratorum militum protervitas. Mirata est antiquitas simulque detestata in sævissimo quodam tyranno hanc novam crudelissimæ tyrannidis diritatem, qui in propinquis & parentibus eorum quos cruciatos occiderat lacrimas & ploratus tanquam crimina vindicabat. Quid dicendum de istis? An est ullum genus sævitix & tyrannidis quod

non exercuerint in persona regis sui, cum ne illo quidem genere abstinuerint, quod veteribus è gentilibus ipsis visum est novum, inusitatum, ac dirum? Cives qui regem suum sub manibus carnificis elevatam securim tenentis jamjam cervicibus ejus infligendam adgeniculatum videbant, Tyranni isti flere vetuerunt, tristes esse noluerunt. Si qui inviti tale spectaculum aspicere visi sunt, pugnis & baculis eos depexerunt. Et quærat jam aliquis quo animo tetræ istæ belluæ ac molossis suis ferociores tale parricidium commiserint, qui talibus oculis spectarunt? Si Caligulas, si Neronas, si Domitianos crudelitate & superbia rex ille superasset, non tamen ita tractandus fuit à Christianis subditis, ipse Christianus. Certe ex quo Christus meliore doctrina imbuit suos, & mitiores sanctioresq; mores mentibus eorum induit, nemo regum ad hoc usq; tempus ab his qui tam piæ professioni sacramentum dederunt, ita crudeliter, & immaniter, & cum tot ac tam atrocibus contumeliis obtruncatus memoratur. Longè abfuissent veteres suum, id est Christianum, tam indignis modis accipere, qui malos, impios imperatores, infideles, idololatrias, religionis cui nomen dede-

dederant persequutores, flamina & ferro  
& omnibus suppliciis in se grassantes pro  
suis tamen habuerunt, foverunt, colue-  
runt. Meminerant hoc sibi mandatum ab  
auctore omnis pietatis, sanctitatis ac mi-  
sericordiæ, exemplo proprio eam in se  
disciplinam quam suis discipulis tradidit,  
etiam sanxisse gestiente. Venisse quippe  
in hunc mundum eum sciebant sub prin-  
cipe usurpatore & per hoc tyranno, sub  
alio eundem pati voluisse qui non usur-  
patione tantum tyrannus esset, sed etiam  
vita & imperandi modo. Si crudelitas  
gentium propria fuit & infidelitas, cur  
non contrarias virtutes Christianis ut  
proprias assignabimus, si quidem hoc no-  
mine digni videri volent? An ego pro  
Christianis & fidelibus habebo, quibus  
non solum gentes infideles, sed etiam bel-  
luas ipsas humaniores esse re ipsa comper-  
tum est? Illæ reges pessimos & quos ho-  
stes publicos pronuntiaverant ob infinita  
& enormia flagitia, sustulisse de medio  
contentæ, ultra mortem in eos non sæ-  
vierunt. Istæ ut famem satient, vel ut se  
vindicient, hominem obvium occidunt,  
nec ultra pergit eorum sævitia. Cur isti  
perditi & profligati Alastores tanto appa-  
ratu & choragio crudelitatis & diritatis,  
totque

totque contumeliarum & injuriarum generibus in rege suo tollendo usi sunt, quem non alio fini tollere destinabant, quam ut ne amplius ullus apud se rex esset? non sub alio criminis titulo, quam quia rex erat? Si rex illis non placebat, si regius displicebat dominatus, nonne poterant simplici regis cæde defungi? An necessarium fuit ut mille mortes ante ultimam pateretur? Ut post ultimam, etiam contumeliis pateret ejus cadaver? Utque in ipso mortis genere eam infandam ignominiam subiret quæ ne tyrannis quidem ullis unquam imposita legitur, sed solis sicariis & latronibus semper irrogari solita est, ut publice puniantur, & turbis circumfasis spectaculum sui ludibriumque præbeant? Remissa sæpe fuit sub bonis principibus talis ignominia etiam perduellionis reis in aliqua dignitate antea constitutis. Cujus hoc fuit feritatis, ut subjecti viles regi quondam suo, etiam tunc legitimo, non hanc veniam indulserint ut in secreto mori permitterent? Si Regi parcere volebant, sua saltem causa idfecissent. Non tanta passim apud omnes invidia nunc flagrarent, nec in tantam omnium detestationem incidissent. Cur non & tam tetri & execrandi spectaculi

culi gratiam fecerunt tot hominibus à plebe regis sui amorem adhuc spirantibus, & sine horrore sub carnifice morientem videre non sustinentibus? Demus id, quod tamen non potest concedi, sceleribus suis meruisse regem ut sic tractaretur à subiectis, an Christianos & Reformatos subditos hæc immanitas decuit in regem suum, quæ ne in barbaris quidem unquam & feris nationibus inventa est? Cur pugione aut veneno aut laqueo intra privatos aulae parietes hoc negotium non confecerunt? Ita multos olim Tyrannos à suis necatos Annales memorant. Turcæ sic suos hodie imperatores maculant. An veriti sunt homines pii nefando homicidio polluerè manus suas, & conscientiae suæ hunc cauterem inurere, si regem secreto strangulassent, vel alio modo sustulissent? An cita mors & gladio properata ab intersectoribus nocentiores parricidas fecisset, quam per judiciales moras tracta, quam theatriali spectaculo traducta, regemque velut nocentem exhibitura? Illa omnino ut minus ignominiosa regi fuisset, ita ipsis parricidis minus invidiosa. Si viro forti cujuscunque sit conditionis, morte ipsa genus mortis plerumque gravius videtur, quanto magis regi? Infamia  
quip-

quippe ad mortem addita duplex supplicium est patienti, & in majoris cessura crudelitatis titulum necis auctoribus. Sed video quid moverit viros justos & sanctos, ac violentiæ omnis inimicos. Cum rege quem pro bono publico trucidandum judicabant, jure agere maluerunt, quam vim adhibere in eo vita exturbando. An vero ulla vis violentior & injustior quam quæ justitiæ nomine & colore prætextitur? Quid si latrones viatorem exceptum infidiis gladio occidere statim nollent, sed ex suo numero lectis judicibus cum eo lege agerent, & pro crimine objicerent, quod avaritia laboraret, quod non satis pecuniæ domo sua egrediens secum sumpsisset, quod ipsos declinare atque evitare conatus esset, quod non bona fide nec statim quo loco pecuniam suam abstrusam in vestimentis reposuerat, indicasset? Quis non ad ludibrium & contumeliam institutum tale judicium latronum existimaret? An alia potest recipi interpretatio illius nefandi judicii, quo sicarii & scelerati, per ludum jocumque regem suum folio vitæque depulerunt? Animo fixum immotumque illis federat regem necare. Ita latrones de viatoris vita auferenda apud se statuunt. Sciebant car-

nifices

nifices regis, non eum responsum esse  
se coram iudicibus delegatis causam dice-  
re cogeretur. Norunt utique & viarum  
inseffores, mercatorem deprehensum per  
ludibrium à se quasi lege interrogatum  
nihil repositurum. Videt hic de sua vita  
jam illos statuiffe, hoc vero agere, ut jo-  
cantes insuper & contumeliam adjun-  
gant sceleri suo. Vidit & rex necem suam  
decretam esse parricidis, quidquid pro se  
allegaturus esset. Hoc unum illis curæ  
esset ut non simplici fato occumbat, sed ut  
infami & ignominioso interitu nocentis  
more pœnas luat. Ita se pro innocentibus  
esse habendos arbitrati, si specie legis &  
iudicii infontem animam è corpore regio  
expellerent. Mitto contumelias quæ sup-  
plicium præcesserunt. Sint illæ pro coro-  
na spinea, pro sputis, pro verberibus, pro  
cæteris ludibriis quibus in crucem iturus  
per militum insolentiam obnoxius fuit  
Rex regum. Quid de illis dicemus qui ca-  
daveri Regis illuserunt? Christi corpus,  
quamvis quasi pro merita noxia servili  
crucis supplicio affecti, & inter duos la-  
trones cruciarios positi, statim redditum  
fuit ad sepulturam. Quotidie videmus,  
noxios qui loci paulo sunt honestioris, ani-  
ma per carnificem extorta, continuo tra-  
di pro-

di propinquis sepulcro majorum reponendos. Regis exanime corpus diu jacuit omnibus expositum ad videndum. Sed quo modo? An gratis ac sine mercede vivere cupientibus licuit? Immo pretium statutum sine quo non liceret ad inspicendum accedere. Primo quatuor solidis taxata spectandi licentia, postremo vel uno dato admissi sunt qui oculos satiant, qui sanguine ejus vel sanie potius imbuta sudaria domum referrent. Utrum ad ludibrium an ad memoriam rei? ludibriosam utique, nisi hoc fecerint ut in martyribus suis olim factitavit antiquitas, quorum sanguinem servabat ut miraculis serviret. Ecquis vero hoc nomine sacculis colendo cultoque dignior in ista temporum præsertim extremitate, quam rex pius & religiosus ab impiis & perfidis civibus contra jus ac fas crudeliter & ignominiose mactatus? Quapropter eos vel stupore planè oppressos fuisse oportet, vel amentia occæcatos, qui in hoc nefario facto perpetrando non execrandos se populo Magnæ Britanniae, non detestabiles, non Deum sibi, non omnes homines & esse & futuros inimicos præviderint, regem autem ipsum quem sic inmaniter trucidarunt, gloria apud posteros fruitu-  
rum



rum sempiterna & pro martyre in famam  
iturum. Nam five *πὲρ ἰερουσαλὴμ* facti, five  
*πὲρ ὧν ἰερουσαλὴμ* substantiam & circumstan-  
tias inspiciamus, Deum in eo offensum  
videbimus, religionem violatam, rempu-  
blicam læsam, Ecclesiam turbatam, jura  
omnia legesque subversas. Primum, ima-  
ginem ipsius Dei in rege destruxerunt.  
Deinde, quia ab eo potestates omnes, &  
quia per eum reges regnant, Dei volun-  
tati hoc modo se opposuerunt qui à sum-  
mo numine sibi datum regem abjece-  
runt. Religio Christiana quæ præcipit po-  
testatibus summis obediendum esse, &  
regem honorandum, eumque etiam si  
molestus sit ac dyscolus dominus feren-  
dum, contemptui ab his habita est & te-  
merata, cum contra ejus præscriptum  
iam impie venerunt. Præterea sublato re-  
ligionis protectore, qui puritatem ejus in  
regno suo custodiendam curabat, collu-  
viem omnium sectarum introduxerunt,  
quibus & licentiam & impunitatem dant  
libere sacrilegos suos cœtus tenendi, & ad  
magistratum etiam aspirandi. Quantum  
per eos detrimentum passa sit respublica,  
tot annorum bella quibus concutitur ac  
vexatur, & præter mala quæ jam inde in-  
finita experta est, illæ etiam sine dubio,  
quas

quas futuras jam jamque impendentes ominari licet, calamitates indicant. Postremo non poterant gravius rempublicam lædere quam legitimum ejus dominum ac principem tam nefarie ac parricidaliter tollendo. Ecclesia vero in quantum discrimen per eos adducta sit, apparet ex multitudine hæreseon quibus distrahitur, ex turbis quas inde perpetitur, & ex eo quod improbantes & abominantes eorum facinus pastores cum summa injustitia persequuntur. Leges omnes ab illis subversas fuisse, & eas quidem quibus tanquam fundamentis nitebatur tam respublica quam ecclesia quis nescit, nisi qui ignorat, nihil eos hæcenus fecisse vel arma contra regem capiendo, vel eum in carcerando, vel accusando, vel judicando & condemnando, quod aliquam juris formam habeat, quodque legi civili, ecclesiasticæ, divinæ consentaneum sit? Leges ipsas regni pedibus penitus conculcasse eo facto apparet, quod cum fuerit supra mille abhinc annos retro hæreditarium, rege occiso nullam habuerunt rationem legitimi ejus successoris & hæredis. Nam quid illi obesse potuit crimen patris, si crimen illud fuit? Cur eum regno paterno & avito fraudarunt? Quid in illos com-  
misit

misit quo hanc pœnam visus sit commiseruisse ut eodem quo pater fulmine concideret? patrimonio & omnibus fortunis excideret, non tantum solio? An quia favit patri? An quia eum vivere etiam voluit? Hoc enim scilicet scelus fuit sceleratorum hominum interpretatione, quod nisi fecisset, inexpiabile in se facinus admisisse bonis omnibus visus esset. Sed esto, filius qui omnia fecit ne pater infami supplicio afficeretur, in eodem cum patre reatu & ruina debuit involvi? Quid iste minimus natu filius qui apud hos barbaros & Molossicæ feritatis homines educatus & servatus est usque ad mortem patris, an & hunc crimen patris luere innocentem oportuit? Concedamus hoc & illis. Ex malo fortasse seminio natum sibi impedire noluerint. Quid Regina Bohemiæ peccavit? Quam in re & quo facto sibi ipsa impedimento fuit ne ad successionem coronæ suo loco vocaretur, exclusis illis quos factionis fanaticæ improbitas censuit non admittendos? Nulla unquam tam barbaragens & tam fera extitit, nulli adeo perditum unquam ulla in gente repertum sunt quibus vel in mentem inciderit tam injustum & immane facinus audere. Janissarii qui Turcæ sunt, solo nomine fideles, re ipsa

re ipsa infideles, ubi imperatorem suum strangularunt, vel alio quo violento fato occumbere coëgerunt, filium protinus, si filium habet, solio imponunt, si non sit, aliquem ex ejusdem cognatione, ex Ottomanorum scilicet stirpe, regnaturum substituunt. Romani exercitus quibus tralatitium fuit tumultuario judicio principes solio imponere & deponere, quia tunc non fuit imperium hæreditarium, alium statim quærebant quem in locum dejecti reponerent. Mutandi status cogitationem nullum unquam inducunt. Quod cum isti Cacodæmones facere aggressi sunt, quis illis hoc juris dedit? Quo titulo hanc potestatem sumpsere? Sanguinis civium quam talis mutatio allatura est, & jam attulit effusionis, quis reus erit præter illos? Atqui hoc maximum criminum fuit quod regi impegerunt. Omnis mutatio in republica tametsi in melius fiat, tamen hoc ipso mala est, quod sine multis magnisque reipublicæ cladibus ulla in ea conversio fieri non potest. Sed nec possunt dicere quis melior sit civitatis status, cum de eo ab antiquis disputatum sit & nunc dispute-tur, nec dum satis constet quorum verior habeatur sententia. Illud sane comper-tum

tum est, optimum eum statum regendæ reipublicæ videri quem longus usus probavit. Cognita & usitata mala expertis sæpe minora sunt quam nova & incomperta, quibusque nondum assuevimus. Si mutanda est forma gubernationis à longo tempore receptæ, saltem cum bono modo moreque fiat, omnium nempe quorum interest uno consensu & una voce, citra necem ac damnum præcipue eorum ad quos ab antiquo regiminis cura pertinuit. Si optimates regant, necessario consentire debent in mutationem status quæ à populo expetitur, sive regius placeat sive popularis. Exemplo sit quod sequendum in eare videtur, factum Regis Lacedæmonii qui diminutionem suæ potestatis Ephorum creatione assensu suo comprobavit, minorem eam hoc pacto futuram se pati dictitans, dum haberet diuturniorem. Quid simile à nequissimis parricidis de quibus agimus factitatum? Tria Regna Britanniae magnæ sub unius imperio fuere. Duo in totum abhorrerunt à regis abdicatione ac trucidatione nefaria. Tertium ne quidem totum in illud facinus detestandum consensit. Quin immo ne pars quidem ejus nisi minima. Ne illa quidem quæ majori jure id potuit, cujus.

cujusque adeo consensus ut ad hanc rem omnino necessarius requiri & exigi debuit. Duæ in eo regno legitimæ fuere potestates; major altera, altera minor. Regia illa, ista Senatus, sive, ut vocatur, Parlamenti. Rex supra Senatum, non Senatus supra Regem. Secundum Regem tamen maximam ejus fuisse liquet auctoritatem. An Rex accusari vel judicari tanquam reus potuit, si Senatus auctor non esset? Senatus iste in duas domos divisus fuit, in superiorem quæ optimatum erat, & inferiorem quam ex plebe deputati componunt. Istæ duæ domus cum efficiant supremum illum regni consensum, utraque consentire debuit, tam in destitutionem & condemnationem regis, quam in mutationem status. Præcipua de duabus ac prima, quæ constat ex proceribus, assensum suum tantum abest ut commodarit huic facinori, ut horrorem tam atrocis sceleris non dissimulaverit. Inferior quando assentiri cœpit, aut quomodo? Postquam major pars nimirum recte sentientium inde vi proturbata est, aliis in vincula conjectis, aliis ingressu Senatus prohibitis. Quos in eo remanere permiserunt, vel fautores factionis in regem exutere, vel etiam præcipui hujus auctores.

Isti

Isti sunt qui regem judicarunt, qui condemnarunt inauditum, qui securi percusserunt, qui regimen regni antiquum ab uno temperari solitum in alium qui à pluribus tyrannis teneatur mutare præsumpserunt, contra jus, contra fas, contra leges Regni, contra sacramenti sui fidem, contra solennem conventionis pactio-  
nem quæ inter duo regna inita fuerat, in qua & expresse cautum fuit de Regis Majestate comiter ab omnibus conservanda, deque persona ejus protegenda. Quis hoc fœdus violavit? quis fidem Senatui datam fregit? quis fidelitatem regi promissam non præstitit? Isti ipsi qui contra Senatum arma sua converterunt, qui cum stipendiarii essent Senatus, leges illi dederunt, qui regem quem in potestate Senatus habebat, ut in sua esset, arte & dolo effecerunt, qui alteram & præcipuam Senatus domum extinxerunt, qui alteram debilitarunt saniore & meliore sui parte mutilatam, qui regem ad causæ dictionem adegerunt, qui causa indicta condemnarunt, qui & morte infami affecerunt, qui status mutationem sine assensu populi, solo ducum & militum arbitrato, id est suo, decreverunt. Quid tyrannis est, si hæc non est, & quidem omnium tyrannidum quæ  
un-

unquam fuere aut post erunt teterrima ac  
dirissima? Eam vero Regis necem quis  
negaverit ad infamiam sæculi pertinere,  
nec sæculi tantum sed & nationis, neq̃  
nationis modo sed & religionis? Sæculum  
certè nostrum hanc notam ex eo sibi inu-  
stam nunquam eluet, quod homines tulerit,  
quibus crudelitate & immanitate pa-  
res nulla retro sæcula tulerunt. Natio ipsa  
Anglicana quæ talia monstra produxit,  
maculam hanc sibi eo nomine impri-  
mendam nunquam deleverit. De religio-  
ne quid dicam? Parum esset de infamia in-  
de in sæculum & nationem redundatura,  
nisi plagam penè mortiferam & insanabi-  
lem eo facto acciperet religio Reforma-  
ta. Sed bene est quod se nostros dicere non  
possunt, quamvis de nobis exierint. Quis  
pro Reformatis hos velit habere, qui vita  
& religione adeo deformes sunt, adeo ne-  
fandi, adeo scelerati, immo etiam adeo  
prophani? Hodie inter Christianos Refor-  
mati hoc esse deberent, quod olim inter  
paganos Christiani. Pagani quo tempore  
cum maxime principibus suis superstitionis  
licet ejusdem cultoribus manus im-  
pias & violentas inferebant, Christiani pro  
iis preces ad Deum fundebant, pro salute  
eorum, pro vita, pro mora finis, hoc est  
ne



ne dissolveretur imperium. An pro bonis & benignis imperatoribus hoc faciebant? Immo pro talibus qui publici hostes appellari à Senatu suo, id est pagano, merebantur, qui à subjectis suis facta conspiratione quotidie attentabantur, qui Christianam persequiebantur religionem, qui omnibus suppliciis in eam sæviebant, ferro, flamma, fame, laqueo, tormentis, exilio, relegatione, omnium munerum & honorum privatione ac bonorum spoliatione. Isti verò Anglicani *Independentes*, qui Reformationis ipsius facere se dicunt reformationem, quique curva in religione se corrigere postulant, ipsis Paganis hac in re longe deteriores & scelestiores inveniuntur. Siquidem isti bonos principes in oculis ferebant, fovebant, colebant, adorabant. At quinam illi erant quos ferre non poterant, quos depellere gubernaculis reipublicæ gestiebant? Non solum reipublicæ hostes, sed generis humani pestes, aliquos Nerones, Caligulas, Vitellios, Domitianos, Heliogabalos. Talibus non regibus sed tyrannis iusta arma inferri posse, sine scelere eos interfici posse credebant. Christiani contra qui tunc temporis vixere sub eorum imperio nati, in alia omnino sententia erant.

C

Nam

Nam cum durius ab iisdem quam pagani tractarentur, cum quotidie ad leonem, ad gladium, ad metallum religionis causa damnarentur, paganis nihil tale metuentibus, non tamen eundem animum nec æque infensum imperatoribus suis atque illi gerebant, sed mitem, placidum, benignum, patientem, mori per mille cruciatus præoptantem, quam mortem inferre persecutoribus suis, quam pacem publicam turbare, quam vel impiis votis necem illorum & perniciem à Deo poscere. At vero isti qui reformatæ religionis reformatores videri volunt, longissimo intervallo ipsis paganis immitiores & infensiores regibus sese ostendunt, tantum abest ut ad Christianorum veterum pietatem & patientiam accedant. Illi nec malos principes oderant: Hi vel bonos occidunt. Pagani solis tyrannis ac decreto Senatus publicis hostibus pronuntiatis sese opponebant, eorumque imperium abnuebant: Hi pro tyrannis mactant quos ipsi nulla ratione, nullo jure tales judicant. Christiani antiqui paganis imperatoribus libenter & æquo animo parebant: Hi nec Christianos principes pati possunt, cum tamen inter Christianos pro Reformatis, id est, pro purissimis & san-

sanctissimis Christianis se haberi postulent. Immo cum & se nomine *Catharorum* ideo nosci velint. Inimicos odio habere Christus vetuit, his bene velle suos voluit. Isti quid facerent extraneis regibus & inimicis, qui suum tam libenter tam cupide accusarunt, damnarunt, necarunt, nihil tale meritum, bene de se quinimmo modis omnibus meritum? Xystus in sententiis dicit, *fidelem hominem, electum esse hominem; electum autem hominem, hominem Dei esse; hominem Dei esse, qui Deo dignus est; Deo dignum esse qui Deo dignum agit*. An Deo dignum agunt, qui infideles ipsos, paganos, idololatrias, nullam veri Dei notitiam habentes, superant feritate, crudelitate, immanitate, nequitia, perfidia, impietate, & omnis generis improbitate, qui tamen populum se Dei electum dicunt, & fidelium delibatum florem? Quid nunc respondebimus Jesuitis? Quo ore, qua fronte nos Reformati ipsis imputabimus quod habeant doctrinam regibus infensam, in regum necem armatam, & populos ad rebellionem incitantem? Qua sunt malitia præditi & qua calumniandi cupiditate ardent, non sibi extorqueri sinent, quin hæc doctrina propria sit Reformato-

torum , quam & tam belle in usum norint convertere, quia pro Reformatis , & Catharis, & Sanctis se jactant qui tam infandum scelus nuper commiserunt. Tros Rutulusve fuit, nullo habebunt discrimine. Omnes qui se Reformatos dicunt pro Independentibus habebunt & *avaritias* vitio laborantibus. Hæc nux pinea pro pomo illis erit si in Reformatos jacienda sit. Faterer quoque si hæc esset omnium Reformatorum opinio; nos etiam in nostra Reformatione Jesuitas habere, immo plusquam Jesuitas , & ipsis Jesuitis longe peiores. Hoc illi saltem docent, non alium regem esse amovendum nisi qui tyrannus judicatus fuerit. Tyrannus autem an habeatur qui pro tali abjiciendus est, ad judicium sapientium & doctorum referre se profitentur. Isti vero qui? An sapientia clari, doctrina celebres, virtute nobiles, nobilitate illustres? Immo fanatici, indocti, obscuri, improbi, fæx plebis, armis tantum noti & ad vim faciendam apti. Hi sunt qui de rege judicaverunt, qui justum injuste damnaverunt, pium impie trucidarunt. Jesuitæ regem solum tyrannice imperantem amoliri student, regnum relinquunt. Isti omnibus Jesuitis sceleratiores & violentiores, omnes  
omni-

omnino reges cum regnis suis exterminandos pronuntiant. Regem quantumlibet bonum, pium, justum, inutilem esse, odiosum, molestum & importunum reipublicæ, scriptis suis prædicant, & re ipsa sicut docent agunt, dicta factis probant. Ut suum ipsi nefario scelere à se peremptum, ita perire debuisse pro bono publico palam contestantur, idem etiam de aliis omnibus Europæ regibus fieri debere proclamant. Eodem loco & numero omnes habent cum Turciæ tyranno. Gallia, Hispaniæ, Moschoviæ, Poloniæ aliosque reges Tyrannos esse, jure expelli throno & vita posse, immo oportere, ab his qui salvas velint eorum regnorum respubl. Qui sic bellicum canunt excitandis & incendendis populorum adversus principes suos legitimos seditionibus, quid mereri videntur? Nonne ut omnium simul Europæ principum consentientium & in unum convenientium armis opprimantur & extinguantur, poenasque luant talis impietatis, cui nulla possunt digna supplicia pro meritis irrogari? Nam quot scelera in uno scelere commiserunt? Ut magnum discrimen quod vitæ impendat vitari sæpe non potest aut vinci sine multis minoribus periculis, ita magnum sce-

lus quale ab his monstrosis admissum est, non potuit sine infinitis aliis flagitiis perpetrari. Cum uno parricidio junxerunt juris divini, naturalis, juris gentium, omnium legum publicarum privatarumque everisionem, reipublicæ perturbationem, libertatis populi oppressionem, Senatus abolitionem, nobilitatis exterminationem, innocentium damnationem, peculatum & ærarii publici direptionem, sollemnis conventionis infractionem, perfidiam, jurisjurandi violationem, statuum omnium confusionem, immo subversionem. Nam regalem statum regis cæde sustulerunt, & stirpis regiæ à successionis jure ac spe remotione; Optimatum, regni procures ex Senatu ejiciendo, cujus digniorem, potiore priorique partem constituebant. Popularis vero status genus penitus aboleverunt quadraginta tyrannorum Consilium eligendo cum summa potestate ad rempublicam administrandam, novum autem & inauditum sæculis prioribus statum instituendo qui *Militaris* debet appellari. Hanc enim *Episcoporum* præcis incognitam, vero nomine oportet nuncupari, quæ forma hodie in Anglia regiminis per hos inspiratos fanaticos introducta est; non *demagogica*, non

non ὀχλοκρατία, quamvis penes plebem absolutam potestatem residere verbo tantum tenus videantur statuuisse. Scelerati igitur cum tot rebus deprehendantur, totque criminibus nocentes, doctrina pestifera, facto nefario, exemplo pernicioso, quod illos fatum manet nisi ut omnes gentes, omnes ætates, improbos ac detestabiles eos deputent, iisque imputent quidquid turbarum ac tumultuum suo tempore & in suis rebus publicis fuscabitur? Et merito sane. Excusatius quippe in posterum peccabunt quicumque hujus facti præjudicium sequentur. Nam si qui sunt sequuturi, eis crimen istorum excusatio futura est, qua factum suum defendent. Quid excusationem dico? Ea est harum pestium doctrina ut etiam audeant affirmare se solos sapere & recte sentire, se solos esse puros & sanctos, se Deo voluntia facere præceptisque ejus consentanea, dum regum coronas pedibus conculcant, sceptrâ confringunt, thronos destruunt, paludamenta conscindunt. Peccare doctorem historiam, non solum in hujus ævi monumentis posteritas cum sua leget pernicië, sed etiam exitiosum hoc dogma imbibet nisi obviam prompte eatur. Nam vel propter hanc impiam do-



Strinam, non solum ex omnibus regnis  
ubicunque invenientur exturbandi sunt,  
sed omnia etiam regna conspirare debent  
ut ex eo regno quod intoleranda tyranni-  
de oppressum nunc occupant, ejiciantur.  
Enimvero de multis pravè factis hoc dici  
potest, quædam vitiosa esse ac minus  
emendata, quæ tamen non sunt scelerata.  
Hoc verò sceleratissimum esse, non unius  
aut alterius, aut plurium opinione, sed  
omnium omnino, quis neget? Magnum  
vero est argumentum & indubitatum, rem  
ita se habere ut creditur, cū omnes unani-  
miter idem de ea sentiunt, cum una voce,  
quod sentiunt, pronuntiant. Ubi dissiden-  
tes sunt sententiæ, tū scias nihil certi posse  
in alterutram partem definiri, tametsi plu-  
res in alteram discedant. Nam sæpe etiam  
ex turba idem asserentium, pessimi judi-  
cii conjectura capitur. Ubi vero nulla est  
dissensio, sed omnes unum idemque de  
re aliqua opinantur, audaciter veritas illa  
adstruenda est ut non dubia, quæ consensu  
unanimi universorum recipitur. Hic enim  
aut nusquam locum habet quod vulgo ja-  
ctatur, *Vocem populi, vocem esse Dei*. Heic  
vero plus est. Nam omnium principum,  
regum, gentium, vocem esse dici potest.  
An aliquis est cui videri aliter queat, nisi ex  
fa-



factione sit fanaticorum, quam, hoc planè detestandum esse & execrandum facinus, siue parricidium verius, quod in regia persona admissum est? præcipue cum gentiũ omnium hæc una vox sit, & in singulis gentibus omnium hominum, omnis conditionis, sexus, generis, ætatis, quæ modo rerum quæ aguntur intelligens esse videatur. Nonnulla sequius facta, si defendi non possunt, excusare tamen licet. Quedam si jure defendi non possunt, saltem ratione aliqua vel aliquo colore obvelantur. Hoc vero velim scire, quo jure vel qua ratione defendant, quo colore excusent? Nā crimina quæ in regem post necem ejus collegerunt infames impiæ causæ patroni, ejusmodi esse ostendemus, ut appareat eos regem non propter ulla crimina vera occidisse, sed ea conquistivisse quibus quasi jure condemnari posse videretur, immo id singulariter quæsisivisse ut regem propter regnum tollerent, non regnum propter regem. Hunc enim revera sustulerunt, regnum vero ipsi sub alio nomine usurpatum nunc tenent. Expositis his tot partibus tanti sceleris, ipsisque omnibus sceleratis, ad jus ipsum explicandum descendemus, ut sciamus de tam nefario ac parricidiali facto, an juris vel umbra dari possit, qua in-

fani ejus auctores illud excusare saltem queant.

## C H A P V T I L

**D**E facto quale sit vidimus. De jure nunc videamus, an ullum sit vel humanum vel divinum, quo id fieri licuerit, & quo tale factum defendi possit. Id ut melius liqueat, facti quæstionem in quinque partes dividemus. Nempe ut quæramus quis, per quos, qua auctoritate, quo crimine, quo judicio damnatus sit. Sic intelligemus, rectene an secus is de quo agitur accusatus, damnatus, capite truncatus fuerit. Primum igitur de primo. Quis condemnatus sit, apparet. Rex est. Qui regem dicit, eum intelligere velle palam est, cujus suprema est in regno potestas, nullique alii nisi Deo obnoxia, cuique adeo soli actuum suorum rationem reddere cogitur, præterea nemini. Cui quod libet licet. Qui legibus solutus est. Qui leges dat, non accipit, & proinde qui omnes judicat, à nemine judicatur. Hac sunt regiae potestatis jura & *privilegia*, quæ semper & apud omnes gentes quibus regius dominatus placuit, rata fuere.

fuere & fixa, & pro lege à qua recedere non liceret, observata. Cum igitur hæc omnibus gentibus de regum suorum plena & summa potestate opinio federit, à jure gentium vel potius naturali eam originem habere statuendum est. Sic Oriens totus olim judicavit, sic Occidens. In Septentrionis & Meridiei regionibus quæcunque regibus paruerunt, subditorum populorum non alia mens, non alius mos fuit. Assyrii, Medi, Persæ, Romani, Judæi, Græci, Pagani, Christiani ita senserunt. In Ecclesiaste habemus cap. viii. hæc verba Regis sapientia clari, quam à Deo infusam acceperat; *Ergo os regis observa, & præcepta juramenti Dei. Ne festines recedere à facie ejus, neque permanas ab opere malo, quia omne quod voluerit faciet, & sermo illius potestate plenus est, nec dicere ei quisquam potest, quare ita facis?* Cum Israëlita regem à Deo per Samuelem Prophetam petiere, eodem jure se ab eo gubernari & judicari velle dixerunt, quo omnes aliæ nationes, quæ hoc regimine uterentur. *Constitue, inquebant, supra nos regem ut judicet nos, sicut & universa habent nationes.* Adeundem itaque modum moremque regem, quem petebant, supra se regnare voluerunt,

runt, quo modo & cæteræ gentes Orientis à regibus suis eo tempore gubernabantur. Regnabant autem illi plane non obnoxie, id est summo jure, & potestate non circumscripta. Virgilius:

--- *Regem non sic Ægyptus & ingens  
Lydia, nec populi Parthorum & Medus  
Hydaspes.*

*Observant.* ---

Cum urgerent talem sibi dari Regem, Propheta, ne sibi non prædictum illi possea dicerent, & ne ignorantiam juris regum & moris in regnando prætenderent, monuit illos verbis Dei, viderent quid facerent, jusque illos regium, & ratio quæ esset imperandi, edocuit, in iis quæ sequuntur Samuelis I. cap. VIII. quæ clausulam istam in fine habent, *Vosque eritis ei servi.* Cum eos, inquam, monuisset de filiis & filiabus suis rapiendis ad ministeria regis quo eos deterreret à rege postulando, de agris, vineis, olivetis à se auferendis, de segetum & vinearum redditus & gregum addecimatione ab illo facienda, de bonis suis tradendis famulis & eunuchis regiis, post hæc tamen persistunt in sua petitione, & regem volunt, dicentes, *Rex erit super nos, & erimus nos quoque sicut omnes gentes, & judicabit nos rex noster.*

*ster.* Ergo iis conditionibus & eo jure regem habere non recusant, quo cæteræ gentes tunc haberent. Non deprecantur nec abominantur injustum regem, iniquum, violentum, raptorem, & quales esse solerent in aliis gentibus etiam qui pessimi forent. Hoc tamen jus esse regis, & in illis rapinis, injuriis, violentiis, contumeliis sæpius consistere, Propheta ipsis insinuaverat. Non de facto nudo, ut quibusdam placet, jus illud accipiendum, nisi factum & jus idem esse contendant, sed de eo quod fieri soleret à regibus impune, & cum jure aliquo dominatus regii proprio. Qui enim pro arbitrio suo quod vult facit, nec lege ulla tenetur ne faciat, nec pœnam timet si fecerit, id *sui juris* esse ut faciat, merito potest dicere. Hinc Latini *suo jure* ab aliquo id fieri dicunt, cujus potestatem is habet faciendi, nulla pœnæ formidine proposita. Nam ut ait Sallustius, *Impune quidvis facere, id est regem esse.* Rex cui quod libet licet, si quod libet etiam faciat quia licet, suo jure utitur. Quod in privatis quoque obtinet, cum *de jure suo* nihil remittunt, sed id rigide & nimis exacte persequuntur. Quo casu verum est quod vulgo dicitur, *Summum jus summam esse injuriam.* Id in regibus.

gibus maxime locum habet qui cum summo suo jure utuntur, ea faciunt in quibus Samuel dicit jus regis esse positum. Aliquando reges illius juris rigorem relaxant, cum legibus quas sanciant se teneri quoque ipsos æquum putant, cumque eas primi observant, ut sic libentius & promptius à populo servantur. Sane jus & justitia plurimum differunt. Aliquod jus etiam minus æquum est & injuriæ propius, justitia vero semper id quod æquum est ac rectum respicit. Inde est quod de Servio dixit Cicero in quadam Philippica, *justitia eum magis fuisse quam juris consultum*, & rationem addit, *quia malebat controversias tollere quam formulas juris componere, aut litium actiones instituere*. Et quod ea quæ à legibus & ab jure civili proficiscebantur, *semper ad utilitatem æquitatemque referebat*. Ita principes boni cum justitia imperant, qua omne quod recte atque ordine fit continetur, minus boni jure licentiæ quæ ipsis concessa est uti consueverunt. Hæc licentia dat *posse si velis*. Quod in servitute miserum esse, ait idem Cicero in octava Philippica, *etiamsi dominus non molestus sit*. Hoc etiam interest bonos inter & malos reges, quod, boni quod possunt, nolūt, mali vero volunt

volunt ut possunt. Ne privati quidem omnia quaecunque possunt & licita sunt velle debent, si ad normam honestatis mores suos vitamque exigant. Nam quicquid licet, non statim honestum est, & multa melius est non fecisse, quamvis factu facilia, atque etiam licita. Nihil turpius mendacio, mentiri tamen licet. Circumvenire alterum in contractu faciendo licet, id tamen honesto viro non convenit. Nihil ingrati animi vitio potest reperiri detestabilius. Atqui impune cuilibet ingrato esse licet, & vilis hodie annona talium. Perjurium abominandum est. Hujus poenam certam apud Deum repositam esse veteres statuerunt. Ergo impunitum apud homines manet, & quodammodo licitum. Non omnia quæ licent etiam expedire Paulus dixit. Ita ergo & regibus, pro amplissima & infinita qua præditum est jus regium potestate, cum possint si velint, magis tamen expedit illo suo summo jure non uti, & licentia quam habent non abuti. Sed posse illis datum est si velint, & quidem impune, quia quod libet illis licet. Sic jus regium apud Samuelem exponendum est, non de facto nudo. Nec illis tamen accedo qui censent de jure Majestatis intelligi debere, quod proprium.



prium sit ac legitimum omnium regnantium. Jus illud fuit licentiæ qua reges uti non decet, non oportet, cum tamen id possint impune usurpare. Nec eorum etiam sententia ulla ex parte mihi probanda est, qui existimant non regem tunc Judæis à Deo constitutum esse, sed tyrannum, ac pro pœna illis datum, ut ab irato numine & offenso. Hæc omnia facile refutari possunt, & mentem Scripturæ sacræ non videntur satis assequuti qui ita sentiunt. Israëlita, pertæsi regiminis, quod sub filiis Samuelis qui Judices eorum erant, diu experti fuerant, quia non recte administrabant judicia, regem expetiverunt, non vero tyrannum. Nec fuit causa cur Deus regem petentibus tyrannum daret, & præcipue per Prophetam Deo dilectum preces suas ipsi Deo allegantibus, & cum non sine causa judicum tunc gubernantium administratio molesta ipsis esset & importuna, vixquæ ferenda. Postremo qui primus ad petitionem eorum tunc datus illis est, non fuit tyrannus nec pro tyranno illis datus, sed rex non de pessimis unus. Quinimmo de eo dicitur capite proxime sequenti apud Samuelem, quod bonus & electus sit, quinimo *nec fuisse in filiis Israël quemquam meliorem*



liorem illo. David qui illi successit, etiam optimus rex fuit, Salomon ejus filius sapientissimus omnium regum. In successionem regum Judæ multi bonitate præcëlentes extitere ac Deo chari. Denique de rege Israëlitis constituendo jam antea prædixerat Moses Deuteronomii xvi. legesque ei ac præcepta bene imperandi per anticipationem dederat. Cum ingressus, inquit, fueris terram quam Dominus Deus dabit tibi, & possederis eam, habitaverisque in illa, & dixeris, constituam super me regem sicut habent omnes per circuitum nationes, eum constitues quem dominus Deus tuus elegerit de numero fratrum tuorum. Per spiritum Prophetiæ Moses de eo rege jam præviderat, quem Israëlitæ à Deo sibi constitui petaturi erant sub Samuele & per illum. Quæ verba Mosis satis clare significant, nec pro pœna impositum Israëlitis à Deo iratore. gem, nec primum qui datus est tyrannum fuisse, sed legitimum, quamvis similem dari sibi illum deprecantur eorum quos vicini populi reges habebant. Quibus conditionibus regem aliquando accepturi essent, & quo more ille qui electus foret regnaturus esset, præscripsit jam tum ibi Moses longo tempore antequam ad hoc deye-

devenissent , & priusquam terram sibi à Deo promissam ingressi essent. Primum præcepit ut eum de numero fratrum suorum eligerent. Idque à Saule primo rege servatum constat usque ad Herodem magnum , qui alienigena fuit. Denique ne exercitu peditum equitumque collecto eos in Ægyptum reduceret. Quod & factum. Postremo leges dat illi regi quandoque ab ipsis eligendo, secundum quas imperare deberet. Illæ quidem diversæ sunt ab illo jure regis quod Samuel eis proposuit. In Deuteronomio mandat Moses ne rex eorum futurus plurimas uxores habeat, ne auri & argenti immensam vim possideat, ut Deum timeat, legem meditetur noctes ac dies, eamque servet & servandam omnibus curet, ne superbe se efferat supra fratres suos, ne deflectat ad dextram vel sinistram. Cum de eodem rege intelligenda sunt quæ hic habentur de rege Judæis aliquando constituendo, & de eo quem constitui sibi petierunt cap. VIII. Samuelis, eoque plane legitimo futuro, non tyranno, nec usurpatore, nec invasore, quomodo hæc conciliabuntur? Isrælitæ non unum regem aut unicum à Deo petierunt, sed pro judicum regimine quod hætenus obtinue-

rat

rat apud ipsos, ut regius dominatus in posterum institueretur in Judæa postularunt. Ut eos averteret à tali cogitatione & petitione, Propheta proponit eis incommoda quæ ipsis imminerent ex regia dominatione. *Ius Regum* ibi vocat, ut diximus, licentiam quæ concessa esset quasi legitima, regio more imperantibus. In longa serie regum qui apud eos essent dominaturi multos fore qui illo jure regio & illa licentia quod libet faciendi uterentur, tametsi & bonos aliquos essent habituri qui secundum præcepta divina regnarent & legem custodirent. Certum omnino est, excessum, sive *παρέκβασις* à justa & clemente dominandi ratione ibi designari à Samuele, in asperiores & duriores, sed quæ tamen licita esset ac concessa, & proinde legitima. Ideo *jus regum* appellat, Græci *δικαίωμα* verterunt. Quo nomine in hoc sensu intelligitur justa causa vel ratio aliquid agendi aut dicendi, quæ versatur in licitis, quam Græci *δίκην ἀφορμὴν* interpretantur. Hebræi hoc loco *דבר* appellant, eaque voce *דבר* *היה*. Nam hanc vocem Hebraicam Græca, *ὡς καὶ ἦν*, Septuaginta interdum verterunt. Nempe quod ad officium aliqujus pertinet. Quamvis autem *דבר* *היה*, quod.

quod decet & oportet fieri, distet ab eo quod licet, id est *וְיִצְטָק*, sæpe tamen, minimo inter utrumque discriminis limite, alterum pro altero sumitur, quia quod licitum est cum aliquo juris colore, id etiam fieri solet. In hanc sententiam recte omnino de R. Jose in Gemara Sanhedrin scriptum est, ita illum sensisse. *Quidquid dicitur in capite de rege, eum regum jus habere.* Quod caput de rege, de octavo primi Samuelis accipi debet, non de xvii. Deuteronomii, ut viri docti ibi existimant. De eodem capite Samuelis R. Judas dicebat, pertinere illud tantum ad terrorem populo injiciendum. Utraque sententia potest stare. Aliud est quippe jus quo rex debet facere quod se decet, aliud quo potest facere quod vult. In priorē iusta & clemens dominatio versatur, in posteriore jus merum & summum situm est faciendi quod libet, idque sæpe injustitiæ & injuriæ proximum deprehenditur. Ideo cum Samuel Israëlitæ vellet deterrere à rege deligendo, & statu qui obtinuerat mutando, quid juris rex haberet, ipsis ostendit, si quando potestate sua abuti in animum induceret. Ita *jus vita & necis* dicebatur quod habuere olim parentes in filios, domini in servos, jusque nihilomi-

nus dicebatur etiam si iniuste ab his interdum exerceretur. Illa autem ut licita, ita legitima videtur agendi ratio, cui impunitas adjuncta est. Quod vero impunitum agenti cedit, de eo ut pœnam non formidet, ita nec accusationem nec iudicium nec condemnationem. Horum itaque trium semper immunis habita est regia dominatio, cui posse datum est quod velit, & cui licet quod libet, cum impunitate nimirum, & citra pœnæ aut iudicii metum quodcumque fecerit. Ideo Samuel eodem loco dicit, adversus talia facientem regem quem elegerint, & jure suo utentem, imploraturos Dei auxilium, cessante omni alia ope humana ad quam recurrere possint, iudiciorum nempe & legum, quibus experiantur cum rege suo supra leges posito, & supra se. Ita enim cum regē peterent dixere, *Rex erit supra nos, & nos erimus quoque sicut omnes gentes.* Nec aliter sane existimari potest quam supra leges esse eum qui nec accusari jure potest, nec judicari, cum ex legibus quæstiones & actiones, accusationes ac iudicia constituta sint. Præter illa quæ in primo Regum de Samuele & regis apud Israëlitas primi constitutione leguntur, Judæi quoque in Talmude confirmant, regem  
suum

suum non judicari, nec cuiquam in eum  
 licere testimonium dicere. Ex quibus  
 planum est nec accusari potuisse. Sic enim  
 in Codice Sanhedrin cap. II. *Rex neque ju-  
 dicat, neque judicatur. Non dicit testimo-  
 nium, nec in ipsum dicitur.* Contra de  
 pontifice ibidem habetur, *Sacerdotem  
 magnum judicare & judicari, testimo-  
 nium in alios dicere & in ipsum dici.* Sed  
 quod de rege ibi scriptum est *non judicare,*  
 id oportet obtinuisse in iis regibus qui  
 post captivitatem regnarunt. Nam aliter  
 fuisse in primis illis qui à Saule fuerunt usq;  
 ad ultimum Joachimum qui Babylonem  
 captivus cum populo abductus est, pror-  
 sus videtur. Certe cum Israëlita regem  
 sibi constitui à Deo petierunt in locum  
 Iudicum, à quibus ante judicia exerceban-  
 tur, resque publica curabatur, judicasse  
 itidem eos oportet ut iudices faciebant.  
 Diserte quippe populus Regum I. cap.  
 VIII. regem rogat sibi dari à quo iudice-  
 tur: *Da nobis regem ut iudicet nos.* Et pau-  
 lo post: *Rex enim erit supra nos, & erimus  
 nos quoque sicut omnes gentes, & iudicabit  
 nos rex noster.* Dictum est de Davide Sa-  
 muelis II. cap. VIII. *Et regnavit David  
 super omnem Israël. Faciebat quoque Da-  
 vid iudicium & iustitiam omni populo suo.*  
 Certum

Certum quidem est, Maimonidem hanc  
ponere inter reges Israëlis & reges Ju-  
dæorum ex Davidis posteris differentiam,  
quod reges familiæ Davidis judicarent, &  
judicarentur, testimoniū adversus eos di-  
cerent alii, ipsiq; in alios dicerent: Reges  
autem Israëlis judicandi potestatem non  
habuisse nec etiam judicari potuisse. Quæ  
in primis regibus omnino locum videntur  
non habuisse, quibus plena & absoluta po-  
testas supra populum & supra leges fuit,  
cum in judicando, tum in aliis rebus re-  
gio jure administrandis, ut ex primo Sa-  
muelis constat. Ibi enim plane habetur  
scriptum; *Et vos eritis ei servi.* Item Pa-  
ralipomenon cap. xxi. Joab Davidi dicit,  
*Nonne Domine, mi Rex, omnes servi  
tui sunt? quare hoc querit Dominus meus  
quod in peccatum reputetur Israëli?* Præ-  
terea regem sibi imponi rogaverunt ad  
instar eorum regum quos cæteræ gentes  
in vicinia haberent, quos omnes constat  
summa præditos fuisse in regno admini-  
strando potestate. Post migrationem è  
Babylone per Pontifices, qui duces &  
principes populi erant, gubernati sunt, us-  
que ad Aristobulum Jonathæ filium, qui  
Rex pariter & Pontifex fuit, primusque  
apud Judæos diadematis sumpsit insigne,  
*πῶς*



πρὸ δρχλὺ ut ait Josephus εἰς βασιλείαν  
 μεταθεῖναι δόξας. Sub illo & sequentibus re-  
 gibus usque ad Herodem Magnum, quo  
 regnante natus est Christus, plurimum  
 potuit Synedrium: nec sine ejus consilio  
 & consensu quicquam regi majoris quod  
 esset momenti agere licuit. Et de his pla-  
 ne regibus verum est quod dixit Josephus  
 lib. iv. Antiquitatum, ubi jura regis com-  
 memorat, sicut habentur Deuteronomii  
 xvii. Πραττέτω δὲ μηδὲν δίχως τῆς δρχιερείας.  
 καὶ τῶν γερεσιασῶν γνώμης. *Nihil prater*  
*Pontificis & seniorum sententiam faciat.*  
 Quod de regibus qui paulo ante Josephi  
 tempora imperarunt, fortasse dici debet,  
 ab Aristobuli regno, non de primis illis  
 qui ante captivitatem fuere. Sed nec ver-  
 ba illa quæ ex Josepho citavimus, in illo  
 Deuteronomii loco leguntur, quo regi-  
 bus Israëlis Moses leges dat secundum  
 quas eos regnare oporteret. Nihil inquam  
 ibi extat, quod nihil agere debeant sine  
 consensu & consilio Pontificis & Synedrii.  
 Josephus ad suæ ætatis reges respiciebat  
 cum illa scriberet. Qui tamen & Syne-  
 drio majorem habuere potestatem. Nam  
 & ipsos Pontifices maximos pro libitu  
 creabant & deiciebant. Ex tota autem  
 priorum regum historia satis compertum  
 est



est, pleraque eos egisse non consultis Synedrii senioribus nec Pontifice, cum & multa contra legem Dei statuerint & fecerint, præcipue circa idolorum cultum. Ob quem tamen, cum crimen esset omnium gravissimum, nec accusatos unquam nec judicatos à Synedrio constat. Illud vero quod ait Maimonides de regibus ex familia Davidis qui judicabant & judicabantur, ne de illis etiam id intelligendum qui post Aristobulum regnarunt, multo minus de illis quos diximus, quorum primus fuit Saul, ultimus Joachimus. In Gemaræ tractatu de Synedrio cap. II. hæc Talmudis traditio quod *rex nec judicat nec judicatur*, non pertinere dicitur nisi ad regem Israël. Nam, inquit, *qui ex familia Davidis sunt judicant & judicantur*. Qui sunt illi reges Israël? Nempe qui in terra Israël, hoc est in Judæa regnarunt, non primi illi quos diximus à Saule usque ad Joachimum imperasse, sed hi qui post Aristobulum usque ad Herodem imperium nomine regio tenuerunt. Quod ex illo capite Gemaræ clarum est. Nam ibi narratur qua ex causa factum sit hoc decretum de rege, quod *nec judicaret nec judicaretur*. Servus Jannæi regis, is est qui Alexander cognominabatur, ho-

D

miciidii

miciidii reus erat. Cum iudicium de eacæde habere vellent seniores, Jannæo regi significarunt, servum ejus hominem occidisse. Mittit illum rex ad eos ut de eo homicidio cognoscerent. Cum mandarent denuo ut se sisteret ipsum, testimoniumque acciperet, nam de domino legem dicere, *Veniet possessor bovis, & consistat juxta bovem*, venit ille & assedit in consilio. Tum Simeon filius Scharahi ad illum respiciens, dixit debere illum surgere in pedes cum testimonium in eum diceretur, scriptum quippe esse, *Stabunt duo isti viri quorum lis est*. Ibi rex Iannæus respondit, non ex jussu tuo id faciam, sed si id statuerint collegæ tui. Atq; hi cū defixis in terram oculis quasi cogitabundi manerent, reperti sunt paulo post solo afflictæ & exanimati à Gabriele. Inde ajunt factū esse decretum, ut rex nec judicaret nec judicaretur. Sed hæ nugæ sunt & fabulæ Rabbinicæ. Jannæus iste successit Aristobulo qui primus diadema sumpsit & regem se fecit, cum prædecessores ejus omnes principes & duces populi tantum essent iidemque Pontifices, regio vero nomine abstinerent ac jure. Judicabant quippe & judicabantur, & maxima tum potestas & administrandi ratio penes Synedrium erat.

Ari-

Aristobulus primus hunc statum in regiū commutavit, sumpto regni insigni. Ut vero omnia sunt initia, non satis perfecta nec absoluta, nondum jus regium habuit cum regis insigne gestaret. Successor ejus ulterius progressus est. Nam vocatus in jus à Senioribus confessus parere noluit. Ab eo firmatum id jus, & sequentibus traditum. Sed quia supremam non habebant potestatem, jus non reddebant, hoc ex regali jure retinentes tantum ut non possent judicari. Nec exemplum ullius in his posterioribus Judææ & Israël regibus afferri potest qui judicium capitis subierit aut in jus vocatus sit ex ulla criminis causa. Nam quod de Herode asserunt Hildebrandinæ & Enthusiasticæ doctrinæ auctores, nihilo eos juvat, quia rex non erat sed præfectus Galilææ, cum ad Synedrium citatus est vivente adhuc patre rege, ut ex Iosepho clarum est. Et parum prudenter urget hanc historiam Sichardus ut probet Synedrium etiam judicasse de regibus. Quod falsissimum est nec probari potest. Reges è posteris Davidis judiciū in se accipiebant & in alios exercebant. Quinam illi fuere? Nempe duces captivitatis qui Babylone agebant, Αἰχμωλωτάρχαι Græcè dicti. Hi ad Davidem genus suum

per mares referebant. De his habetur in Gemara Talmudica cap. i. de Synedrio, traditionem qua fertur *non recessurum sceptrum à Iuda*, ad eos pertinere, nam eos esse Æchmalotarchas Babylonicos qui sceptrum Israëlis tenebant. Sed cur hi judicabantur, cum id proprium esset regii juris *non judicari*? Non erant veri reges, sed vice tantum regia regnabant: suberant enim regibus Persidis à quibus potestatem suam accipiebant. Ex his liquet qui reges essent re & nomine, non potuisse judicari; impune ergo ipsis fuisse quidquid fecissent. Non desunt tamen ex Rabbinis qui longe aliter hanc differentiam regum Israëlis & regum familiæ Davidis explicent. Nam reges Israëlis de Samaritanis exponunt, quos volunt transgressores legis in regno suo fuisse, & nimis superbe imperasse, nec eo se unquam demisisse ut legi vellent obedire. Reges autem à Davide oriundos, quia legem noverant, non existimasse sibi indecoram istam legi parendi necessitatem, ideo & judicasse & judicium Synedrii excepisse. Aliquot de ea re Rabbiorum testimonia Sichardus allegavit. Sed non possum à me impetrare ut hoc esse credam, aut ut mihi persuadeam primos Judææ reges à Davide

vide usque ad Joachimum à Synedrio unquam fuisse judicatos. Nullum exemplum producunt nec producere vero possunt. Ut ostendant, reges debere etiam judicari, & eos qui essent ex domo Davidis, etiam judicatos fuisse, adferunt ex Jerem. Propheta hæc verba c. 21. v. 11. *Domui Davidis hæc dicit Dominus, judicate mane judicium, & eruite vi oppressum de manu calamitatis.* Atqui, inquiunt magistri in Gemara, *nisi in jus vocari possent quomodo judicarent?* Quod est ridiculum. Quasi judicare non possent de aliis reges, nisi de ipsis alii judicent. Cæterum vel locus ille ipse Ieremiæ clare testatur non judicatos fuisse nisi à Deo reges illos domus Davidis. Nam sequitur continuo apud prophetam comminatio Dei in illos nisi judicium exerceant ac de manu calumniatorum innocentem liberent. Si Deus sibi sumit ut de his judicet, hoc judicium hominibus ademit. Nihilo magis ad rem facit quod sequitur ex scriptura testimonium ad hanc rem probandam, *per vestigamini & per vestigate*, id est, inquiunt auctore R. Lakises, *Corrige te ipsum, deinde alios corrige.* An inde sequitur regem debere capitis judicium subire? Hoc pertinet ad internum conscientię judicium

qua se quisque probare tenetur, & in se descendere. Si non habent validiora argumenta quibus doceant reges domus Davidis ut judicant ita debere judicari, nihil agunt. Præterea differentia quam ponunt inter reges Israël & reges domus Davidis nihili est, si vera est historia illa de Iannæo quam supra retulimus ex Gemara, cujus occasione volunt natum esse morem sive statutum, ut rex nec judicet nec judicetur, eamque traditionem pertinere ad reges tantum Israël. Nam Iannæus ille ut & successores ejus usque ad Herodem & sequentes, reges etiam fuere Judæ, non Samaritæ tantum, sicut distinguebantur Samaritani reges olim à Judæ regibus. Postremo quod afferunt de domus Davidis regibus judicandis & judicantibus, non aliud genus castigationis spectabat quam verberationem, eamque in certis tantum casibus usurpari in reges solitam, si multiplicaret uxores, currus equosque, & si amplificaret pecuniam. Ea autem vapulatio sicut eam describunt Rabbinii poenitentiae potius genus & quidem voluntariae fuisse videtur quam poena ob crimen inflicta. Nam ipse deligebat à quibus verbera exciperet, & modum verberandi statuere.

statuebat. Non ignominiosa denique fuit hæc castigatio apud Judæos. Nam eos qui hanc passi erant infamia non sequebatur, nec dignitatis gradu excidebant, ipsique etiam Pontifices summi huic flagellationi erant obnoxii. Non illi denique possunt ostendere ex ullis historiæ sacræ monumentis, quemquam priorum regum Israël, aut ex successoribus Davidis, hæc pœna fuisse affectum. Ne quidem ex suis traditionibus tale quidquam depromptum possint dare. Præterea credibile non est, regibus violationem & transgressionem legis ac præceptorum Decalogi, quæ describere ipsi & memoriæ mandare tenebantur, sine ulla castigatione & pœna cessisse, & verberibus multatos fuisse propter uxorum numerum nimis grandem, & propter currus multiplicatos, aurique & argenti pondera amplificata. Talmudica sane Misna absolute ac simpliciter pronuntiat regem non judicari. Eadem ubi percenset personas de quorum capite & causa cognosceret Synedrium magnum, nullam facit regis mentionem. Unde certum est regem non vocari in jus solitum ad tribunal septuaginta Seniorum, non coram his accusatum, nec ab his judicatum. *Tribus inquit; Pseudo-*

*prophetes Sacerdos magnus non nisi à LXXI. iudicum confessu iudicatur.* At Gemaræ auctores dum distinguunt inter reges Israël & reges familiæ Davidis, aut nugantur, aut ea differentia explicanda est sicut exposuimus. Sed de his adhuc infra erit dicendum. Ut ad rem ex diverticulo revertamur, nihil omnino tam proprium regiae maiestati quam τὸ ἀνὴρ δ' ἄνθρωπον, à nemine pendere, nemini esse obnoxium, à nemine iudicari posse. Qui nulli alteri mortalium de se & pro suis actibus respondere tenetur, restat ut Deum solum agnoscere debeat iudicem. De quo semper convenit inter omnes ferme populos qui unquam regium dominatum accipere & pertulerunt. Omnium quippe sæculorum ac gentium una vox fuit, & una hæc sententia, regem non esse videri, nec dici debere à quo ratio eorum quæ ageret exigi posset, aut qui propter male facta pœnam persolvere deberet. Illustris est apud Josephum locus lib. xv. Antiquitatum cap. iv. de Herode, quicum postularetur apud Antonium à quo precarium obtinuerat regnum, cædis in Aristobulo commissæ, uxoris suæ Mariannæ fratre, Antonius respondit, non esse iustum aut æquum à rege reposci rationem eorum



eorum quæ tanquam rex egisset. Nam si id fieret, regem eum non esse videri oportere, eos autem qui hunc illi honorem & potestatem concessissent; potestatis quoque usum à nullo dependentis videri permisisse. Si rex ejusmodi, qui regnum alterius beneficio teneret, vel judicio ejus cujus hæc fuit gratia, nulli obnoxiam potestatem exercere debuit, quid de illis dicendum qui ab alio non habent quod regnant, sed soli Deo acceptum referunt? Inde est quod solium in quo rex sedet *solium Dei* in Sacra Scriptura dicitur, ut Paralipomenon lib. I. cap. XXIX. *Seditque Salomon super solium domini in regem pro David patre suo, & cunctis placuit, & paruit illi omnis Israël.* A Deo reges creati dicit Clemens in Constitutionibus. Τὸν βασιλεία, inquit, φοβηθήσῃ, εἰδὼς ὅτι τὸ κυεῖς ἐστὶν ἡ χροτομία. *Regem timebis, sciens hanc domini esse electionem.* Apud Essenos hæc etiam doctrina teste Porphyrio obtinuit, quod sine Dei numine nemini imperium habere contingat, & δὲ χροτομία πεινῶν πινεῖ τὸ ἄρχεῖν. Inde vetus poëta à Jove reges esse dixit, ἐκ δὲ Διὸς βασιλῆες. Homerus unum regem in populo oportere esse ait, quem constituerit Jupiter:

Εἰς ἡγέταν ὦ ἔσω,  
 Εἰς βασιλέως ὃ ἔδωκε Κρόνον πᾶσι ἀγκυλομήτεω.

An aliud Christianæ doctrinæ auctores primi prædicarunt, cum Euangelium gentibus adnuntiarent? Paulus in Epistola ad Romanos XIII. *Non esse potestatem nisi à Deo scribit, & quæ sunt, à Deo esse ordinatas.* Is est, ut habetur apud Danielem, ὁ κρ. δις τῶν βασιλεῖς καὶ μεδιστῶν, *qui constituit reges & transfert regna.* Si à Deo reges constituuntur, si per eum regnant, ut ipse Deus dicit, non alius eos judicare debet præter ipsum qui dedit. Quam veritatem non minus Græci agnovere quam Judæi & Christiani. Decantatissimum illud est Lyrici Romani:

*Regum tremendorum in proprios greges,  
 Reges in ipsos imperium est Iovis.*

M. Aurelius sapienter ac scite dixit, Magistratus de privatis, principes de magistratibus, Deum de principibus judicare. Xiphilinus, *ὡς γὰρ τοι τὴν αὐταρχίαν ὁ θεὸς μὲν κείνῳ δύνανται.* Plena sunt testimoniorum id disertis verbis confirmantium omnia Græcorum & Latinorum monumenta, nec minus Judæorum, quamvis isti in plerisque regis potestati minus æqui fuerint. David Psalmo XVII. canit, à  
*facie*

*facie tua iudicium meum egrediatur.* Ex quo probat Bar-Nachmoni, ut jam viris doctis notatum est, *quod nulla creatura iudicat regem nisi Deus.* Quod non de interiori tantum iudicio quo Deus corda probat intelligendum est, sed de externo quo pœnas imponit. Hinc idem rex & propheta cum exomologesi & pœnitentiam ageret pro homicidio in persona Uriæ commisso, ut uxorem ab eo abduceret, in hæc verba, à Deo veniam petens, erupit Psalmo LI. vers. XI. *Tibi soli peccavi.* Soli Deo delinquit qui iudicem eum habiturus est solum delicti sui, qui nulli alii vindicanda nec ab ullo homine castigari metuentia committit. Quod & tunc accidit. Plus vice simplici peccaverat rex ille, adulterium cum homicidio conjunctum admittendo. Non pro duplici crimine in jus vocatur, nec coram Synedrio causam capitis dicere cogitur; sed Prophetam mittit ad eum Deus qui ei peccatum exprobrat & pudore illum confundat, sed & pœnam simul denuntiet sequuturam à Deo ipso infligendam. Adversus Reges male agentes cum nullum sit populo positum in jure nec in legibus nec in judiciis præsidium, ad Deum solum confugere debet, ut se vindicet & liberet  
tyran-

tyrannica regis injuste dominantis oppressione, non ipsi vindictam de eo sumere, cum id facere nequeant quin Deum gravissime offendant, cujus potestatem hoc modo sibi adrogant & jus attentant. Quod & Samuel capite illo de jure regum clarissime docuit. Eum Prophetæ locum ad sui defensionem perperam à Rege Angliæ allegatum tradit Advocatus ex illo latrocinio Sicariorum, qui regem innocentem & pium, suæ ambitioni & tyrannidi victimam mactare non horruerunt. Advocatus inquam ille qui in confessu sanguinario Alastorum, negotium habuit perorandi contra regem tanquam omnium flagitiorum reum, ut nefarios sibi que similes judices ad condemnationem ejus inflammaret, satis per se ad hoc incensos & excitatos, in libello quo criminationes plures congeffit ex quibus rex morti adjudicandus fuit, si respondere dignatus esset ad crimina sibi objecta, scribit prohibitum. eum fuisse ab ea Samuelis allegatione. Primum, inquit, quia ibi describitur tyrannus; deinde quia non ibi significatur quid bono regi sit faciendum, sed quid malus facere soleat. Tertio quia Saulis & Davidis electio in regem extraordinaria fuit, hoc autem tempore omnis

nis.

nis auctoritas à populo in regem derivatur. Postremo quia Saul tunc datus est populo in pœnam, quoniam regem petierant ad instar eorum quos cæteræ nationes habebant, illos autem omnes fuisse tyrannos. Ut ad ultimum primo respondeam, ridiculum plane est quod dicit & stupore illo dignum quo ejusmodi fanatici demersi obbrutuerunt. Nam Deus pejus eos perdere videtur voluisse quam ipsi perditum sunt. Ita enim ratiocinatur. Quia Judæi tunc se puniri voluerunt, Deus eos punivit. Tyrannum petierunt, Tyrannum eis dedit Deus, fecitque haud secus ac si pater stolido filio serpentem pro anguilla ad esum poscenti, serpentem quem vellet daret. Regem, inquit, petierunt similem regibus gentium cæterarum. Atqui illi Tyranni omnes. An ergo hoc nesciverunt tunc temporis Judæi? Ignorant nempe an Ægypti reges tyranni forent? Vicini illi certe Judæorum. Et in Deuteronomio dicitur de hoc populo: *Constituam super me regem sicut habent omnes per circuitum nationes.* In illo sane circuitu fuere & Ægyptii. Hebræi diu apud eos vixerunt sub duro imperio quasi captivi. Quo jure & more inde loci reges in suos subditos regnarent, non potuit eos  
magis

magis latere , quam de aliis nationibus quæ in vicinia eorum habitarunt regesque habuerunt. Si hoc igitur non ipsis incognitum fuit quale regale esset tunc regimen apud gentes notas & finitimas , arverisimile est, eodem more quo illas, regconcupisse, cum tyrannice scirent eas regi? An de fumo in flammam ire præcipientes maluerunt , id est sævitiam pessimorum tyrannorum experiri potius quam iudices malos pati quibus jam assueverant? Si de re sibi ignota contendebant ut reges haberent , cur Deus tanquam bonus pater ignorantia eorum non subvenit, & errantibus non dedit veniam? Nam quis panem petentibus natis lapidem dat benevolus ac benignus parens? Immo panem credentibus qui lapis esset nunquam daret. Sed reponet sanguinarius Patronus, hoc etiam Deum facere destinasse cum per prophetam suum eos commonefecit erroris sui , quasi parum gnaros quo iure reges erga subditos uti solerent, sed illos Deo velut invito regem accipere voluisse. Si ita est , ergo jam tum auctoritas in populo erat maxima , non hodie atque heri penes illum cœpit esse , ut perterritus cruentus Advocatus. Liberrima ergo tunc potestate populus erat præditus.

Quod

Quod ostendêre eo tempore Israëlitæ  
dum Judices à quibus gubernabantur li-  
bere repudiarunt , & regem optarunt.  
Non tamen existimandum est Deum ita  
eorum voluntati obsequutum fuisse , ut  
rem malam volentibus annuerit , nec eos  
tam prave judicasse aut in tam stolidam  
voluntatem lapsos esse , ut quod malum  
sibi esset futurum quærerent , præsertim  
cum opinione errare non possent , & scire  
in promptu ipsis esset qualis ratio foret  
regii regiminis apud vicinas gentes. Non  
hoc autem novum est , ut rem optabilem  
& concupiscendam pater invitus , licet bo-  
nus , filio concedat , per vim quodam mo-  
do eam extorquenti. Hoc autem vel Scri-  
ptura ipsa teste licet confirmare , Deum  
Israëlitis regem non tanquam tyrannum  
aut pœnam petentibus tunc attribuisse ,  
sed ut rem salutarem & bonam. Sic au-  
tem capite ix. ejusdem Samuelis primi de  
Saul inaugurando & inungendo Deus  
Prophetæ suo præcipit : *Hac ipsa hora quæ  
nunc est cras mittam virum ad te de terra  
Benjamin, & unges eum ducem super po-  
pulum meum Israël, & salvabit populum  
meum de manu Philistinorum, quia respe-  
xi populum meum, venit enim clamor eo-  
rum ad me.* Respexit Deus populum  
suum,



suum, ad preces eorum dat illis regem qui eos eripiat de manu hostium suorum. Nunquid hæc argumenta sunt Dei irati, & contra voluntatem suam dantis in pœnam Israëlitis malum ac tyrannum? Præterea falsum est quod ponit pro confesso ex grege fanaticorum Advocatus, omnes reges qui tunc temporis regnarunt, tyrannos fuisse. Aristoteles in III. de Republica omnes reges Orientis *καὶ νόμοι* fuisse scribit, & legitimos agnoscit, utpote qui hæreditaria omnes tenerent regna. Vel de Ægypti regibus hoc constat ex fide dignis auctoribus, eo more modoque tum imperium exercuisse, ut legibus in maximis minimisque rebus obstricti essent. Leges quippe illis positæ erant quibus prandere, cœnare deberent, non minus severæ quam quas ægroto medicus servandas præscribit. Etiam leges certas concumbendi cum uxore observare habuerunt necesse. Si ad hoc instar regem dari sibi petierunt Israëlitæ num tyrannum videntur habere voluisse? Nihil minus. Quinimmo & leges multo ante præscripserat Moyses regi quem ex Dei mandato constituere sibi debuerunt simul ac terram promissam ingressi fuissent. Secundum illas regnaturus Israëlitarum rex  
non



non potuit videri tyrannus, ut nec Ægyptiorum. Omnibus quoque aliarum gentium regibus, etiam antiquissimis, leges datas fuisse liquet quas observarent si boni esse & bene vellent regnare, non tamen ut iis tenerentur judiciorum metu & pœnæ capitis, ut infra dicam. Tradunt Judæorum magistri, tria injuncta fuisse Israëlitis quæ facere eos oporteret postquam introducti essent in terram sanctam, *regem sibi constituere, exscindere Amalechitas, templum extruere*. Quodnam ex his primum facere debuerint, disputant. Plures statuunt creationem regis primum locum habere debuisse, idque adstruunt ex verbis Exod. xvii. *¶* s. xvi. *Quia manus solii Domini & bellum Domini erit contra Amalec*. Nam *solium Regum* in scriptura *solium Dei* appellari solet, sicut jam supra notatum est. Plurimi eorum scribunt, recte & ordine Seniores illius temporis regem postulasse, sed in eo peccasse vulgus hominum, quod ad instar regum cæterarum nationum sibi dari eum petierint. Quæ minuta est disputatio & absurda, ut ex his quæ jam diximus liquere potest. Diserte enim confutatur his verbis Moyſis sole, clarioribus sicut in Deuteronomio xvii. habentur,

&

& mandatum continent de rege creando:  
*Cum ingressus fueris terram quam Dominus Deus dabit tibi, & possederis eam, habitaverisque in illa, & dixeris, constituam super me regem sicut habent omnes per circuitum nationes, eum constitues quem Dominus Deus elegerit, ex numero fratrum tuorum.* Enimvero cum regem flagitarent, non potuerunt nec debuerunt alio jure vel alia conditione aut titulo eum poscere, quam quomodo apud alias nationes vulgo haberi soleret regius status. Si qui verò sint ex magistris, ut certe sunt, qui negant alium suis majoribus regem agnoscendum fuisse præter Deum, & qui affirmant ita eum datum esse à Deo Israëlitis, nempe in pœnam, ut fabula fingit Jovem ranis dedisse hydram in perniciem eis dominaturum, horum sententiæ tota reclamatione scriptura sacra. Unde enim Deus promisit Abrahamo in benedictionem, egressuros ex ejus semine reges, si hanc regendi formam damnabat ut tyrannicam? *Ponam, inquit, te in gentibus, & egredientur ex te reges.* Cur idem Deus pro magno beneficio tribui Judæ pollicitus est, *non recessurum sceptrum à Iuda*, si regia dominatio tanquam res exitialis & perniciofa, ut isti judicant, habenda

benda est? Quid quod salutis humanæ auctor de regio Davidis genere originem ducere debuit? An hoc leve videtur ad commendationem regum ac regalis imperii? Nunquid de regia gubernatione ut de maximo reipublicæ malo sentiendum est, cum & ipse Messias rex in Scriptura vocetur? Hoc tamen præcipue discrimine judicum administratio distabat à regum regimine, quod isti potestate præditi erant soluta legibus, & nulli pro delictis tribunali obnoxia. Cætera pares fuere. A judicando *judices* dicti sunt. Hoc etiam munus fuit proprie regum. Nam & Israëlita cum regem deposcerent petierunt in hoc sibi dari ut jus dicerent. Duces utrique nominantur in Scriptura. De Saule quippe dicit Deus lib. i. Regum cap. ix. *Et unges eum ducem super populum meum Israël.* Passim hoc nomine vocantur in libro Judicum ii qui judicando populo constituti erant. Utrique *ἀρχοντες* dicti, & de utrisque *ἀρχη* auctores tam sacri quam profani dixere. Hoc etiam *dominari* Latini interpretes verterunt. Dominationi autem respondet servitus. Nam servus & dominus relata sunt. Et cum regem sibi constitui peterent Israëlita, dixerunt, *Et nos servi ei erimus.*

Unus

Unus autem est rex & gubernator omnium rerum quas & ipse creavit & condidit Deus. An qui ejus imaginem interris reddit ad populos ab ipso sibi commissos regendos, tam diversum quid ab exemplari erit, ut rei longe omnium rerum optimæ sit pessima imago? *Rex regum* appellatur Paulo, βασιλεὺς βασιλευόντων in Epist. ad Timotheum I cap. vi. Si reges omnes tyranni sunt, ut perduellionum Anglicanorum dicit Advocatus, Deus ipse rex fuerit tyrannorum dicendus, & quidem tyrannus ipse maximus, quoniam primus fit & supremus tyrannorum. Atqui rex est justorum & justitiæ, non iniquorum, nec cum injuria & peste subditorum dominantium. An non ipse denique Moses rex fuit? Quid enim de nomine laboramus ubi res apparet? Nonne ille potestate plane summa & regia populum Israël ab Ægypto eduxit ut in terram sanctam induceret? Quæcunque gessit in populo regendo, in his eum se pro rege gessisse omnino constat. Sed ne nomen quidem defuit: nam diserte Scriptura regem fuisse dicit Deuteronomii xxvi. vs. v. Postremo quid manifestius & expressius potest dici illo Dei mandato, quo per Moysen præcepit Israëlitis, ut statim  
 atque

atque ingressi essent terram sanctam, regem sibi constituerent? Deuteronom. xvii. *¶* vs. xv. *Ponendo pones super te regem.* Cum Deus igitur tanto ante determinaverit regium regimen inter Israëlitas instituendum, cum etiam tanquam optimum illum populi regendi statum à se judicari tot & tam claris indiciis ostenderit, quomodo cum his conciliabuntur ea quæ primo Samuelis habentur, de propheta repugnante populi voluntati qui regem cupiebat, de eodem incommoda ipsis & mala proponente quæ sub rege & à rege essent eventura, de Deo etiam ipso sic agente cum propheta suo, quasi nollet regem Israëlitis dari? Cogitandum in his est, Samuelem esse, cujus filii tunc tempore judicabant populum Israëliticum summi magistratus jure. Eos esse quos populus repudiabat ob corrupta pretio & vendita mercede judicia, regem eorum loco sibi constitui postulans. Cum igitur Samuel propheta id agi videret ut filii ejus rejicerentur à gubernaculis reipublicæ, atque ut rex pro his ad regendum Israëlem substitueretur ex populi voto, de hac eorum voluntate Deum ita consuluit, ut appareret nolle hanc injuriam sibi filiisque suis à populo fieri. Deus etiam ut

gra-

gratificaretur prophetæ suo, responsum suum ad ejus consultationem ita dispensavit, ut innueret sibi non valde placere id quod populus desideraret, dicendo, *non enim te abjecerunt, sed me, ne regnem super eos*. Nihilo secius tamen Samueli mandavit expresse ut annueret eorum votis. *Audi vocem*, inquit, *populi in omnibus qua loquentur tibi*. Et paulo post: *Nunc ergo vocem eorum audi*, id est, da illis regem sicut flagitant. Sed addit, *contestare tamen eos, & prædicito eis jus regis qui regnaturus est super eos*. Quam clausulam videtur addidisse in gratiam Samuelis, ne crederetur nimis præfracte abjicere illum & filios ejus ab administratione reipublicæ, & populi libidini obsecundare. Quasi diceret, Vide tamen, num possis populum deterere ab hoc proposito, prædicendo eis quam dura conditione sub regia potestate vivere eos oporteat. Sed cum populus nihilominus perstaret in proposito, Deus de Saule ipsis in regem constituendo providit, non ut de tyranno aliquo illis imponendo, sed de duce tali qui eos de hostibus suis vindicaret. Nam & se respexisse dicit populum suum, & clamorem ejus ad aures suas pervenisse. Quomodo hæc iterum conciliabimus? Cum bonum & salu-

salutarem eis regem destinaret, cur per Samuelem eis proponi curavit mali regis & tyrannice imperantis exemplum? Non de rege uno vel primo hæc illis prædixit Samuel, nec de omnibus, quasi vel unum talem habituri essent, vel omnes ad illud instar regnatos, cujus jura ibi describit. Sane sciendum est cum regem petiere Israëlitæ, statum regalem apud se institui petiisse pro judiciali & Sufetico qui hætenus apud eos obtinuerat. Status ille non in uno & altero rege consistere debuit, sed in longa serie invicem sibi succedentium, regno de patre in filium semper transituro. Nam apud Judæos ut omnia olim officia fuere hæreditaria, ita etiam regnum post Davidem, & Sufetum sive Judicum gubernatio, antequam reges eorum loco constituti forent. Ut igitur in longa dominantium successione, qua jus regum hæreditate devolvitur in natos & nepotes, non semper filius similis est patri, nec bonus rex succedit bono, sed sæpe bono malus, & vicissim malo bonus, Samuel quo Israëlitæ abduceret ab ista cupidine regis habendi, significavit eis non quid boni reges bene imperando facerent, sed quid mali facere solerent, cum jus impune faciendi quod velit rex habeat. Et hæc  
ratio

ratio fuit optima deducendi eos à confilio quod jam ceperant regii status sumendi pro Sufetico , cum prædixit illis in longa fucceffione regum qui regnaturi fuper eos forent, futuros multos qui jure fuo fumno & poteflate infinita uterentur quod liberet faciendi , quique tyrannica potius vi quam regio animo imperarent. Hæc mēſ omnino Dei videtur fuiſſe cum prophetæ præcepit ut conſtaretur Iſraëlis populum & prædiceret eis quod jus eſſet regium. Non enim defuturos aliquos in multis regibus invicem ſibi ſuccedentibus qui ſubditos ſuos ita tractarent ut ibi exponitur. Sic in privatorum familiis alternis patres mali boni vereperiuntur. Sunt quippe quidam patres in eadem familia qui jus patriæ potefſtatis tyrannice in liberos exercent, duri, ſeveri, aſperi. Sunt contra qui clementer, remiſſe & cum indulgentia eo jure utuntur. Idem eſt & in regibus ubi regnum hæreditate defertur. Nam & qui durus eſt pater in liberos, ſi idem regnet, etiam populum non melius ſæpe rex tractare ſolet quam pater naturalis eos qui ex ipſo geniti ſunt. Hoc etiam argumento regi licere quod libet, & ita Samuelem intellexiſſe cum quale eſſet jus regum Iſraëli-



Israëlitas advertere voluit, potest sic facile demonstrari. Filii ejus nomine *Iudicum* rexere Israëlitas. A Mose usque ad illud tempus, sub *Iudicum*, sive *Sufetum*, imperio populus fuit. Isti Sufetes etiam duces erant qui principatum in populo tenebant, summi magistratus instar, non tamen cum regia appellatione & potestate. In hoc munere & officio Mosis succedere, & non plures quam singuli, & quoad viverent. Primus Jesu Nave Mosis successor fuit, deinde cæteri usque ad filios Samuelis, qui ambo quasi duo consules populum regebant, cum omnes qui ante ipsos eum magistratum gessere, singuli fuissent. Exercitus ducebant, in hostem ibant, jus reddebant, omnia pro imperio agebant, & parum aberant à regio. Reges etiam in Scriptura dicti. Judicabantur tamen. Pars erant quippe Synedrii magni, sed illi suberant. Ut in Optimatum statu qui primatum inter eos tenet, sive principatum, si quid in rempublicam committat, ab reliquis potest ac debet judicari. Tales stante republica Romana Consules in Senatu fuere, & Sufetes, id est iudices, in Senatu Carthaginiis. Nam nomen *Sufetis*, ex Hebraico *Sophet*, & iidem *Sufetes* Pœnorum qui *Sophetim* He-

E

bræo-

bræorum. Festus *Sufetem* Consulem esse notat lingua Pœnorum, & ex Cælidio hæc verba citat: *Senatus*, inquit, *censuit referentibus Sufetis*. Ita Consulum Romæ erat ad Senatum referre, Senatus vero de iis quæ ad eum referebantur, censere. Sed Consules Romani & Sufetes Pœni annui magistratus erant, Sufes Hebræorum per totum vitæ tempus imperium habebat, quo propius ad regiam dignitatem & potestatem accedebat, & quia unus fuit, & quia quoad viveret, principatum obtinuit. Non reges fuisse re, ne quidem nomine, liquet ex lib. Judicum cap. VIII. ubi Israëlita perhibentur Gedeonem qui judex erat regem facere voluisse. *Dixeruntque viri omnes Israël ad Gedeon, Dominare nostri tu & filius tuus, & filius filii tui, quia liberaasti nos de manu Madian*. Quibus respondisse Gedeon dicitur, *Non dominabor vestri, nec dominabitur in vos filius meus, sed dominabitur dominus*. In his iudiciis filius etiam succedebat patri. Unus iudicarium hoc regnum tenebat. Unde Abimelec filius prædicti Gedeonis ex concubina, cum hunc principatum sibi adfereret post mortem patris, exclusis Gedeonis filiis quos ex legitimis uxoribus habuerat, ita ad Siche-

mitas

mitas ex quibus oriunda mater erat dixit. *Quid vobis est melius, ut dominantur vestri septuaginta viri omnes filii Ieroboam, an ut dominetur vobis unus vir?* Vides illum dicere *dominari*, quasi regiae dominationi proxima esset potestas illa iudicum. Sed & ille ipse Abimelec tyrannidem arripuit, & regis appellationem sumpsit. Nam & in Chronico Alexandrino scriptum est, quod tyrannide, id est vi, regem se constituerit. Οὗτος ἐστὶν Ἀβιμέλεχ, ὃς φονεύσας τὰς ἐβδομήκοντα ἀδελφὰς αὐτῆ καὶ τυραννίδι ἐαυτὸν βασιλέα κατέστησας καὶ τῷ λαῷ καὶ ἀλλήλων πόλεμον ἀνάστηκας. *Hic est Abimelech, qui septuaginta fratres suos occidit, & se regem tyrannice fecit, & populum ad bellum intestinum concitavit.* In Scriptura tamen regem eum constituisse Sichemitæ dicuntur, cum universis familiis urbis Melo. Ibidem etiam scriptum est, regnasse eum super Israël tribus annis. Fortassean ut pœnas parricidii effugeret, & ne causam diceret in Synedrio ob septuaginta fratres nefarie interfectos, Tyrannidem arripuit ac se regem fecit. Pro eo tamen crimine quia ab hominibus puniri non potuit cum rex esset, Deo procurante supplicium meritum incurrit à muliere interfectus, quæ

fragmentum molaris lapidis cerebro ejus incussit, dum turrim urbis obsessæ propius subit, quam incendere moliebatur. Et sic reddidit, ut ait Scriptura, *Deus malum quod fecerat Abimelech contra patrem suum, interfecit septuaginta fratribus suis.* Quæ historia potentissime adstruit, Deum solum, malefactorum quæ à regibus committuntur, judicem esse & vindicem, nec ad hominum tribunal puniendos pro delictis jure trahi eos posse. Ne judices quidem ipsos, sive Sufetes Hebræorum, legimus in Scriptura apud Syhedrium capitis fuisse postulatos, nec ullius criminis reos factos. Ipsi quinetiam Samuelis filii cum à populo ab judiciorum exercitatione depulsi essent ob judicia pretio corrupta aut gratia, eo tamen nomine nec judicati sunt nec condemnati, sed simpliciter destituti, & pro his reges constituti. Hæc dicta sint ad lymphaticum ex grege lanionum Advocatum pro eo quod objecit, datum esse regem Israëlitis à Deo supplicii loco, quia regem petierunt similem regibus aliarum gentium: & quod idem scripsit, reges primarum quattuor monarchiarum tyrannos extitisse donec populorum animos sibi conciliassent. Quæ digna sunt homine cerrito & mentis

tis bonæ statu dejecto. Nec sanicrem redolet mentem quod idem carnificum Patronus tertio loco ponit, Saulis & Davidis electionem extraordinariam fuisse. Vellem se clarius aperuisset. Sed hic mos est Enthusiastarum, qualis ille est cum suis similibus & pari corybantiafino corruptis, ut fatis putent dicere rem ita esse cujus probatio pendet à Spiritu quo divexantur. Quid inquam extraordinarium in Saulis & Davidis ad regnum vocatione? An quod reges facti sunt? Atqui ordinarium tunc fuit & consuetum pluribus gentibus regimen. Ideo petunt sibi à Deo constitui regem, ut cæteræ gentes haberent. An hoc novum illi visum est, quod de Aristocratico Judicum statu in Monarchicum rem sibi publicam transformatam optarunt? Nihil hac vulgatius mutatione. Nisi existiment magis novum videri oportere quod de Aristocratico in Monarchicum transit, quam quod de regali in Democraticum migrare jubetur. Quod non puto dicturos nisi more suo insaniant. Longe sane magis extraordinarium, quod nuper fecere in mutando statu reipublicæ Anglicanæ, quam quod tunc ab Israëlitis factum. Isti saltem sine sanguine & cædibus à Deo per prophetam ejus regem sibi

concedi orarunt, cum Judices suos male judicia exercentes ferre amplius non possent. Non eos accusarunt, non damnarunt, non neci dederunt, sed in eorum locum regem à quo judicarentur substitui poposcerunt. At fanatici Angliæ qui se pro Catharis & sanctis haberi postulant, quas tragædias excitarunt? quas strages dederunt? quantum sanguinis fuderunt? quot familias fortunis spoliarunt? quot nobilium capita demersuerunt? quam nefarie denique regem suum infami supplicio trucidarunt? Hæc omnia & plura alia scelera numero carentia commiserunt, non ut regalem statum populari commutarent, sed ut pro uno rege legitimo ac juste pieque imperante, quadraginta tyrannos populi cervicibus imponerent. Hoc igitur, hoc est, si vis scire, fanaticorum & lymphatorum furiose Advocate, quod extraordinarium vocari debet, quia novum, inusitatum & inauditum. Sed modus fortasse quo Saul & David ad imperium regale adsciti sunt, videtur illi extraordinarius. Nempe quod per prophetam Dei ab Deo petierunt sibi regem constitui. Sane si tempera nostra spectemus, modus hic regis eligendi plane novus. Sed si morem illius sæculi & illius præ-

præcipue populi respiciamus, res fuit ordinaria & consueta. Nihil enim tum Israëlitarum quidquam quod alicujus esset momenti auspicari solebant, quin Dei voluntatem per prophetas, qui ejus erant interpretes, sciscitarentur. Nec tantum in rebus gravioribus consulebant Dei prophetas, sed etiam oraculum divinum, quod in pectorali summi Pontificis intextum & insertum per duodecim gemmas fuit, quod Urim & Thummim dicebant. Ad Deum omnia referebant, eumque auctorem omnium quæ fierent, faciebant. Hodie quidem non minus cuncta ejus voluntate aut permissione fieri statuendum est, sed tacita & obscura, non explicata nec expressa. Post mortem posteriorum Prophetarum Aggæi, Zachariæ & Malachiæ recessisse Spiritum Sanctum ab Israël tradunt magistri Judæorum. Ab eo tempore cessavit ratio consulendi Dei per prophetas, sacerdotes & somnia; qui tres ejus modi memorantur in libro Judicum. Cum per secundas causas agit Deus vel jubens vel permittens, tacite vel expresse, nihilominus ipsi causæ secundæ, id est homini, tribuitur id quod agitur. Deus Saulem primum regem dedit Israëlitis, quem morem regis constituendi ex-

traordinarium fuisse vult latronum & parricidarum Causidicus. Et tamen Moses in Deuteronomio de eo rege loquitur tanquam ab ipso populo constituendo. In cæteris regibus Israël quamvis successione aut alio modo ad regnum pervenirent, idque etiam fieret interdum expresso Dei mandato, nihilò tamen secius à populo constituti dicuntur in Chronicis & in libris Regum. Ita in Chronicorum i. cap. xi. Israëlita constituisse perhibentur Jeroboamum super se regem, cum tamen eodem capite Deus per Semejam nuntiari Roboamo jubeat regi Judæ, id gestum esse sua voluntate. Si quis impius alterum æquè impium occidisset, *manus Dei* dicebatur, & *judicium Dei*, cum tamen impune illi qui fecisset hoc non esset. Nam ut vetus apud Israëlitas proverbium fuit, *Impietas ab impiis egreditur*; ita David noluit Saulem interficere quamvis à Deo projectum sciret ac derelictum, sed alicui improbo & scelerato hoc Dei judicium exequendum reliquit, nec manus ipse polluere voluit sanguine Uncti Dei. Si stylus hic fuisset alicujus ex illis Angliæ Alastoribus, Saulem protinus transfodisset, & egregiam laudem eo se facto meritum ultro jactasset. Cur hoc?

Quia



Quia Spiritu illo nequam exagitantur omnes qui Saulem vexabat, non illo bono qui residebat in Davide, quo repletus inimicum suum bis sub sua potestate positum noluit occidere, quia rex esset & Unctus Dei. Quomodo autem Israëlitæ Deum per prophetas consulebant, præcipuè cum de statu publico componendo ageretur, cum de constituendo iudice, vel rege creando; ita & gentes variis modis in rebus similibus consulere Deos suos soliti erant. Aut ad Astrologos, aut ad oracula mittebant, aut ad aruspices, vel ad augures. Alii, forti committebant regum suorum electionem. Hinnitus equi ex compacto & regem quondam fecit. Omnes hi modi nunc nobis extraordinarii & insoliti atque inusitati, olim ordinarii fuere. Sed esto, extraordinaria fuerit Saulis & Davidis electio. Quid tum postea? Quid inde conclusum volet habere litum illud Advocati Regio sanguine inquinatum? An solis regibus, qui ita ordinati fuerint, parci debere, alios omnes impune interfici licere? Sic David trucidari non debuit, sed Salomon debuit? Cur ergo occisus non est, nec capitis à populo damnatus? An melior rex ille Carolo primo fuit, cui vir sanguinis

nis & carnificum patronus, ac parricidii defensor, decies millenas cervices optavit ut omnes possent uno ictu obtruncari? Certe Salomon regnum suum à cæde fratris nati majoris auspicatus est, qui patre connivente regnare cœperat. Non justiore titulo Joabum inter ipsum Dei tabernaculum, manibus apprehensum cornu altaris tenentem, interfici jussit. Populum gravissimis tributis & vectigalibus pressit, quibus cum se relevari peteret à Roboamo ejus filio & successore, atque ille re-tueret, hanc causam defectionis suæ & abdicationis Roboami prætexuere decem tribus. Deinde in fine vitæ & regni deseruit cultum veri Dei, ut Deos gentium adoraret, & idolis sacra faceret. Si his criminibus implicatus fuisset rex Angliæ & inter reges Protomartyr, quot mortes mereri, quot supplicia visus esset? Non tamen populus talis regis puniti-onem à Deo petivit, nec ipse eam invasit. Ne Deus quidem Salomonem viventem punivit, sed scelerum ejus vindictam in filium distulit. His adde, quod omnia regnorum primordia quacunque ex causa veniant, sive ex voluntaria populi electione, sive ex invasione & usurpatione, extraordinaria plane sunt, quia priore statu

statu immutato novoque inducto, ordinem usitatum & receptum in regimine interrumpunt. Extraordinaria, inquit parricidarum patronus, Davidis ad regnum vocatio fuit. Ergo quid? Quia hodie auctoritas omnis à populo derivatur? Cur hodie tantum? Quando incepit esse populi? An eo tempore quo Saul creatus est rex, nulla populi auctoritas fuit? At fuisse testatur Scriptura. Nunquid sine auctoritate iudices suos eisdemque belli duces abjecerunt ut reges haberent? Quis illis auctor fuit, ut regem à Deo peterent? Cur dixit Moyses, regem eos statim atque ingressi essent terram sanctam, constituere sibi oportere? Cur de aliis regibus in Chronico sacro passim scribitur eos à populo fuisse constitutos, si nullam auctoritatem populus habuit tum sibi constituendi regem? Constituebant sane eo modo qui tunc maxime inter illos usitatus & receptus fuit, consulta prius Dei voluntate, an id ei placeret quod essent acturi. Sed quis ille populus in quo nunc scelerum Advocatus potestatem creandi regis vult residere? An turba est cerdonum, opificū, lanionum, coctorum cervisiæ? Non ista fæx, istud cœnum populi erat cui apud Israëlitas potestas dabatur constituendi regis.

regis. Seniores populi hoc jus soli habere, experientia longi ævi ac sapientia probati, & in Synedrium magnum, penes quem summa auctoritas fuit, propter merita cooptati. His & prophetis Dei jus compete-  
bat regis eligendi. Primo & secundo loco quod urget truculentus Advocatus de Samuelis capite octavo, quo jura regis recensentur, ibi tyrannum à propheta describi, & declarari non quid bonus rex faceret, sed quid malus facere posset, si totum hoc illi concederemus, quid inde concludendo hincere posset? Tanto melius olla hujus Coqui fervens parva trua confutabitur. Sane tyranni jus & licentiam ibi prosequitur propheta, minaturque etiam talem quandoque regem oriturum Israëlitis qui asperre & tyrannicè eos tractet. Numquid ibi adjungitur, debere qui talis esset & eo modo imperaret, in jus vocari & neci dari? Hoc si propheta dixisset, pro cruento carnificinæ defensore id in primis faceret, & rem factam inde haberet, causamque bene peroratam. Sed quid adjicit ille? Tunc cum omnia illa dura & sæva sub tyranno paterentur, invocatu-  
ros esse opem Dei, sed frustra. Non enim Deum eis aures præbiturum. Quid aliud hæc significant

cant & clare clamant, quam regem etiam pro tyranno se gerentem, regem tamen esse permanfurum, nec cuiquam nisi Deo actionum suarum rationem redditurum? Sic igitur hoc caput concludam ex jure quod Scripturæ divinæ auctoritate regibus asseritur, non omnia quidem regi esse facienda quæ facere potest, præcipuè si inhonesta sint, si perniciofa, si ea per leges ab ipso positas facere non liceat, sed omnino tamen id ei licere quod potest, citra legum aut judiciorum metum, & cum impunitate maxima, ut qui solum habeat judicem suorum delictorum ac vindicem Deum.

---

## C A P V T III.

**I**us Regum quale esset, superiore capite lex lege divina fœderis antiqui docuimus. Ex ea & illud probavimus, non justos solum reges sed etiam tyrannos ut impune quod volunt possunt, ita non posse impune à populo quem premunt, abjici vel occidi, quia Deus tribunali suo vindictam de his reservavit. Nunc est discutiendum an alia lex novi fœderis fuerit: An contrariam regulam Christus instituerit:

tuerit: An diversa de regibus præcepta discipulis servanda tradiderit. Ipse cum nasci posset sub florentissima, potentissima, & omnium quæ unquam extitere & quæ fortasse posthac erunt, maxima republica, eaque libera, sub tyranno naturam sumere humanam præoptavit. Nam quamvis Augustus tyrannicè non regnaverit, tyrannus tamen in invadendo regno & populi libertate opprimenda fuit. At idem Christus sub eo principe qui tyrannus etiam administratione esset, condemnari & supplicium mortis subire sustinuit. Hoc quoque parum esset, nisi & ultro talibus tyrannis suos parere jussisset, ut ipse paruit. Agnovit non semel nec uno modo potestatem tunc imperantium quasi legitimam, cum tamen ex usurpatione nata foret primum, nec justius deinde exerceretur quam erat usurpata. Ad discipulos suos de primatu inter se contententes, quo eorum ambitionem retunderet dixit, *Reges gentium dominantur iis, vos autem non sic*. Apud Lucam cap. xxii. ὁ β. xxv. Οἱ βασιλεῖς τῶν ἐθνῶν κυριεύουσιν αὐτῶν. Ubi verbum κυριεύειν *dominum esse* significat, cui ex adverso respondet τὸ δουλεύειν, *servire*. Agnovit, ut res est, Christus eos qui reges illo in tem-

pore

pore gentibus dominarentur, non fuisse earum servos sed dominos. Longe contraria est huic doctrinæ Christi, Fanaticorum Angliæ Molossorum opinio, qui auctore Advocato suo, nefandi parricidii quod commiserunt defensore nequissimo, docent populum dominum esse regis, regem verò creaturam populi. Hunc figuli instar habere, regem verò vasis à figulo tornati. Et addit homo nequam, *proditionis esse crimen, aliter credere.* Alio oportet hos homines Euangelio uti quam quod à Christo traditum est, vel alium habere Christum doctorem quam qui nobis ab Apostolis annuntiatus est. Hic ceterè tentatus à Pharisæis, & rogatus, an liceret Cæsari censum dare, respondit, *Quæ Cæsaris sunt, reddenda esse Cæsari, quæ Dei, Deo.* Idem non recusavit solvere didrachmum quod exigebant Romani à Judæis tributi nomine, subacta Judæa & in provinciæ formam redacta, Matthæi xvii. Qui tributum illud exigebant sive censum, interrogarunt Petrum an magister ejus solveret didrachma? Is respondit soluturum, & cum intrasset domum, Iesus eum prævenit, dixitque, quid tibi videtur Simon? Reges terræ à quibus accipiunt tributum vel censum? Utrum à filiis, an ab alienis?

alienis? Et cum ille dixisset, ab alienis, Ergo, inquit Jesus, liberi sunt & immunes filii. Sed addidit statim, Ne eos offendamus, age vade ad mare, & quæ sequuntur. Sic pro se & pro Petro staterem solvit, id est duo didrachma. Quis autem ille Cæsar cui didrachmum solvit, & cui censum solvendum esse præcepit? Bonus aliquis & legitimus princeps, an vero sævus tyrannus tam administratione quam usurpatione? Tiberius tum imperabat, qui artibus matris imperium nihil ad se pertinens fraude & scelere sceminæ occupaverat, legitimo Augusti hærede excluso. Is successerat tyranno, tyrannus & ipse plus vice simplici. Nam ut tyrannus regnum invaserat, atque ut tyrannus regnabat. Hujus tamen edictis cum tam libere & libenter se subjecerit Christus, nonne hoc facto significavit per eam doctrinam quam instituebat, & quam prædicandam ubique terrarum discipulis suis mandabat, nullam se mutationem induci velle formæ regiminis quod tunc obtinebat? An non Apostoli eam ipsam quam à magistro acceperant doctrinam successoribus porro suis tradiderunt, & populis insinuarunt? Ecce Petrus Apostolicæ coronæ princeps, in ea Catholica Epistola quam Judæis ubique



que terrarum in Diaspora consistentibus scripsit, præcepit eis ut subiecti essent omni humanæ ordinationi, *πάσῃ τῇ ἀνθρώπινῃ κτίσιν*. Quod verbum veteres patres de magistratibus explicant, sive de præsidibus qui à regibus constituti sunt, vel etiam de ipsis regibus. Sed melius est ut per *πᾶσιν ἀνθρώπινον κτίσιν* omnem omnino *δεχλῶν*, sive principatum ac magistratum, generalius intellexerit, ut in Epistola Pauli ad Romanos cap. xiii. vetustissima quædam exemplaria legunt, *πᾶσιν ἐξουσίαις ὑπερέχουσιν ὑποτάσσεσθε*, & in Latina antiqua versione, *Omnibus potestatibus sublimioribus subditi estote*. Ita etiam legit Irenæus & Ambrosius in Commentariis. Pro quo dixit Petrus, *πάσῃ τῇ ἀνθρώπινῃ κτίσιν*, *omni humana ordinationi*, id est omni potestati quæ in homines constituta est. Eam deinde explicat nominatim tam de Rege quam de præsidibus qui ab eo ad regendas provincias regni mittebantur. Εἴτε βασιλεῖ, inquit, ὡς ὑπερέχοντι, εἴτε ἡγεμόσιν, ὡς δὲ αὐτὸν πεμπομένοις εἰς ἐκδίκησιν μὴ κακῶποιῶν, ἔκτανον ὃ ἀγαθοποιῶν. Proinde subditi estote omni humana ordinationi, propter Dominum, sive regi tanquam supereminenti, sive præsidibus, at qui per eum mittuntur

ad

*ad vindictam quidem nocentium, & ad laudem recte agentium.* De quo rege ibi loquatur Petrus, colligendum est ex loco in quo scripta fuit ejus Epistola. Datam fuisse Babylone, quod in fine scriptum est indicat. Ἀποστόλες ὑμᾶς ἐν Βαβυλῶνι ἐκκλησία συνεκλεκτή. *Salutat vos Ecclesia quæ est Babylone collecta.* Ergò in urbe Babylone, & quidem propriè sumpta, non allegorice, ut de Roma dictum vulgo perperam interpretantur, constat eam à Petro conscriptam & datam. De rege etiam Parthorum, eum regem intelligi debere cui subjici vult omnes illius regionis provinciarum Christianos. Cæterum quum directæ sit Judæis ad Christum conversis qui provincias Ponti, Galatiæ, Cappadociæ, Asiæ & Bithyniæ habitabant, non minus de Romanorum Imperatore quæ à Petro dicta sunt accipi oportet. Quis ille tū fuit quo imperante eam Epistolā scripsit? Nero si fortè aliquis, non de vulgaris notæ tyrannis unus, sed omnium sævissimus qui unquam fuerit, adeo ut nomen ejus in tyranni crudelissimi significationem omnium sæculorū ad probationem & consensu transferit. Sive ergo Parthorum rex sit, sive Romanus Cæsar, sive quicumque alius, vel tyranni appellatione notandus, huic obedientiam

lientiam & subjectionem deberi Petrus  
 affirmat. Nec minus Paulus in Epistola ad  
 Romanos cap. xxi. Ubi etiam rationem  
 reddit cur potestati omni supereminenti  
 parendum sit & serviendum, *Quia nulla  
 potestas sit nisi à Deo, & quæ sunt potesta-  
 tes, à Deo esse omnes ordinatas.* Ex quo et-  
 iam concludit, quisquis adversatur pote-  
 stati, Dei ordinationi adversari; eos autem  
 qui divinæ constitutioni resistunt, ipsos si-  
 bi condemnationem accersere. Postre-  
 mo ut occurrat illis, qui possent dicere, ea  
 de causa præcipere, potestatibus obedi-  
 tiam præstari oportere, quia non impune  
 cessurum foret aliter facienti, subjungit,  
 non solum propter iram, id est propter  
 metum irati regis, id faciendum esse, sed  
 etiam propter conscientiam: *διὸ ἀνάγκη  
 ὑπακούειν ἐκ μέρους διὰ τὴν ὀργὴν, ἀλλὰ καὶ  
 διὰ τὴν συνείδησιν.* *Ideo necessitate subditi  
 estote non solum propter iram, sed propter  
 conscientiam.* Quasi conscientiæ nostræ  
 nobis ratio, & ejus erga Deum puritatis  
 & integritatis aliter constare non possit,  
 quam subditos nos fatendo & præbendo  
 regię potestati, aliisque sub rege & à rege  
 constitutis potestatibus. Nempe quia Dei  
 hæc voluntas est, cui resistere nemo cum  
 bona conscientia queat. Idem dixit Petrus  
 cum

cum idem præceptum de subjectione & obedientia regibus præstanda inculcaret, loco jam citato ex Epistola ejus Catholica, ὑποτάγητε ἀπὸ τὸν κύριον. *Subditi estote propter Dominum.* Quare propter Dominum? An non quia Dominus ita vult? Ita certe paulo post exponit, ὅτι ἔτις ἐστὶ τὸ θέλημα τοῦ θεοῦ. *Quoniam ita est voluntas Dei.* Postremo subjungit, quasi liberos hoc agere nos debere, id est regibus parere & subiacere, & non veluti improbitatis velamen & prætextum habentes libertatem, sed sicut servos Dei, ὡς ἐλδοῦντοί, καὶ μὴ ὡς ἐπιχάλυμμοι ἔχοντες τὴν ἐλδοθερίαν, ἀλλ' ὡς ὁδοὶ θεοῦ. Quis servus Dei nisi qui voluntatem ejus exequitur? Quæ autem voluntas alia Dei quam ut regibus subditi simus? Qui prætextu libertatis iis subjici nolunt, ut Deo se inobedientes præbent, nec Dei veri servi sunt, ita nec verè liberi, quandoquidem falsæ libertatis speciem pro velamento obtendunt suæ malitiæ. Quid aliud faciunt illa extremæ barbariæ Molossica monstra quæ hodie regnum Angliæ intoleranda tyrannide conculcant? An dici aliter potest quam eos omnia scelerum & parricidiorum hætenus inaudita prodigia velamento fucatæ libertatis adumbrare? Quid enim sunt mi-

nus ipsi quam liberi, quos tot vitiorum & flagitiorum vinculis obstrictos esse constat? Quid minus autem quam libertatem populo reliquerunt, cui jugum imposuere longe gravius ac durius quam unquam sub ullo regum quos habuere passi sunt? Idem Petrus regem honorandum esse in eadem epistola pronuntiat, ἢ θεὸν φοβεῖσθε, τὸν βασιλέα πρώτῃ, *Deum timeate, regem honorate*. Ita parentes honorari mandat Apostolus Paulus. Hoc & unum est ex Decalogi præceptis quo patrem & matrem honorare jubemur. Regem quippe parentis locum apud subditos tenere, semper & ab omnibus creditum est. Quem qui occidit, plusquàm homicidam, plusquam parricidam censendum esse, vel ipsi gentilium auctores testantur. Tantus honor ab Israëlitis suis regibus habitus est, ut nefas crediderint & piaculum, solio ejus sedere, equum inscendere, sceptrum tenere, ut est in tractatu Sanhedrin cap. 1. Pontifex maximus honorem illi habere & reverentiam debebat, etiam ipsi prophetæ, eique assurgere & coram illo incurvari. Adeo vero honos ipsi debitus ab eo inseparabilis fuit, ut ne ipse quidem honori suo posset renuntiare, quamvis ut de jure suo ita & de honore quilibet possit remittere,

tere, & volenti non fiat injuria. Non ita tamen de rege sic se res habuit. Quin etiam is quodammodo in crimen læsæ Majestatis incidere posset, si quid pati vellet indecorum & parum conveniens majestati suæ. Ita & Romanis more fuit & opinione receptum, *Magistratum qui potestatem suam in administrando non defenderet, imminuti magistratus, veluti majestatis læsæ, reum esse.* Ut est apud Afconium in Verrinas. Rex igitur reus potest esse propriæ majestatis læsæ cum jus suum imminui patitur, aut honori à quoquam derogari, cum non possit illi renuntiare, nec prudens sciens minus honorari velle quam debet. Multa alia sunt quibus regum suorum majestatem amplificare, comiter conservare ac decorare solebant antiqui Judæi tam in vestimentis & ornamentis quam in aliis rebus externis quibus privatorum habitus à regali discernitur. Hoc etiam ejus honori dabant, ut magistrum suum à rege mori jussu discipuli nec publicè nec privatim plangerent, quamvis scirent & crederent non jure occisum. De magnæ existimationis magistris cum mortui essent, plangendo eos clamare consueverant, *Vbi pius, ubi mansuetus, discipulus Esdra, discipulus Hillelis?*

*Hillelis ?* Judam Ben-babam pari lessio  
prosequi & eodem ornare elogio destina-  
verant, nisi temporis calamitate prohibi-  
ti fuissent, quia nempe regis jussu inter-  
fectus fuerat. Regis autem mandato oc-  
cisi non planguntur, ut refertur in Gema-  
ra. Paulus tributa & vectigalia regi ait  
esse pendenda, in Epistola ad Romanos,  
ubi præscribit, non *propter metum*, sed  
*propter conscientiam* regi esse serviendum.  
Et continuo subjicit: *Ideo enim & tributa*  
*solvitis, si quidem ministri Dei sunt in hoc*  
*ipsum servientes.* Et paulo post: *Redden-*  
*dum omnibus esse quod debetur*, præcipit:  
*cui tributum, tributum: cui vectigal, ve-*  
*ctigal.* Non dicit, iusta tantum & levia tri-  
buta vel vectigalia esse solvenda, sed  
quæcunque imposuerit is qui jus habet ea  
imponendi. Magistrum suum discipulus  
est sequutus. Nam dixit ille, *quæ Cesaris*  
*essent, Cesari reddenda.* Præter tributa  
& vectigalia decimas etiam regi suo pen-  
debant Judæi, frugum, arborum & ju-  
mentorum. Quod jus verbis illis Samue-  
lis adstrui putarunt, *Sed & segetes vestras,*  
*& vinearum redditus addecimabit.* Ex qui-  
bus colligitur, Magistros Judæorum pro  
certo tenuisse, capite illo octavo i. Samue-  
lis jus regum declarari, cum ejus auctori-  
tate

tate confirmaverint jus illud decimarum Regi præstandarum, quæ ex lege divina personis tantum sacris deberi viderentur. Habebat etiam potestatem Rex Judæorum tributum imponendi populo cum necessitas belli id exigeret, vel etiam rei propriæ, ut iidem magistri Hebræorum consentiunt. Ministrum Dei esse regem cum loco supra citato Apostolus affirmet, paulo ante eodem capite dixit, regem Dei ministrum esse. *θεὸς γὰρ ἀγγέλους ἐστὶ σοι εἰς τὸ ἀγαθόν. καὶ ὃ τὸ κακὸν ποιῇς φοβεῖ.* Ideo *gladium* eum *gestare* subjungit, *Dei enim esse ministrum, vindicem in iram ei qui malum agit.* Sunt & Dei ministri & servi, quoties populos Deus castigare vult, quos ideo dura aliquando premunt servitute, ex permisso Dei, ut vindictam nempe de eorum peccatis sumat. Sic Nabuchodonosorem Deus *Servum suum* appellat apud Jerem. c. xxvii. *Et nunc itaque ego dedi omnes terras istas in manu Nabuchodonosoris regis Babylonis, servi mei.* Quod & alibi repetit. Eodem etiam capite dicit per prophetam Deus, gentem & regnum quod non servierit Nabuchodonosori, gladio & fame & peste se in eam vindicaturum. *Subjicite, inquit, colla vestra sub iugo regis Babylonis, & servite ei, & po-*  

pulo



*pulo ejus, & vivetis.* Ut ergo reges servi sunt & ministri Dei, ita subjecti regis servi sunt ejus ac ministri. Si credimus novis Evangelistis, novitiisq; Sanctis, doctrinæ paricidalis & Anti-Christianæ auctoribus, rex minister est populi, & servus. Non bella sua sed populi gerit. Populi creatura est, ut vas fictile figuli. Si in Monarchico statu res ita se haberet, ut rex esset populi servus, cum sit contrariorum parratio, inde sequeretur in Democratia quæ populi principatum agnoscit, populos vice versa servire debere. Sed cui serviet? Cervisicæ coctoribus, cerdonibus, ærariis fabris, & aliis ejusmodi furfuraceis tyrannis, qui Christi legi illudunt, & Apostolos ejus perversa emulatione imitantur. Nā illi mortuos suscitabant, isti quod facilius est de vivis mortuos faciunt. Cum reges necant, ministros Dei nō credunt à se trucidari; sed ministros populi, quales illi si fortè fuerunt, quibus ad publica ministeria usæ Resp. Græcorum feruntur, quos *δημοσίς, δ' ἄλλος* appellabant, id est, *servos publicos*. Fanatica est hariolorum Angliæ interpretatio de præcepto Pauli, jubentis omnes subjectos esse potestatibus, & non esse resistendum potestati à Deo ordinatæ monentis. Hanc enim potestatem de populo intelligunt. Quid fieri

non posse putes? Quis ille populus, quem nomine potestatis intelligi volunt? Utrum totus, an pars ejus? Si totus, quinam illi erunt qui populo parere debebunt, ut legitimæ potestati, & à Deo constitutæ? Si pars, de qua parte id explicabunt? Ergo pars populi subjecta erit, pars imperabit. Quomodo imperantem à subjecta discernent? Si de magistratu populi accipient eam potestatem cui resisti vetat Paulus, hoc quidem rectum erit, sed aliud est populus, aliud magistratus. Nec dubium est, quin potestatis nomine, cui obsequium ex verbis Pauli debetur, etiam magistratus ante comprehendere debeat qui à populo creatus est in earepublica in qua populus plus potest. Sed si talis potestas ab Apostolo etiam commendatur populo, ut ei honorem habeat & obedientiam, non minus ex eo sequitur, regibus & à rege constitutis magistratibus ac præsidibus idem ex præcepto Apostolico deberi. Ipse populus, ubi magistratum creavit, subjectus quoque ei esse debet, haud secus ac milites Duci quem sibi imperatorem delegerunt. Nam populus, cum per se rempublicam regere non possit, constituit per quos ipse regi possit. Et illæ ipsæ sunt potestates.

de

de quibus loquitur Paulus , quibus æque honos exhibendus est, sive à populo dominante, sive à rege institutæ sunt. At ridiculum est Fanaticorum commentum, potestates de populo accipientium. Quis ille populus? An Martinus futor, Gulielmus pellio, Johannes sartor? Paulus in Epistola ad Titum cap. III. §. I. *Admone illos principibus & potestatibus subditos esse, & dicto obedire.* Qui sunt illi quos admoneri à Tito vult, ut principibus & potestatibus subditi sint & obediant? Nonne de populo sunt quos auditores & discipulos habuit Titus? Qui sunt illi principes, quibus dicto audientes eos esse præcipit? An populus? Ita censer Enthusiastarum natio, quæ id somniavit cum propheticiis raptaretur deliriis. Cum Reges Apostolus nominat, an etiam de populo eos intelligemus? Pro regibus certè orandum esse idem Apostolus Paulus scripsit I. ad Timotheum cap. II. *Pro regibus, & omnibus qui in sublimitate sunt, ut quietam & tranquillam vitam agamus, in omni pietate & iustitia.* Viderint an se pro Christianis haberi jure prætendant qui reges suos trucidant, ut ipsi regnent cum omni impietate & injustitia; populus autem vitam agat sollicitam, tur-

bis, seditionibus & bellis intestinis semper exercitam & inquietam, nunquam securam. Sed pro quibus regibus precandum esse Paulus admonet? An bonis tantum? Atqui tunc cum hæc scriberet, imperabant vel pessimi. Ergo pro regibus, qualescunque sint, preces faciendæ sunt. Omnes honorandi, etiam mali. Omnibus subditi esse debemus, etiam tyrannice regnantibus. Hæc doctrina est duorum præcipuorum Apostolorum Christi, quorum alter Apostolatum Gentium ab illo concreditum habuit, alter Judæorum. Adeo ut in horum duorum potissimum præceptis totam de regibus observandis & honorandis, quamlibet asperi sint, difficiles, morosi ac duri, Evangelicam regulam contestatam & consignatam esse credere nos oporteat, à qua qui tantulum deflectent, aliud eos Evangelium habere & alium sequi Christum videri necesse est. Non enim Paulus clementes, bonos, & justos tantum reges & magistratus à Deo esse ordinatos nobis insinuavit, sed etiam iniquos & injustos. Cum enim dixisset non esse potestatem nisi à Deo, statim intulit, *Quæ autem sunt, à Deo ordinata sunt.* Quæ clariora haud paulo sunt in Græcis, αἱ ἡ εἰς αὐτὸν ἐκ τῆς θεοῦ τελευτῆς αὐτοῦ.

Id est, *Quæ autem nunc existunt, à Deo constituta sunt.* Hoc enim disertè volunt illæ duæ voculæ, *αἱ ὅς εἰσι.* Alioquin superflua repetitione idem dixisset quod ante, cum scripsit, *Non esse potestatem nisi à Deo.* Nihil enim differunt, *omnes quæ sunt potestates à Deo esse ordinatas, & nullā esse nisi à Deo.* Cum igitur prius generatim dixisset omnē animam potestatibus eminentibus debere esse subiectam, & rationem hujus præcepti hanc reddidisset generalem, quia non est potestas nisi à Deo, haud obscura subiecta continuo clausula innuere voluit, etiam quæ tunc dominerentur, esse à Deo ordinatas. Nempe Romanum Imperatorem qui tunc regnabat. Quod ad Romanos scribens non debuit prætermittere, ne si in genere tantum dixisset non esse potestatem nisi à Deo, illi ad quos scribit, persuadere sibi potuissent de bonis tantum regibus id esse intelligendum, non de Neronibus qui tunc imperium tenebant. Ideo adjecit, etiam quæ tunc erant ac regnabant à Deo esse ordinatas. Enimvero cum illi duo Apostolorum coryphæi iis temporibus fuerint quibus Nero imperium Romanum obtinebat, alter etiam Babylone vixerit sub imperio Parthorum regis, non

est verifimile, quæ de regum honore, ob-  
servantia & obsequio à subditis præstando  
præscripserunt, ad alios reges pertinere  
voluisse quam qui tunc temporis domi-  
nabantur. Non enim probabile est, Pau-  
lum & Petrum de his qui jam decesserant  
aut de his qui nondum nati erant, vel sal-  
tem qui nondum regnum adepti fuerant,  
intellexisse, cum pro his orandum dixe-  
re, iis honorem habendum, & obsequium  
quod subditi regibus debent, iis exhiben-  
dum. Quod esset omnino ridiculum:  
Hæc sanè videtur esse causa cur Petrus &  
Paulus in præscribenda subditis erga re-  
ges obedientia & *ὑποταγή* non de malis  
regibus hoc etiam præceptum diserte de-  
derint, sed reges tantum nominarint.  
Cum enim qui tunc regebant imperiam,  
mali essent, non opus habuerunt discrimen inter bonos & malos ponere. Ex eo  
quippe intelligebatur etiam malis deberi  
ex eorum sententia obsequium, quia  
non alii eo tempore nisi mali regnarent.  
At de servorum *ὑποταγή* expresse Pe-  
trus dixit, non solum eam dandam esse  
dominis clementibus & justis, sed etiam  
pravis & iniquis. *Servi, inquit, sub-  
diti estote dominis, non tantum bonis &  
modestis, sed etiam dyscolis.* Ita enim in

Gracis

Græcis etiam scribendum, *δυσκόλοις*, non *σκολιοῖς*. Et hoc fieri debere, subjungit, *ἀλλὰ σωείδῃσιν ὁ θεὸς*, propter Dei conscientiam. Nempe quia conscius sibi sit Deum ita velle. Paulus similiter regibus obsequendum & serviendum esse dixit, non propter iram metum, sed *ἀλλὰ τὴν σωείδῃσιν*. Quod Petrus *ἀλλὰ τὸν κύριον*, propter Dominum. Quæ omnes expressiones eodem recidunt. Voce *ἐπαγγέλῃς* tam de servis erga dominos quam de subditis erga dominantes reges Scriptura utitur. Nam & subditi etiam vocantur servi in Scriptura, & verbum *κυριεύειν* de regibus eadem usurpat. Sed fortasse an Christus ita suos Apostolos, Apostoli porro Christi ita suos discipulos docuere, verum hæc disciplina non duraverit ultra eorum ætatem. Christiani qui postea sequuti sunt, rem istam pensitatus & accuratius cum examinassent, falsam esse hanc doctrinam compererunt. Reges quippe non esse pluris faciendos quam ministros populi & servos publicos. Non enim à Deo esse eorum potestatem, sed à populo. *Ὑπὸ τοὺς* proinde non *Domini*, ut passim eos appellat Scriptura Sacra, sed populi, esse nominandos. Dispicendum est igitur an sequentis ævi Christiani iisdem vestigiis institerint,



eamdem orbitam triverint, qua Apostoli Christo duce iverunt. Antiquissimus Pater Irenæus, martyr sanctissimus, qui sub secunda ab Apostolis successione floruit, non aliam quam Apostoli docuere, regulam tenuit circa obedientiam & subjectionem regibus debitam. Is lib. v. adversus hæreses cap. xxiv. ubi docet, non à Diabolo sed à Deo constitutas esse terrenas potestates, hoc idem aliquot testimoniis ex Scriptura veteris pariter ac novi fœderis allatis probat. Morem autem Apostolorum sequens aperte de sæculi sui potestatibus loquitur, id est de regibus qui tunc regnabant. *Non enim, inquit, Diabolus determinavit hujus sæculi regna, sed Deus.* Deinde citat ex Salomone: *Regis cor in manu Dei.* Et per Salomonem ait verbum, *per me reges regnant, & potestates tenent iustitiam. Per me principes exaltantur, & tyranni terra.* Deinde locum adducit Pauli quem jam supra attulimus, *Omnes potestatibus sublimioribus subiecti estote.* Et ostendit, non de Angelicis potestatibus nec de invisibilibus id dictum esse ab Apostolo, sicut nonnulli placuit, *sed de his quæ sunt secundum homines potestates,* ὧν τὸ κατὰ ἀνθρώπους ἐστὶν αὐτῶν, id est, *quæ inter homines versantur*



aut hominibus dominantur. Quoniam, inquit, *absistens à Deo homo in tantum efferauit, ἐνεαώθη, ut etiam consanguineum hostem sibi putaret, & in omni inquietudine, & homicidio & avaritia sine timore versaretur, imposuit illi Deus humanum timorem. Non enim cognoscebant timorem Domini, ut potestati hominum subjecti & lege eorum adstricti aliquid assequantur iustitia, & moderentur adinvicem, in manifesto propositum gladium cernentes, sicut Apostolus ait, Non enim sine causa gladium portat. Subjungit postea: Et propter hoc & ipsi Magistratus instrumentum iustitia leges habentes, quæcunque iuste & legitime fecerunt, de his non interrogabuntur neque poenas dabunt. In ultimo nempe iudicio. Quæcunque autem ad eversionem iusti inique & impie contra legem & more tyrannico exercuerint, in his & peribunt iusto iudicio Dei ad omnes aequaliter perveniente & in nullo deficiente. Ubi notandum est, iudicem ab eo constitui Deum eorum quæ contra leges à magistratibus summis & regibus commissa fuerint. Postremo scribit: Cujus enim iussu homines nascuntur, huius iussu & reges constituuntur, apti his qui in illo tempore ab illis reguntur.*

Quorum verborum hic est sensus, Reges à Deo constitui prout sunt illi populi à quibus regi debent. Nam quibusdam populis justos & clementes reges convenire, quibusdam duriores & asperiores, nonnullis etiam plane superbos & crudeles & tyrannicos. Cum tales à Deo pro populorum natura & moribus constituentur, malos tamen justum Dei judicium non evadere, quamvis in pœnam populo dati ab ipso Deo sint. Quod his verbis idem sanctus Martyr explicat: *Quidam enim illorum ad correctionem & utilitatem subjectorum dantur & conservationem justitiae: Quidam autem ad timorem & pœnam & increpationem: Quidam autem ad illusionem & contumeliam & superbiam, quamobrem & digni sunt Dei justi judicio sicut prädiximus, in omnibus aequaliter superveniente.* Tria regum genera facere hic eum palam est. Quosdam enim clementes, benignos & pios esse, & bono publico studentes; quales fuere inter Romanos Titus, Antoninus cognomento Pius, & Marcus philosophus. Quosdam severos & delicta rigide punientes; quales multos constat fuisse in Republica Romana, sed præcipue Severum, Alexandrum Mammææ, & Pertinacem. Alios  
autem

autem superbos, crudeles, & planè tyrannos, ad ludibrium & contumeliam populi imperantes, non ad utilitatem ut primi, neque ad correctionem ac castigationem ut secundi. Hoc genus est de quo ait Apostolus; Θεὸς γὰρ ἀγαθὸς ἐστὶν εἰς ἀγαθόν. ἐὰν δὲ τὸ κακὸν ποιῇς φοβῆ. Et paulo post: ἐκδικήσας ἐσὶν εἰς ὀργὴν τὸ τὸ κακὸν πράσσον. *Vindex in iram ei qui malum agit.* De primis illi sunt quorum ἀναίμακτον fuisse imperium veteres scriptores tradunt, quale fuit Antonini Pii, sub quo adeo nullum percussum fuisse Senatorem auctor vitæ ejus scribit, *ut etiam parricida confessus in insula deserti poneretur, quia natura legibus vivere ei non liceret.* Tales sunt quos *patria patres* verè nominarunt antiqui, qui & *populi patres* dicti, ut fuit apud Gallos Ludovicus duodecimus. Primi ergo trium illorum generum regum optimi censentur, medii boni, tertii pessimi. Primi amandi, secundi timendi, tertii odio digni. Sunt isti qui de populo suo dicunt, *oderint dum metuant.* In totidem facies licet dividere naturas & proprietates patrum, quorum alii sunt indulgentes, alii severi, alii sævi. Ad duos regnandi modos quidam reducunt omnem in regibus dominandi rationem, ut alia sit paternæ  
boni-

bonitatis, alia tyrannicæ crudelitatis. Photius de libro Appiani qui inscribitur *Ρωμαϊκῶν βασιλική*, deque primo Romanorum rege Romulo scripsit, ἄρξας ἢ πατρικῶς μᾶλλον ἢ τυραννικῶς, ὅμως ἐσφάγη. *Hic cum paterno potius animo quam tyrannico regnaverit, nihilominus jugulatus est.* Quod idem fas est dicere de Carolo primo Magnæ Brittanniæ rege. Utriusque porro generis ac moris reges, æque bonos ac malos, à Deo constitui, Irenæus clare testatur. Nec tamen malis semper impune esse quod male agant, sed Deo iudicium & vindictam reservari, quam subditis de regum suorum five tyrannorum malefactis sumere sit nefas. Non hæc propria sanctissimi Ecclesiæ patris & Martyris fuit sententia, sed omnium qui per ea tempora Ecclesiæ Christi præfuerunt, aut in ea Christiane ac pie conversati sunt. Justinus in Apologia pro Christianis, secundum præcepta Christi dicit eos tributa & vectigalia Romanis imperatoribus solvere, & sic quæ Cæsaris sunt Cæsari reddere, quæ Dei Deo, dum Deum ipsum adorant solum & colunt, regibus autem & principibus hilares ac libentes serviunt ac ministrant. Οἴην, inquit, θεὸν μόνον προσκυνοῦμεν, ὑμῖν δὲ πρὸς τὰ ἄλλα χαίροντες ὑποτάσσεται.

ρεῖν, βασιλεῖς καὶ ἄρχοντες ἀνθρώπων ὁμολογῶντες, καὶ ὀυκννοὶ μὲν τῇ βασιλικῇ δυνάμει καὶ σώφρονα τῷ λογισμῷ ἔχοντες ὑμᾶς ὀρεθῆναι. Unde & Deum solum adoramus, vobis autem ad cetera omnia libenter & hilari animo inservimus, reges vos ac principes generis humani esse fatentes, etiam orantes ut cum regia potestate moderatum animum & temperantem geratis. Hæc loquitur ad eos principes qui cætera boni, sed idolatriæ dediti, patiebantur Christianos ad supplicium quotidie rapi innocentes, sed solo hoc nomine odiosos. Nam de nomine accusabantur tantum, non de ullo crimine. μέχρι ὀνόματι & κατηγορία. Quanto nos hodie peiores Christiani prioribus illis, quos miramur potius quam imitamur? Nam quis hoc tempore ferret principem diversæ religionis quamvis ab eadem Christi appellatione se jactantis? Pontificii sane Reformatum regem sibi dominari non paterentur, nec Reformati Pontificium. Atqui vel hæreticos tulerunt etiam sub medio imperio Christiani, ut Arrianos, ut Constantios & Valentes. Sed quanto illud magis horrendum quod nec Reformati pati potuerunt Reformatum? Quod talem tales nefario scelere interemerunt? Sed cum hac differentia

tia quod impii pium? Athenagoras alter Christianus philosophus in defensione sua pro Christianis quam Marco Antonino & filio ejus Commodo inscripsit, ab alto illos, id est, divinitus regnum accepisse dicit, quia regis anima secundum prophetæ dictū in manu Dei est, & ut omnia sub eorum potestate sunt posita, ita Deo & filio ejus Christo omnia esse subiecta. Ως γὰρ ὑμῖν πατρὶ καὶ υἱῷ πάντα κεχείρωται ὡς θεὸς βασιλείᾳ ἐληφόσι, βασιλέως γὰρ ψυχὴ ἐν χειρὶ θεῶ φησι τὸ πεφνηκὸν πνῦμα, ὥτως ἐνὶ τῷ θεῷ ἔστι τὸ παρ' αὐτοῦ λόγος υἱὸς νομίζων ἀκείῳ πάντα ἐπέτακται. *Vt enim vobis patrī natoque omnia sub sunt, de calo imperiū nūc consequutis; nam anima regis in manu Dei est, secundum spiritum propheticū: ita uni Deo & verbo ejus filio menti inseparabili omnia subiecta sunt.* Nec dici potest hominem philosophum & Christianum adulatoriē hęc de principe gentili scripsisse cum aliter sentiret, sed ita omnino sentit scripsitque quomodo omnes tunc Christiani loqui & opinari de regibus didicerant, juxta regulam à Christo & Apostolis traditam. In fine illius defensionis notanda & hęc verba sunt quibus Apologiam suam clausit, *Ecquienim consequi digniores sunt quæ petimus, quam nos ad eæ vobis*

*devoti*

*devoti & addicti? Nos enim pro imperio vestro preces ad Deum fundimus, & ut filius, quod est iustissimum, patri in regno olim succedat, utque vestrum imperium magis magisque amplificetur. Denique ut omnia vobis ex animi vestri sententia eveniant oramus, quod & nobis salutare fuerit, ut quietam tranquillamque vitam degentes interim ad qualibet imperata prompte inserviamus. Paulo inferius descendamus, & Tertullianum qui sub Severo aliquot post annis vixit advocemus. Quid ille? An aliam de regibus, quam Irenæus, quam Justinus, quam Athenagoras colendis & observandis sententiam scriptis suis publicavit? An aliter quam illi Christianus fuit? In Apologetico suo, illius esse imperatores ipsos, cuius & cælum est, dicit. Inde est, inquit, Imperator, unde & homo antequam imperator. Inde potestas illi unde & Spiritus. Ovum ovo similis non est, quam hæc verba illis Irenæi germana sunt, & sensu saltem si non voce eadem: Cujus enim jussu homines nascuntur, hujus & jussu reges constituuntur. Eodem loco ita idem sanctus & pius ac gravis scriptor ait, nulla imperatoribus adulandi suspicione violandus: Nos enim pro salute imperatorum Deum invocamus*



*aternum, Deum verum, Deum vivum.*  
Pro quibus imperatoribus? An bonis tantum? Immo ut ipse declarat pro omnibus, sive boni essent, sive mali nimirum. *Illuc suspicientes Christiani, nempe ad cœlum, manibus expansis quia innocuis, capite nudo quia non erubescimus, denique sine monitore quia de pectore oramus, precantes sumus omnes semper pro omnibus imperatoribus, vitam illis prolixam, imperium securum, domum tutam, exercitus fortes, Senatum fidelem, populum probum, orbem quietum, & quacunque hominis & Caesaris vota sunt.* Ecce omnes Christiani tunc temporis pro omnibus imperantibus precantur. An hoc facerent qui reges suos ipsi occidunt? Ne votis quidem illius ævi Christiani in hoc scelus erumpebant, sed vitam illis prolixam optabant. Precabantur suis imperatoribus imperium quietum, domum tutam, populum obedientem. Quam longe hæc dissident ab improborum sectariorum disciplina & factis, turbas ubique miscentium, pacemque & quietem imperii sub quo vivunt nefarie concutientium. Exercitus fortes imperatori suo gentili & idolatræ genuini Christi discipuli precabantur, Senatum fidelem, populum probum.



bum. Exercitus hic fortes sunt, sed in ne-  
cem ac perniciem regis sui. Senatus est  
infidelis, populus improbus. Sed respon-  
debit hic aliquis infelix sectarius, adulatos  
tunc fuisse imperatoribus suis Christia-  
nos, & vota mentitos quæ dixerant ad  
vim evadendam. Occurrit huic objectio-  
ni Tertullianus in sequentibus, atque ut  
ostendat se ex animi sententia tales preces  
pro imperatoribus ad Deum fecisse, his  
argumentis id probat: *Qui ergo putave-  
ris, inquit, nihil nos de salute Caesarum cu-  
rare, inspicere Dei voces, litteras nostras  
quas neque ipsi supprimimus, & plerique  
casus ad extraneos transferunt, scitote ex  
illis præceptum esse nobis ad redundantiam  
benignitatis, etiam pro inimicis Deum ora-  
re & persecutoribus nostris bona precari.  
Qui magis inimici & persecutores Chri-  
stianorum quam de quorum maiestate con-  
venimur in crimen? Sed etiam nomina-  
tim atque manifeste, orate inquit pro regi-  
bus & pro principibus & potestatibus ut  
omnia tranquilla sint. Duplici ratione ad-  
ductos se pro imperatoribus Deum dicit  
orasse, primum quod divino præcepto  
juberentur orare Deum pro inimicis, &  
bona iis precari, nullos autem tunc po-  
tentiores & crudeliores inimicos se ha-  
buisset*

buisse quam ipsos Cæsares , Christianorum acerrimos persecutores. Deinde quod etiam nominatim divina Scriptura juberet, *pro regibus orare & principibus ut omnia tranquilla essent.* Viderint an his duobus præceptis satisfecerint qui regem suum Christiani Christianum, non inimicum , non persecutorem regno & vita spoliarent, sobolem ejus successionis legitimæ jure privarunt , & ut hoc efficerent, reipublicæ tranquillitatem perturbarent, cædibus , rapinis, vexationibus in omnes ordines grassati sunt, novamque formam status per vim & contra leges induxerunt , tyrannidemque plurimum pro uno rege invexerant. Jurabant & Christiani tempore Tertulliani per salutem Imperatorum. Idem in eodem Apologetico: *Sed & juramus sicut non per genios Cæsarium, ita per salutem eorum, qua est augustior omnibus genis.* Paulo post ait Deum gentibus imperatores præfecisse: *Nos judicium Dei suscipimus in imperatoribus qui gentibus illos præfecit. Id in eis scimus esse quod Deus voluit, & pro magno id juramento habemus.* Non ergo à populo suam accepere potestatem reges, sed à Deo ipso, qui id quod habent in illis esse voluit, & quales voluit gentibus imposuit

posuit regnatos. Hæc fuit religio & pietas tunc temporis Christianorum in Imperatorem, *quem necesse est*, ut ait ibidem Tertullianus, *suscipiamus ut eum quem Dominus noster elegit. Et merito dixerim, noster est magis Caesar, ut à nostro Deo constitutus.* Quam adversis frontibus pugnat hæc veterum doctrina Christiana cum ista fanaticorum, vere Anti-Christiana, quæ sancit, populum esse figulum regis, regem autem vas esse à populo fictum, ut figulo suo? Qui tam facile rota quasi figulari reges confingunt, non mirum est si tam nullo negotio eosdem confringant. Soli Deo regem idem ibidem subjicit. Non ergo populo subjiciendus ille qui solo Deo inferior est, ut idem ait Tertullianus: *Sed etiam quod temperans majestatem Caesaris infra Deum, magis illum commendo Deo cui soli subjicio. Subjicio autem cui non adæquo.* Et paulo post, *Satis habeat appellari Imperator. Grande & hoc nomen est quod à Deo traditur.* Capite sequenti patrem esse patriæ imperatorem dicit, atque ita tunc vulgo vocabantur Cæsares. *Dominus enim meus unus est, Deus omnipotens, æternus, idem qui ipsius qui pater patriæ est quomodo dominus est. Sed gratius est nomen pietatis quam pote-*

*potestatis. Etiam familia magis patres quam domini vocantur. In eodem Apologetico cap. xxxv. Parricidas appellat, qui conjurationis ad Domitianum occidendum focii & conscii fuerant. At qualem imperatorem, quam malum, Deus bone, & quantum tyrannum! Sed & qui nunc scelestarum partium socii aut plausores quotidie revelantur post vindemiam parricidarum racematio superstes, quam recentissimis & ramosissimis laureis postes praestruebant? Si parricidae Christianae Ecclesiae patri & doctori vocantur, qui pessimum principem ac de crudelitate Neroni parem, unde & Nero cognominatus est, occiderunt, quo nomine erunt dicendi qui Christianum regem & pium infami supplicio mactandum & capite obtruncandum carnifici tradiderunt? Quot vero parricidia commisisse censendus ille nefarii latrocinii patronus, qui decem millia cervicum regi optavit, ut totidem ei demeti possent? Toties parricidii reus peragi debuit; quot cervices demi regi suo voluit ac vovit. Circa eadem ferme tempora quibus Tertullianus floruit incipiebat cognosci Origenes. Is in libris contra Celsum eam ipsam quam omnes Ecclesiae patres haecenus defenderant doctrinam propugna-*

pugnabit de regibus honorandis & eorum  
 majestate comiter conservanda. Sic enim  
 lib. viii. scribit ex Daniele, Deum esse  
 verum, non Jovem poëtarum Saturni fi-  
 lium, τὸν βασιλεῖς κατιστάντω καὶ μετιστάντω,  
 καὶ τὸν χεῖσι μὲν καὶ χαρὸν ἐγείροντω ἐπὶ τῇ γῆς.  
*Qui reges constituit ac mutat, resituitq;*  
*Et eum qui sit bonus in tempore suo in ter-*  
*ris excitat.* Paulo post addit, καὶ τὸ αὐτό γε  
 ποιεῖτωσαν μὲν ἅπαντες τὸ μὲν Ὀμηρικὸν κα-  
 τάλυνοντες δόγμα, τὸ δὲ θεῖον ἀεὶ βασιλείας τη-  
 ρῶντες, καὶ τὸ τὸν βασιλέα πμῶν φυλάττοντες.  
*Faciant idem quod ego omnes, doctrinam*  
*quidem Homericam rejicientes, sed divi-*  
*num praeceptum de regis majestate servan-*  
*tes ut regem honorent.* Idem eodem loco  
 scribit, non esse, secundum Homerum &  
 poëtas cæteros, Saturni filium Jovem, qui  
 regna distribuit & reges constituit in sin-  
 gulis provinciis, sed Deum universi recto-  
 rem, qui novit quem cui regioni præfice-  
 re debeat, ἀλλ' ὁ διοικῶν τὰ σύμπαντα θεός,  
 εἶδεν ὅτι πῶς ποιεῖ καὶ τὸν τόπον τῶν βασιλέων  
 καταστάσας. Athanasius in sermone de cru-  
 ce & passione Domini, regem ideo dicit  
 ad testimonium dicendum vocari non  
 posse quia superior actoribus sit ac judici-  
 bus: *Nam si reges terra ad humana tribu-*  
*nalia in testes vocare nefarium est, ut-*  
*pote*

*pote majores & actoribus & judicibus, cur increatum ad creata accersimus? Hoc est quod Judæi in Talmude tractatu Sanhedrin testantur; Regem non dicere testimonium, nec in eum dici. Ergo qui citari ad testimonium dicendum non potest, nec in eum testimonium fas est dicere, ac proinde nec accusari nec judicari posse constat, quandoquidem accusatio non procedat, nec condemnatio sine testium denuntiatione, aut testimonii dictione. Paulatim progrediendo jam pæne ad ea tempora pervenimus quibus celeberrimi & sanctissimi Ecclesiæ Doctores & Patres vixere. Testimonium eorum audiamus super hac doctrina, quam totjam auctoribus Ecclesiasticis confirmavimus. Quæramus igitur ex Ambrosio, Augustino & Hieronymo, an propriam sibi semitam fecerint, de relicta illa via lata & regali quam munivit Christus, quam post eum Apostoli desabulaverunt, quamque omnes deinceps Ecclesiæ Antistites Græci, Latini & Africani calcaverunt. Primus procedat Ambrosius. Is in Apologia Davidis cap. x. cui titulus est, Quod David quamvis rex esset & solutus legibus humanis, voluerit tamen se subditum esse Deo, cui soli peccaverat, ita ad illa verba*  
Psalmi

*Psalmi I, Tibi soli peccavi commentatus est, Rex utique erat, nullis ipse legibus tenebatur, quia liberi sunt reges à vinculis delictorum. Neque enim ullis ad pœnam vocantur legibus, tuti imperii potestate. Homini ergo non peccavit cui non tenebatur obnoxius, sed quamvis tutus imperio, devotione tamen ac fide erat Deo subditus. Quidã nuper male feridatus Anonymus ex illo profano sectariorum grege qui regum se hostes profitentur, & legum divinarum humanarumque inimicos quæ regum majestatem inviolatam servandam præscribunt, ausus est scribere, Davidem cum dixit ad Deum, Tibi soli peccavi, confiteri Deum solum peccata posse ipsi remittere. Quilibet, inquit, ex populo tantumdem dicet. En ut imperitia cum improbitate in istis nebulonibus ex pari certat? Quasi scilicet sub veteri fœdere remissio peccatorum, quam ad vitam æternam adipiscendam solus sanguis Christi in novo Testamento nobis acquisivit, locum tunc habuerit, cum David Deo confitebatur, ei soli se peccavisse. Hæc tam putida sunt & insulsa & falsa, ut mirer proficisci potuisse à summi Theologi & pastoris discipulo. Idem Ambrosius commentario in Epistolam ad Romanos, ad istum*  
ver-



versiculum : Nam & idcirco tributa penditis, hæc verba posuit : Ideo dicit tributa præstari, vel quæ dicuntur fiscalia, ut subjectionem præstent per quam sciant non se esse liberos, sed sub potestate degere quæ ex Deo est. Principi enim suo qui vicem Dei agit sicut Deo subjiciuntur, sicut dicit Daniel Propheta Dei est inquit regnum, & cui vult dabit illud. Vnde & Dominus, Reddite, ait, quæ sunt Cæsaris Cæsari. Huic ergo subjiciendi sunt, sicut Deo, cujus subjectionis probatio hæc est, quia illi pendunt tributa. Idem commentariorum in Lucam, quos tamen alterius esse auctoris nonnulli volunt, lib. iv. ad illa, Mitte hominem. Magnum quidem est, inquit, & spiritale documentum, quo Christiani viri sublimioribus potestatibus docentur debere esse subiecti, ne quis constitutionem regis terreni putet esse solvendam. Si enim censum filius Dei solvit, quis sic tantus est qui non putet esse solvendum? Et ille censum solvit qui nihil possidebat, tu autem qui sæculi sequeris lucrum cur sæculi obsequium non recognoscis? Cur te supra sæculum quadam animi arrogantia feras, quum sæculo sis mira cupiditate subiectus? Quid ille sanctus pater diceret, si nunc viveret, & si videret quæ fiunt ab Independentibus?



bus? Hicerte non solum supra sæculum se ponunt, sed Dei tribunal invadunt, cujus est solius Reges plectere eosque de folio ob peccata sua deicere. Certe ipse ille Ambrosius, adeo animosus & fortis etiam contra Imperatorem in tuendo jure Ecclesiæ & denegandis Cæsari Basilicis, nihilominus eadem illum posse fatetur quæ Samuel Israëlitis denuntiat passuros eos esse sub rege quem à Deo petebant. Sic enim in Epistola xxxii. *Quid igitur? Non humiliter responsum à nobis est? Si tributum petit, non negamus. Agri Ecclesiæ solvunt tributum. Si agros desiderat Imperator, potestatem habet vindicandorum. Nemo nostrum intervenit. Potest pauperibus collatio populi redundare. Non faciam de agris invidiam. Tollat eos si libitum est. Imperatori non dono; sed non nego. Idem Epist. xxxiii. Respondi, si à me peteret quod meum esset, id est fundum meum, argentum meum, jus ejusmodi meum, me non refragaturum. Si patrimonium petitur, invadite; si corpus, occurram. Vultis in vincula rapere? vultis in mortem? voluptati est mihi. Non ego me vallabo circumfusione populorum. Non sic loquuntur, nec sic facere aut pati parati sunt plurimi ex hodiernis Theologis. Sed fortasse Am-*

brosius qui olim politicus fuit , minus ad gustum nostris antistitibus videbitur, quasi retineret aliquid ex pristina conversatione cum illa scriberet. Testimonium igitur denuntiabimus Augustino. An ejus auctoritatem in hac re parvi facient quam in aliis tanti æstimant ? Regem legibus esse solutum clare testatur Epist. xviii. in causa partis Donatistarum, qui petebant se audiri coram præfectis Imperatoris cum Valentino Episcopo ex parte Catholicorum. Dicit ibi Augustinus, vel saltem clerici Hipponenses , non posse hos illis talem judicem concedere qui deberet judicare secundum leges jam contra eos constitutas. *Quanto ergo, inquit, melius ipse Imperator, qui non est eisdem legibus subditus, & qui habet in potestate alias leges ferre, cum ei collatio vestra fuerit recitata, de tota ipsa causa poterit judicare?* Idem enarratione in Psalmos comparat regis potestatem Dei potestati & Christi. Ut enim Deus qui legis auctor est, contra illam non facit cum poenam legis alicui remittit, quod non posset facere qui Dei minister est tantum: Sic regem qui legem tulit, contra legem suam potest privilegium cui velit dare & indulgentiam poenæ quæ lege ipsius sancita est, quod non  
lice-

liceret ei iudici qui vice regis iudicaret, quia secundum leges regis iudicare debet. Non ergo Deus, inquit, contra legem suam, quia nec imperator contra leges suas facit, quando confessis dat indulgentiam. Moyses minister legis, Christus promulgator legis. Moyses lapidat ut iudex, Christus indulget ut rex. Idem in lib. iv. de Civitate Dei cap. xxxvi. dicit, Deum illum felicitatis auctorem, quia solus est verus Deus, ipsum dare regna terrena bonis & malis, neque hoc temere, & quasi fortuito, quia Deus est, non fortuna, sed pro rerum ordine ac temporum occulto nobis, notissimo sibi. His plane verbis vult tam bonos quam malos reges à Deo constitui. Et paulo post, Et ideo regna mundi huius Deus bonis & malis communiter præstat, ne boni ea tanquam munera Dei magna concupiscant. Idem lib. v. cap. xix. Cum Neronis crudelitatem & luxuriam multis exaggerasset, subjungit, Etiam talibus dominandi potestatem non dari nisi Dei providentia, quando res humanas iudicat talibus dominis digniores. Quam sententiam tuetur auctoritate vocis divinæ, loquente Dei sapientia, Per me reges regnant, & tyranni per me tenent terram. Deinde adjicit, sed ne tyranni, non pessimi

*atque improbi reges, sed veteri nomine fortes dicti existimentur. Vnde ait Virgilius, Pars mihi pacis erit dextram tetigisse tyranni. Apertissime alio loco de Deo dictum est, qui regnare facit hominem hypocritam propter perversitatem populi. Ex qua doctrina colligere licet, & libere etiam verique dici potest propter perversitatem populi Anglicani Deum permisisse ut bonus rex iis auferretur, & in locum ejus ad tempus succederent aliquot tyranni & hypocritæ, quibus Deus dedit potestatem castigandi peccata populi. Idem eodem libro cap. xxi. statuit dandi regni atque imperii potestatem nisi Deo vero tribui non debere, qui dat felicitatem in regno calorum non nisi solis piis, regnum vero terrenum & piis & impiis. sicut ei placet, cui nihil injuste placet. Adjungit ibidem, illum unum verum Deum, qui nec judicio nec adjutorio deserit genus humanum, quoniam voluit & quantum voluit, Romanis regnum dedisse quod dedit Assyriis & Persis. Et paulo post: Ipse etiam regnum dedit sine cultu eorum per quorum cultum se isti regnasse crediderunt. Sic etiam hominibus: qui Mario, ipse Cajo Casari: qui Augusto, ipse & Neroni: qui Vespasianis vel patri vel filio suavissimis imperatoribus,*

*bus, & ipse crudelissimo Domitiano: Et ne per singulos ire necesse sit, qui Constantino Christiano, ipse Apostata Iuliano, scilicet regnum dedit. Quid de Hieronymo dicemus? An aliud ille docuit? In Epistola ad Damasum, Ismaëlem filium Nathaniæ parricidam appellat, quia Godoliam interfecerat, quem rex Babylonis Nabuchodonosor præfecerat terræ Judeæ, id est, reliquiis Israëlitarum, cum cæteros abducendos in Babyloniam captivos curasset. Ab Ozia quippe sub quo orsus est prophetare Esaias, usque ad Sedechiam qui extremus regnavit & qui cæcus in Babylonem ductus est, fuisse reges undecim, & duodecimum Godoliam, quem constituerat rex Babylonis super terram, quem interfecit Ismaël filius Nathaniæ inter medias epulas, reliquiarum patriæ parricida. Si is qui constitutum à tyranno victore reliquiarum populi regem, qui remanebat in patria servus, interfecerat, parricida patriæ Hieronymo appellatur, quo nomine censuisset idem nuncupandos eos, qui regem suum longa serie successionis ab atavis & atavorum atavis hæreditarium in Anglia regnum obtinentem, nefario scelere, infando iudicio, ignominioso mortis genere trucidarunt? Idem Hieronymus*

mus commentario in Ecclesiasten ad illa verba, cap. viii. *Ergo os regis observa; Videtur mihi quidem*, inquit, *præcipere juxta Apostolum, regibus & potestatibus esse obsequendum, maxime lxxi. interpretibus imperativo modo dicentibus, σὺμα βασιλέως φύλαξον.* Agnoscit nimirum, sicut & alii omnes Ecclesiæ patres ac pastores veteres, doctrinam Evangelicam quæ præcipit obsequium regibus esse præstandum, non minus malis quam bonis, æque juste ac tyrannice imperantibus. Ex his omnibus patrum testimoniis quæ produximus, Christi & Apostolorum disciplinam Evangelicam de regum sacrosancta & inviolabili majestate confirmantibus, tria omnino ista constare certum est, Reges tam bonos quam malos, tam justos quam tyrannos, à Deo esse constitutos, à Deo solo esse judicandos, legibus quas ipsi faciunt solutos esse. Nos ad inferiora tempora non descendemus, ut Ecclesiæ doctorum sententiam exquiramus, qui post Augustinum ad hanc usque ætatem vixerunt. Abunde illos quos citavimus huic probationi sufficere existimo, quamvis innumeri non desint ex recentioribus quibus hæc eadem federit opinio, verbo Dei & Apostolicæ regulæ consentanea.

De

De Hispanis Ifidorus Hispalensis Episcopus in sententiarum lib. III. cap. LI. *Populi peccantes iudicem metuunt, & à malo suo legibus coërcentur. Reges autem, nisi solo Dei timore metuque Gehenna coërceantur, liberè in præceps ruunt, & per abruptum licentia in omne facinus vitiorum labuntur.* De Gallis Gregorius Turonensis lib. v. cap. xvii. subditos ita loqui facit ad Chilpericum: *Si quis de nobis, ô Rex, iustitiæ tramites transcendere voluerit, à te corripiri potest; si verò tu excesseris, quis te corripiet? Loquimur enim tibi, sed si volueris audis; si autem audire nolueris, quis te damnabit nisi is qui se pronuntiavit esse iustitiā?* De Germanis Otto Frisingensis in Epist. ad Fredericum I. *Cum nulla inveniatur persona judicialis quæ mundi legibus non subiaceat, subjacendo coërceatur, soli reges, utpote constituti supra leges, divino examini reservati, sæculi legibus non coërcentur. Vnde est illud tam regis quam Propheta testimonium, tibi soli peccavi.* Ad infima etiam tempora doctrina hæc Evangelica, de regum absoluta potestate nullius examini nisi Dei obnoxia, à multis non solum privatis doctoribus retenta est, sed etiam à collegiis & Synodis sancita. Sorbona hodieque eam tenet, & à Concilio



cilio Constantiensi firmata est. Sed in agro Dominico ante multa sæcula, pro bona semine lolium & avenas pravi magistri severunt, & malæ herbæ bonis mixtæ succreverunt. Usque ad Augustinum nemo Doctorum Ecclesiasticorum variavit, aut dissidentem super ista re protulit sententiam. Constans & perpetua in Ecclesia conservata est per quingentos & amplius annos prædicatione, commentatione, tractatione, disciplina & usu hæc doctrina. Immo eo usque pura & intemerata permansit donec extitere qui supra reges ipsos se constituerent & imperatores, Ecclesiæ nimirum Romanæ Antistites. Quamdiu enim creditum est soli Deo reges subjici, nec aliam in terris potestatem neque sæcularem neque Ecclesiasticam supra eos ullam extare, tamdiu nemo dubitavit, quin reges ab alio non dependerent nisi à Deo ipso, illi soli actuum suorum rationem reddituri, ab eo solo puniendi, regno privandi & vita, à quo constitutos eos esse constaret. Et merito sane. Judicari quippe nemo potest nisi à pari vel superiori. Cum reges autem nec parem nec superiorem in regno suo habere putarentur, ne populum quidem universum cui imperabant & cujus erant domini;



domini; non posse certe à quoquam ea illos exui potestate quam à solo Deo accepissent, certa & fixa omnium opinio fuit. Ubi vero exorta est potestas quam regnum in terris possidere majus regum imperio persuasum fuit hominibus Christianis, ut quæ Christi vices gereret, tum illi potestati multorum ejus adseclorum & satellitum sententia subjici cœpta est regia & imperatoria majestas. Ex hac ipsa tamen, quamvis impura & falsa, opinione facile potest confirmari qualis olim & semper fuerit vera Ecclesiæ & Evangelica de regibus doctrina. Nam si improbus ille cumulus qui temere & perperam justæ mensuræ ex zizaniis adjectus est, deruatur, tum pura sinceri seminis natura apparebit. Tolle illud falsum & impurum dogma, quo Papa Romanus populos solvere sacramento fidelitatis quam regi promiserant, posse censetur, tum remanebit sana & sincera qualis à Christo & Apostolis ejus tradita est & diu in Ecclesia conservata doctrina, quæ populum regi suo ita obligatum & obstrictum statuit, ut nullo regis facto, quantumvis scelerato & tyrannico, ab ejus obsequio & subjectione liberari possit. Pontificii ergo dum credunt traduntque, populum nisi

sacramento fidelitatis à Romano Pontifice solutum rebellare contra regem suum non posse, nec ullam justam habere causam arma in eum capiendi, hoc ipso statuunt, debere prius solvi eo Sacramento, ut jure possit arma capere & insurgere contra suum regem. Non posse autem nisi per Pontificem Romanum eo fidelitatis juramento solvi dum ponunt, nobis etiam eo ipso facile persuadent, populis nulla ratione & nulla causa licere principem cui subjecti sunt, abdicare, quia nullo modo possunt solvi, nec ab ullo fidelitatis quam jurarunt sacramento. Tam enim falsum est secundum leges divinas & humanas Pontificem Romanum posse subditos sacramento fidelitatis absolvere, quam subditis licere per se id agere, ut illo sacramento liberentur, & liberati bellum regi suo inferant, eum accusent, judicent, damnent, regno exuant & vita. Maneat ergo indubitatum & certum id, quod hoc capite demonstravimus ex doctrina patrum, primorum quatuor sæculorum, quæ sola Evangelica & Christiana censerī debet, reges etiam malos & injustos à Deo constitui, & proinde Deum solum habere iudicem, supra leges esse, nullam esse legem scriptam, non scriptam, naturalem

ralem neque divinam , quæ rei possint fieri à subditis suis , neque apud subditos suos. Quia si hi possent iudices sedere contra reges suos , rerum vices inversæ viderentur , & populus pro rege imperaret , rex vero populo subiectus haberetur. Ita nulla uspiam foret regia dominatio , nulla optimatum , sed ubique populus rex esset , resque publicas gubernaret.

---

## C A P V T I V.

**D**Uobus prioribus Capitibus explicavimus totum doctrinæ Judæorum simul & Christianorum censum de obsequio, obedientia & fidelitate quæ regibus debentur, etiam malis, etiam tyrannis, quoniam à Deo æque justos atque injustos reges esse Scriptura utriusque fœderis testatur. Nunc tractandum & dispiciendum, an utriusque Ecclesiæ Judaicæ & Christianæ primitivæ usus responderit præceptis divinæ legis, reges ita observari jubentibus, ut nulla iusta causa fuerit apud Deum populis contra reges arma capiendi, eis resistendi, vim vitæ eorum inferendi, regno illos quocumque modo dejiciendi. Parum quippe fuerit, hanc doctrinam  
utrosque

utrosque ex veteris & novi fœderis fontibus haustam habuisse, si facta eorum dictis discrepaverint, si exempla cum moribus non pariauerint, si denique aliter vixerint quam docuerunt. A Judæis incipiemus, & postea ad Christianos descendemus; ut sic non aliam fuisse mentem ostendamus antiquæ legis observatoribus, & novæ auditoribus, neque aliud vitæ in utrisque institutum, quia non aliud præceperit lex vetus quam nova, neque alia mandaverit Deus Filius quam Pater Deus, nec aliam traditionem circa hoc acceperit Synagoga quam Ecclesia. A prioribus prius auspicati, Judæorum res super hoc negotio, à primo eorum rege usque ad Herodem sub quo Christus natus est, persequemur; Christianorum vero recensebimus memorias à Christo ipso fundatore talis disciplinæ usque ad Augustinum. Primum igitur quod ad Judæos attinet, illustre dat documentum Rex ac propheta David quid reliqui deberent observare, dum ab inimico suo rege, & persecutore, vim abstinuit, non aliam ob causam, quam quia rex esset & unctus Domini. Alioquin justam videtur habuisse causam eum occidendi, quem sciebat à Deo ipso projectum esse, cum ipse rex esset jam designatus,  
cum

cum Dei Spiritu repletus incederet, Saul autem à Spiritu contrario agigaretur. Atque hoc ipsum est scilicet quod eum prohibuit manus violentas regiæ personæ inferre, quamvis violentus & iniquus foret ac Deo exosus. Opponamus igitur Spiritum Dei, Spiritui Diaboli. Qui illum habet ut David, regem non interficit, etiam talem qualis Saul fuit, id est tyrannum, & à Spiritu nequam exagitatum, à Deo ipso, sicut Spiritu prophetico dictante cognoverat, abjiciendum & exterminandum. Quo itaque Spiritu dicemus impulsos Anglicanos perduelles regem suum hæreditarii regni per tam longam seriem avorum ad se devoluti possessorem legitimum interemisse? Utrum ab illo qui Davidem movebat, an ab illo qui Saulem vexabat? Isto sane; neque quisquam aliter possit dicere nisi eodem Spiritu animatus. Spiritus qui Davidem impellebat, manus eum à rege bis temperare jussit, cum totidem vicibus in potestate sua illum habuisset, & occasionem occidendi opportunam nactus esset. Spiritus ille, Dei fuit illius, qui in veteri Testamento *reges per se regnare* dixit, & *animam regis in sua manu positam* esse pronuntiavit, non alia proinde quam sua eripiendam, quique in

novo fœdere tam *reges honorandos* speciatiim præcepit, quam generatim *inimicos esse diligendos*. Hoc arripuere fanatici Angli, & ex eo perversum & perniciosum collegere dogma, inimicis potius parcendum esse quam amicis. Inde concludunt se regi suo parcere non debuisse, quia amicus erat. Ergo si inimicus fuisset, illi pepercissent. Monstra hominum! Quid istis phreneticis facias, qui cum ad legem naturæ subinde provocent, naturam ipsi humanam plane exuerunt, nihil retinentes hominis nisi faciem., cætera Molossis suis ferociores. Ipse ille David regem impium & quem Deus decreverat tollere, ab impio aliquo tolli maluit quam à se qui pius erat, quem sciebat se non posse perdere, nisi simul etiam pietatem vellet amittere. Alterius scelere voluit cum violari potius quam suo. *Ab impiis, inquit, egredietur impietas*. Quasi diceret, impius aliquis Deo Saulem perdere destinanti hoc ministerium præbeat; non ego qui pietatem colo. Saule paulo post in acie interfecto cum ad Davidem accurrisset qui falso jactabat se inimico ipsius vitam ademisse, & præmium sperabat à rege, quid illi Rex respondit, aut quomodo eum excepit? Primum audita  
regis

regis morte & hostis sui, vestimenta sua, ut in luctu tum fieri solitum, laceravit. Omnes etiam qui cum eo erant, planctu & fletu dolorem suum testati sunt, & jejunium usque ad vesperam celebrarunt. Illi autem qui sua manu Saullem se occidisse gloriabatur, retulit David haud dictu mollia: *Quia non timuisti mittere manum tuam, ut occideres Christum domini?* Pretioque mox quod tale parricidium merebatur affecit, & proximo satelliti imperavit ut eum neci daret. Ipse autem David, cum unus ex suis Saullem pararet occidere, ne id faceret, interminatus est his verbis: *Ne interficias eum: quis enim extendet manum suam in Christum Domini, & innocens erit?* Si hæc Christianis pro lege & regula non sunt, quid eos à tanto facinore possit dehortari, aut deterrere, non satis scio. Urgent, qui coronas despuunt ac thronos destruunt, quod idem ille Rex David sexcentis satellitibus iret stipatus cum Saul eum persequeretur. Sed ad quem usum istos homines habebat? An ad occidendum persecutorem suum? Immo ad se tuendum tantum. Quod illi licuisse per leges omnes, naturales, divinas, & civiles, planè liquet. Audentne hoc dicere atrocissimæ perduellionis rei, qui

qui sexaginta millium exercitum compararunt, ut tuto possent regem suum infami carnifici publicè decollandum dare? Urgent iidem Ianiones defectionem decem tribuum Israël à Roboamo Salomonis filio. Sed quæram ab iis primum, cur à Salomone ipso non defecerunt, qui tam gravibus tributis eos premebat, qui postremo ad idololatriam deflexit à fœminis quas efflictim deperibat inductus? Cum tot equos, tot currus, tot uxores, tot concubinas contra legem Dei expressam haberet, cur nemo repertus est in populo, qui eum interficeret? Cur autem ipse populus non rebellavit? cur Synedrium magnum ad causam dicendam non eum pertraxit? Nisi Lex divina eos tenuisset, hoc sanè fecissent. Sed Deus, qui solus est nocentium regum iudex, decreverat delicta ejus in filio vindicare. Ideo permisit ut post mortem patris decem tribus à filio secederent, & alium regem sibi crearent. Sed quomodo? An eo quem rebelles Angli usurparunt? Numquid eum Israëlitaë accusarunt, damnarunt, ad mortem duci jusserunt? Regno adhuc recenti & vix ad tertium hæredem transiture, ubi palam factum esset de morte Salomonis, congregati Israëlitaë ad regem sibi constitu-



tuendum ejus filium, conquesti sunt apud illum de oneribus quibus sub patre gravati fuerant, & rogarunt ut vellet eos relevare gravissima illa tributorum mole, quæ pater imposuerat. Quid ille ad tam justam eorum petitionem? Tantum abfuit precibus illorum annuere, ut etiam ultro longe graviora minatus sit, & scorpionibus se verberaturum denuntiaverit quos pater flagris tantum ceciderat, increpans insuper, digitum suum minimum crassiorē esse patris toto corpore. Qui nondum rex erat, quid fecisset si regnum esset adeptus? Tam superbum ejus responsum merita, nec tamen justa, defectione reddidit. Justam fecit Deus ipse, hanc illis mentem immittendo, atque ita fieri mandando, quo patrem in filio puniret. Sic ad alium iverunt. Nihilō tamen secius factum Jeroboami semper improbatum fuit, & ἀποστασία ejus ab omnibus sequentibus ætatibus detestata. Successores ejus pro rebellibus & reprobis semper habiti sunt. Etiam si per secundas causas Deus agat quod statuit, quod male tamen egerunt quamvis id ipse permiserit, non ipsis impunitum solet abire. Pro flagello iis ubi Deus usus est ad puniendos improbos, flagellum ipsum postea in ignem

ignem mittit aut frangit. Multum igitur interest, quod sit, utrum ut regulæ consentaneum adprobationem omnium mereatur, an verò velut à regula exorbitans cunctorum judicio repudietur. Utrum id Deus jusserit, an permiserit tantum, plurimum etiam refert. Quamvis enim ex facto interdum jus oriatur; si quid fiat quod juri & legibus sit contrarium, ex eo jus fieri non potest. Quotidie adulteria, homicidia, furta committuntur, & quidem sæpius impune, cum tamen nemo dicere possit licita esse, quia sæpè admitti solita sint. Certè illa secessio vel rebellio Jeroboami ab omnibus semper, ut diximus, improbata est tam Judæis quam aliis gentibus, atque etiam præcipuè à Christianis doctoribus. Gregorius Nazianzenus cum Julianum Apostatam ex multorum nequitiiis & vitiis pessimorum principum monstrum concretum & compositum vellet dicere in secunda Philippica sua, Jeroboami quoque ἀποστασίαν dicit eum habuisse; Εἰπὲν γὰρ τὰς πάντων κακίας εἰς ἑαυτὸν συλλεξάμενος φαίνει. Ἰεροβοὰμ τὴν ἀποστασίαν, Ἀχάβ τὴν μαιφονίαν, Φαρχὰ τὴν σκληρότητα, Ναβουχοδόνσορ τὴν ἱεροσυλίαν, ἀπάντων ὁμοῦ τὴν ἀσεβείαν. Quoniam ipse omnium vitia & nequitias in unum colle-

*collectas possedisse videtur, Ieroboami apostasiam, Achabi crudelitatem, Pharaonis duritiam, Nabuchodonosoris sacrilegam cupiditatem, & omnium simul impietatem. Nec ipse tantum Jeroboamus rebellionis illius auctor improbus & detestabilis tyrannus existimatus est, sed omnis regum successorum ejus posteritas tali crimine damnata est, & pro improbis ipsi quoque atque impiis, proque rebellibus non minus quam primus ille rex Israël, habiti sunt. Augustinus lib. xvii. cap. xxii. de Civitate Dei scribit, Regem hunc Israël Jeroboamum, mente perversa non credentem Deo, quem veracem promisso sibi regno datoque probaverat, timuisse, ne veniendo ad templum Dei, quod erat in Hierusalem, quo secundum divinam legem sacrificandi causa universæ illi genti veniendum fuit, reduceretur à Deo populus, & stirpi Davidis tanquam regio semini redderetur, atque instituisse idololatriam in regno suo, & populum Dei secum simulacrorum cultu obstrictum nefanda impietate decepisse. Nec tamen, inquit, omnino cessavit Deus non solum illum regem, verum etiam successores & impietatis imitatores, populumque ipsum arguere per prophetas. Magistri Judæorum*

rum

rum de his omnibus Israëlitis regibus dicunt, transgressores legis fuisse, superbos, contumaces, nullamque ab his, quamvis per prophetas à Deo missos corripuerentur, correctionem salutarem sperari potuisse, sed tantum contemptum & abolitionem legis. Cum omnes reprobi essent & idololatræ ac rebelles tam Deo quam regi suo legitimo à primo hujus rebellionis duce Jeroboamo, & sæpè hoc nomine à prophetis increparentur & arguerentur, nunquam tamen prophetæ contra eos populum incitasse leguntur. Denuntiabant illis minas irati & offensi Dei, nisi resipiscerent, sed populum ipsum ab eorum obsequio & subiectione non abducebant, non sicarios subornabant qui in eos irruerent, ipsi contrà prophetas Dei trucidabant, & altaria suffodiebant, dicente Elia qui ad eos post alios missus fuerat, *Et ego relictus sum solus, & querunt animam meam.* Cum tot etiam pessimi reges in parte Judæ extiterint, nemo tamen repertus est qui in vitam eorum conspiraret, qui regno eos deicere tentaret, qui exemplum denique Jeroboami sequeretur. Cujus crimen una res excusatius reddidit, quod videretur expresso Dei mandato id ab eo commissum

ut vindicaret peccatum Salomonis per  
pœnam filio irrogandam. Ideo cum Rex  
Roboamus pararet tanquam tyrannidem  
divisæ illius partis bello persequi, prohi-  
bitus est populus pugnare cum fratribus  
suis, dicente Deo per prophetam, *se hoc  
fecisse*. Allegat quidem Anglicani latro-  
cinii factio, se ad id scelus quod tam nefa-  
rie suscepit, nescio qua voce cœlitus missa  
impulsos fuisse, cum meliora viderent  
probarentque, sed deteriora sequi coge-  
rentur monitu vocis illius cœlestis quæ ad  
facinus faciendum scilicet eos hortaba-  
tur. Sed si quis fidem habet fanaticis com-  
mentis hominum sceleratorum, illum  
ego contenderim mente bona carere, nec  
minus esse furiosum quam qui ita dicunt  
& faciunt, ut qui non possit distinguere  
inter instinctus falsos & inspirationes dæ-  
moniacas, ac veras Dei prophetias. Ne-  
mo certè unquam Dei propheta populo  
auctor fuit, regis sui coram Synedrio ob  
idololatriam, ob parricidia, ob adulteria,  
ob homicidia & alia ejusmodi peccata ac-  
cusandi. Nullus unquam rex, nec in parte  
regni Judæ, nec in parte regni Israël, is-  
prophetarum jussu vel suasu, publico ju-  
dicio, in platea publica carnificis manu  
capite truncatus memoratur, aut posteri-

tas ejus à legitimæ successionis jure exclusa. Nulla videtur justior causa populo arma capiendi contra regem suum quam quæ velamento religionis prætextitur. At ne hæc quidem justa dici vel videri potest. Non enim legimus in Scriptura Hebræos contra proprios reges è Davidis stirpe bellum propterea suscepisse quod religionem veram & legitimum Dei cultum in prophanum & Samaritanum mutare ausi essent. Si ullum crimen in rege fuit quod à Synedrio judicandum & vindicandum videretur, hoc vero fuit. Quod allegatur de Idumæorum & Libnensium defectione quæ sub Joramō rege Jūdæ accidit, nihil habet simile cum factō horrendo Independentium Anglicanorum. Defectiones & rebelliones populorum ut sæpe fiunt atque à Deo permittuntur, non tamen in exemplum trahi debent, quia nunquam probantur nec laudantur. Illi ipsi Joramō Deus per Elisæum multa mala impendentia & imminentes calamitates minatus est, quia cultum Dei dereliquerat, fratres suos occiderat, alia flagitia nefanda commiserat. Quorum gratia non eum trahi ad tribunal Synedrii mandavit, nec sententia judicum plecti; sed ipse se vindicem criminum ejus ac judicem

cem constituit Deus, Palæstinos & Arabas in eum fuscitando, qui terram ejus depopulati sunt, domos expilaverunt, uxorem & liberos in captivitatem abduxerunt, ipsum autem Joramum morbo alvi insanabili adflixit. Nec sola hæc pœna est quam personæ Jorami inflictam à Deo dicere liceat, qua etiam ostenditur regem non habere judices è populo suo, sed solum Deum agnoscere delictorum quæ committit vindicem. Ne prophetæ quidem se judices constitui voluerunt regum peccantium, quamvis à Deo mitterentur ad eos corripiendos. E contrario à regibus sæpius ipsos prophetas trucidatos legimus, quod multis locis Scriptura divina testatur. Interdum & cum iis quasi lege egerunt, eosque in carcerem conjici jusserunt. Cum Jeremias detineretur à rege captivus, Abdemelechus Eunuchus pro eo intercessit & obtinuit. A Synedrio in carcerem conjectum fuisse volunt, & ex eo arguunt Synedrii majorem fuisse potestatem quam regis. Verum quidem est propriam extitisse Synedrii cognitionem de falsis prophetis, ut constat ex tractatu Sanhedrin cap. i. Sed quamvis ordinaria hujus conventus in pseudopphetas fuerit jurisdictio, nihilominus tamen regis



gis potestas, tanquam supra Synedrium constituta, extra ordinem de his cognovit, & potuit eos duci in carcerem jubere, aut è carcere extractos liberare, vel invito Synedrio. Jeremiam principes populi, id est Synedrium, verberibus cæsum in carcerem miserant. Jeremias tamen cum eum rex de carcere eductum ad se vocasset, ita interpretatus est quasi regis jussu fuisset incarceratus, his verbis quibus est regem alloquutus: *Quid peccavi tibi & servis tuis & populo tuo quia misisti me in domum carceris?* Deinde regem oravit ne se remitti juberet in domum Jonathani scribæ, quo eum principes populi custodiendum miserant. *Valeat, inquit, deprecatio mea in conspectu tuo, & ne me remittas in domum Jonathan scribæ, ne moriar ibi.* Sedecias hanc ei veniam dedit ut peterat, & præcepit ut in vestibulo carceris custodiretur, ac daretur ei panis torta in singulos dies. Postea principes populi Sedeciam adierunt & rogarunt ut sibi traderetur Jeremias occidendus. Annuit eorum petitioni rex, non tanquam minor & obsequii reus, sed gratificari illis cupiens, vel fortasse negare non ausus metu seditionis. Acceptum illi Jeremiam in locum demiserunt ut ibi fame necaretur, sed



sed post breve tempus Abdemelechus Æthiops Eunuchus liberationem ejus à rege impetravit. Hæc omnia demonstrant, etiam de prophetis reges Judæ statuisse quod vellent, nec quemquam unquam extitisse Dei prophetam qui seditionis auctor & factionis fautor in regem fuerit, aut ullo-  
rum consiliorum particeps aut conscius quibus è medio tolleretur, ut novæ & Diabolicæ prophetiæ Enthusiastæ nuper perpetrarunt. Allegant impuri Cathari exemplum Elisæi Prophetæ, qui ostium occludi jussit domus suæ spiculatori, à Joramio misso ut caput sibi demeret. Quid inde concludunt? An defendere volunt isto Elisæi facto id quod fecerunt ipsi dum caput regi suo truncarunt carnificis manu? Propheta ille Dei noluit sibi à rege caput amputari, isti Satanæ prophetæ regi suo cervices amputarunt. Quid simile? Achabo non potuit deterior quispiam ostendi, nec monstrum regis ex omnibus vitiorum portentis magis conflatum reperiri. Nam de eo dicit Scriptura I. Regum cap. xxi. *Non fuit alter talis sicut Achab, qui venundatus est ut faceret malum in conspectu Domini.* Prophetæ non ab eo populum abduxerunt, nec in jus ad Synedrium traxerunt, nec capitis causam

H

dicere

dicere coëgerunt , nec quemquam immiserunt ad eum occidendum , quia nullum tale mandatum habuere. Personæ ejus, quamvis sceleratissimus esset , Deus ita pepercit , ut quæ peccarat in posteritate ejus vindicanda, extra ordinem præceperit per Elisæum. Qui totam regiam domum funditus extinxit. Nam Jehum Deus excitavit , & in regem per prophetam ungendum mandavit , ut rex regiam domum extirparet. Non enim cuiquam privato ex subditis regis hoc munus delegavit , sed ei quem extra ordinem Deus regem constituit , ut ejus voluntatem exequeretur. Godoliam, qui à Nabuchodonosore præfectus fuerat reliquiis populi quæ in terra sancta remanserant , Ismahel interfecit. Nec hoc factum laudavit Jeremias. Quin è contrario damnatur eidem Jeremiæ c. xl. Unde & *Patria paricidam* eum appellat Hieronymus. Duodecimum eum regem numerat gravis auctor in Epistola ad Damasum ab Ozia. Ex illis autem duodecim regibus qui ab Ozia usque ad Godoliam regnarunt, quatuor tantum ait justos fuisse, Ozian , Johatan, Ezechian & Josian , cæteros malos. Cum tot mali reges in Judæa fuerint, mirum est nullum seditione populi vel procerum

cerum factione fuisse trucidatum ; tantum abest, ut accusatus ullus sit coram Sy-  
nedrio, vel ab eo judicatus, & damnatus.  
Qui pro bonis regibus inter eos nume-  
rantur, si comparatio eorum instituatur  
cum Carolo primo Angliæ rege, multum  
de bonitatis existimatione deperdent.  
Sume tibi Davidem, adulterii simul &  
homicidii reum deprehendes, nihil tale  
in Carolo inventurus. Contra Dei exer-  
tam voluntatem Israëlitarum populum  
recensuit. Salomon ejus filius qui sapiens  
audire vulgo, nihil dignum ea sapientia  
fecit, cum ad impietatem & idololatriam  
in fine vitæ à mulieribus suis inductus  
deflexit, cum fratrem natu majorem &  
mox Joabum in tabernaculo Dei cornu  
altaris tenentem interfici mandavit, par-  
ricidii & sacrilegii scelere commacula-  
tus. Contra expressa Dei mandata idem  
innumerabilem uxorum & concubina-  
rum multitudinem habuit, curruum &  
equorum tot millia ut numerus fidem su-  
peret, cum tamen Deus per Moysen regi,  
quem constituere sibi debebat populus  
ubi terram Sanctam ingressus foret, nu-  
merum equorum & curruum multipli-  
care noluerit esse licitum, nec uxores  
plurimas habere. Quod de Athalia adfer-

tur, non meretur refutari. Ipsa regnum non sibi debitum sumpfit defuncto filio, atque omnem stirpem regiam extinxit. Soror Ochoziæ Jesaba filia regis Jorami de medio eorum qui interficiebantur, surripuit Joan filium Ochoziæ, ac servavit. Eum postea productum, diademate decoratum, & solio impositum regem proclamaverunt Principes populi, Athalia abjecta & interfecta, plus quam hoc merita. Exturbata quippe est quæ regno incubabat, rege legitimo in thronum reposito. Nam legibus Hebræorum scæminæ ad imperium non admittebantur. Scriptum quippe fuit, *Constitues super te Regem*, Deuteron. xvii. non reginam. Ita enim magistri exponunt. Joachimus Uriam prophetam ex Ægypto quo fugerat retractum interfici jussit, & projici cadaver ejus in sepulcris vulgaribus. Unus de pessimis fuit, & pravam prædecessorum suorum sectam sequutus est, nec tamen à Synedrio condemnatus aut necatus fertur. Ubi Spiritus Sanctus recessit à populo Israëlítico, & prophetia cessavit, vatesque esse desierunt qui malis regibus denuntiarent minas iræ divinæ, non minus tamen certa Dei judicia fuere in vindicandis peccatis male imperantium regum,

gum, ut nunc etiam sunt, quamvis non ita explicata & aperta fuerint. Spiritus qui prophetas implebat, sub secundo templo defecit. Quamdiu mandata Domini regibus ab eo constitutis hi ministri ferebant, nullos unquam reges eorum monitu occisos vel destitutos legimus, nec populum unquam eorundem voce incitatum ad arma contra regem suum capiendam. Quod maximum est argumentum, nunquam Deo placuisse rebellionem populorum adversus reges suos, quia nunquam per prophetas suos populis ut rebellarent mandavit, aut ut regibus manus inferrent. Quinimmo contrarium expresse factitatum videmus ab illis quos Spiritus Dei replebat, ut in Davide. Nunc videamus, ubi prophetas ille Spiritus cælestis impellere destitit, an Judæi alio Spiritu animati fuerint erga reges suos quantum cum à prophetis viva voce instruebantur, & monebantur. Post remigrationem è Babylone usque ad Aristobulum nullos habuere reges per quadringētos plus minus annos. Duces aut Pontifices summi regnabant, maxima cum auctoritate, & quamvis regio nomine carent, vix regiæ dissimili. Nullum ex suis illis Ducibus neque occidisse per seditionem

nem leguntur, neque capitis damnasſe, cum tamen non ſemper optimi fuerint & impotenter ſæpius ſe geſſerint. Ariſtobulus, qui primus diadema ſumpſit, & cum regio nomine imperavit, deteſtabilis fuit, atque impius. Matrem quippe & Antigonom fratrem natu minimum trucidavit, reliquos in vincula conjecit. Uxor ejus Salome ex tribus viri fratribus Jannæum cognomine Alexandrum in torum & regnum recepit. Contra Ariſtobulum cum adeo execrandus foret, nulla extitit Judæorum rebellio. Contra Jannæum, cum Phariſæos contumacis & ſuperbæ ſectæ homines adeo male tractaſſet, ut octoginta ex his dum epularetur ſupra tetum palatii ſuspendiſſet, nemo eorum inſurrexit. Octingentos eum Phariſæos cruci affixiſſe teſtis eſt Joſephus lib. i. Ha-loſis cap. iv. Quinimo hunc ei honorem mortuo habuere, ut luctu & planctu funus ejus proſequuti ſint, & feretrum mortuale humeris ſuis ad ſepulturam extulerint. Cum vero per ſimulationem experiri vellet quali animo in ſe forent Phariſæi, & ægrotum illum, mox etiam mortuum, uxor juffu ejus finxiſſet, iſque dixiſſet, Alexandrum eorum hoſtem diem ſuum obiſſe, ut ſi vellent vel igni illum

con.

consumerent, vel canibus cadaver ejus  
objicerent; responderunt Pharisei, ut apud  
Josippum legitur: Absit hoc scelus à no-  
bis, ut hanc vicem rependamus domino  
nostro, uncto Domini, regi simul & Pon-  
tifici. Quidquid in nos male fecit, expia-  
tum esto illius morte. Nos autem & plan-  
ctu ipsum honorabimus & luctu, quin &  
feretrum ejus subire parati sumus, & hu-  
meris nostris deferre ad locum sepulturæ,  
& in monumentis regiis eum reponere.  
Hæc testatur historia, qua mente præditi  
erga reges suos fuerint Pharisei, & quam  
de his colendis & observandis doctrinam  
habuerint, genus alias hominum turbu-  
lentum, seditiosum, factiosum, & zelo  
Dei inconsiderato sæpe abripi solitum.  
Ubi in potestatem Romanorum Judæi  
venere, sæpe tanquam contra hostes suos  
acerrimos legumque suarum ac religio-  
nis eversores rebellarunt. Quid mirum?  
Nondum jugo erant assueti, & impatien-  
ter ferebant religionis suæ & legum vio-  
lationem. Præcipue vero toto illo tem-  
pore, quod intercessit Christi nativitatem  
inter & Hierosolymitanæ urbis excidium,  
multum turbarunt, ac plurimos tumultus  
adversus Romanos Imperatores con-  
citarunt, ut gentem illam constat inter

omnes maxime seditiosam & rebellem  
fuisse. Habuere aliquando & quosdam  
duces factionum, tubas & accendones tur-  
barum, qui se Zelotas dici cupiebant. Po-  
pulus interim prætexebat, se non cum  
Imperatore Romano bellum gerere, sed  
cum præfectis ejus, quorum sævitiam &  
tyrannidem ferre se non posse dictita-  
bant. Quam eorum querimoniam inju-  
stam his rationibus ostendere conabatur  
Agrippa apud Josephum lib. 11. Excidii  
Hierosolymitani, cap. xxviii. Si injurias  
præsidum, inquiebat, vindicare laboratis,  
cur libertatis recuperandæ studio vos rapi-  
dicitis? Si libertatis amor vos incitat, &  
servitutis onus intolerabile ducitis, super-  
flua est de præsidibus querimonia. Hæc  
duo cum apud se examinaret, neutrum  
ab iis fieri oportere probabat, ut aut que-  
rerentur de injuriis præsidum, aut de li-  
bertate armis recuperanda cogitarent.  
Quod ad hoc ultimum attinet, *Serum est  
nunc*, inquiebat, *libertatis desiderio move-  
ri, cum ab initio ne amitteretur, certan-  
dum foret, servitutis quippe experimen-  
tum esse durum, & ad eam propulsandam  
contentionem videri justam. Sed qui se-  
mel jugum subiit, si excutere illud satagat,  
contumax servus habendus potius quam  
liber-*



*libertatis cupidus.* Hujus Agrippæ pater etiam Judæos sub imperio Caligulæ ita à rebellione deterrebat, ut tamen dissuaderet ne paterentur illius statuam in templo collocari publicè adorandam. Cum Petronius ad hoc missus à Caligula denuntiasset Judæis quid haberet in mandatis de Cæsaris statua in templo eorum dedicanda, & diceret insuper, se non posse Imperatoris voluntati inaudientem esse, nisi ipse mallet perire, universi clamaverunt se paratos esse quidlibet potius pati quam legi suæ derogare. Tunc sedato tumultu Petronius ad eos sic verba fecit. Quid ergo? An bellum Cæsari inferre animus vobis fert? Nequaquam, illi respondere. Nam quod ad Cæsarem & populum Romanum attinet, bis de die pro eorum salute sacrificium Deo offerimus, sed si ille statuam in templo nostro statuere certum habet atque animo fixum, universam prius Judæorum gentem immolari & exterminari jubeat oportet. Nos enim omnes priusquam hoc patiamur jugulandos præbere nosmet ipsos cum, uxoribus nostris & natis destinavimus. Misericordia subiit Petronium cum videret mori certos pro religione, cujus tuendæ tantum & tam invincibilem ar-

dorem testabantur. Non consilio , non exhortatione, non minis deducere illos potuit de sententia, cum tamen ad quidvis potius perp̄tiendum quam ad bellum inferendum Imperatori se promptos ostenderent. Sæpe illi quidem alias seditionibus in Romanos suscitatis exarserunt, sed infelici semper exitu, cum Deus aperte eas damnaverit, successum dando contrarium rebellantium voto. Judæis sepositis, qui ex his producti & quodammodo iis infiti fuere, Christianos arripiamus, & videamus, an nova lex per Christum data aliud à suis Discipulis exegerit, quam pater ejus Deus in *πολιτεία* à se instituta observari per Moysen Judæis præceperat. Hoc quidem jam dispeximus, & observatum nobis est, novi fœderis leges non aliud circa hoc statuiss̄e quam quod veterum tabularum constitutione sancitum fuerat. Sed an mores pares habuerint, & an usu doctrinam à Christo & Apostolis ejus acceptam comprobarint, intuendum est. Paulo ante notavimus ex Josepho, Judæos bis in die pro Cæsaribus sacra fecisse. Deus per prophetam suum populo in captivitatem Babylonem abducto præcepit orare pro ea ipsa civitate, in qua captivis ipsis vivendum fuit, Jeremia

miæ cap. xxix. *Quarite pacem civitatis ad quam transmigrare vos feci, & orate pro ea ad Dominum, quia in pace illius pax erit vobis.* Daniel alter Dei propheta pro incolumitate & salute regis Nabuchodonosoris orare non dubitavit. Apud Esaiam cap. xlv. Deus vocat Cyrum *Pastorem suum.* Cyro dixit Deus, *Pastor meus es.* Et cap. xlv. appellat eum *Christum suum,* id est Unctum. Ne quis ex grege Catharorum doctor impurus argutetur hariolando, solos Reges pios & fideles *Unctos* Dei dici debere. Sed istis fanaticis nullus Rex Dei Unctus habetur, quos ex æquo omnes interficere vel gladio vel voto parati sunt. Paulus qui secta fuit Phariseus & in legis doctrina apprime versatus, cum nulla novæ legis status admitteret sacrificia post unum illud in Cruce peractum Redemptoris nostri, quod potuit, Christi sectatoribus injunxit, ut pro regibus, id est Imperatoribus, preces ad Deum funderent. Hæc unica fuere sacrificia quæ pro salute imperantium Deo fieri tum potuerunt. Sic enim in Epistola ad Timotheum prima, cap. ii. *Pro regibus & omnibus qui in dignitate sunt eminenti, ut quietam & tranquillam vitam agamus, in omni pietate & castitate.* Pietas quippe

quippe & castitas vix locum suum tutari queunt nisi in pace & tranquillitate. Pax autem & quieta vita esse non potest nisi salvis regibus. Quinam tunc erant reges pro quibus Deum orandum præcepit? Certe usurpatione tyranni, tyrannice etiam regnantes, religionis veræ offores, & persecutores, idololatræ. Hæc regula fuit, hæc lex, hoc præceptum. An id observarint illi quibus mandatum fuit, recognoscamus. Præter Liturgias veteres hoc testantur antiquissimi quique patrum. Quamdiu gentiles fuere Imperatores, ὑπὲρ τοῦ βασιλέων tantum sine ullo epitheto preces concipiebantur, *pro regibus*. Ubi imperatores facti sunt Christiani, non simpliciter ὑπὲρ τοῦ βασιλέων precari solebant, sed eos etiam φιλοχρίστους, ὁσεβεστάτους, & θεοφυλάκους nominabant, *Christi amantes, piissimos, & à Deo servandos*. In ea quæ Chrysostomo tribuitur, hæc legas: ἐπὶ δεόμεθα ὑπὲρ τοῦ ὁσεβεστάτων καὶ θεοφυλάκων βασιλέων ἡμῶν, καράτης, νίκης, ἀγαθῆς, εὐρωῆς, ὑγίαιας, σωτηρίας αὐτῶν. Etiam precamur pro piissimorum & Deo carorum imperatorum nostrorum fertitudine, victoria, longa vita, pace, valetudine, conservatione. Non minora nec pauciora precabantur pro regibus.

bus adhuc gentilibus, & Deorum falsorum cultui deditis, ut ex Tertulliano jam vidimus in Apologetico. Denique, inquit, *sine monitore precantes sumus semper pro omnibus Imperatoribus, vitam illis prolixam, imperium securum, domum tutam, exercitus fortes, Senatum fidelem, populum probum, orbem quietum.* Non potuere plura bona vovere & optare Christiano alicui regi & piissimo optimoque, quam tunc pessimis, idololatræ & tyrannico more imperantibus à Deo poscebant. Ambrosius in commentario ad Epistolam Timothei I. cap. II. *Hæc regula Ecclesiastica est tradita à magistro gentium, qua utuntur sacerdotes nostri, ut pro omnibus supplicent, deprecantes pro regibus hujus sæculi, ut subiectas habeant gentes, ut in pace positi, in tranquillitate mentis & quiete, Deo nostro servire possimus.* Vocat regulam Ecclesiasticam à magistro gentium, id est, Apostolo Paulo traditam, qua tunc utebantur sacerdotes ut pro regibus Deo supplicationes facerent: & addit rationem, *Vt sopitis omnibus quæ imperio infesta & inimica sunt, in affectu pietatis & castitatis Deo servire possimus.* Perturbatio enim & captivitas nec pietatem servat nec castitatem. Vnde enim pius qui nudus

est.

*est? Et unde castus qui sua potestatis non est? Certe regno turbato populi seditio-  
nibus aut procerum contra regem factio-  
nibus, nihil horum potest haberi bono-  
rum propter quæ obtinenda Christiani  
veteres pro salute regum non Christiano-  
rum preces suas Deo allegabant. Cyrillus,  
qui sub Constantio vixit, in Catechesi v.  
Παρακαλῶμεν τὸν θεὸν ὑπὲρ κρινῆς τῆ ἐκκλη-  
σιῶν εἰρῆνης, ὑπὲρ τῆς ἁγίας οὐραθείας,  
ὑπὲρ βασιλείων, ὑπὲρ στρατιωτῶν καὶ συμμά-  
χων. Deum precamur pro communi Eccle-  
siarum pace, pro orbis quiete, pro regibus,  
pro militibus & sociis. Qui tunc regna-  
bat Imperator, non Orthodoxus fuit, sed  
Arrianæ perfidiæ fautor, pro quo nihilo-  
minus preces à sacerdotibus in Ecclesia  
Catholica post peractum sacrificium spi-  
ritale fiebant. Hoc etiam liquet ex litte-  
ris Ariminensis Synodi ad Constantium  
missis, nempe patres Orthodoxos etiam  
pro hæretico Imperatore preces tunc fe-  
cisse. Dimitte nos, inquiunt, ad suos quem-  
que greges, ut precibus, & Deo sancte colen-  
do, tranquillis animis vacemus, oremus-  
que sedulo pro tua salute, imperio, & pace  
quam Deus nobis sempiternam largiatur.  
Extant hodie Liturgiæ Copticæ, hoc est,  
Ægyptiacæ, sub nominibus Basilii, Gre-  
gorii*

gorii & Cyrilli ex Ægyptiaco sermone antiquo in Latinum conversæ, quibus hodiequæ utuntur Ægyptii Christiani qui priscum illum & Ecclesiasticum morem adhuc servant precandi pro Imperatore Turcico cui subiecti sunt. In ea quæ Basilii nomen præfert, ita scriptum est: *Pacem nostris concede temporibus. Reges, Proceres, Proreges, Populos, & servos nostros ingredientiæ & egredientes à nobis orna omni pace. O Rex pacis, si pacem nobis dederis, omnia dederis.* In ea vero quæ Cyrilli titulo insignitur, ita Diaconus populum alloquitur: *Rogate ut Christus Deus noster concedat nobis misericordiam & clementiam coram regibus & imperatoribus, & flectantur corda eorum erga nos.* Tum sacerdos ita precatur. *Conserva eum in pace, & iustitia & Imperio, Regem nempe, ut subjiciantur illi omnes Barbaræ gentes quæ bellum volunt inferre arcibus & arariis nostris. Loquere ad cor ejus pro pace unius tuæ dilectæ sanctæ Catholicæ Ecclesiæ, ut cogitet pacem nobis & nomini sancto tuo, ut vivamus vitam securam & placidam.* Plura de his non est opus afferre, cum vel ex istis quæ attulimus, satis liquido probatum sit, unum hunc omnium Christi Ecclesiarum Græcarum Ægyptiarum



rum & Latinarum consensum fuisse, in precibus publice in Ecclesia, dum sacra Synaxis celebrabatur, pro salute & prolixa vita regum pro tempore imperantium fundendis. Ex Athenagora constat etiam, solenne fuisse in ejusmodi precibus ut adderetur votum de filii successionem. Nam tunc orabat sacerdos, ut Commodus patri in imperio succederet. Novi Christiani, qui & se *Sanctos* dicunt, totam posterorum successionem uno elogio cum ipso rege delendam decernunt, quam dissimiles moribus ac vita? Hæ preces luce clarius ostendunt, regulæ, quæ super hoc ab Apostolis Ecclesiæ tradita fuit, observantissimos fuisse omnium temporum & locorum Christianos. Non eorundem certe est hominum, pro salute regis orare, & eum velle perdere: Vitam illi prolixam optare, & vita illum privare: Pro imperii ejus quiete & pace Deo supplicare, & omnia bellis intestinis in regno turbare: Exercitus fortes ei à divino numine petere, & exercitum ad eum exterminandum conscribere: Populum probum & obedientem regi per preces postulare, & populum in eum concitare & armare: Senatum fidelem eidem votis poscere, ut fecere primi Christiani etiam imperatoribus.



ribus paganis , & si qui in Senatu erga regem Christianum & pium visi sunt fideles, eos ejicere, incarcerare, perdere, ipsumque post omnia regem capitis damnare, & supplicio infami plectere. Hoc fecere Angli, & quidem Christi fidem ac nomen ementiti, falso puritatis & sanctitatis cognomine dissimulati, cum nihil simile unquam fecerint gentes ullæ ex omni barbaria immanissimæ. Enimvero quicumque Christiani olim publicas in Ecclesia preces ac supplicationes admiserunt pro regibus suis, qualescunque forent, pii an impii, justii an tyranni, facien- das, quam longissime abfuerunt à bello ei inferendo pro cujus imperii pace & tranquillitate Deum orabant. Hypocri- tarum hoc fuisset, bona illi optare preci- bus Ecclesiæ totius nomine fundendis, & omnia mala eidem reapse extra Ecclesiam procurare pro quo in tēplo precati essent. An aliquando pro rege suo oraverint An- glicanæ conspirationis latrones, nescio, sed illud constat, fidem suam de ejus au- ctoritate & majestate conservanda solen- ni conventionem non semel interposuisse, quam nefario ac sacrilego ausu postea mi- sere fregerunt. An hi pro Christianis ha- bendi sint, & an sint hoc nomine vocan- di,

di, viderint qui nomina vera rebus sciunt ponere. Pergamus ex Patribus planū facere quam alieni fuerint primitivæ Ecclesiæ Christiani ab omni in regem aut imperatorem quemcunque, bonum an malum, justū an tyrannum, pium an idololatram, clementem an persecutorem, factione, conspiratione, seditione. Tertullianus in libro ad Scapulam dicit, *Amicos diligere, omnium esse, inimicos autem, solorum Christianorum*. Qui inimicos suos diligere jubebantur, quique etiā eos re ipsa diligebant, quomodo reges suos pro inimicis habere potuissent, aut tanquam eorum inimici arma contra eos capere, bellum iis inferre, aut eos, si possent, trucidare? De regibus id etiā explicat paulo post, quomodo eos qualesquales diligere. *Christianus, inquit, nullius est hostis, nedum Imperatoris, quem sciens à Deo suo constitui, necesse est ut & ipsum diligat, & revereatur, & honoret, & saluum velit, cum toto Romano imperio quousque sæculum stabit*. Deinde subjicit continuo, *Colimus ergo & Imperatorem sic quomodo & nobis licet & ipsi expedit, ut hominem à Deo secundum, & quidquid est à Deo consequutum, solo tamen Deo minorem*. Testatur ibidem neminem Christianum

stianum in partibus fuisse quæ contra Imperatorem steterint. Gentiles tunc Christianos pro sacrilegis infamabant, quamvis in furto nunquam deprehensi forent, nedum in sacrilegio. Sic &, inquit, *circa majestatem imperatoris infamamur. Tamen nunquam Albiniani nec Nigriani vel Cassiani inveniri potuerunt Christiani.* Idem in Apologetico, ubi latius hunc locum exequitur, conspirationibus quæ per illa tempora in Cæsares struebantur, Christianos nunquam immixtos fuisse gloriatur. Vnde, inquit, *Cassii & Nigri & Albini? Vnde qui inter duas lauros obsident Cæsarem? Vnde qui faucibus ejus exprimendis palæstricam exercent? Vnde qui armati palatium irrumpunt, omnibus Sigeris atque Partheniis audaciores? De Romanis, ni fallor, id est de non Christianis.* Varias hic tangit conspirationes quæ in plurium imperatorum necem à Marco Antonino usque ad Severum, qui tunc regnabat, comparatæ fuere, quarum nullus Christianus particeps & socius fuit, cum tamen inter Palatina officia plerique jam tunc militarent Christi religionem professi. Sed hic occurret aliquis de caterva latrocinii Anglicani, ideo bellum in Cæsares non movisse Christianos qui eo tem-  
pore

pore vixere, nec conjurasse in illorum factum, nec rebellasse, quia non possent potius quam nollent, pauci contra tot numero, & infirmi adversus adeò potentes. Hæc enim scelestæ est hujus nefandæ sectæ disciplina, jus esse populis, quandocunque id possunt, se in libertatem vindicandi, & reges à quibus gubernantur amovendi, si ve clemens sit ac justum eorum imperium, si ve asperum & tyrannicum. Sane justius hanc licentiam sibi sumere potuissent illorum sæculorum Christiani, quia non Christianos Imperatores deturbassent, sed prophanos, sed idolorum cultores, nec idololatriæ tantum addictos, sed etiam veræ religionis inimicos, nec inimicos tantum, sed etiam persecutores, flamma & ferro in se sævientes, & bestiis se laniandos tradentes, mille etiam injuriis & contumeliis in ejusdem fidei consecratos grassantes. Cæterum cum talia paterentur ac tanta sub crudelissimis tyrannis, cum nec pati ea si voluissent possent, quia satis multi erant tunc & satis validi ad se liberandos, perpetiendę tamen quam faciendę injurię se promptiores esse semper ostenderunt. Non aliam ob causam quam quia Christiani essent, & quatenus Christiani, quia tale præceptum

ptum ab ipso Christo & ejus Apostolis acceperant, quia denique non aliter religioni suæ satisfacere se posse credebant. Objectioni itaque sicariorum Anglicanorum, qua perhibent, idcirco noluisse rebellare aut conjurare in principes suos qui tum Christiani erant, quia non poterant, ipse Tertullianus pro nobis respondeat in eodem Apologetico. *Cui bello, inquit, nos idonei non fuissetus, etiam impares copiis, qui tam libenter trucidamur, si non apud istam disciplinam magis occidi liceret quā occidere?* Numero etiam Christianos satis valuisse ibi ostendit, si hostes se Romani nominis declarare & nomen suum inter conjuratos ac rebelles profiteri voluissent: *Si enim & hostes exertos, non tantum vindices occultos agere vellemus, deesset nobis vis numerorum & copiarum? Plures nimirum Mauri & Marcomanni, ipsique Parthi, vel quantacunque, unius tamen loci & suorum finium, gentes, quam totus orbis? Hesterni sumus, & vestra omnia implevimus, urbes, insulas, castella, municipia, conciliabula, castra ipsa, tribus, decurias, palatium, senatum, forum. Sola vobis reliquimus templa.* Docet etiam ibidem, si fraude sibi agendum esse credidissent, nec ab arte clandestina defuisse  
sui

fui ulciscendi copiam. *Vel una nox*, inquit, *pauculis faculis largiter ultionem posset operari, si malum malo dispungi penes nosliceret. Sed absit ut aut igni humano vindicetur divina secta, aut doleat pati in quo probatur.* Addit, & alia via Christianos potuisse tunc persecutiones regnantium devitare, nec tamen rebellionis crimen incurrere, secedendo nimirum & in alias terras fugiendo ubi liberi esse possent à Romanorum principum dominatione ac tyrannide. *Potuimus & inermes nec rebelles, sed tantummodo discordes solius divortii invidia adversus vos dimicasse.* Si enim tanta vis hominum in aliquem orbis remoti simum abrupissemus à vobis, suffudisset utique dominationem vestram tot taliumcunque amissio civium, immo etiam & ipsa destitutione punisset. Ex iis quæ ibidem subjicit, etiam liquido constat, plures vel eo tempore fuisse Christianos. Procul dubio, ait, *expavissetis ad solitudinem vestram, ad silentium rerum, & stuporem quemdam quasi mortui orbis. Quæsissetis quibus imperaretis. Plures hostes quam cives vobis remansissent.* Nunc enim pauciores hostes habetis præ multitudine Christianorum, pene omnium civium, pene omnes cives Christianos habendo. Egregius  
magni

magni & verè Christiani auctoris locus, quo probatur, cum tanta Christianorum multitudo tunc esset in imperio Romano, solos eos cives potuisse ac debuisse merito nominari qui nunquam hostes Romanorum regum fieri possent, quia disciplina suæ religionis eos à rebellionē & hostili adversus imperatores animo arcebat. Plures sanè tunc in orbe fuere Christiani, & tamen quod est summopere admirandum, nullus ex tot Christianis repertus est qui unquam de nece imperatoris sui cogitavit, qui cum id agitantibus consilia vel manus confociarit, qui vel conscius ullius conjurationis in eum faciendæ extiterit. Si tantus Severo imperante Christianorum numerus fuit, quantum putamus fuisse sub Juliano Apostata postquam jam duo principes Christiani habenas imperii satis longo tempore proxime tenuissent? Sub Juliano tamen, cum unus ille magis quam ethnici omnes qui unquam regnassent imperatores, dirissime Christianos vexasset, nemo inventus est, qui obsequium illi denegarit, aut auctor fuerit in eum rebellionis. Gregorius Nazianzenus in prima contra illum Apostatam Philippica, quam *τη λίστις* inscripsit, solis lacrimis ait illius ævi Christianos se adversus tyrannidem



dem & oppressionem persecutoris Juliani defendisse, cum nihil scilicet haberent aliud quod juste ei possent opponere. Deceverat ille, omni genere libertatis Christi nomen & fidem profectos prohibere, & ab omni conventu publico arcere, foro, senatu, mercatu, consilio, schola interdicere. Ταῦτα, inquit, ἐκείνῳ διανοεῖτο μὴ, ὥς οἱ τῶν ἀπορρήτων ἐκείνῳ κρινωνοὶ καὶ μάγιστροι, ἐπέχετη ἢ θεῆς φιλανθρωπία καὶ τοῖς Χριστιάνων δάκρυσιν, ἀ πολλὰ δὴ καὶ ὡρᾶ πολλῶν ἐχύθη, τὸ το μόνον ἐχόντων καὶ τὸ διώκετε φάρμακον. *Hac ille agitabat, ut testentur secretorum ejus participes, sed Christi misericordia, & Christianorum lacrimis, quae affatim & à multis profusa sunt, unicum hoc adversus persecutorem habentibus remedium, prohibitus fertur. Quibus paria sunt & ista Ambrosii, ex Oratione in Auxentium de tradendis Basilicis: Coactus repugnare non novi, dolere potero, flere potero, potero gemere. Adversus arma, milites Gothos quoque, lacrima mea arma sunt. Talia enim sunt munimenta sacerdotis. aliter nec debeo nec possum resistere. Non dicit tantum se non posse resistere, sed nec debere; etiam si posset. Idem in eadem Oratione: Convenior ipse à Comitibus ac Tribunis ut Basilica fieret matura traditio,*  
*dicen-*



dicentibus, Imperatorem jure suo uti, eo quod in potestate ejus sint omnia. Respondi si à me peteret quod meum esset, id est, fundum meum, argentum meum, jus ejusmodi meum me non refragaturum. Et paulo post: Si patrimonium petitur, invadite: si corpus, occurram. Vultis in vincula rapere, vultis in mortem, voluptati est mihi. Non ego me vallabo circumfusione populorum, nec altaria tenebo. Idem Epist. xxxii. Quis est qui potest vel unus vel inter paucos dicere Imperatori, Lex tua mihi non probatur? Nō permittitur hoc dicere sacerdotibus; permittetur laicis? Notatu digna plane sunt de Juliano infideli fidelibus crudeliter imperante, & Christianis tali tyranno fideliter parentibus, Augustini verba, cujus testimonio semper utor libenter, Enarr. in Ps. 124. Aliquando potestates bonæ sunt & timent Deum, aliquando non timent Deū. Julianus extitit infidelis Imperator. Nonne extitit infidelis, iniquus, idololatra? Milites Christiani servierunt Imperatori infideli. Vbi veniebatur ad causā Christi, non agnoscabant nisi illum qui in calo erat. Quando volebat ut idola colerent, ut thurificarent, proponebant illi Deum. Quando autem dicebat, producite aciem, ite contra illā gentem, statim obtemperabant. In prima Na-

zianzeni Steliteutica, milites quos thura  
 diis dare coëgerat, & qui quasi aliud agen-  
 tes id fecerant, mox pœnitentia ducti &  
 peccatum suum agnoscentes ab eo petunt  
 pro beneficio ut jugulentur, tantum abest  
 ut in regem suum & imperatorem insur-  
 gant, aut ejus jugulum petant. Δὲς χάριν,  
 inquebant, τοῖς σοῖς στρατιώταις, Χεῖρ ᾧ σφα-  
 γιάσων ἡμᾶς. *Fac hanc gratiã tuis militibus,  
 Christo nos immola.* Augustinus autẽ loco  
 jam citato doctrine usum pariter & doctri-  
 nam, de obsequio regibus omni fidelitate  
 qualescunque sint præbendo, ut Christiani  
 eam tunc observabant, diserte & signanter  
 expressit. *Quod, inquit, dixi de domino &  
 seruo, hoc intelligite de potestatibus & regi-  
 bus & de omnibus culminibus hujus sæculi.*  
 Quid autem ille dixerat de domino & ser-  
 vo? Exempli gratia, ut ostenderet qualis  
 honor debeatur ordinatæ à Deo potestati,  
 id est regiæ, unam rem se dicere ait, & ex  
 ea conjici velle gradus omnium potesta-  
 tum. *Prima, inquit, & quotidiana pote-  
 stas hominis in hominem, domini est in ser-  
 vum.* Prope omnes domus habent hujusmo-  
 di potestatem. *Et quid dicit Apostolus, do-  
 cens servos dominis suis subditos esse? Servi  
 obedite dominis vestris secundum carnem,  
 quia est dominus secundum spiritum. Ille*  
 est

*est dominus verus & aternus, isti autem temporales secundum tempus. Tu cum ambulas in via, cum venis in hac urbe, non vult te facere superbum Christus. Contigit tibi ut Christianus efficereris: non ideo Christianus factus es, ut dedigneris servire, cum enim Christo iubente servis homini, non illi servis, sed illi qui iussit. Servi quorum tunc usus fuit, homines fuere bello capti & venditi pretio ad servitutem iis qui illos aere suo emerant serviendam. Cum dominos superbos & crudeles nacti erant, cum ipsi facti Christiani infidelibus dominis serviebant, nonne jus habuerunt quotiescunque id facere poterant, fugiendi & se in libertatem vindicandi? Ita quidem hoc eis suafissent si tū vivere illis contigisset, Anglicanae rebellionis parricidæ. Nonne enim hoc justius & rationi magis consentaneum videretur, quam quod ipsi fecerunt, dum regi suo, & Christiano Christiani quoque ipsi, nefarie vitam ademerunt? Non ita Paulus spiritu Christi plenus & voluntatis ejus optimus interpres servis sui temporis præcepit, ut se fuga liberarent, aut domini cæde facta servi esse desinerent. Quid igitur ille? Obedite dominis vestris secundum carnem cum timore & tremore & in simplicitate cordis, non*

*ad oculum servientes quasi hominibus placentes, sed quasi servi Christi, facientes bonam voluntatem Dei ex animo cum bona voluntate. Quid ad hæc Augustinus tam bonus Apostoli enarrator & interpretes, quam Apostolus Christi fuit? Ecce, inquit, non fecit de servis liberos, sed de malis servis bonos servos. O quantum debent divites Christo, qui illis componit domum, ut si fuit ibi servus infidelis, convertat eum Christus, & non ei dicat, dimitte dominum tuum: jam cognovisti eum qui verus est Dominus. Ille forte impius est & iniquus, tu autem fidelis & justus, indignum est ut justus & fidelis servus serviat iniquo & infideli: non hoc ei dixit, sed magis, serviat. Si homo in bello ab hoste captus & venditus, domino suo qui eum emit, quamvis infideli, quamvis iniquo & tyrannice imperanti, servire fideliter, ex Christi præcepto jubetur, nec causam ullam habet justam domini deferendi aut occidendi ut libertatem recuperet, quanto minus populis regi alicui subiectis liceat regem suum interimere ut ipsi loco ejus regnent? Quod dixi, ait Augustinus, de domino & servo, hoc intelligite de potestatibus & regibus & de omnibus culminibus hujus sæculi. Nam ut idem docet ibidem,*

*Modo*

*Modo quidam iusti aliquando laborant, & modo aliquando iniusti dominantur iustis. Quibus modis? Aliquando iniusti perveniunt ad honores seculi. Cum pervenerint, & facti fuerint vel iudices vel reges, quia hoc facit Deus propter disciplinam plebis suae, propter disciplinam populi sui, non potest fieri nisi exhibeatur illis honor debitus potestati. Ordinavit enim Deus sic Ecclesiam suam, ut omnis potestas ordinata in saeculo habeat honorem, & aliquando à melioribus. Ergo ut ex his tanti & tam sancti doctoris verbis colligimus, hoc ex Dei ordinatione descendit, ut aliquando meliores pareant deterioribus, iniustis iusti subditi sint, fideles infidelibus serviant, Christiani Ethnicis, aut Muhamedanis, aut tyrannis cervices submittant. Quoniam hæc Deus ita ordinavit, & Ecclesiae suae hanc regulam per discipulos suos tradidit, propter disciplinam populi sui, non magis isti populo licet potestatem à Deo in se ordinatam repellere qualiscumque illa sit, quam servo dominum repudiare ac rejicere quem fors illi dederit, quamvis iniustum assignarit & iniquum & aspere imperantem. Hanc disciplinam exacte servarunt Christiani quamdiu vere Christiani fuerunt, id est quamdiu mandatorum*

Christi per Apostolos Ecclesiæ suæ traditorum memoriâ retinuerunt. Ubi paulatim cœpit evanescere & quasi decoqui eo modo quo res omnes sensim dilabuntur, non solum in hoc præcepto, sed etiam in aliis multis retro ferri visa est, non tantum remitti & laxari disciplina Christiana. Vt enim aquæ quo longius à fonte suo & capite recedunt, in rivos plures diductæ, puritatem suam amittunt, atque in lacunas tandem degenerant luto multo inquinatas & sordibus: ita doctrinæ Evangelicæ sinceritas per multas impuras traditiones quæ subinde in eam introductæ sunt, pedetentim temerata, ad extremam tandem delapsa est sceditatis & turpitudinis corruptelam, quando longius nimium à fontibus suis & origine ex qua primitus hausta fuit, temporum lapsu submota evanuit. Per gradus igitur, & numeros, non statim nec uno saltu, in hanc quam nunc videmus depravationem disciplina de præstanda regibus obedientia ac fidelitate præcipitata est. Tam doctrina ipsa quam doctrinæ tenor & usus per aliquot sæcula inviolatus mansit, non ullo facto læsus neque privatæ neque publicæ vel popularis factionis. Usque ad Augustinum & infra ejus ætatem nulla cujusquam privati extat

in

in historiis mentio, qui regi suo manus cruentas attulerit, vel qui armis cōtra eum pugnarit. Nulla Christianorum plurium in unum confociatorum conjurata factio, ne in principes quidem paganos hoc ausa est. Nullus de proceribus regni conscientiam suam polluit scelere simili. Cur hoc? Quia doctrinæ vis Apostolicæ & Euangelicæ quasi recens adhuc animis hominum inhærebat, sicut à principio infederat, per manus ad sequentia tempora constanti successione tradita, & subinde per bonos Ecclesiæ Doctores ac Pastores populo infinuata. Quandiu nulli adulteri inter Christianos noscitabantur, nulli fures, nulli sacrilegi, nulli latrones, nulli homicidæ audiebantur, parricidas regum nemo etiam inter illos vidit. Prius ad alia vitia prolapsi sunt quam ad hoc omnium delictorū atrocissimum gradus factus sit, quo respublica perturbatur, populi vexantur, summa imis vertuntur. Hoc ipsum est quo reges trucidantur. Poenitentia Ecclesiasticæ pro variis criminibus agendæ certa tempora canonibus Conciliorum definita legimus. Habuit homicida tempus suum quo Exomologesim in Ecclesia publice faceret, habuit adulter, habuit fur. Multa alia crimina quotidianæ tum incursionis & po-



pulo nota, censuram ab Ecclesiæ liminibus noxios excludentem experta sunt: sed nullam olim accepimus indictam pœnitentiam iis qui regem interemissent, quive conjurationis ad eum solio excutiendum participes & socii fuissent. Quare? Quia tunc corvo albo & cygno nigro rarior res fuit, fontem hujus criminis videre aliquem Christianum qui potestatem à Deo ordinatam ausus esset violare. Ut alias morum labe, ita & hanc quoque ultima sæcula fenserunt. Olim ne Ethnicos quidem & idololatrias, ne persecutores quidem fides Christiani vel factio vel dicto lacerare præsumebant. Immo vel quamlibet pessimis, quæcunque bona bono regi optari poterant, bona fide ac sincere optabant, quia id Deo esse gratum, quia etiam sic ab eo mandatum noverant. Ultimorum temporum Christiani quantum mutati à prioribus? Quasi aliam legem haberent, aliam regulam sequerentur, vel alium Deum colerent, etiam Christianos principes & suos sibi quæ legitimis de medio tollere sustinuerunt. Nostra vero ætas ad summum culmen violati de regibus divini præcepti, ut tam inauditi quam incredibilis facinoris exemplum posteris proderet, ascendere non dubitavit.



vit. Non contenta quippe, sicut antea factum pluries fuerat, regem tralatitia cæde transfigere, infamiam etiam supplicii adiecit. Antea ejusmodi tantum reges, qui aut tyrannidem arripuerant, aut qui tyrannice imperare videbantur, mos, & ille etiã perniciosus ac legi divinæ contrarius, occidebat: isti vel bonum piumque & hæreditario jure regnum obtinentem capitis damnarunt, ut nimirum justitiam ipsam, cujus velamentum tam impio scelere prætenderunt, etiam injustam facerent. Tanto nocentiores quod innocentiam ex legis abolitione affectarunt, cum eo ipso duplicis sceleris reatum videantur incurrisse. Nam qui contra legem facit, illicitæ rei reus est, sed simpliciter peccare intelligitur. Qui autem ipsam legis abrogationem aggreditur, infinito plus noxius deprehenditur, quam ille qui quod lex vetat, admittit. Quippe cum ille de scelere suo erubescat, iste de eo soleat gloriari. Ille soli sibi peccat qui quod lege interdictum est facit, iste qui legem ipsam tollit, de vetito licitum facit, & alios ad peccandum provocat, non solum impunitate proposita, sed etiam præmio in medio posito, & quasi ob rectè factum debito. Sic in aliis quidem delictis infirmitate humani ingenii peccatur

ab illis qui sciunt & vident quod lege prohibetur, in isto commisso quod maiestatem spectat, qui regulam excesserunt, non putarunt se contravenire præcepto, sed aliam sibi regulam finxere, quæ statuat reges impune posse folio dejici, vita extorres fieri, contumeliis affici, accusari, condemnari, infami supplicio neci dari. Hac lege semel sancita, Evangelicam illam & Apostolicam regulam necesse est aboleri, quæ contrarium tenuit: Nimirum reges esse honorandos, ipsis obsequium & obedientiam præstandam, ferendos esse eos quoque qui mali sunt, quia providentia Dei tales constituit non secus ac bonos. *Hippias*, dicit Tertullianus in Apologetico, *dum civitati insidias disponit, occiditur. Hoc pro suis omni atrocitate dissipatis nemo unquam tentavit Christianus.* Hodie Christiani, etiam non læsi, nec ulla injuria violati, nec quemquam suorum querentes pulsatum, reges Christianos, & suos, capitis damnatos, infamia ad mortem addita, trucidant. *Sed dicet*, ut subnectit idem ille Tertullianus, *etiam de nostris excedere quosdam à regula disciplina.* Statim ipse illi qui hoc dixerit, respondet; *Desinunt tum Christiani haberi penes nos.* Cur non ergo & eos cessamus habere pro Christianis.

nis qui talia edunt facinora, quibus à regula disciplinæ quam Christus, quam Apostoli præscripserunt, exceditur? Si aliam habent regulam, ne sic quidem habendi à nobis sunt Christiani; cū magis Antichristianam videri necesse sit talem disciplinam, quæ illi ex adverso opposita est quam Christus instituit, & quam Ecclesiæ suæ per Apostolos tradidit. Regula illa Apostolica quæ regum etiam malorum honorem & obsequium tuetur, infracta primum est à malis Christianis qui nec Christiani dici merentur, ut magnus auctor affirmat. Sic aliæ Christi leges multæ disciplina in pejus labente neglectæ sunt, ut illa quæ adulterium vetat, quæ furtum prohibet, quæ à falso testimonio dicendo avocat, quæ concupiscentiam reprimat, quæ parentes honorandos præcipit. Istæ omnes tamen leges ratæ manserunt, nec aliis earum loco introductis cessere, quamvis pleræque hodie parum observentur. Sola, quæ regibus qualibuscunque, sive justis sive tyrannis, ut à Deo ordinatis, subjectum esse debere omnem Christianum sanxit, non solum corrupta, sed etiam in contrariam deformata regulam transiit. Quando hoc factum, aut unde, vel quo modo? Ex quo nimirum, ut jam dictum, alia potestas regali

gali major, & imperatoriam ipsam majestatem *Sanctitatis* titulo supergressa agnoscicœpta est in orbe Christiano. Hanc Ecclesia Romana introduxit imperii Romani loco. Vbi urbem ac sedem Imperatoris occupavit Romanæ urbis Episcopus, ab eo tempore cœpit is velle supra regum & imperatorum capita sese extollere, se vicarium esse Christi intendere, sibi soli reges peccare, delinquentes proinde sui esse officii multare; pro pœna hoc imponere se posse illis supplicii, ut regno exuantur, ut subjecti eorum sacramento fidelitatis liberentur. Sceptra aliis adempta, aliis transscribere. Novi orbis populos nondum occupatos, sui juris esse quibus velit adscribere. Imperia denique omnia ad libitum suum constituere aut mutare. Ubi Deum se in terris fecit, tum & reges sibi principesque omnes supposuit, qui solo Deo inferiores juxta priorum ac puriorum Christianorum opinionem ac disciplinam censebantur. Quid igitur ex hac novæ Ecclesiæ Christianitate consequi aliud poterat, nisi veteris regulæ Ecclesiasticæ, quam Christus per Apostolos fixerat, de pietate subjectorum erga reges tanquam erga patriæ parentes, subversio? Alia lex fuit,

fuit, aliud jus, alia etiam Ecclesiæ disciplina, cum Imperatores novum Papam confirmare debebant, non aliter in sede stabilem futurum, nisi ab ipsis approbatum, cum concilia Episcoporum, quando volebant, & quo, & ex quibus, imperatores & reges convocabant, cum Papa ipse subjacere conciliorum auctoritati debebat, eorumque decretis teneri, cum denique nulla alia quam Episcopali potestate nitebatur. Postquam ergo imperatoria & regia majorem Majestatem ille adeptus est, non defuere doctores qui antiquam regulam, quæ regum Majestati consulebat, quæ eos tuebatur, curvam esse pronuntiarunt, & de alia pangenda cogitarunt, qua Sanctitas Papæ sub titulo *servi servorum* supra omnium regum imperia eveheretur, & omnium dominantium domina agnosceretur. Ab his doctoribus nova ista prodiit doctrina cum antiqua & Apostolica oppositis pugnans frontibus, qua statuerunt, populos regem legitimum, si degeneret, & tyrannice regere incipiat, pro jure suo judicare posse, & è solio vitæque depellere, fasque esse subditis in hoc casu arma capere contra justum principem. Atqui, ut verba Tertulliani hic iterum inculcemus, *Nullus unquam*

*unquam Christianus hoc tentavit.* Sic vetustatem novitas exclusit, quasi novus aliquis Christus cælo nuper delapsus ad hoc venerit, ut quas leges antiquus Messias sanxerat, ipse abrogaret, & per suos Apostolos novum! Evangelium à priore diversum gentibus adnuntiandum curaret. Eadem certe disciplina est, quæ Papam vicarium Christi constituit, quæ supremum ei supra omnes à Deo ordinatas potestates imperium tribuit, quæ & licentiam illi dat alibi reges dejiciendi, alibi imponendi, quæ denique subditis licere vult bellum Principi suo inferre, si sacramento fidelitatis prius soluti sint à Papa, qui id solus nunc posse creditur, propter supereminentem potestatem quæ in Ecclesiam ipsi directe competit, in rempublicam indirecte. Ita quod jus olim regiæ proprium fuit majestatis, ad Papam illi Doctores transtulerunt; ipseque adeo Papa sibi hoc adrogavit, ut omnes judicet, à nemine judicetur, & ut *soli Deo de peccato teneatur reddere rationem*, ut Canonistæ docent. Exinde reges qui antea à nullo judicabantur, judicari jam posse judicatum est. A quo? A Papa. Ex quo nimirum Deus in terris Vicarium habere cœpit qui reges vice sua judicaret, quorum

quorum olim Deus solus iudex erat. Hæc mutatio disciplinæ veteris, quæ regiæ dignitati pestem perniciemque invexit, tum primum introduci in Ecclesiam cœpta est, ut jam diximus, cum Romano Imperio de occidentesublato, Roma, suis imperatoribus deserta, quodammodo cessit in potestatem proprii Episcopi. Hac occasione maximam & principalem auctoritatem absentia domini sæcularis nactus, eam promoveri in majus nunquam postea cessavit, donec ad fastigium in quo nunc est, evexit. Zacharias Pontifex primus Gallos juramento fidelitatis absolvere ausus est. Idem in Epistola ad eosdem consilium petentes de Chilperico abdicando, ea rescripsit quæ fanaticorum Angliæ Independentium falsæ doctrinæ prorsus velificantur. *Principem, nempe, populo cujus beneficio regnum possidet, obnoxium esse. Quacunque enim habet, potentiam, gloriam, divitias, dignitatem, à populo accipere, & plebi accepta referri necesse esse. Regem plebem constituere, eundem & destituere posse.* Ita dictum, ita etiam factum. Non poterat plebs jurejurando obstricta regi suo ad fidelitatem ei servandam id facere sponte sua, antequam vinculo illo juramenti soluta esset.

Cui-



Cuinam tanta potestas data est in terris, ut sacramenti tam sancti gratiam populo universo facere queat? Ecce tibi Episcopus Romanæ urbis, qui pro sua sanctitate id sibi juris sumpsit. Successores, vestigiis ejus insistentes, opus inchoatum non destiterunt sic expolire & perficere, ut non satis habuerint quod primus ille factitarat, exteris populis persuadere ut suum regem abdicarent, ipsi quoque proprium dominum & imperatorem res suas sibi habere jusserunt, concitatis ad rebellionem Italiæ populis, & tributa illi pendere vetitis. Carolum, cujus patrem Zacharias amoto Chilperico regem Gallis dederat, loco Leonis Isaurici in Occidente Imperatorem constituit Leo tertius. Qui succeſſe-  
re in Papatu, in eadem doctrina promo-  
venda successores pariter extitere, donec  
ventum ad Gregorium septimum, qui  
ludum jocumque esse quæ anteriores fe-  
cerant ostendit, præut illa fuerunt quæ  
patravit simul & docuit. Is patentem lato  
dedit ore fenestram ad regum exitium  
excidiumque regnorum, stabilita nefaria  
de illis cum visum esset amovendis & de  
his mutandis doctrina, quæ merito *Hil-*  
*debrandina* ab auctore & doctore suo ap-  
pellata est. Dictata potro ista Hildebran-  
di



di diligentes ac strenuos habuere propugnatores ex hujusmodi magistris plures, qui, Pontificis Romani auctoritatem ut quo jure qua injuria defenderent, senatos & factos crediderunt, multis etiam tum doctrinæ verioris assertoribus subinde restantibus ac renitentibus. Sed nullos acrices defensores detestanda illa Gregorii septimi secta fortita est, quam Jesuitas. Hi auctore & institutore Lojola Hispano milite, qui lege Solduriorum Pontifici Romano se devoverat, in orbem missi dedocendis si qui Evangelici dogmatis puriora semina adhuc retinerent, pestiferæ scientiæ virus per omnes orbis plagas sparserunt. Sed isti quidem, utpote Pontifici addicti, non alio fini Hildebrandina scita de regibus Papæ subjiciendis asseruerunt, quam ut ne alios Europa reges aut principes habere posset quam Pontificios. Independentem autem Anglicani in eadem doctrina amplexanda aliud sequuti sunt. Eo consilio ex hæreseos suæ disciplina talem acceperunt, ut haberent nullos. Utri meliores? Immo utri peiores? Illi nullos reges volunt nisi Pontifici subjectos, & ad ejus nutum tollendos, si nolint se submittere, ac jugum recusent subire. Isti quia nullius imperio  
se sub-

se subijci volunt, ideo omnes omnino tollere satagunt, & quaecunque regale regimen linea alba signant, sive Reformatorum sit vel Pontificiorum, sive justorum regum vel tyrannorum. Quantum hi simul & illi ab antiquis & veris Christianis diversi! Nam reges illi tulerunt non solum minus æquos & justos sed etiam hæreticos, nec hæreticos tantum sed etiam Ethnicos, nec Ethnicos tantum sed etiam Neronas, immo vel Neronibus deteriores. Ut tandem hoc caput concludam, tam impio dogmati refellendo satis est dicere, à principio non sic fuisse. Deum in veteri testamento aliud suis præcepisse. Prophetas Dei nullius unquam in reges seditionis auctores extitisse. Judæorum magistros nihil unquam tale commisisse. Christum aliam legem sanxisse. Apostolos ejus aliud gentes docuisse. Gentes ipsas ubi Christo nomen dederunt, nunquam tale quid tentasse. Omnes reges, etiam paganos, etiam infideles, Scriptura teste, Dei Unctos dici. A Deo tam justos quam injustos esse constitutos. Ad summam, si vere Christiani veteres illi fuerunt, qui talia de regibus senserunt & servarunt, istos novos non esse: si isti sunt, illos non fuisse. Adeo non potest

test simul esse vera tam contrariæ utro-  
rumque disciplinæ & sectæ eadem appel-  
latio, cum res in tantum diversa habeat-  
tur.

---

## C A P V T V.

**P**ost explicatas Hebræorum & Chri-  
stianorum veterum rationes consen-  
tientes de Regum jure, de honore iis de-  
bito, deque sacrosancta eorum Majestate  
nulli subditorum violabili, nemini for-  
tasse non satisfacere videatur lex divina  
Vetus & Nova in eandem disciplinam  
conspirans, ad regulam formandam,  
quam teneantur etiam hoc tempore ob-  
servare omnes populi qui Christo nomen  
dederunt. Adeo ut, qui eam transgressi  
fuerint, merito indigni hoc nomine cen-  
seri debeant. Superfluum itaque existi-  
mare quis posset, per reliquas gentes ire,  
& earum quoque sententiam exquirere,  
quæ Regiam dominationem expertæ  
sunt. Quid super ista quæstione sene-  
rint, quid in usu & consuetudine obser-  
varint, quam reverenter suorum Regum  
personas habuerint. Sed præcipuè, num  
aliquæ ex illis, quæ Christum ignorarunt,  
natio-

nationibus tam pestiferæ & perniciosæ doctrinæ adhæserint, quæ hodie mentibus inhæret. quorundam partim sciolorum, partim fanaticorum Christianorum, quos unus idemque perditionis & rebellionis spiritus exagitat, uti malitiæ genere differentes, ita ad unum tendentes propositum, quamvis via diversa. Horum quippe duo genera *Ἀντιχριστῶν* esse diximus, qui docent, Regem non solum precarium à subditis suis imperium possidere, sed etiam animā tenere fiduciariam, & ab illorum nutu dependentem. Unum genus horum, Papæ supremū in Reges populōsq; imperium tribuit, qui cum velit, possit ipsos populos ad arma concitare in Regem suum, eosq; fidelitatis quā ei dixerunt, sacramento absolvere, & sic principem subjectis mactandum exponere. Alterum, qui Papæ medium digitum ostendunt, nec ejus auctoritatem desiderant ad Reges suos tam vita quam regno privandos, sed in populo ipso residere asserunt supremam potestatem, qui dare eam datamque revocare pro arbitrato possit, quotiescunque & quibus velit cunque. Non enim Reges alio loco ipsis sunt quam servi & ministri populi. Illi priores nullos admittunt Reges nisi Pontificios &

Pon-

Pontifici colla submittere paratos. Si qui sint, qui jugū hoc subire detrectant, à Pontifice ipso jure suo posse vel regno exui, vel necandos cuilibet tradi. Isti vero omnes omni modo reges recusant. Nō Reformati meliore conditione apud eos & sorte sunt, quam Pontificii. Uno discrimine cunctos habent, ut nimirum habendi non sint. Si verum queritur, longe isti deteriores prioribus putandi sunt, quia illi solos eos amovere student, quos sua opinione malos esse credunt, isti malos & bonos simul amoluntur. Non tamen hi minus quam illi præceptis divinis adversantur, cum Scriptura sacra etiam malos principes & religioni populi contrarios tolerandos esse præcipiat, quos Jesuitæ non ferunt. Eadem autem Scriptura regium regimen probat ac recipit, quod Independentes non admittunt. Nihil ergo egerimus si proponamus illis exempla gentium quæ Christum nescierunt, aut eum respuerunt sibi adnuntiatum, vel earum quæ verum Deum non cognoverunt antequam Christus venerit. Quos lex Judæis per Moysen data non movet quæ pro regibus facit, nec illa quam Christus per Apostolos tradidit, quæ reges honorandos præscribit, cum utraque tam malos quam bonos re-

ges

ges à Deo esse constitutos doceat, frustra laborabimus si ab iis contendamus ut respectum ullum habeant illarum gentium quæ notitiam Dei veri nullam habuere, nec Christi. Hoc tamen nobis enitendum est, ut ad hujus causæ firmamentum, non invalidum nec inutile esse æquioribus persuadeamus id, quod ex paganarum gentium more, usu & legibus ducitur argumentum. Si enim probaverimus lumine eos solo naturæ donatos id vidisse, quod Judæi per Dei prophetas edocti, quod Christiani per Apostolos Messia instructi tenuerunt, quid hac consensione unanimi tot populorum fortius aut validius videri possit nescio. Ex jure certè quodammodo naturali eam doctrinam fluxisse dici debet quam heic adstruimus. Præterea vel ad fanaticorum rationes subvertendas hoc totum unicè valebit, qui cum viderent sibi objici solere, nullam proferri posse scriptam legem quæ Regem accusari & capitis damnari permittat, eo confugerunt ut dicerent, ubi lex scripta non est, ad naturalem esse recurrendum. Hoc ipsum est quo confutari validissime nunc posse videntur, si legem illam naturalem ad quam nos vocant, maxime ipsos habere contrariam ostendamus.

damus. Quod omnes ferme gentes solo naturæ instinctu didicerunt, quod aliæ Deo ipso tradente per ministros ejus acceperunt, id non potest aliter haberi quam ut communi humani generis naturæ conveniens & consentaneum. Sane lex ipsa naturæ, quæ ratio est omnium hominum mentibus insita, quum bonum respiciat universorum populorum, quatenus homines sunt societate inter se gaudentes, non potest bonum illud commune procurare, nisi etiam, ut sunt quos regi necesse est, disponat quoque qui regere debeant. Certum quippe est & unicuique manifestum, multitudinem congregatorum in unum corpus hominum non posse semet ipsam gubernare & moderari, quia ubi multi sunt, non desunt qui non bene cum aliis conveniant, ex morum differentia, & ex earumdem rerum quæ singulis commodæ sunt aut necessariae, appetentia. Unde pugnas & rixas inter eadem cupientes aut non idem sequentes consequi necesse est. Quæ ut componantur, ex ipso numero plurium qui in unum convenere, quosdam deligi oportuit, qui aut sapientia aut fortitudine præstent cæteris, atque ita vel vi vel persuadendo in officio contineant male morigeros. Sæpe  
unus



unus id præstare potest cujus excellens sit virtus & prudentia. Interdum plures qui mutuis consiliis id faciant, deligi solent, aliquando pauciores, duo vel tres. Unde nomina *Duumvirum* & *Triumvirum* in minutis Rebus publicis, atque etiam maioribus. Cæterum si unus sit qui præsit publicæ rei, cum unus omnia providere & administrare non possit, necesse est ut consilia cum pluribus participet, & in societatem regiminis alios admittat, per quos judicia exerceat, & quæ ad bellum pacemque pertinent, agat. Sin autem penes populum sit suprema potestas & publica procuratio, quia tot capita quæ populum componunt, non idonea sunt ad regendum, propter turbæ regi ac regere ex æquo nesciæ confusionem, ipsa semet impediende multitudine, necessario oportet ut paucioribus suo nomine committat gubernationis summam. Ita sive ad unum revocetur, singulare ut sit imperium, sive ad universum redeat populum, quia nec omnes simul rem gubernare possunt publicam, nec unus omnia gerere quæ talis administratio requirit, ideo revera penes plures semper regimen consistit. Nullus quippe umquam rex fuit quin Senatum, id est seniorum ex populo



populo confessum, quorum consiliis adjuvaretur, in partem curarum adsciverit. Sed nec ulla civitas extitit, quin ejus populus qui summum habuit imperium, sui regendi potestatem commiserit paucioribus vel pluribus ad hoc è suo corpore sumptis vel electis. Ita in tribus statuum generibus, Regali, Optimatum & Populari, re ipsa penes plures administrationis hæret summa, non penes unum nec penes universos. Nam rex cum consiliariis suis & per eos imperat. Populus per eos magistratus quos civitati præfecerit. Optimatum vero Respublica est, cum certo numero virorum, in populo eminentium vel generis antiquitate vel divitiarum merito, defertur Imperium. Debere esse igitur qui regant cum sint qui regi debeant, natura humana ipsa dictavit, quia societas hominum non potest sine hoc consistere, neque homines ipsi sine societate. Ipsa autem regendi ratio, sive per plures, sive per pauciores, sive per unum dispensetur, æquè naturalis est, cum ex naturæ ejusdem principiis descendat, quæ non patitur ita unius singularitatem gubernare, ut non alios socios imperandi habeat, neque universitatem populi sic se-

K

met-

metipsam moderari, quin ad pauciores eam sollicitudinem velit pertinere. Sed si bene calculum ponimus, dum quæritur quænam ex his tribus administrandi rationibus magis naturalis censenda videatur, quæ per unum præcipue exercetur talem esse omnia monstrant, immo vel ipsa natura. Ad unius Dei exemplar hæc forma expressa est, qui omnia ut solus condidit, ita & regit. Pater in familia nonne id est quod Rex in civitate, qui & pater populi merito dictus est: Primi reges fuere patres numerosæ familiæ ex se propagatæ. Et cum homo sit animal societatis ac congregationis amans & ad eam à natura factum, ut in familia unus debet imperium habere, is nempe qui pater est, ita & in corpore ac cœtu plurium hominum unius esse oportet imperium, qui parentis locum obtinet. Animalia ipsa, quæ eandem habent cum homine naturam societate & congregatione gaudentem, ut aves quæ gregatim volitant, pascuntur & stabulantur, plerumque ab uno duce & rege diriguntur. Apes regem habent. Coturnices sub ortygometra duce trans mare abeunt & inde ad nos redeunt. Taurus est unus quem tota sequuntur armenta. Dux gregis caper est. Arietes singuli oviū gre-

gregem ducunt. Inter aves cohortales gallus gallinaceus qui reliquis fortior est ac pugnacior tam maribus quam fœminis imperitat, easque congregat & congregatis præest. Cum lex igitur & ratio naturalis quæ omnibus hominibus ingenerata est, ad utilitatem reipublicæ, id est societatis ex pluribus hominibus constantis, regimen prospexerit vel unius, vel plurium qui pro uno regant, vel pro universis, eadem utilitatis & incolumitatis omnium ratio postulat, ut qui semel ad gubernandum constitutus est, etiam conservetur quo omnes sub eo manere possint incolumes. Nam quod ait Poëta de apibus, id de universo hominum genere qui à regibus gubernantur dici debet, *Rege incolumi mens omnibus una, Avulso rupere fidem.* Nec enim potest Regis, vel illorum qui civitati præsunt cum potestate regia, exitium procedere sine certo Reipublicæ detrimento & perturbatione summa, præcipuè si ab his quorum bono datus est perniciēs ei creabitur, quæ semper conjuncta est cum ipsius populi perniciē. Numquam enim talis exitus quo vitæ Regis aut regentis vis inferitur solet evenire nisi cum seditionibus turbulentis, quæ populum dividunt & in factiones scin-

dunt. Ut autem ex turbis ea violentia nascitur, ita per turbas promovetur, & nihil nisi turbas post se trahit, ex quibus dissipationem pro congregatione consequi necesse est, & postremo interitum totius Reipublicæ, qui dissipationem semper sequitur, ut salus & incolumitas congregationem. Tametsi autem detur malum esse eum qui gubernat, certum est tamen, non tantum mali posse civitati illum procurare male gubernando, quam quantum creatur cladium & calamitatum ex seditionibus & factionibus quæ ad eum gubernaculis decutiendum suscitantur. Neronēs, Caligulæ, Domitiani, tres hi tyranni simul juncti, non tantum sanguinis in Imperio profuderunt, non tot familias subverterunt, non tot strages populorum ediderunt, quot unum bellum civile Syllæ & Marii, Cæsaris & Pompeii, qui dissensionibus suis totum orbem terrarum una quasi ruina pessunderunt. Exemplo sint & arma in Regem Angliæ nuper à furiosis ac perditis civibus sumpta, quæ universam illam insulam, beatam sub regibus suis, & luxu copiisque omnibus adfluentem & florentem, ita hætenus seditionibus & discordiis intestinis deformarunt, ut nunquam sub ullo rege quamvis injustè imperante

rante tantum cruoris haustum sit, tot familiæ desolatæ, tot proceres extincti sint, tanta populi consternatio, ordinum omnium confusio, pecuniarum publicarum dissipatio, tam immanium tributorum exactio, acciderint, quæ omnia videmus sub his accidisse, qui specie libertatis dirissimam servitutem populi cervicibus imposuerunt. Nec dum malorum finis est. Manet illos vindicta divina ob execrabile parricidium in persona Regis sui commissum, quæ nec poterit contingere quin omnia iterum novis tumultibus quassentur & ima summis mutantur, quæ scelerum merito imputabuntur. Cum itaque salus populi suprema lex sit, & natura, quæ vidit salvam esse non posse hominum in unum corpus congregatorum communitatem sine regimine, ne ipsi, quorum utilitati tale regimen provisum est, suis manibus illud evertant & malum suo sibi jumento arcessant, hoc etiam ab humana mente videtur requirere, ut per eos potissimum, quorum incolumitati reges dati sunt, defendantur & protegantur. Quamvis enim parum sæpe æqui sint & idonei, quia tamen mutatio etiam in melius non potest sine plurimis & maximis malis contingere, & quia, si quid male agunt

in paucos, id majoribus & in commune bonum redundantibus commodis sæpe pensatur, ideo ferendi sunt. Nam ut Pater naturalis quamvis asperior sit & iniquior atque etiam sævior, non potest sine scelere summo à nativitate tolli, ita eum qui vicem parentis publici gerit, licet molesta & injusta dominatione subjectos premat, sine parricidii crimine fas non est occidi. Quippe ut pater non desinit esse pater quamvis in liberos jus Patriæ potestatis severius exerceat, sic Rex qui imperium in subditos durius exercet, non perdit appellationem *Patriæ patriæ*, ut ait Justinianus. Hunc sensum ita gentibus natura impressit ut nihil magis. Quod autem pluribus aut ferme omnibus gentibus in usu & more positum est, id jus gentium constituit, immo etiam naturale, si tale jus ex principiis naturæ descendat, ut hoc ipsum inde originem trahere docuimus. Constat porro, longè plures nationes nunc & olim & semper ab orbis usque conditi primordiis regum civitatis statum probasse ac recepisse, quam aut optimatam aut popularem. Quinimò antiquissimam hanc fuisse regiminis formam, immò vel primam. Siquidem primum hominem liquet etiam omnium ex se progenitorum pri-

primum regem fuisse, atque inde per totum Orientem patres familiarum, earundem etiam reges audivisse. Inde & *φύλαρχοι* Arabum. Inde etiam, ut diximus, Israëlitis per Moysen Deus præcepit, ut si quando regem sibi constituerent, non alium sumerent nisi qui de numero fratrum suorum esset. Sane & post mortem patrisfamilias in Asia major ex fratribus regnum, sive familiæ regimen, accipiebat. Hinc nominati *πατριάρχαι* in Veteri Testamento, id est stirpis ab uno auctore, quæ *πατρία* dicebatur, duces & principes. Ad hoc instar populi ceteri reges sibi postea elegere. Si potestas est penes populum eligendi à quo regatur, ut contendunt qui minus æqui sunt regis dominationi, id apparet melius esse quod pluribus probatur. Atqui certum est, vix millesimam esse, immo vix centesimam millesimam toto orbe hominum partem reperiri, quæ aliam quam regiam agnoscat dominationem. Excepta una aut altera Republica totus hodie Occidens cum Oriente, Septentrio cum Meridie, regali tenetur imperio. Univerſa pene Europa, ne longius quod prope est, quæramus, regibus paret. Nec secus olim fuit. Trojani belli temporibus



bus omnes ex tota Græcia principes ac duces qui ad Trojam profecti sunt, suarum quique civitatum reges fuere. Summa imperii in exercitu qui ad excidium urbis prædictæ comparatus fuerat, Agamemnoni omnium consensu delata est; qui propterea *Rex Regum* appellatus est. Cum Hebræi regem sibi dari à Propheta Samuele petierunt, totus tunc Oriens sub regibus erat. Nam postularunt regem sic sibi habere licere, ut cæteræ gentes haberent. Regum porro omnium qui tunc nationibus imperabant, idem jus eadem potestas fuit, in eo præcipue posita ut judicarent & non judicarentur. Quod & disertis verbis ibi testatus est Propheta dum jus regum describit. Apertè quippe declarat, regem electum à populo, si in tyrannum degeneraret, vindictam de eo ac judicium aliunde non posse sperari nec implorari nisi à Deo. Non est autem dubium quin à Samuele eo loco proposita sit populo vel durissima regendi ratio quæ possit metui ex dominatione in tyrannidem declinante. Non enim fieri posse, quin ex multis regibus, quos essent habituri per successionem continuam natorum post patres regnantium, plerique in tyrannos essent evasuri, & ea

onera



onera populo imposituri quæ ibi percen-  
sentur à Propheta. Clemens Alexandrinus  
& alii sic interpretati sunt. Αἰτῶν, inquit,  
τῷ λαῷ βασιλέα ὃ τὸν φιλανθρώπον ὑποχρεῖ-  
ται κύριον, ἀλλὰ πῶς αὐτοῖς αὐθιγὰν τύραννον.  
*Petenti regem populo non humanum polli-  
cetur dominum, sed quendam contuma-  
cem tyrannum.* Omnes tamen hîc erra-  
runt, non solum Clemens. Non enim  
poscenti populo regem tyrannus à Deo  
promissus est ac datus, sed denuntiatum  
illi à Propheta, multos exoritueros in suc-  
cessionem Regum longa, qui jure regio,  
quale ibi describitur, id est summo, ute-  
rentur, & maxime intenso, adeo ut inter-  
dum pro rege tyrannum essent experturi.  
Sed ne talem quidem, ob ea quæ populo  
infligeret mala, sub alio staturum vindice  
& iudice quam Deo ipso. *Et clamabitis,*  
inquit Propheta, *in die illa à facie regis ve-*  
*stri quem elegistis vobis.* Si aliam eis opem,  
quam à Deo paratam, Dei voluntate ad-  
versus tyrannidem regis sui positam, eam-  
que legitimam, potuisset promittere, in  
hæc verba illam spondere videretur eis  
debuisse: *Tunc tentabitis regem quem*  
*elegistis, rejicere, & regno depellere, sed*  
*frustra.* Ne quidem id tentare illis per-  
mittit quo jugum excutiant, sed Deo

relinqui vult vindictam de malo rege  
sumendam. Et cum jushoc esset, teste  
Propheta, omnium regum qui eo tem-  
pore gentibus dominabantur, non alia  
conditione & Judæis tunc datus est, ut  
supra multis probavimus. In Deuterono-  
mio scriptum est à Mose, simul atque  
ingressi essent terram sanctam Judæi, re-  
gem sibi electuros ad instar vicinorum  
populorum. Eo tempore quo regem illi  
sibi constitui petierunt, Regnum Ægy-  
pti potentissimum fuit ac florentissimum  
sub Pharaonibus, & Judææ maxime fi-  
nitimum. Quo jure ac more illi regna-  
rint, inspiciendum, & an tyranni fuerint,  
ut omnes fuisse volunt illius temporis re-  
ges Enthusiastæ isti, quibus Tyrannorum  
appellatio hodie in Anglia jure optimo  
competit. Nam si tyranni non sunt, nul-  
los unquam hoc nomine merito notatos  
esse dixero, cum isti crudelitatem & im-  
manitatem omnium, qui unquam fuere,  
tyrannorum, factis suis longe supergressi  
sint. Scribit Diodorus lib. i. Bibliothecæ,  
Regibus Ægypti nihil agere permissum  
sine lege. Omnibus ejus actionibus mo-  
dum ac tempus lege præfinitum fuisse.  
Juris dicendi tempus ei statutum erat,  
deambulandi, lavandi, & cum uxore etiam  
con-

concumbendi. Leges etiam fuere, quæ ei præscribebant, quibus cibis vesci deberet, quibus abstinere. Cui vivere non licuit sicut voluit, tanquam æger sub medici regula constitutus, ita ad normam legum rex ille quotidiani victus morem observare necesse habuit, ne in minimis quidem suæ potestati atque arbitrio relictus. Non judicium ferre de quoquam, non punire aliquem, non denique quicquam agere potuit, contra quam leges juberent. At de omnibus, quæ ageret, lex aliqua fuit quæ vel vetaret facere quod vellet, vel juberet exequi quod nollet. Cum tot legibus obstrictus & tam strictis limitibus circumscriptum ejus foret imperium, si tamen quasi tenacis oris equus fræno rupto extra fines legibus positos evagaretur, & omnia pro libitu etiam contra leges ageret, an illi patiendum fuit aliquod supplicium à populo ob delicta & effrenatam licentiam infligendum? An in jus vocatus est? An sacerdotes, qui proximam & secundam ab illo potestatem & auctoritatem tenebant, quique à consiliis illi erant, & in omnibus judiciis adsidebant, judices in eum sedere poterant, eumque damnare & capite plectere? Nihil minus. Et tamen, quod miran-

mirandum, populus ille levitatis nomine & animi ad seditiones proni semper male audiit. Sed nec impune Regibus suis esse voluerunt, qui se legibus solutos vellent. Quam pœnam igitur peccantibus imposuerunt, aut quando? Quandiu vixere, quod male & contra leges fecissent, tulere impunitum. Morte obita demum vindicabat se populus de rege malo, male ei dicendo, & memoriam ejus convitiis & contumeliis incessendo. Si juste regnasset, & ex legum præscripto, multa hominum milia funus ejus prosequerentur cum lacrimis, fletu, planctu, ac laudum celebratione, quibus defuncti memoriam condecorabant. Aitque ibidem Diodorus, multos Ægypti reges, quod tyrannice imperassent, legitima & publica funeris pompa caruisse, populo non permittente ut cum funebri choragio sepe-  
 lirentur. Καὶ πολλοὶ, inquit, τῶν βασιλέων, ἀλλὰ τὴν ὁ πᾶσι πᾶσι ἐναντίον, ἀπὸ τῆς ἑστῆς τῆς ἐμφανῆς καὶ νομίμης ταφῆς. Nullum tamen regnum fuit quod plures reges habuerit, neque aliud quod diutius duraret, cum tamen nusquam mentio extet ullius regis à populo per seditiones occisi, aut in jus vocati vel damnati, cum  
 vel.

vel tyrannos crudelissimos & immanissimos, ut Busridem illum olim; & Cambysem, postquam in potestatem Persarum redacti sunt, habuerint. De se dicebant illi, primo apud se Deos imperium tenuisse, deinde semideos, postea homines mortales regnum possedisse. Ut priora de Diis & semideis fabulosa sunt, ita de illis etiam quæ sequuntur fides sit penes Herodotum, qui tradit, cum apud Thebas esset Ægyptias, sacerdotem Jovis sibi in grandem aliquam cellam introducto ostendisse colossos è ligno trecentos quadraginta unum, qui pro regum simulacris, eorumdemque Pontificum, ibi positi erant perpetua serie patribus natorum succedentium. Quibus colossis subscriptum fuerat, *Piromim* regnum accepisse à *Piromi*, id est, hominem mortalem ab homine mortali. Vox autem Πίρωμις, vel Πώμις sine articulo, Ægyptiaca lingua sonat hominem. Herodotus ea voce significari tradit apud Ægyptios τὸν καλὸν καὶ ἀγαθόν, quia nempe talis esse debet homo. In tot regum numero verisimile est non omnes fuisse bonos, & tamen non interrupta serie successionis per tot generationes de patre in filium subinle devolutum est imperium. Incredibilem  
qui-

quidem videri necesse est tot regum continuationem successivam, quæ secundum eorum calculum colligeret ad decem millia annorum. Sed non aliud nos inde argumentum ducimus, quam quoscunque & quotcunque reges habuere, nulli ex his bellum illos intulisse, nec quidquam vel publice vel privatim fecisse quo è solio deiceretur. Postea sub Persarum imperium redacti non minus alienigenis dominatoribus, qui per vim imperium invaserant, fideles extitere, quam fuerant erga suos & legitimos principes. Deinde Macedonum regum jugum subierunt, id est, Ptolemæorum. Hos etiam patienter tulerunt, quamvis aliquot ex illis pessime imperarint, ut ille qui Phisconis cognomine fuit, & alter Epiphanes, quem *ἐπιμην* ab infania nuncuparunt pro Epiphane. Postremo à Romanis devicti, & in provinciæ formam Ægypto translata, Augustalem præfectum accepere. Alexandria tunc Ægypti metropolis erat & sedes olim Ptolemæorum, quæ puris Ægyptiis non habitabatur, sed ex colluvie omnium gentium conflatum populum habebat, Græculorum, Judæorum, Samaritanorum, Syrorum, Romanorum, & aliorum. Unde efficieba-

tur,

tur, ut veterum morum nihil retinerent. Seditiones sub medio Imperatorum Romanorum ævo sæpe fecerunt, & præfectis suis diadema imposuerunt, & Augustos crearunt. Ventosi erant, factiosi, vani, rerum novarum cupidi, & quibus, ut ait Vopiscus in Saturnino, *præsentia semper tempora cum enormi libertate displicebant*. Præterea more tunc tralatitio in Imperio Romano utebantur, quo rebelliones, passim solitæ usurpari, quasi licitæ videbantur. Temporibus antiquis longè aliter se res habuit, & eo præcipue sæculo quo Israëlitæ regem sibi habere voluerunt, ut cæteræ gentes habebant. Assyrii tunc temporis imperium in Oriente obtinebant, quod ab Assyriis ad Medos translatum est per Arbacem, à Medis ad Persas per Cyrum. Omnium idem jus atq; eadem potestas fuit in regno, nempe regium illud quale describitur à Samuele, summa cum licentia, quodcunque libitum esset, faciendi conjunctum. Cum tamen populi nefas esse tum crederent regem suum hoc nomine repudiare quod illo jure abuteretur. Ab externis ut plurimum ea regna destructa sunt, non ab indigenis, neque à subditis. Persarum monumenta in eo dissentiunt à Græcis, quod nulla

Assy-



Assyriorum, Medorum, Persarum, Parthorum distincta per gentium genera agnoscunt imperia, sed per varios ex una eademque stirpe principes, qui tyrannidem diversis temporibus & in diversis imperii locis arripuerunt. Magnum illud imperium à mari Caspio usque ad Persicum extendebatur, innumeras gentes & populos complexum, nomine *Airan*. Cyrum illum, qui destruxit Medorum imperium, satrapam fuisse volunt regis; cujus vidua *Toman*, ea *Tomyris* est Græcorum; contra quam rebellavit Cyrus. Sed hæc non sunt hujus loci. Persæ cum imperium tenuerunt, quali jure regnarint, liquet ex Herodoto. Cum Cambyfes pessimus Rex, & quem novum Nabuchodonosorem Judæi nuncuparunt, sororis germanæ amore captus esset, eamque vellet in uxorem habere, interrogavit Regios, id est suos, Judices, qui ipsi à consiliis erant, ex populo ad hoc munus delecti, num aliqua lex esset apud Persas quæ permetteret tale matrimonium. Cum illi negarent, Regi tamen suo gratificari in hoc amore vellent, dixere aliam se legem invenisse, qua liceret regi Persarum facere, quicquid ipsi collibitum esset, *ἄλλων μὲν τοι δούλην αἰ νόμος, ἱζέειν αἰ*



ἐξείναι ποιεῖν τὰ αὐτῷ βέλη). Artabanus Persa in Themistoclis vita apud Plutarchum dicit, ex multis, quibus uterentur Persæ, legibus, & quidem egregiis, nullam esse pulchriorem & meliorem illa, qua sancitum fuerat, regem esse honorandum & adorandum, ut Dei cuncta fervantis imaginem. Ἡμεῖς δὲ τῶν πολλῶν ὄντων νόμων καὶ καλῶν, καλλίστου ἑτοῦ ἐστὶ, τὸ πρῶτον τὸ βασιλεύειν καὶ δεσπομεῖν εἰκόνα ἔχοντα πάντα σώζοντες. Non dicit, bonum esse factum, bonum tantum regem colere, sed qualemcunque. Nam, ut Claudianus cecinit de Persis, *quamvis crudelibus æque Parebant Dominis*. Otades Persa in oratione sua apud Herodotum, quam sententiæ loco dixit de optimo Reipublicæ statu, Monarchicum definit statum esse, cui licet impune facere, quod lubet. *Μοναρχίῳ ἢ ἐξέστιν ἀνυπόβουλον ποιεῖν τὰ βέλη*). Injure ejus describendo eadem prope scribit quæ Samuel de regis potestate cum Israëlitarum dari sibi Regem petierunt. *Τὰ ὅμως μέγιστα ἔρχομαι ἐρέων, νόμοι ἅτε κινεῖ πάτρια, & βιάζονται γυναῖκας, κτείνου τε ἀκέρτους*. Ut ad ea qua maxime gravia sunt, dicenda ingrediatur, leges patrias abrogat, mulieres violat, & condemnat inauditos. Rex apud  
eos.

eos non mutabatur nisi morte, ut ait Justinus, nempe naturali. Cum Persæ Medis successerint, & Medi Assyriis, qui eo tempore dominabantur quo regem Israël sibi constituerunt ad instar aliarum gentium, apparet non alio jure hos regnasse quam illos. Homerus circa illa ipsa tempora secundum quorundam opinionem vivebat. Quale jus Regum esset qui in Græciæ civitatibus summam potestatem tunc obtinebant, ipse satis declaravit, cum dixit, *Reges à Iove esse, & illos regnare quibus dederit id Iuppiter Saturni filius.* Quod à Deo perhibet esse constitutos, ex eo arguitur non posse alium quam Deum habere judicem, qui eos constituit. Eiusdem quippe esse, destituere quem constat constituisse, moris ac juris est indubitati. Idem Homerus perpetuo ferme epitheto *Θείας βασιλῆς*, *divinos Reges*, & *διοτρεφεῖς*, *à Iove educatos*, appellat. Philippus dixit, regem, cum homo sit mortalis, *ἐξ ἐσίας ἰσθῆον* accepisse, *poteſtatem divina parem.* Diotogenes Pythagoreus, in lib. de Regno, scripsit, ut se Deus habet ad mundum universum, ita regem se habere ad rempublicam cui præest. *Εἴ ᾧ καὶ ὡς θεὸς ποτὶ κόσμον, βασιλεύς ποτὶ πόλιν, ἔ ὡς πόλις ποτὶ κόσμον, βασιλεύς*

σιλδὺς ποτὶ θεόν. Civitatem quippe, ex multis & diversis rebus compositam, mundi structuram & concentum imitari, regemque, cum imperium gerat nulli obnoxium, & lex sit animata, Dei effigiem inter homines exhibere. Οἱ βασιλεὺς δὲ ἔχων ἀνυπόθῃνον, καὶ αὐτὸς ἀν νόμου ἔμψυχος, θεὸς ἐν ἀνθρώποις παρεχρημαίεσται. Idem paulo post scribit, Deum regi principatum dedisse, ὃν δέδωκεν ὁ θεὸς αὐτῷ τὴν ἡγεμονίαν, *Cui Deus dedit suum ipsius principatum.* Planè intelligit, Dei vices in terris regem gerere, & commissum ab eo imperium gubernare. Ibidem præclare dicit, *Deum naturæ primum esse regem & principem; regem vero mortalem, creatione & imitatione.* Deum in universum mundum potestatem habere; regem interra. Θεὸς γὰρ φύσις ἐπὶ ἐπεὶ ὅτι βασιλεὺς καὶ δυνάστης, ὃς ἡγήσεται καὶ μιμήσεται. Οἱ μὲν ἐν τῇ παντὶ ὅλῳ, ὃς ἐπὶ γᾶς. Ecphantas, Pythagoricus alius, in libro ejusdem argumenti, ubi de regno tractabat & regis officio in terra & inter mortales, docet, *Optimam quidem naturâ rem esse hominem, maxime vero divinam regem.* Eum meliori conditione esse præditum quam ceteros homines. Et, quamvis corpore sit similis reliquis, ut pote ex eadem materia creatus,

ab optimo tamen artifice esse productum;  
 ὃς ἐτεχνίσατο αὐτὸν , δὲ χεῖν παρὰ χεῖρα αὐτοῦ. Qui eum fabricavit ad suum ipsius  
 exemplar. Subjicit continuò , Regem sin-  
 gulare quoddam & unicum esse opus , ut-  
 pote , qui sit imago ἑαυωτέρου βασιλέως, Cæ-  
 lestis Regis. Idem , αὐτοερχίω , quæ regit  
 se ipsam , & regitur à nemine , Dei pri-  
 mum esse propriam , deinde & Regis.  
 Ο' περὶ ἐντὶ μὲν τοῦ θεοῦ , ἐντὶ δὲ βασιλεῖ. αὐτοῦ  
 μὲν ἄρχειν , ἀφ' ἧς περ καὶ αὐτοερχίης καλεῖται,  
 ἄρχεται δὲ ὑπὸ δδενός. Ferendos autem reges  
 esse, etiam injuste imperantes, etiam in-  
 justa jubentes, pluribus Philosophorum  
 & Poëtarum & auctorum Græcorum La-  
 tinorumq; testimoniis adstruere liceret, si  
 res ista testibus egeret, quæ tot rationibus  
 confirmatur. Potestatem certè nullis legi-  
 bus, nullis judiciis obnoxiam in Græcia re-  
 ges obtinuisse, vel unus Æschylus potest  
 docere, qui in Tragœdia *Supplices* regem  
 Argivorum ἀνεῖλον πρὸς Ἰώνιν vocat, non  
*judicabilem rectorem*. Inachidæ tum re-  
 gnabant. Si quæ tunc mutatio interce-  
 debat qua de singulari imperio fieret po-  
 pulare, aut optimatum, ut plurimum ea  
 contingebat defectu stirpis regiæ, sive  
 familiæ dominantis. Sic sub illud ipsum  
 tempus Sicyoniorum regum imperium  
 defe-

defecit, quod per annos nongentos sexaginta duos steterat, translata in Carnios Sacerdotes potestate. Ita post Codri interitum Athenienses reges habere destiterunt, & Magistratus eorum loco habere cœperunt administrandæ Reipublicæ. Sane ubi extinctum est semen regiæ stirpis in hæreditariis regnis, tum ad populum potestas redit, cui liberum est postilla vel alii imperium simile deferre, vel in aliam formam id mutare. Sæpe itaque de familia in familiam regna transeunt, aut omnino cessant, aut de urbe in urbem transferuntur. Sic regno Argivorum finito translata est potestas Mycenæ, unde fuit Agamemnon, ut ait Augustinus. Bello sæpius destruebantur regna ab alienigenis hostibus. Non longè ab illa ætate Priamidarum dominatus extinctus est bello ob Helenæ raptum ab universæ Græciæ Principibus in Trojanos suscepto. Eodem sane tempore ex alia causa familia Erechthidarum, qui Atticis Athenis per annos plus minus quadringentes regnaverant, imperio excidit, idque ad aliud genus transiit. Nam cum Thymoeten ad pugnam Xanthus Boeotius provocasset, & Thymoetes recusaret, Melanthus Pyliensis Andropompi filius singulare illud certamen

tamen contra Xanthum suscepit & ex eo regnum meruit. Non opus est per singula regna currere, nec omnes mutationum causas quę statum regiminis in aliam formam converterunt, enumerare. Satis est ex communi omnium gentium sententia id jus regibus adstruere, contra quod si quis faciat, rem justam non fecisse judicetur unanimi cunctorum populorum consensu. Turpissima quęque factu facinora, & quę talia omnium opinione existimantur, sæpè nihilominus fieri & à multis videmus, sæpius etiam vindicari in auctores suos, quę tametsi & bene nonnullis succedunt, atque impunita abeunt, non propterea licita esse & rectè facta dicendum. Minuta Gracię regna relinquamus, & ad Romanos veniamus, quorum cum maximè potens & latissimè patens fuerit imperium, plurimasque mutationes passi sint, de regno in Rempublicam, de statu populari in singularem, an aliam quam Ægyptii, Persę, Judæi, Graci de Monarchicę dominationis jure & potestate sententiam habuerint, consideremus. Gravissimus eorum Historicus, & qui, cum æquis adhuc legibus floureretur & suā libertate frueretur Respublica, vixit ac scripsit, *Impune quidvis facere, id esse*

*esse Regem esse dixit. Tacitus, qui sub Imperio unius floruit, non dubitavit ita scribere: Principi summum rerum arbitrium dii dederunt, subditis obsequii gloria relicta est.* Primus eorum principum qui statum liberum civitatis in Monarchicum convertit, Dictaturæ perpetuæ nomine & titulo imperium sibi arripuit. Notum est porro Romanæ historiæ peritis Dictaturam fuisse *δεξιὴν ἀντιστάθμων*, quæ nullis legibus teneretur & omnibus soluta esset. Initio urbis conditæ talem & reges habuere potestatem à primo Romulo. Nam Romulus, ut ait Tacitus, *nobis, ut libitum, imperaverat. Et constat, ut scriptum Pomponio, initio civitatis reges omnem potestatem habuisse.* Sanè cum populum sibi ipse fecerit & se ipsum regem populi, non potuit nisi summam & merè regiam in eum habere potestatem. Qui succedere illi in regno, par imperium quoque habuisse verisimile est, quamvis de jure suo fortassis aliqui remiserint, leges ferendo quibus obligati se voluerint. Quod & ipsum summæ potestatis argumentum est. Majus quippe imperium haberi debet quod quis volens in semet ipsum statuit quam quod in alios exercet. Sic enim melius aliis imperat qui ipse sibi pri-



primum. Ut enim optime dictum est ve-  
 teri Philosopho, *Non cadentis est curre-  
 re, nec incompofiti velle alios componere;  
 ita nec ejus qui vitiis suis indulgeat & pa-  
 reat, aliorum vitia pro imperio corrigere.*  
 Non ego sane crediderim, minus potuisse  
 in regno Servium Tullium quam Romu-  
 lum, quamvis hic *sancitor legum fuerit*  
*quibus etiam Reges obtemperarent*, ut ait  
 idem Tacitus. Nam qui legem sanxit, po-  
 test eam abrogare. Cum boni autem  
 Principis officium sit recta sibi imperare  
 non minus quam subditis, utrumque li-  
 bere agit, & potest neutrum facere im-  
 pune, quatenus legibus ipse solutus est,  
 tam *cogentibus* quam *dirigentibus*, ut lo-  
 quuntur. Non illis quippe assensum com-  
 modare possum qui legibus tantum eum  
 solutum esse volunt, quibus cogatur, cum  
 nullæ sint omnino quibus teneatur. Sane  
 tam ab iis quæ jubent quam quæ vetant,  
 liber est. Dio libro LIII. *Δελιὸν γὰρ τοὶ νό-  
 μων, ὡς αὐτὰ τὰ Λατινικὰ ῥήματα λέγῃ,  
 τὰ τε πρὶ ἐλευθέρου ἀπὸ πάσης ἀναγκῆς νομί-  
 σεως εἰσι, καὶ ὅθεν τὸ μετὰ μὲν ἐνέχον.*  
*Soluti sunt legibus, ut ipsa Latina voca-  
 bula significant, hoc est liberi sunt ab om-  
 ni legum coactione, nec ulla scripta lege te-  
 nentur.* Nomen Græcum αὐτοκρατορ  
 eam



eam potestatem legibus nullis obnoxiam denotat, quod, ut ait idem Dio, Romani Imperatores receperunt *πρὸς δὴ λῶσιν τῆς αὐτοτελεῖς σφῶν ἐξουσίας*, ad demonstrandam absolutam suam summamque & independentem, ut ita loquar, potestatem. Hæc illi dat non solum *καὶ τὰς νόμους* imperare, sed etiam *καὶ τὸν νόμον ἄρχαν*, id est supra leges esse, ut loquitur Plutarchus. Justinianus Novella c v, ubi ab iis quæ in Consulibus statuerat, Imperatoris fortunam excipiendam pronuntiat, *ἢ γε καὶ αὐτὸς ὁ Θεὸς τὰς νόμους ἱσχυροτέθεικε, νόμον αὐτὸν ἐμψυχὸν καὶ ἐπὶ μέψας ἀνθρώποις*, Cui & ipsas leges Deus subjecit, *legem animatam mittens hominibus*. Quæ cum ita sint, boni tamen est principis semet ipsum legibus subicere, & secundum leges quas ipse posuit vivere. Inde illa ex rescripto Severi & Antonini Institutorum lib. ii. Tit. xvii. *Licet legibus soluti simus, attamen legibus vivimus*. Cæterum hîc quæstio non est, quid regem bonum facere oporteat, sed quid facere possit ex jure quod illi dat summa potestas. Quod jus describitur i Sam. cap. viii. ut jam supra notavimus. Inde Plinius in panegyrico ad bonum Principem Trajanum, *in Rostris simili religione ipse te legibus subjecisti, Ca-*

*sar, legibus, quas nemo principi scripsit, sed nihil amplius vis tibi licere quam nobis.* Hoc verò ipsum quod se legibus sponte sua subjicit princeps, cum à voluntate ejus id pendeat, ad illud semper redeundum est quo jus supremæ potestatis in rege denotatur, *si velit, posse; si nolit, non facere id quoque posse; & proinde vere legibus solutum esse tam jubentibus quam vetantibus.* Dio: Αὐτελελὴς ὄντως καὶ αὐτοκράτωρ καὶ ἑαυτῷ καὶ τοῖς νόμοις, πάντα τε οἷα βέλοιτο ποιῇ, ἔκ πᾶνθ' ὅσα μὴ βέλοιτο μὴ πρᾶτῃ. *Revera solus per se omnia perficiens, sui que & legum imperium habens, quacunque velit faciat, & qua non velit non faciat.* Sic posito & confirmato jure regis, quale habuerunt priores Romanorum reges & posteriores eorundem Imperatores, qui quamvis regis appellatione abstinuerint, veri tamen reges erant, & sic passim à Græcis auctoribus βασιλεῖς vocati sunt, quid inde consequatur, manifestum est. Nempe, ex eo quod supra leges essent & quod quidquid statuissent, legis vigorem haberet, ut est in leg. 1. D. de Constitut. Principum; non posse ulla lege ad faciendum quod nollent, cogi, nec ullis legibus scriptis propter aliquod male factum reos fieri vel puniri. Hæc regula est

est quæ in omnibus regnis & de omnibus regibus quibus ex vero nomen hoc datum fuit, sancita est, apud Assyrios, Medos, Persas, Ægyptios, Judæos, Græcos, Romanos. Ut autem sapientis est & viri probi regulæ institutum custodire, improborum verò & insipientium eam violare; si quid contra regulam sapius & à pluribus factum est, non impedit ne veritas regulæ maneat & justitia. Multa sunt quæ ad amissim & normam exigi non possunt, nec desinit tamen norma aut amissis esse recta. Quoties populi in legem committunt quæ reges sacrosanctos esse voluit, quæque *Patres Patria* eos vocandos statuit, quamvis severius imperent & non legibus vivant, non ex populorum vitio lex contraria sancienda est illi legi quæ jure naturali & gentium introducta est, quamque omnes gentes bene morata & constituta semper observarunt. Alioquin ex multitudine adulterorum, homicidarum, furum & falsorum testium, leges quæ adulterium, furtum, falsum testimonium prohibent & plectunt, viderentur abrogandæ, atque ipsa Decalogi præcepta moralia tollenda. Inter leges sensu communi hominum adprobatas, & unanimi consensu gentium receptas, ea

fuit maxime illustris & maximi momenti, quatenus ad communem humani generis utilitatem una unice pertinet, atque ut talis, ex juris naturalis principiis petita & hausta videtur, quæ regum conservationem spectat. Non tamen eodem modo ab omnibus observata est populis, quamvis inter omnes constaret esse unam ex omnibus præcipua religione custodiendam. Sed prout melius moratæ & magis piæ, aut sanioris sanctionisque religionis sensu imbutæ gentes fuere, ita maiore observantia eam coluerunt. Quod idem de aliis legibus, quæ ex naturalibus deductæ sunt fontibus, licet dicere: Nempe illas à nationibus, quæ naturæ humanæ, id est rationali, magis convenienter vixerunt, exactius & strictius esse servatas. Inter gentes quæ regibus suis colendis maxime fideles fuere, Ægyptiacam poëta nominat, Lydiam & Parthicam, quia tunc Parthi imperabant in Oriente. Alioquin idem fuit de Assyriis, Medis & Persis, qui idem imperium Orientis tenuere suis temporibus. Ferociiores & incultiores gentes hac in parte sæpius peccasse comperiuntur. Historia Scotica in regum suorum albo quin-quaginta exhibet, aut expulsos, aut incarceratos,

ceratos, aut necatos, quosdam etiam in publico capitali supplicio affectos. Angli à Gulielmo Conquæstore tres numerant in carcere occisos, Eduardum II. Richardum II. & Henricum VI. Enimverò quorum populorum purior fuit religio, moresque castiores ac sanctiores, eos etiam reverentiores extitisse regum suorum & magistratuum cultores constat, ut Judæos & Christianos. Nam ex religionis suæ præceptis hanc regulam habuere, qua regibus malis & bonis ex æquo parere jubebantur. Christiani vero in ea regula observanda majorem diligentiam & fidem adhibuerunt quam Judæi, quia meliores se ac fideiores divinatorum præceptorum observatores semper jam olim præbuerunt; & quia hoc præceptum studiosius ipsis ac sæpius inculcatum & infixum ab Apostolis fuit. Qui in cæteris legibus & moralibus præceptis, divinisque mandatis sese morigeros magis & magis religiosos ostenderunt, haud mirum est si & in hoc ipso regulæ se tenaciores præbuere. Sæpe & imperii latius patentis magnitudo in causa fuit ut pronius peccaretur à populis contra hanc legem. Exemplo sint duo quæ omnium amplissima extitere, Assyrium & Romanum. De quibus Augusti-

nus lib. xviii. de Civitate Dei cap. ii. *Duo regna cernimus longe cateris provenisse clariora, Assyriorum primum, deinde Romanorum. ut temporibus ita locis inter se ordinata & distincta. Nam quomodo illud prius, hoc posterius, eo modo illud in Oriente, hoc in Occidente surrexit. Hæc duo regna maximas mutationes & frequentissimas passa sunt, partim ex seditionibus. & bellis intestinis, partim ab externis armis. Nec mirum. Immo magis mirum foret si in eodem statu pacis & tranquillitatis sub iisdem semper dominis mansissent. Immania & vasta corpora, in plurima membra, & ipsa per se magna divisa, motibus & morbis, tam externis quam internis, magis obnoxia sunt quam exigua. Cum indiffusi & extenti spatii ditio in plures Satrapias & præfecturas distincta, omnia non possit per se Rex solus administrare, cogitur partes regni regendas præsidibus & rectoribus mandare, est ubi & exercitus numerosos ad tuendum limitem ipsis committere. Unde ambitio præfectorum qui se tam potentes vident, & in locis à comitatu & aula principis remotis positos, sæpissime ea occasione utitur ad rebellandum. Ex qua re non raro unum regnum plura solet regna parere, cum aut*  
puc-



pueritia principis dominantis, aut inertia, aut odio adducti ii qui rebus novis student, tyrannidem affectant, & factionis qua sibi principatum parare conantur, haud paucos socios consciosque reperiunt. Rebellionem certe adornantibus numquam defunt adiutores, ubi causa aliqua odii vel invidiae in eum qui dominatur, arcessi potest, vel quando multum posse creditur is quid se velle ostendit. Quod, ut dixi, in regnis plurimas & late diffusas ditiones occupantibus saepe usu venit, quia occasiones majores & crebriores ad hoc conandum inde oriuntur. Nisi occurrant, interdum & manuum sunt. Cyrum illum veterem, Satrapam fuisse tradunt regis Persarum Annales Persici, qui primus contra viduam ejus Tomyrin arma sumpsit. Arbaces Medus ab Assyriis ad Medos imperium transtulit, Nino occiso, ob effœminatum corporis cultum, & regundis viris parum idoneum muliebre animum. In Romano Imperio non solum quando ab uno regi cœpit, talia multa evenere, sed etiam cum populus rerum summam teneret, plurimæ & maximæ seditiones civium ad perniciem status publici grassatae sunt. Amplitudo imperii hoc fecit, factiones plures nobilium & optimatum contra

populum, ac populi frequentes secessiones ab optimatibus suscitando. Ubi sub unius potestate redactum est, ea causa quæ attriti, sæpe regnantes gubernaculo excussit, tumultuantibus exercitibus, ac tumultus concitantibus ducibus, imperandi scilicet cupidine, præcipue qui provincias regabant tam multas simul ac magnas, ut quæ jam regna sunt potentissima, eo tempore unius præsidis vel rectoris administrationi cesserint. Nullum hodie in orbe terrarum qui notus est, amplius ac majus imperium cernitur quam est Turcicum. Nullum etiam videre est quod tot mutationes in personis dominantium soleat experiri. Regni moles in causa est, & copiarum militarium quæ ad tuendum Imperatorem & regnum conservandum comparatæ sunt, multitudo. Ut sanguis qui in corpore vitam retinet, si nimis abundet, sæpe & in perniciem ejus exsuperat, cujus ad salutem venis infusus est. Non raro tamen & in parvis regnorum corporibus hi excessus nati sunt. Nondum pomærium urbis suæ egressa erat Romana potentia, cum regem bene de se meritum & primum Senatus interfecit, ab ipso constitutus. Adeo autem non pro recte factis hoc jactavit, ut contra omnibus modis celatam



tam hanc necem voluerit : cujus ut invidiam à se amoliretur, finxerunt sceleris conscii in cælum raptum à Jove fuisse. Subornarunt e corpore suo Proculum quendam, qui populo persuaderet visum à se Romulum augustiore forma quam humana sit, & ipsis mandare ut se pro Deo acciperent colerentque. Quirinum se in cælo vocari. Sic illi tum regem sustulerunt ut regnum in statu suo conservarent. Postea utrumque simul abolitum voluere. Sed quomodo aut qua causa, aut qualem regem regno simul exuerunt, regnumque ipsius in aliam status formam mutarunt? Importuna hominis superbi dominatione offensi, ferre eum diutius non potuerunt. Cum enim impotenter se gereret & crudeliter, omnes in odium sui adduxit: quod adauctum est expugnata nocturno stupro Lucretiæ pudicitia ab ejus filio Sextio. Præterea si omnia quærantur, ne legitimum quidem eum Romanorum à quibus expulsus est, regem fuisse constat. Sed quomodo ejecerunt? An in jus vocarunt? An capitis causam dicere coëgerunt coram Senatu? An occiderunt? Nequaquam. Portas venienti clausurunt, cum ingressum urbem capere potuissent, & capto securi caput amputare.

Destituerunt eum, agrum ejus Marti suo consecrarunt. Ita illi gentiles regem tractarunt, qui vi regnum occuparat, qui superbe & crudeliter imperabat. Christiani novitii Angliæ & Reformatae religionis reformatores Regem suum, legitimum, bonum, pium, clementem, non adulterum, non homicidam, pro nefas infando & infami supplicio, per carnificem, publico spectaculo, medio die, cervicibus securi defectis sustulerunt, per multas tractum prius mortes, metu mortis sapius gladio vel alio genere intentatae excruciatum, ad supplicium ductum per ea loca quæ plurimum vivus amaverat, per Aulae suæ membra picturis egregiis & magnifici operis aulaeis exornata. Ne quid deesset ad mortis infamiam, stipitem ipsum cui caput decollandum carnificis securi imponere debuit, humiliorem & depressiorem statum curaverunt quam reliquis noxiis poni soleret, ut sic prostrato non ingeniculato cervix abscinderetur, quo major scilicet morientis esset ignominia. Redeamus ad Romanos. Cum Rempublicam præ Regno maluissent, quas non ibi pœnas mutati status postea pependerunt? Rem quidem suam & imperium longe lateque dilatarunt, sed intestinis dome-

domesticisque discordiis tam sæpe tam diu conflictati sunt, ut dici possit hæc supplicia hausisse ob reges suos olim interemptos & ejectos. Quid tandem? Per infinitam sanguinis civium vim effusam, per subversionem fortunarum & bonorum suorum, per tot Reipublicæ vulnera, per ipsius tandem generale excidium, ad id quod tanto animo repudiarant, recidere coacti sunt, ut iterum reges acciperent. Nec prius hoc bono eis frui datum est, quam mala extrema passi sint sub Cinnis, Mariis, Syllis, aliisque publicis hostibus & patriæ teterrimis pestibus. Tandem Cæsar rerum potitus est, post non minores Reipublicæ clades & calamitates ab eo illatas quam illi priores inflixerant. Sic ille rex factus non nomine sed re, non diu regnum tenuit, sed in Senatu, à conjuratis nobilibus & libertatis cupidioribus quam par esset, occisus est. Nec sic tamen ea cæde libertas quam tanto ambitu petierant, recuperata est, sed majus inde conflatum incendium, quo iterum publica res conflagravit, Deo manifestis indiciis testante non sibi placuisse quod in persona Cæsaris commissum fuisset parricidium. Intra annum quippe vertentem multi eorum qui in caput ejus con-

spi-

spiraverant, parricidii pœnas sanguine suo  
luerunt. Nemo certe percussorum ejus,  
Suetonio teste, *triennio amplius super-  
vixit, neque sua morte defunctus est.*  
*Damnati omnes alius alio casu poriere,*  
*pars naufragio, pars pralio, nonnulli se-*  
*met eodem illo pugione quo Casarem vici-*  
*laruerant, interemerunt.* Quanto sceler-  
ratius & majus aggressi sunt nefas qui Ca-  
rolum Angliæ Regem parricidaliter ob-  
truncarunt, tanto citius sceleris sui pœ-  
nam merentes expensuros esse, debemus  
sperare. Illi tyrannum germanum, liber-  
tatis oppressorem, reique publicæ usur-  
patorem à se interemptum gloriabantur.  
Isti quo titulo tam immane facinus à se  
admissum possunt defendere, qui Regem  
suum hæreditarium, regni paterni posses-  
sorem legitimum, hoc solo noxium quod  
nimis bonus esset, non illo affecerunt  
supplicio quo tyranni solent mactari, sed  
eo quo latrones & proditoris rei dam-  
nari consueverunt. Cum de supremi  
numinis justitia dubitare nequeamus,  
tanto spem majorem concipere fas est,  
exorituros esse aliquos Harmodios, &  
Thrasibulos, qui cæde quadraginta ho-  
rum tyrannorum infandum crimen ex-  
pient sanguine impio, & sanctis Mani-  
bus

bus optimi Regis parentent. Cæsari sic  
interfecto nefaria eorum conspiratio-  
ne, quos omnes ipse multis beneficiis de-  
vinxerat, quorum etiam plerosque in-  
tutoribus filii sui, si quis sibi nasceretur,  
testamento nominaverat, solida columna  
viginti pedum in foro posita est, & inscri-  
ptio: PARENTI PATRIÆ. Quanto  
magis hoc honore & elogio dignus Caro-  
lus, qui populi ingrati tantum amorem  
& tale studium, non solum tota vita sed  
etiam in ipsa morte testatus est? Sæpe so-  
litam ferunt Cæsarem dicere, non tam  
sua quam Reipublicæ interesse uti salvus  
esset. Rempublicam quippe si quid sibi  
eveniret neque quietam fore, & aliquanto  
deteriore conditione civilia bella subitu-  
ram. Quanto justius hoc de se deque re-  
gni sui statu potuit ominari Carolus, cum  
jam longe deteriore conditione esse vi-  
deamus post obitum ejus miserabilem An-  
gliam quam vivente ipso ac regnante fue-  
rat. Curiam in qua Cæsar occisus est, ob-  
strui placuit, Idusque Martias parricidium  
nominari, ac ne umquam eo die Senatus  
ageretur. Quantum intersit inter cruentā  
mortem Cæsaris Romani & Caroli Angli  
fatum infame, quis non videt? Si hoc  
quærat quis eorum majori jure occisus  
sit.

fit, Carolus nullo crimine cecidit, Cæsar illo maxime, quo tyrannos perire semper fas & jus fuit antiquitate iudice quæ legem meliorem non noverat. Christiani quanto melius eruditi, qui vel tyrannis eo ipso tempore regnantibus, suisque persecutoribus, manus inferre nefas judicabant, & inter verita, immo inter scelera, hoc habebant! Deo quippe ita placitum sciebant, qui reges malos & tyrannos ipse sæpe constituere solet in pœnam populi qui tales habere meruit. Si mors Cæsaris vindicata est qui talis fuit, an Caroli securis, qui tantum ab ejus tyrannide titulo & factis abfuit, impunita manere debet? Pergamus ad cæteros Romani Imperii infellores, Cæsarisque successores qui morte non ficta gubernaculum sibi extorqueri viderunt. Sic eorum vita omnibus vitiis inquinata, sic tyrannica administratio id mereri visa est, ut tamen iis qui fecerunt ne impune fuerit, nec in laudem cesserit factum; cum Nerones & Caligulas & Vitellios & Domitianos interficerent. Regula semper etiam tunc in animis hominum inviolata mansit, quæ violari Regem non patitur, & quæ tyrannorum titulum donat eos ipsos, qui contra tyrannum arma sumpserunt. Quis impurior Gallienus

Impe



Imperatore fuit? Quis ex omni vitiorum colluvie Princeps magis concretus? Non dubitarunt tamen auctores Romani, qui vitam ejus in literas miserunt, tyrannorum elogio impertiri, quicunque sub ejus imperio rebellarunt. Trebellius Pollio peculiari libello omnium eorum nomina & gesta complexus est, quosque adeo, quia totidem fuerant, triginta Tyrannos nuncupavit. *Triginta*, inquit, *Tyranni occupato Valeriano magnis belli Persici necessitatibus extiterunt, quum Gallienum non solum viri, sed etiam mulieres contemptui haberent.* In illo tamen tyrannorum numero constat multos fuisse qui boni fuerint & bene imperaverint, cum ipse legitimus princeps, contra quem illi tyrannidem arripuerant, nequissime ageret. Quicunque enim ad imperium proficiebat non jure, quamvis juste regnaret, tyrannum eum vocari tum mos fuit, quamvis melius imperaret illis ipsis qui pro legitimis habebantur dominis. Plerique illorum ab iisdem militibus à quibus purpura amicti fuerant, interempti sunt. Sic sæpe etiam constat trucidatos & qui imperium justo titulo tenuerunt. Nemo tamen umquam *Iustitiam* vocavit illud factum quo sublati sunt, multo minus Justitiæ tribunal.

nal aliquod constitutum fuisse legimus ad malos principes damnandos & capite plectendos. Si qui hostes à Senatu aliquando judicati sunt, ut de Nerone legimus, factio id fecit, non jus, & vis potentior majorque eorum qui in eum conspiraverant. Senatus tunc in partibus erat, & cum fortiori parti faveret, pronum illi fuit in gratiam victoris, hostem pronuntiare publicum qui pro victo & destituto habebatur. Ita Galbam ex suo corpore Senatus ille qui Neronem condemnavit, ad imperium promovit, ab exercitu prius consalutatum Imperatorem, quo tempore ipse legatum se Senatus ac populi professus est. Senatum nemo nescit sub Imperatoribus togatorum mancipiorum confessum fuisse, qui semper, in seditionibus & factionibus principum & exercituum, ei parti quam prævalere acceperant, se totos dabant atque addicebant: ut tunc fecere Romani, qui audito Galbam descivisse à Nerone, omnes in verba ejus jurarunt. Anglicani Prophetæ qui urgent hoc exemplum Neronis à Senatu hostis judicati & more majorum plectendi, ut simile esse doceant cum ea scelerata ac nefaria condemnatio-  
ne qua regem Carolum affecerunt, dent nobis Senatum qualis tunc fuit Romanus,  
dent



dent Regem condemnatum qualis erat Nero. Ubi hoc fecerint, tunc etiam nobis reddant dantem pœnas Galbam qui contra Neronem insurrexit. Hoc unum non dissimile futurum auguror, quod omnes qui regem suum capitis damnarunt, patrem exitum habituri sunt Galbæ. Reliqua omnia ita inter se pariant, ut cælum à terra distat. Tantum absuit Carolus à Nerone, quantum isti Ianiones Anglicani à Senatoribus illius temporis Romanis diversi sunt. Si Senatus hostem Neronem iudicavit, nullus hic fuit Senatus qui in Regem Angliæ sententiam mortis dixit. E facie plebis cruenti latrones hoc iudicium composuerunt, selecti à ducibus rebellis exercitus, ipsisque perduellibus. Senatus ille Romanus confessus regum fuit, ut olim cum longe minor esset respublica, appellari meruit. Ex illo ordine mittebantur qui provincias regerent Proconsulari imperio, quæ hodie integra regna constituunt. En similitudo cum eo Senatu Caligarum Angliæ militarium! Neroni similiores, sed crudelitate & immanitate superiores, fuerunt illi parricidæ qui Regem Carolum occiderunt. Nero ille matrem suam necavit, isti Patrem Patriæ. Senatus Romanus talem parricidam tollendum

dum decrevit, isti Neronēs regem suū  
parentem publicum. Solis igitur Angli  
militibus quos Molossis suis ferociōres esse  
constat, ex omni temporum memoria &  
ex omni gentium numero hodie licuit,  
quod nec ipsi umquam antea usurpave-  
rant, *Iustitia* instituere novum & inaudi-  
tum tribunal, quod de regis sui capite ju-  
dicaret. Nimirum postquam Christiani  
facti sunt, immaniores & crudeliores  
injustioresque evaserunt. Immo poste-  
quam Christi religionem reformarunt.  
Nam per universa regni Anglicani tem-  
pora ex quo die Christi fidem accepe-  
runt nihil tale ausi sunt. Post reforma-  
tionem lapsæ in pejus religionis, & pie-  
ritatem ejus, siquid illis creditur, resti-  
tutam, de hominibus belluæ extiterunt,  
de subjectis tyranni, de filiis parricidæ.  
Hoc docuit illos Christus? Hoc ab ejus A-  
postolis didicerunt? Hanc è Scriptura Sa-  
cra utriusque divini testamenti disciplinam  
imbiberunt? Quod nec Assyrii, nec Me-  
di, nec Scythæ, nec Græci, nec Romani,  
non Judæi, non ulla omnino gens orbis  
cogniti, culta aut barbara, rudis vel eru-  
dita, umquam factitasse perhibetur. Nul-  
la religio non habuit conjunctam regis re-  
verentiam cum Dei cultu. Multas quippe  
apud

apud gentes olim iidem Pontifices fuere ac reges, quasi nemo melius summi numinis colendi rationes tenere posset, quam qui inter homines esset præstantissimus & optimus. Regem enim eum locum supra homines obtinere quem Deus supra Reges haberet, Diotogenes Pythagoricus scripsit. Locus hic esset dicendi de regum differentia, & quatenus potestate alii minore, alii maiore in regnando fuerunt. Sed commodius infra de eo tractabimus. De eo jure quod omnes populi olim agnoverunt, quodque reges à subditorum judicatione & damnatione liberat, legibusque solutos præstat, nunc pauca ut dicamus ad clausulam hujus capituli, tempus postulat. Nam quamvis plena & libera potestate non omnes reges usi fuerint, nihilo secius illud inter omnes semper convenit, *ἐκείνοις* fuisse omnes & *ἀντιθέτοις*. Non potuisse judicari nec damnari à subjectis suis. Quod autem de Judæorum regibus nonnulli adhuc dubitant an subjecti Syne-drio fuerint, ubi ea quæ jam hîc differam legerint, ambigere de re nimis clara desinent. Primum eam rem in dubio non relinquit, quod Judæi regem petentes sibi dari eum poposcerint ad instar cæterarum nationum. Atqui omnes eo tempore na-  
tiones.

tiones ejusmodi reges habuerunt qui judicio populi non essent obnoxii, ut supra docuimus. Deinde cum Samuel Judæos edoceret quale esset jus Regium, ne ignorantiam ejus juris postea prætexerent, satis aperte eis declaravit, impune regi licere facere quod vellet sine metu legum & judicii, ut de quorum delictis vindicta soli Deo esset reservanda. Præterea vel uno firmissimo argumento id evincitur, quia si reges coram Synedrio fisti accusandi & condemnandi debuissent, nulla inter Judices quos prius habuerant, & reges quos loco judicum postea habere cœperunt, omnino fuisset differentia. Judices quippe Judæorum omnia quæ reges, fecerunt, in ductandis exercitibus, legibus dictandis, jure dicundo, muneribus aliis fungendis. Singulare præterea imperium obtinebant, quia singuli judicabant. Quid opus igitur fuit judicum imperium in regium commutare, si ex æquo reges Synedrio parebant & judicium ejus subibant, ut Judices olim facere soliti? Nullum sic inter eos discrimen fuerit nisi nominis, cum res eadem foret. Atqui Judæi Judicum illorum tædio odioque adducti, reges postulant quales reliquæ nationes haberent, nempe a quibus regerentur potestate

testate nulli majori imperio obnoxia; cum  
Judices Synedrio magno subjacuisse con-  
stet. Postremo nullum exemplum extat  
in libris Regum & tota Sacra Scriptura re-  
gis ullius qui judicatus sit & condemnatus  
a Synedrio, cum tamen ea delicta pleri-  
que eorum commiserint, quæ non solum  
ad rebellionem concitare jure populum  
deberent, sed etiam quæ legum auxilia  
& judiciorum vim provocare. Sed quia  
nec leges, nec jus metuebant, nec alium  
judicem præter Deum agnoscebant, ideo  
plerique non solum impune mali extite-  
runt, sed etiam quod malorum omnium  
gravissimum fuit, idololatræ, nisi si quan-  
do Deus extra ordinem puniendos aliquos  
sibi desumpsit. Magistri Judæorum, qui  
Scripturas sæpius ex opinione futili, quam  
ex veritate solida interpretantur, tradunt,  
Reges ordinario etiam judicio ob legem  
violatam potuisse castigari & verberibus  
affici. Quod tamen non de quovis deli-  
cto, sed de tribus tantum asserunt, quæ  
speciatim in lege expressa sunt; ejusque  
castigationis potestatem penes Synedrium  
majus fuisse. Credant hoc Judæi Apellæ,  
non ego, cum ejus rei nullum in Scriptu-  
ra refugium extet, neque ullum ipsi talis  
judicii exemplum a Synedrio adversus  
Reges

Reges redditi produxerint, neque vero producere queant. Ne in Talmude quidem. In tractatu Sanhedrin, inter illa peccata quæ ad jurisdictionem Synedrii pertinent, ea tria delicta recensentur, neque inter personas quas ab eo judicari jus fuit, reges nominantur. De Tribu Septuaginta Seniorum confessus judicabat, de Prophetis, de Pontifice summo, non de Reges, ut in cap. i. ejusdem tractatus disertè habetur. Nec causa sane fuit cur de tribus illis solis legis transgressionibus judicari & castigari debuerint reges, non etiam de aliis longè atrocioribus criminibus? An quia illa tria speciatim in lege prohibita sunt? Quasi vero non æque expresse lege eadem mandatum illi & injunctum verbis Mosis fuerit, ut custodiret præcepta Dei & caeremonias legis, ne superbe se efferreret supra fratres suos, & ne declinaret ad dexteram aut sinistram. Si faceret, pro pœna proponitur breve regnum, sin ea observaret quæ Deus præcipit, diuturnum imperium promittitur. Deuteron. xviii. Quæ omnia ostendunt, Deum sibi reservare judicium de Regibus extra ordinem ferendum. Quid dicendum de præceptis Decalogi; deque eorum primo & præcipuo, quo Idololatria omnibus ex æquo inter-



terdicitur; cum nullum eo crimine majus fuerit apud unius Dei veri cultores? Quid ergo? An Regi tunc impunitum erat, idola non solum colere ipsum, sed etiam eorum cultum populo imperare; qui tamen vapulabat si plures quam lex permittit, uxores haberet, si plures equos aleret, si opes majores licito quæreretur? Hi sunt enim tres casus propter quos regem in jus vocatum fuisse volunt ad Synedriū, & verberibus coercitum, cum pro Idololatria, pro homicidio, pro adulterio, pro aliis omnibus flagitiis & transgressionibus legis nihil tale pateretur. Hinc colligamus quā sint ridiculi illi magistri & quā vanas stultasque traditiones habuerint. Lex quidem aperte regi futuro inter Israēlitas præcipit ne numerum uxorum, ne equorum augeat, ne amplificet auri & argenti pondera. De numero Regis uxorum legitimo, de equorum, de mensura vel pondere auri & argenti quod licitum esset ei possidere, nihil dicit Lex. Neque etiam addit eum qui amplius æquo de illis tribus possederit, verberibus id luiturum. Nul- lum exemplum in Scriptura occurrit regis ulicujus castigati ob unam ex tribus illis aoxam. Quem igitur statuunt numerum mulierum lege permissum, ultra quem si pro-



processisset, non ei impune esset futurum?  
In Gemara Sanhedrin c. II. ultra octodecim non licuisse illi habere traditur. *Nec multiplicet sibi uxores ultra octodecim.* Unde hoc colligunt? Quia Davidi tot fuerunt. Ergo octodecim uxores non sunt de pluribus intelligendæ illæ quas lex prohibet. Una adjecta si novem & decem fiant, plures erunt lege concessis. Quid magis absurdum potuit fingi, quam ut dicatur pluralitatem in octodecim non consistere, ad hunc numerum si vel unitas adjiciatur, in multitudine id esse vetitum. Quæ ratio ipsis ita argumentandi? An quia Davidi totidem fuerunt, nempe octodecim, idcirco octodecim mulieres non esse dicendas ad pluralitatem pertinere? Quanto planius veriusque dici potuit Davidem excessisse in hoc capite legis terminos, & plures habuisse uxores quam illa permittit, & quidem impune? Sane si ille impune homicidium cum adulterio junctum potuit committere, nonne & eadem impunitate in legem peccare, quæ plures uxores vetaret? Si David non transgressus est legem habendo decem & octo uxores, quid de Solomone ejus filio dicent, qui præter uxores legitimas tot concubinas habuit, ut utriusq; generis mulieres usque  
ad

ad mille numeraret, septingentas ex illis, trecentas existis? Quot flagrorum ictibus culpam expiare hic Rex debuit, si propter uxorum lege vetitam copiam, hanc poenam ex Lege meruit? Tot sanè plagas accipere eum oportuit quot vicibus numerus ille decem & octo in millenario invenitur. Multiplicatio equorum æque regibus interdicta eadem lege fuit, ut uxorum. An dicent Salomonem eam servasse, cum tot millia equorum tam currulium quam singularium aluerit? De eo scribitur lib. iii. Reg. cap. iv. *Et habebat Salomon quadraginta millia præsepia equorum currulium, & duodecim millia equilestrium.* In Chronicis pro quadraginta millibus præsepium longe minore summa legitur, *Quatuor millia præsepium equorum habuisse ad currum, & duodecim millia ad equitandum.* Quæ & ipsa exorbitat in excessu, si verum est quod iidem Rabbinii volunt, non plures Regi licuisse equos habere quam quanti ad currus sufficerent: si vero vel unicum ante se ad pompam ducendum curaret, vapulare debuisse. Unde hoc hauserunt? Currigitur non quadragies millenas plagas accepit Salomon, propterea quod quadraginta millia equorum haberet ad currus, &

duodecim millia ictuum propter XII. millia equorum singularium? Operæ pretium etiam est videre quomodo interpretari soleant illa quadraginta millia præsepium, quæ Salomon habuit, & quomodo illa concilient cum quatuor millibus Chronicorum. Ita enim in Gemara ex Rabbi Juda explicant, aut fuisse quadraginta millia stabulorum quorum singula habuerunt quatuor millia præsepium, aut quatuor millia stabulorum quorum singula haberent quadraginta præsepium millia. Sed quantam ex hac interpretatione & conciliatione oriri necesse est equorum multitudinem? Tantam sane ut fidem non capiat. Non meliores sunt aliorum Magistrorum expositiones. Septuaginta Interpretes longè rectius quadraginta millia præsepium de quadraginta millibus equorum acceperunt, qui reddidere *πενήκοντα χιλιάδες ἵππων*. In Hebraico est *מֵיָרֶסֶת*. Quæ sunt præsepia, Græcis *φάτναι*. Lacus sunt quadrati, sive septa ex tabulis quadrata in quibus ante singulos equos hordeum olim, ut nunc avena, pro pabulo apponebatur. Totidem erant præsepia, sive *φάτναι*, quot equi, ut etiam hodieque in aliquibus locis videre est. Pro quadraginta millibus quæ habet liber Regum, quatuor

tuor millia sunt in libro Chronicorum. Quæ non hic concilio, cum ad aliud tempus pertinēant locumque alium postulent. Hoc tantum volumus, Salomoni impune licuisse habere quantum vellet equorum & mulierum & auri. Cum aliquis ob delictum verberabatur, si iterum in eandem culpam recidisset, iterum vapulare debebat, & quotiescunque eodem genere peccabat, pœna flagri imponebatur. Quid igitur fiebat illi Regi qui ob uxorum illicitum numerum aut equorum plectebatur, si illas & hos semper retinere vellet? Nonne singulis diebus novam pœnam pati debuit, aut equos vel uxores dimittere, quorum gratia hoc supplicium erat patiendum? In Talmude tractatu Maccot enumerantur omnia delicta quibus pœna verberum infligebatur, omnesque adeo personæ recensentur quæ huic castigationi erant obnoxia. De Rege nulum ibi verbum, neque de multiplicatione uxorum vel equorum. Quinimmo in Gemara tractatu Sanhedrin diserte traditur Salomonem contra illa duo præcepta fecisse, nec tamen additur verberatum propterea fuisse. *Cur non, inquit, declarata sunt rationes Legis? siquidem expressis rationibus duorum præceptorum*

*in hoc offendit maximus omnis memoria vir.* Tertium fuit præceptum de auro & argento non amplificando. Ne hac etiam in parte Salomon vetito abstinuit. Immo quis legem qua id interdictum erat, magis violavit? Nullus regum illo ævo æque dives fuit. Nam & Scriptura testatur disertis verbis in libro Chronic. ii. cap. ix. *Magnificatum fuisse Salomonem super omnes reges terra divitiis & gloria.* Quod si Salomoni impune fuit tantum auri & argenti accumulasse sine metu flagri, an putamus non idem licuisse & frequentibus Israelis & Judæ regibus? Nugæ sunt igitur & næniæ Rabbiniæ quod traditionibus eorum deblateratur de Regis loris cædendo ob uxorum & equorum lege interdictam multitudinem, & ob auri & argenti vim quæ legem excederet. Hæc cum sine fundamento & sine auctoritate ab illis proferantur, ideo ea refutare necesse habuimus, ut constaret nulla in re Synedrio, aut judicii ab eo redditi pœnis, obnoxios fuisse reges Judæorum. Quod æque de veteribus qui captivitatem præcesserunt, ut de his qui post eam regnarunt, certum est. De prioribus nullum omnino exemplum è Scriptura Sacra produci potest, quo id adstruatur. De postero-

rioribus falsissimum id fuisse liquet illo Herodis facto, qui postquam regnum adeptus est, totum Synedrium sustulit, uno Schammæo excepto; tantum abest, ut suppositum se illius jurisdictioni crederet. At cum juvenis esset & præfectus Galileæ, vivente adhuc patre qui regnum tenebat, coram iudicibus Synedrii constitit ad causam capitis dicendam quod reus esset cædis Ezechiae latronis. Sed quomodo ante iudices constitit? Amictus chlamyde regali, & deaurato gladio cinctus. Cum ad hunc fastum & insolentiam commotus fuisset R. Schammai Senior Herodes palam eos irrisit & contempsit, ut narrat Josippus. De omnibus porro gentibus quæ regum imperio tenebantur, quam reverentes regiæ majestatis fuerint, diximus, & quam sanctam illam habuerint. Sed in Judæis & Christianis, qui ab illis prodierunt, præcipue harere debemus, ut doctrinæ hujus efficaciam & usum populis omnibus Christum professis insinuemus vel infigamus potius, ut sciant quid super his credere eos oporteat, quid etiam facere. Nomina quippe hæc religionis esse potius constat quam nationis. Quicunque jus Judaicum ediscebant, & illam supersti-



tionem capeſſebant, omnia etiam obſervare tenebantur, quæ lex Moſaica præſcripſerat, ex quacunque tandem natione profelyti Judæorum fierent. Idem de Chriſtianis dicendum, qui Chriſti fidem amplexi ſunt. Sive ergo Hiſpanus ſit, ſive Gallus, ſive Italus, ſive Germanus, ſive Anglus, ſive Scotus, ſi modo Chriſti legem acceperit, ea debet cuſtodire ſine quibus nemo vere Chriſtianus dici poteſt. Inter præcepta quæ Chriſtus ſuis fidelibus per Apoſtolos tradidit, illud eſt vel maximi ad ſalutem & pacem populorum momenti, quo regibus ſuis ſubjici jubentur, etiam malis, etiam ſevere & injuſte dominantibus. Si nationes, priuſquam Chriſto ſeſe dicarunt, reverentiam erga Reges ſuos tam ſancte cuſtodierunt, & majeſtatem eorum ita comiter conſervarunt, cum ſolo ad hoc naturæ inſtinctu ducerentur, quid facere eas par fuit poſtquam Chriſtianæ factæ ſunt, poſtquam legem de eo acceperunt, cui refragari non potuerunt & nomine Chriſtiano dignæ videri. Quis ergo non miretur Anglos gentiles reverentiores ſuorum regum fuiſſe, quam Anglos Chriſtianos? Plus adhuc dicam, immo quam Anglos Reformatos? Immo quam



quam Reformatores eorum qui dicuntur Reformati? An hanc gloriam penes solos primitivæ Ecclesiæ Christianos fuisse dicendum erit, ut regibus suis etiam malis bona fide parerent? Enimvero ut primi Judæi, ita & primi Christiani, hoc idem præceptum, quia communiter utrisque à Deo datum est, constanter observarunt. Nam de sui temporis Christianis dixit Tertullianus, *Neminem unquam id tentasse ut regi insidias strueret*, sicut Hippias civitati suæ fecerat, *etiam cum sui omni immanitate dissiparentur*. Postremis vero sæculis ut in aliis rebus ita & in hac mores, ut jam dictum, cum temporibus mutati sunt, disciplinæ vigor laxatus est, & regula corrupta. Quinimo extitere tandem pestes Rerum publicarum, regumque *peccatores*, & omnis à Deo ordinatæ potestatis hostes, sophistæ quidam qui contrariam illi quæ à Christo tradita est, doctrinam introduxerunt de occidendis quasi jure regibus si displicerent subiectis. Tales in Pontificiis Jesuitæ, inter Reformatos qui vocantur *Independentes & Brunista*. Tales etiã apud Judæos Pharisei exorti sunt, sectæ genus ambitiosum, superbū, seditiosum, factionum, impatiens dominorum & omnium

summarum potestatum. Si tamen hi cum Iesuitis & Independentibus comparentur, dociles, amabiles, morigeri & regib<sup>us</sup> amici. Quod satis testatur historia de Jamaica, quam supra retulimus. Si quis ergo inter Christianos posterioris ævi ostenderit populos per seditionem reges suos destituentes, primores regni per factionem eos solio deturbantes, exercitus militari tumultu imperium eorum abnuentes, hæc exempla non ad regulæ novæ institutionem trahenda sunt, sed tanquam excessus à veteri regula notandi. Quot servi etiam Christiani dominos suos perfidiose necaverunt? Ita & Phocas dominum suum Imperatorem Mauritium vita & regno privavit, ut se regem faceret. Ita Theodorus Patricius Heraclium oppressit & oculis orbavit, postridie eandem pœnam in se expertus. Quomodo Imperator Christianus vetus filium ex se natum interficiendum curavit, & nostra ætate Rex æque Christianus suum, quomodo denique pater extinguitur à filio, aut dominus à servo, ita & Rex à subditorum suorum aliquo, vel à pluribus per conspirationem consentientibus tollitur. Ut ab omnibus id fiat generaliter, tantum nefas assensu suo comprobantibus, vix dari potest, nil

rex omnium subditorum simul semelque  
exterminandorum mentem induisset, &  
se id conari professus esset. Quod nec ip-  
sum datur. Ne Nero quidem, cum hostis  
esse videretur generis humani, & mon-  
strum hominis hominibus perdendis na-  
tum, ita omnium odium incurrit ut volen-  
tibus universis, qui sub Romano Imperio  
erant, mors ejus acciderit. Quinimo cum  
talis esset, qualem vitæ ejus memoria de-  
monstrat, *Non defuerunt tamen, teste*  
*Suetonio, qui per longum tempus vernis*  
*æstivisque floribus tumulum ejus orna-*  
*rent, ac modo imagines prætextatas in Ro-*  
*stris proferrent, modo edicta quasi viventis*  
*& brevi magno inimicorum malo rever-*  
*suri.* Sed nec illis qui ab ipso defecerunt  
impune cessit rebellio, cum Galliæ pri-  
mo descivissent duce Julio Vindice, qui  
paulo post occisus est. Galba deinde cum  
Hispanis rebellavit, qui & ipsi successit.  
Sed mox & is pœnas dedit cæsus ad arbi-  
trium Ottonis, qui & imperium post eum  
arripuit, nec meliorem exitum fecit. Sed  
isti non Christiani; qui tamen judicem  
Deum sensere & vindicem perpetrati à  
se sceleris ac rebellionis, vel parricidii  
porius. Ultimus primæ stirpis Galliæ  
regum, ab Ordinibus regni destitutus,

detonsus, in monasterium detrusus solium alteri occupandum reliquit. Sed quales illius temporis reges? Excepto nomine nihil habuere quo reges esse crederent aut possent. Majores domus, qui erant Aulae praefecti, omnia arbitratu suo administrabant rege inscio & inconsulto. Ipsi verè ac re ipsa reges fuere. Non igitur difficilis & ardua res fuit, hæc tropica facere, ut, qui de facto reges erant, nomen etiam assumerent, & qui nomen tantum haberent, id amitterent, cum ipsa re cuius appellatio fuit, sociandum. Per factiones tamen id factum liquet ejus qui summam tunc potestatem & vere regiam in regno obtinebat, cuique proclive adeo fuit, cum omnia posset, hoc etiam facere posse, ut rex ignavus & iners sibi throno cederet. Quæcunque similia his exempla ex omni Christianæ antiquitatis memoria produci possunt, aut ex omnium gentium quæ reges habuere, archivis promi, non enim decrevimus per singula discurrere & omnia vasaria excutere, pari responso reperiuti debent, factum ea nempe continere improbandum, illicitum, illegitimum, a regula excedens, a disciplina, immo & a fide Christiana alienum; nec hoc tantum, sed etiam.

etiam cum jure gentium & cum naturali lege diversis frontibus pugnans. Sic foeminae solent monstra parere cum in his natura tenorem non servat & ultra citrave legitimum formandi foetus modum consistit. In ea de qua agimus quaestione si prodigia quae in omnibus saeculis & omnibus gentibus evererunt, perfidiose ac parricidaliter trucidatorum regum colligamus, nullum huic Anglicano conferendum portentum reperietur, cum sceleris ipsius qualitate, tum perpetrandi modo.

---

## C A P V T VI.

**H**Inc alius & major quidem argumentorum mihi surget ordo, quibus demonstretur Regum sanctitatem inviolabilem esse, & à nulla altera nisi divina potestate pendentem. Haecenus quippe abunde testimoniis, auctoritatibus & exemplis ad hoc probandum pugnavimus, quae ex jure & usu gentium ac disciplina omnium saeculorum petita sunt. Nunc alio genere probationum id evincemus, quae utique ostendant, non aliter constare rationem regii regiminis, nisi sui juris sit & suae

suæ potestatis, id est non aliam nisi suam respicientis, simulque quicquid contra hæc Sophistæ hodierni & rebelles populi cavillantur, refellemus. Inter illa quæ constituunt hujus administrationis statum qui ab unius nutu suspensus est, primum locum obtinet, quod Rex à nemine judicari potest nisi à Deo, & nulli nisi Deo actuum suorum rationem reddere tenetur. Nam si is qui rex est ac dicitur postulari posset apud aliam potestatem, eam omnino regia majorem esse opereretur. Quæcunque autem major statueretur, hanc vere regiam dici & esse necesse esset non illam quæ minor habetur. Sic enim definiendum, quæ potestas summa sit in gubernanda republica, si singularis sit & supra eam nulla agnoscatur alia, non alio eam nomine venire posse quam Regiæ, quia si altera superior fingatur, ea omnino debeat regia potius appellari, quam illa quæ majori supposita est. Hoc autem iret in infinitum, quærentibus semper quo nomine esset vocanda illa suprema omnium potestas, quæ regibus, & regum regibus imperitaret. Multa quippe hoc modo regum veluti tabulata & fastigia alia aliis superstruenda in altum exirent. Quæ res & fine & modo



modo careret. Inde igitur concludimus, si quis in administratione reipublicæ constitutus est qui ab alio possit judicari, eum vere regem non esse, nec ita appellari debere, sed illum propriè qui judicat de omnibus & à nemine judicatur. E contrario si detur nullum esse regem qui non possit à populo suo judicari, eo ipso qui hoc dixerit fateatur oportet nullum esse regimen quod regale queat nuncupari. Qui autem regibus ipsis imperabit & eos judicabit quo illum nomine censebimus appellandum? Plus sanè quam regium jus ejus erit, sed nomine proprio talis potestas carebit, si negabitur sub regis appellationem cadere quicumque summum & regibus ipsis imperans obtinebit imperium. Si populus est qui ejusmodi potestatem habeat, ut secta perduellium Anglicanorum autumat, communi quidem & olim recepto vocis usu rex populus fuerit, & regia dominatio erit vocanda quæ per eum exercebitur. Sed quia vocabulum *Regis*, minorem populari potestatem designat secundum rebelles Anglos, quomodo hujusmodi status appellandus sit in quo populus plus quam Rex potest, incertum erit: nisi dicamus, in ea regendi conditione populum *Regem regum* nominari.



minandum esse, ut olim Parthorum & Persarum reges sese inscribebant. Sic in singulis regnis populus *Rex regis* erit appellandus. Cæterum si in omni statu, quicumque dabitur, siue Regalis, siue Popularis, siue Optimatum, populus summam rerum obtinebit, ut fanatica disciplina sancit, nulla erit distinctio Reipublicarum ex regiminis diversitate, qualem veteres omnes summo consensu posuerunt. Nam si in regali etiam statu populus rege major est, rex populi minister ubique sit oportet & in populi potestate. Nec magis quippe ipse populus in eo statu qui proprie popularis dicitur, dominus fuerit, nec etiam magis in illo qui ab optimatibus nomen sumit. Cum omnis ætas hæc tria genera status quibus Respublica constituitur, agnoverit, nova doctrina Enthusiastarum nullum discrimen in illis admittit, sed omnem Reipublicæ statum decernit esse popularem, quia in regali & optimati non minorem habet potestatem populus, quam in populari ita proprie dicto. Nam cur popularis dicitur? An non quia populus ad arbitrium suum & libitum in eo creat magistratus & abdicat? Delinquentes coërcet & punit? At idem in regali ju-  
ris

ris obtinet si Entheatam Vatum turbam  
audiamus, dum reges quando vult expel-  
lit, alios instituit, aut si velit, de regali po-  
pulari statum facit. Quæ statuum ge-  
nera eo modo non alia ratione invicem  
different, quam quia in regali primus ma-  
gistratus appellatur *Rex*, in populari vel  
est *Consul*, vel *Duumvir* vel *Triumvir*,  
vel alio nomine; in optimati, *Optimates*  
& *Proceres*. At quid vetat & in populari  
*Consules* & *Duumviros* civitatis appellari  
*Reges*, cum illi qui reges proprie appella-  
ti sunt in regimine regali, æquè ad nu-  
tum populi abjici queant & mutari, ut in  
populari Reipublicæ forma illi qui *Con-*  
*sules* vel *Duumviri* nominabantur? Pari-  
ratione & reges ipsi pro consulibus aut  
duumviris tam re quam nomine haberi  
debeant, quia respectu populi non plus  
possunt reges quam duumviri; cum Re-  
ges primi tantum magistratus locum ha-  
bere existimantur, ut habent *Consules* &  
*Duumviri* in libera Civitate. Frustra igitur  
Seneca in Epist. xiv. tria illa genera  
statuum, antiquis cognita, ita describit:  
*Interdum populus est quem timere debeat-*  
*mus, interdum si ea civitatis disciplina est*  
*ut plurima per Senatum transigantur,*  
*gratiosi in ea timeantur viri, interdum*  
*singuli*

*singuli in quibus populi potestas & in populum data est.* Naso adunco suspendent hos timoris diversos gradus & differentias Anglicani prophetæ, & delirasse Philosophum arguent, vivoque, si eum tenerent, caput secarent, qui populum dicat esse timendum in populari statu, & Regem in regali. Quasi non æque formidandus sit populus in regali quam in populari, quia rex ipse qui regit populum, debet eum metuerè à quo regi debet, & ad cuius libidinem deponere sceptrum necesse habet, immo & caput sub carnifice ponere, si ita populo videatur. Saniore nempe sententia ducti doctique milites doctores affirmabunt, unum esse & unicum in genere popularem statum, cuius sint tres modi: unus qui reges constituit, id est singulos, ad rem summam gubernandam: alter qui paucos, nimirum optimates, tertius qui plures è plebe quos velit, in annum aut per biennia mutandos. In omni statu quicunque dari potest, populum imperare, regnare, dominari, quia imperia donat & regna, & quia quando libet, auferat data. Non jam ergo per Deum reges regnare, sed per populum; non in Dei manu cor & vitam Regis esse & salutem, sed in populi potestate. Non à Deo  
reges

reges constitui & destitui, sed à populo, quia populi est & regalem & optimatam & popularem reipublicæ statum componere. Atque ut philosophi dicunt, animam corpus informare, ita populum qui anima est Reipublicæ eam ut vult & modo quo vult formare, reformare, vel etiam deformare posse, nunc optimatibus regendam permittendo, nunc plebi administrandam, nunc regi, id est uni magistratui, gubernandam. Hæc est fanaticorum Angliæ de regibus & regendi diversis generibus in republica sententia & doctrina, quæ omnia ad populum revocat ut ad fontem & originem totius potestatis & auctoritatis, quæ leges rogat & abrogat, quæ pacem & bellum sancit, quæ fœdera firmat, quæ religionē dirigit, Ecclesiamq; cum republica regit. Frustra igitur sunt secundum hanc Enthusiastarum regulam, qui docent Regem primam & efficientem causam esse Deum. Aut mediatè, ut loquuntur, aut immediatè à Deo eos constitui. Mediatè, cum per causam secundam, id est hominum ministerium eos creat, ut vulgo fit. Et hæc ordinaria regum electio. Immediatè cum ipsa causa prima, id est Deus, non ministrante secunda id est hominibus, eos populis imponit, ut

39307

Saulem

Saulem & Davidem fecit. Quæ extraordinaria est Regum à Deo constitutio. Nullam harum agnoscunt Fanatici Angli. Sed quicquid illi perdit homines dicunt ac docent de populari administratione, cui alia omnia vindicant gubernationis genera, ad populum decipiendum pertinent, cuius fucum hoc modo faciunt. Nihil enim minus revera cogitant quam ut populum ipsum populis imperio regendis destinent, nihil etiam minus præstant. Forma regiminis quam introducere, plane nova est & priscis inaudita. Non popularis est, non regalis, non optimatum, sed militaris. An hoc negabunt? Res ipsa, si negent, eos convincet. Quis ordinem procerum à Parlamento ejecit? An populus est? Miles hoc fecit cum suis ducibus. An populus plebejum ordinem domus inferioris, id est populum, parte sua meliori mutilavit, alios fugando, alios in carcerem conjiciendo, solis illis relictis, qui militarem istam probabant, aut probare simulabant, dominationem? Hoc duces fecere cum suis militibus. Quis Regem de carcere in carcerem traduxit? Quis justitiæ tribunal ad eum capite damnandum erexit? Quis ad causam eum tanquam reum dicendam adegit? Quis postremo condemnatum

car-

carnifici tradidit? Num populi hoc facinus? Num alicujus qui à populo hanc potestatem acceperit? Militum & Ducum factionis hoc factum fuit. Quis nunc Angliæ populum jure plusquam regio regit? Quis tributa illi imponit? & longè quidè graviora quam ullus umquam Rex imposuit? Quis cives Londinenses exar-mavit? Quis catenas quibus urbis plateæ claudebantur, abstulit & in turrim abdidit? Quis urbem armatis complevit? Quis ærarium publicum diripuit? Num populus? Militis hæc sunt omnia qui ducum suorum jussu hæc perpetravit. Quis consilium illud supremum instituit, quod ipsi Parlamento leges nunc dat & ex quibus est compositum? Inscium rerum esse oporteat qui neget à militum ducibus esse constitutum, aut ex militaribus viris constare. Quis nuper expeditionem in Hiberniam sumpturus Londino egressus est triumphantis habitu, regali pompa, sexjuge curru vectus al-bentibus equis tracto, stipatus octoginta nobilium satel-litio? Nonne unus ex ducibus, qui non à populo hanc accepit potestatem, sed à militibus & militari consilio? Quibus igitur persuadebunt id quod ipsis in labris natat, penes populum summam esse re-gimi-



giminis, cum tyrannidem exerceant duces exercitus, populumque ipsum duro & intolerando servitio premant? Hi tamen hac offa imaginaria populum latrantem demulcent, dum verbis ei potestatem adstruunt quam re destruunt, totam militibus eorumque ducibus assertam. Nisi stultos inveniant & stolidos scelerati isti latrones, nemini sano hanc mentem immittent, sibi placuisse popularem gubernandi rationem, quam omnibus modis exterminatam pessundederunt ut militarem solam stabilirent. Exemplum hoc illis video arrisisse e Republica Romana statu, cum pessimus fuit, & nequissimè administratus. Primum Romæ mos fuit in ipsa tantum urbe Imperatorem creati si quando imperium vacaret, cuius eligendi jus competebat Senatui populoque Romano. Ab Augusto lex quidem de successione inter prima imperii fundamenta & firmamenta sancita est, sed ut successio stirpis Cæsareæ in Nerone defecit, reddita exinde est quodammodo Senatui populoque potestas quam lege illius successionis amiserat, novi principis substituenti in locum ejus qui decesserat. Cum igitur hoc jus ad Senatum pertineret, & in urbe ipsa qui summam rerum tenere



eneret eligendus esset, exercitus qui à Nerone desciverant Imperatorem Galbiam fecerunt. Jam ante in Claudio militaris hujus electionis exemplum proditum fuerat, cum post mortem Caligulae Senatus de afferenda libertate cogitasset, & de abolenda Caesarum memoria. Sed cum jam miles Claudium in castra raptaisset, & intra vallum receptum tumultuario juramento in concione Imperatorem fecisset, Senatu segnius agente, qui cum consulibus forum & Capitolium occuparat asserturus communem libertatem, & multitudine populi quæ circumstabat unum rectorem jam nominatum poscente, sic non solum libertate penitus in posterum excidit, sed etiam jus faciendi principis prorsum amisit, quod ab eo tempore penes militem esse coepit. Unde causa existit tot seditionum, discordiarum & motuum, qui deinceps Rempublicam Romanam vexarunt, & miserum in modum discerpserunt. Antea lex Imperii fuit, non debere aut posse extra Romanam, nec citra Senatus populique Romani arbitrium Principem fieri. Ubi vero milites per seditionem & defectionem cuncta a quibus regebantur in Provinciis hoc jus sibi vindicarunt, in legem tradu-

Et a licentia, tum invaluit hæc pestifera & exitialis imperio disciplina, posse ab exercitu principem fieri. Hinc prima, ut dixi, mali labes, & totius imperii postrema ruina veluti in præcipitium lapsi, certusque interitus natus est. Quis enim enumerare fando valeat clades ac misérias quas imperio peperit hæc firmata longo usu quasi jure licentia militaris? Sed hoc non agimus, & res per se è monumentis. Historiæ Romanæ clara est. Quod nunc agendum est, non ita patet. Nempe ut comparemus Romanorum militum in eligendo principe ad Imperii perniciem tunc introductum morem, cum hoc nefario Anglicani exercitus parricidio, quo Regem suum securi percusserunt, non dissimili quidem furore & scelere, quo Romanæ illæ Caligæ suos quoque principes sæpe destituebant ut alios constituerent, sed longe immaniore insania. Ex hac sanè utrorumque comparatione dilucebit, quanto isti barbariores Romanis & in omne facinus proniores. Romani exercitus ubi principem aliquem sede sua ac statione dejecerant, ut in alterius verba jurarent, non hoc agebant ut respublica suo rectore careret, sed pro illo quem nolebant, alium subrogabant qui magis placeret.

ceret. Unò avulso non deficiebat alter. Eum quem creaverant pro legitimo Principe agnoscebant, ei parebant, summam potestatem attribuebant, jus vitæ ac necis in se & in suos ut in alios subditos dabant, non revocabile esse credebant, quod dederant. In summa, nulla in re sic datum imperium differebat ab eo quod Senatus Populique decreto delatum foret, quantum ad jus ipsum & potestatem, eamque exercendi modum & finem. Si quid erat discriminis, in persona tantum dantis, non in accipientis consistebat. Quippe cum iisdem conditionibus ac legibus acciperet à militibus imperium qui ab his fiebat Princeps, quam si à Senatu Populoque factus esset. Ea de causa nec militaris iste status appellabatur, quamvis milites principem Reipublicæ dedissent. Haud sane magis quam popularis, cum populi iudicio principis electio stabat. Quin nec miles ipse imperium sibi retinebat cum illud dabat, nec populus. Neuter enim imperabat, sed ille quem ad imperandum elegerant. At in Anglicano rerum statu qui nunc obtinet, milites sunt qui regnant, & militare revera imperium est, quale numquam ex omni sæculorum memoria visum vel auditum fuit. Populare esse, tam  
falso

falso jactant, quam verè militaris est Respublica, in qua ne in speciem quidem imaginaria potestas populo relinquitur, sed tota ducibus exercitus asseritur, qui & judices sunt & reges & quicquid est in regnando summum, vel usque ad tyrannidis specimen & effectum. Romani milites ubi Principem constituerant, Senatui suam libertatem & auctoritatem salvam in cæteris permittebant, excepto jure creandi Imperatoris quod sibi vindicabant. Anglicani milites Senatum primum sua auctoritate & prærogativa in omnibus privarunt, optimates qui in eo erant partim capite damnaverunt, partim in ordinem redactos cum plebeius unam domum facere coegerunt, alios in vincula dederunt, alios exilio multarunt. Putes eos ut plebi faverent nobilitatem exauctorasse? Non plebeio ordini Parlamenti æquiores fuerunt, magna eorum parte Senatu mota, & urbe expulsa. Pro Parlamento caligatam Curiam composuerunt, cui præsident Duces Bardaici, iidemque Angliæ tyranni. Milites Romani regem à se factum colebant, venerabantur, purpuram ejus adorabant; inviolabilem & sanctam ejus Majestatem conservabant, in omnibus se ei dicto audientes

dientes præbebant. Unde & Valentinianus, cum à militibus Imperator factus fuisset, & ab eo peterent id quod ipse iis nolebat concedere, sic eos apud Sozomenum in Historia Ecclesiastica increpat: *Ut me ad vobis imperandum elegeretis, in vestra situm erat potestate, ô milites, at postquam me elegistis, quod petitis in meo est arbitrio, non vestro. Vobis tanquam subditis competit parere, mihi qua facienda sunt, cogitare.* Non minorem itaque potestatem habuere creati à militibus principes quam à populo. Anglicani milites novo & inusitato exemplo regem suum interfecerunt, non ut alium facerent cui subjicerentur, sed ut omnia sibi subjicerent; non alia ratione quam cum populus dominatur in populari statu. Ut enim popularis dici non potest status in quo regi potestatem dedit populus, sed in quo ipse habet, ita nec militaris tunc erat Reipublicæ status in quo milites Principi dabant imperandi jus, sed in quo ipsi imperant. Talis est hodiernus Anglicanus, nova forma proculus, & nova moneta percussus, cuique similem nulla umquam sæcula viderunt. Apud Turcas etiam hodieque Prætoriani milites, quos Janissarios vocant, ut illi antiqui Rô-

N

mani.

mani, Imperatore per seditionem sublato, alium per tumultum eligunt ex eadem Domo Ottomanidarum, nec sibi imperium arrogant, quod isti Anglicani latrones fecere, quos nuper accepimus in Alba Aula quod est regis Palatium, confessum habere cœpisse, magnifico & regali apparatu ornata, & aulæis impensi pretii decorata. Non alio igitur nomine vel titulo donari potest status hic Reipublicæ ab illis constitutus quam militaris, quia milites cum ducibus suis & tribunis in eo regnum possident. Ut enim in populari, quod ait Seneca, populus timetur, ita in isto duces militum timeri debent, per quos omnia geruntur, aguntur & reguntur. Si in regali, ut ante diximus, etiam populus timendus est, quia supra regem sit, cujus tollendi cum velit, potestatem habeat, nullam sic fuisse oportet inter regalem & popularem differentiam. Magna tamen fuit totius antiquitatis iudicio & omnium quæ umquam Reges habuere, nationum consensu. Videndum itaque quid intersit regalem inter statum & popularem, si modo rex potestatem quam habet populo acceptam referre debet. *Interdum populus est, inquit Seneca, quem timere debemus, interdum singulos quibus potestas*  
populi



*populi & in populum data est.* Hic Regalis est status cum regi populi potestas & in populum data est. Ergo ille popularis sit in quo populus habet potestatem, nec in eum quisquam, id est, ut ait Seneca, *in quo populus timeri debet.* Non timetur in Regali, quia populi potestas in populo amplius non est, sed in rege, qui à populo eam accepit. In populari itaque statu populi est potestas. In regali populi fuit. Nunc regis est, qui in populum eam habet, quamvis à populo. Sed dicent Belonarii Vaticinatores, si à populo est, ergo est populi. Æque hoc idem dici deberet de Imperatoribus Romanis qui à militibus fiebant. Atqui non militis hæc erat potestas, sed à milite dabatur in milites ipsos, ut & in reliquos subiectos è populo. Quod statuemus ergo discrimen popularis status & regalis, cum in utroque à populo potestas velut ab origine veniat? Hoc certe erit. In populari penes populum potestas manet, in regali à populo in regem transfertur. Populi esse definit ubi regis esse incipit. Dicit fanatica natio, ita in regem à populo transire ut ad populum possit redire, immo & debeat, quandoque hoc velit, aut si ita expedire iudicet bono ac saluti Reipublicæ.



Atqui salus Reipublicæ semper postulat ut data à populo Principi potestas numquam ad populum revertatur: qui ita eam deponit, ut principem semel illa donatum non privare possit in posterum dato imperio. Quippe cum ad salutem populi reperta sint omnia genera gubernationis quibus respublica constituitur & administratur, boni publici maxime interest, ut potestas à populo Regi semel concessa & donata numquam revocetur. Nisi enim hoc esset, etsi pro lege id observaretur, ut quotiescunque populo placuisset, imperium regi quem delegisset ablatum ad populum rediret, nulla pax unquam firma in Republica sperari posset, sed ad singula momenta quies ejus turbaretur, omnia seditionibus & factionibus arderent, fomites subinde in facies ad totius status conflagrationem supeditandis. Numquam certe deessent turbarum incentores, qui privata ambitione ducti & regnandi cupiditate permoti populum prensarent, ambirent, eique persuaderent ut imperium illi qui tum dominaretur ademptum, sibi traderent, se longe melius quam illum esse regnatos, se ad utilitatem ejus & voluptatem quæcunque agerent, esse facturos. Quæ

ut populus novitatis studiosus facile audiret, ita inde facillime in bella intestina moveretur. Numquam enim hæ mutationes & conversiones in Republica sine aliqua clade & insigni calamitate populi eveniunt, quamlibet de priore domino in meliorem regnum transeat, ut sæpè malus princeps loco suo mansurus optandus magis videatur, quam bonus in locum ejus sumptus, propter mala quæ ex tali mutatione vel status ipsius vel solius dominantis, solent accidere. Cum igitur salus populi suprema lex in his esse debeat, eadem causa quæ postulat populum non esse sine aliquo rectore, etiam omnimodo flagitat, ut rector non facile mutetur, nec de regendi forma diu recepta in aliam cito migretur. Eapropter lex hæc ad æternitatem in imperiis fixa & fundata videtur, ut in regio statu, si potestas in regem à populo transcribatur, irrevocabiliter ista fiat donatio, nec ad libitum dantis irrita aliquando fieri queat. Si enim quoties libido populo incesserit potestatem à se rectori suo datam revocandi, id etiam jure suo facere possit, nihil tum esset discriminis inter popularem & regalem statum, nisi hoc, quod in regali singuli re-

N 3

ctores

ctores constituuntur, in populari plures. Utrobique magistratus is esset populi qui rempublicam ejus nomine administraret, rex in monarchia ad arbitrium plebis abdicandus, consules aut duumviri in Democratia per plebem similiter abrogandi. Sic Monarchia non differret à Democratia nisi numero personarum quas populus sibi ad rem suam gubernandam deligeret, cui singularitas in Regali regimine placeret, in Democratico statu pluralitas. Temporis etiam si forte æstimatione aliqua inter regem, & magistratum popularem constaret differentia, Nam ubi populus imperium habet, constitutere solet magistratus per quos regatur, qui stato tempore potestatem deponant, in quorum locum alii deligantur, qui pari spatio eam teneant, quo finito cedant, aliis deinde sedem vacuam relicturi plebis ejusdem suffragio creandis. Plerisque civitatibus annuos esse tales magistratus receptum olim fuit. Romæ Consules in annum creabantur. Athenis & in aliis Græciæ minutis Rebus publicis idem tempus popularibus magistratibus statutum erat. Euripides in Theseo, quem sic inducit loquentem:

... ὅς τις ἀνὴρ ἀνδρείος ἄριστος ἄνθρωπος ἦν  
 ... ὅς τις ἀνὴρ ἀνδρείος ἄριστος ἄνθρωπος ἦν

--- ε γδ ἄρχη)

Εἰς τοὺς ἀνδρῶς, ἀλλ' ἐλευθεροῦ πόλιν,

Δῆμον δ' ἀνάσσει Διδοχαῖσιν ἐν μέρσι,

Εὐκαιοσίαισι.

--- non enim jugum

*Patitur sub uno civitas, sed liberam*

*Populus gubernat regis instar per vices,*

*Solitus in annum dignitates credere.*

Hoc autem ideo institutum quando populus regnat, ut annui sint magistratus, quo unusquisque ex plebe honorum particeps esse possit. Nam si dignitates ad totum vitæ tempus singulis mandarentur, non tam multis communicari eas facile foret. Et notandum est, poetam philosophum dicere in libera civitate, quales Athenæ tunc fuere, populum regem esse, ubi nempe populus plus potest, aut, ut ait Seneca, timendus est. Aristoteles τὸ πᾶσι δ' ἄρχει in ejusmodi republica scribit, quæ populi arbitrio regitur, id est populum imperare. Ergo in regali statu non est populus qui imperat sed unus, qui si ad arbitrium populi dominaretur, aut magistratum gereret, ut Enthusiastæ docent, deberet etiam ab ejusdem nutu pendere quantum ad regendi spatium quod ei præscriptum foret attinet. Saltem definitum habere deberet

temporis modum intra quem se abdicare potestate sibi à populo commissa teneretur. Ecce enim in populi statu ut plurimum annui fuere summi magistratus. Si ultra annum prorogarentur, vel ultra aliud præscriptum ac legitimum tempus, à populo illa prorogatio dabatur, ut Romæ in provinciis regendis Proconsulari imperio. In urbe magistratus ultra statutum tempus non prorogabantur. Si igitur in regali reipublicæ constitutione populus eodem modo & pari jure regem creare debet, ut in populari forma magistratum alium solet, & si is qui ab eo semel creatus est, æque pender ab arbitrio populi ut magistratus ab eodem positus; cur non & rex tempus similiter præfinitum regnandi accipit ab ipso populo? An hoc tantum ad jus regis pertinet, ut quoad vivit, magistratum populi gerat? Si hoc dederint de magistratu illo summo qui à populo cum hac conditione constituitur, ut non finiatur ejus potestas nisi cum vita, & regis propriè nomine appellandum cum esse concedant, id quidem in ejusmodi regnis quæ electione deferuntur, potest locum habere, sed quid dicent de hæreditariis? Certe in populari civitatis statu nunquam successio

in magistratibus servata est, ut nempe patre decedente filius in demortui locum subrogaretur. Nam nec ita esse potuit ubi quasi solenne & legitimum tempus obtinendæ potestatis observatum fuit vel in annum vel ad biennium, certe omnino cum aliquo fine, alio quam vitæ, præstitutum. Si regia itaque potestas non differt ab ea quam habet magistratus popularis, quia utraque populi jussu mandatur, nusquam in regali dominatu successio permitti debuit, quæ non conceditur in ea civitate ubi populus dominatur. Quinimmo ne quidem tam longum dari oportuit uni rectori tempus quam datum est pluribus, quia facilius in tyrannidem singularitas degenerat, præcipue quæ vires colligere potest diutius regnando, affinitates contrahendo, societates cum exteris ineundo, quibus efficiat ne cogatur invitus sese abdicare magistratu, cum populus id reposcat. An regi nullum ideo tempus est præfinitum gerendæ potestatis à populo, quia possit cum velit repetere ab illo jus quod commisit? Cur non in populari regimine ubi populus propriè regnat, non ad hoc exemplum magistratus constituti sunt, ut certum eo honore fungendi tempus non

N 5.

habe-



haberent, sed arbitrato dantis decedere potestate deberent, nulla causa aut ratione edita cur id faceret, nisi quod ita placeret, ut voluntas pro ratione esset? Mirum certe in omni civitate quæ populum habuit rectorem, semper id observatum fuisse, ut magistratus gerendi statum spatium esset ac lege limitatum, in regali quæ tamen æque à populo manare & ab eo mandari creditur, non idem usu venisse, sed aut vitæ tempus datum esse in his quæ per suffragium mandantur, aut nullum, ut in his quæ per successionem natorum in posteros eunt. Cum hæc ita sint, & cum perpetuo istud discrimen in Monarchia & Democratia servatum sit, certè inde concludere necesse est, alio jure & alio fini constitutum esse regimen unius quod *Μοναρχικόν* appellatur, & populi quod est *Δημοκρατικόν*. Hoc quippe nomen accepit à populi dominatione, illud ab unius dominatu in quo populus nihil potest. Nam si æquè in utroque statu populus dominus haberetur, genus Reipublicæ utrumque *Δημοκρατίας* appellatione donandum foret. In illo populus dominatur. Cur quia magistratus à quibus regi debet, creat ipse, in hoc in quo ab uno imperatur, hujus unius est, magi-  
stratus



stratus facere, non populi. Sed ipse est à populo factus. Ergo populus dominus est dominantis. Tanto magis sic hæc Δημοκρατία esset quam μοναρχίαν vocamus. Nam & qui regi subsunt summi magistratus, possunt sæpè & minores creare. Nonne Consul quem populus creaverat, Dictatorem dicebat, qui major erat Consulibus & populo, & qui in omnes summum imperium habebat, etiam jus vitæ & necis? Jam igitur explicandum, quanta sit & qualis differentiæ ratio inter μοναρχίαν & δημοκρατίαν statum, quamvis detur utrumque esse populi, diverso respectu. Illud populi est & in populum. Hic populi tantum. In populum est singulare imperium, quia populus in eo regitur ab uno, non regit se ipsum, nempe per magistratus annuos quos constituit. Quin & ipse dominatur in concionibus. Monarchia verò populi sic esse dicatur, non quia populus in ea imperat, sed quia à populo jus imperandi accepit ille unus qui in populum habet potestatem. Lege Regia Romæ sic appellata constat translatam à populo in unum dominationem. Ea lex, ut scripsit Ulpianus & post eum atque ex eo Justinianus in Institutis, de Principis Imperio lata est, quaque populus ei & in eum

omne

*omne suum imperium concessit.* Ita ergo in populum data est principi hæc potestas à populo. Sed à quo? à Romano. Et de Augusto omnino certum est; & propter Augustum latam illam legem fuisse, non autem cum urbe natam esse; nec de Romulo, ut infra dicemus. Non enim omnium regum potestas à populo ipsis fuit concessa, nec Romulus eam populo suo acceptam retulit, quia populum ipse sibi fecit, non populus eum regem. Si qui autem Principes ad illud exemplum, cujus gratia lex regia lata est, imperium à populo acceperunt, non ita accepisse hoc videri queunt, ut magistratus qui à populo creatur potestatem ab eodem judicandi capit, aut ille cui ab ipso rege jurisdictio mandatur, aut si quis imperium aliquod aut jus gladii ab eo accipit, aut utq; aliæ denique potestates quæ ab eodem constituuntur. Eodem quippe modo magistratus à Rege fiunt in Regali statu, & à populo in populari. Uterque enim licentiam habet minores potestates & à se dependentes ordinandi, quas vel ad certum tempus constituit vel ad vitam, sed ita ut si delinquant aut prodicionis accusentur, aut læsisse aliquam in re Majestatem Regis aut populi deprehendantur, di-

mitti

mitti possint & abdicari, & vita etiam privari, non tantum magistratu excidere. Ratio est, quia in eos suam potestatem non transcribit Rex vel populus, sed cum potestate eos creat vice sua judicandi & regendi vel præsidendi. Vicariam eo modo & fiduciariam tantum habent potestatem, ut legati qui exercitui olim ab du-  
cibus præficiebantur, qui in absentia sua exercitui præessent. At lege Regia populus omne quod habuit imperium omnemque potestatem in principem tran-  
stulit, ut in populum ipsum eam exerceat, eodem jure quo populus in privatos eam exercebat. Sic propria potestate se ipsum exiit populus, & regem ea donat, animo non eam recipiendi in posterum, sed cum irrevocabili concessione vel traditione potius. Si repetendam eam quotiescun-  
que vellet daret, aut propter aliquod cri-  
men revocandam, non differret Rex à magistratu quem rex ipse, aut populus, cū  
dominantur, creat; in quem nec rex nec populus totam suam potestatem transfert  
ad hoc ut dominium ejus in accipientem transeat. Potestatis autem hujus quam po-  
pulus cum dominus est, aut quam Rex ubi eam à populo accepit, obtinet, hæc vis est  
& summa, ut judicari non possit ab alio,  
cum

cum omnes judicet. Non enim populus universus, cum dominationem habet, judicari potest ab illis quos in republica sua iudices ordinavit, nec proditiōis accusari, nec læsæ majestatis. Ratione quippe caret, ut populus collectivè sumptus se ipsum prodere velit, aut in se aliquid admittere offensæ & peccati, propter quod totus puniri possit & exterminari, nisi si una cervix omnibus detur, ut ille tyrannus olim populo Romano optavit. Ergo ubi propriam potestatem uni tradidit, nihil ex ea sibi reservat, sed eam omnem quamcunque habuit largitur, & sic eam quoque tribuit, quæ judicari non potest ab ullo, sed omnes judicare. At potest populus universus æquè se in alterius & unius potestatem & ditionem tradere ut singulis id licet. Ubi aliquis autem in servitutem se cuiuspiam vendidit aut subjecit, omnem in se illi domino potestatem concedit quam antea habebat, cum suæ potestatis esset & sui dominus. Lege etiam Hebræorum cuilibet licuit & jus fuit dominum adsciscere quem vellet, cui libertatem suam suorumque addiceret, & servum se faceret. Omnium pene gentium hic idem mos fuit, ut proinde juri naturali quodammodo possit accenseri. Populi

puli vero duplici modo in alterius arbitrium se dedunt, imperiumque in se e tradunt, aut vi victi coactique, aut sua voluntate. Utroque modo alienare suam potestatem intelliguntur, & in eum transferre plenum ejus dominium qui accipit, ut irrevocabiliter datum. Illi quibus vi rapitur, ut sunt qui armis subiguntur, etiam consensum suum victori accommodare solent, quo veluti volentibus imperare videatur. Præterea non omnes in eo populo qui se sub leges pacis iniquæ hosti suo subjecerit, victi & domiti fuisse bello intelliguntur, sed illi tantum qui arma gesserunt. Quibus cum reliqua pars imbellis accedere cogatur, ideo ut pax inter victos victoresque & concordia firmior coalescat, quasi fœdere, licet iniquo, ea sancitur, quo leges victi accipiunt, victores dant, ut illi subjectorum loco sint, isti dominorum. Sic cum Augustus bello superior extitisset armisque libertatem Romanorum oppressisset, quibus quo vellet modo leges ut victis imponere potuit, tamen lege Regia quæ ad hoc tunc lata est, populus Romanus omnem potestatem quam antea habuerat cum republica potiretur libera, transfudit in Principem. Renovata & in aliis Principibus

ea lex, qui non jure hæreditario succedebant, sed de novo eligebantur nihil pertinentes ad familiam ejus qui decesserat. Ita Tacitus scribit, *Senatum omnia principibus solita Vespasiano decrevisse*. Atqui Vespasianus vi occupavit imperium, ut & Augustus, militari judicio factus Imperator & præter voluntatem Senatus qui postea assensit. Immo & ei decrevit omnia jura potestatis quam alii Principes habuerunt. Mos erat tum ut qui assentirent alicujus principis electioni, in verba ejus jurarent, & illi ipsi qui auctores eligendi creandique fuerant ad hoc juramentum adigebantur, ut ex Historiæ Romanæ scriptoribus passim liquet. De hoc ipso Vespasiano Suetonius: *Tiberius Alexander Præfectus Ægypti primus in verba Vespasiani legiones adegit Kal. Julii. Qui principatus dies in posterum observatus est. Et continuo: Judaicus deinde Exercitus v. Id. Jul. apud ipsum juravit. Vocat Sacramentum idem auctor in vita Galbæ, ubi mutati Sacramenti meminit de ala quadam Equitum, quæ appropinquantem Galbam destituere conata est, quod ipsam poeniteret mutasse sacramentum. Paulo post scribit, Eundem Galbæ, superuenientibus ab urbe nuntius, ut occisum*

Nero.



Narbonem, cunctosque in sua verba iurasse cognovit, deposita legati suscepisse Caesaris appellationem. Ex quibus palam est, longe aliter creatos legatos & alios magistratus tam civiles quam militares, à summa potestate, sive populi sit sive regis, aliter imperium à populo deferri principi solitum. Magistratus cum à populo vel à Rege creabantur, non jurabant in verba populi dominantis vel Regis à quo eligebantur, sed si forte iuramento se obstringebant ad leges servandas, & ius dicendum secundum leges. Cæterum tam populus ipse quam milites in verba Principis iurare soliti erant, cum ei imperium deferrebant, & suam in eum potestatem transferebant. Qua vi sacramenti à populo & exercitu præstiti Principi electo, non poterant nisi summa cum perfidia & rebellionem damnanda mutare iuramentum quod ei præbuerant; non magis quam milites ubi sacramentum duci suo dixerant, nunquam se eum esse destitutos nec deserturos militiam. Longum igitur discrimen fuit inter magistratum à populo cum dominatur factum, & regem quem idem populus sibi facit: Illum potest cogere ut se abdicet magistratu, & si proditoris vel læsæ Reipublicæ reus fiat, capite.



capite punire, regem non item. Hoc eo-  
fit, quia in magistratum non totum jus  
transfert, sed in regis quem deligit, gra-  
tiam omni potestate se exuit, ut cum illa  
induat. Ut Luna lucet alieno lumine quod  
à Sole mutuatur, ita magistratus pollet  
aliena potestate quam mutuam. velut ac-  
cipit vel à Rege vel à populo qui regit,  
eam cum reposceretur mox redditurus. At  
Rex qui à populo eligitur, ita populi pote-  
statem suscipit in se, eamque veluti sibi  
infusam recipit & penitus induit, ut num-  
quam postea exui ea queat, idemque pa-  
titur ac si Sol lucem quam habet, totam  
deponeret, eamq; in Lunæ corpus trans-  
funderet, ita ut Luna in Solem transmu-  
taretur & Sol in Lunam. Ita vel vi coactus,  
ut dixi, populus, vel voluntate, quodcun-  
que illi inest potestatis, in eum qui se re-  
gem ipse fecit vel quem volens creat,  
transdere solet. Utroque modo pari sacra-  
mento se obligat populus ad servandam  
illi fidelitatem qui regium imperium acci-  
pit. Duobus his quippe modis etiam servi-  
fiunt qui erant liberi. Aut enim in bello ca-  
piuntur & per vim servire coguntur, aut ipsi  
se sua voluntate in servitutem ob pretium  
participandum aut alia de causa alicui ad-  
dicunt. Non magis his licet quam illis se in-  
liber-

libertatem invitis dominis vindicare. Et cum Paulus servis præcepit subjectos esse dominis suis, non respexit magis hujus quam illius generis servos. Nam ex utroque genere tum multi servitutem serviebant vel in servitute erant. Rapta quæ raptoris nuptias optaverat, ut olim lex fuit, non minus legitima ejus uxor fiebat à quo per vim abducta fuerat & compressa, quam si voluntate parentum & propria viro tradita fuisset, sed consensus raptæ superveniens in hoc valebat quamvis vim passa foret, ut legitimæ essent nuptiæ. Idem de eo dicere licet qui per vim in victos occupavit imperium: consensu quippe populi accedente qui non poterat non consentire, firmatur in victore regendi potestas, quæ legitima evadit haud secus quam si populus sponte sua ei detulisset imperandi jus. Sic translata in aliquem regalis dominatio, earum rerum naturam induit, quæ semel datæ postea revocari non possunt. Ubi pater filiam marito in manum dedit, paternam potestatem in natam habere definit, vir habere incipit, aliquantum tamen immutatam re & nomine. Quinetiam in uxores, si quid deliquissent, viri olim jure Romano hoc jus habuerunt, ut de his judicium ferre easque condemnare

nare possent. Lege etiam naturali quam Deus in homine creando sanxit, mulieri patrem & matrem relinquere jubetur ut viro suo adhæreat. Pater naturalis qui filium in adoptionem alteri dederat, jure suo cedebat paternæ potestatis, eaque in adoptivum patrem transferebatur. Et sic in novam familiam & alia sacra adoptatus transibat. Qui minus autem regi ubi à populo regimen accepit, id in perpetuum possidere fas est, nullo judicio vel damnatione destituendo, quam Pontifici Romano postquam Papa factus est à Cardinalium Collegio? Ajunt quippe, & pro fide non dubia tenent, Papam à nemine judicari, cum omnes judicet, ac proinde non posse destitui, nec Papatu quandiu vivit expelli, aut gradu dejici. Vnde hanc illi prærogativam datam dicemus? An ex Episcopatu habere? Atqui quatenus Episcopus etiam dignitate exui potest ac degradari ob crimen, quia omnes Episcopi olim nec poenæ immunes nec censuræ, si quid peccassent, per canones Ecclesiasticos fuere. Dignitas itaque Episcopalis cum ob delictum possit amitti, certum est & Papam quatenus Episcopum sede sua depelli posse & honore. Ergo ubi regale illi & principale fastigium accessit, immo ubi

supra

supra reges & principes evehi cœpit, idem quoque jus quod principum regumque proprium est, simul accepit, ut à nemine judicari posset, nec condemnari. Ut Petri Apostolorum coryphæi successor non potest hoc sibi sumere, quod ipse Petrus cui se vult videri successisse, numquam jus habuit, numquam sumsit. Nam & ipse & alii Apostoli numquam iudices sederunt ne in privatorum causis quidem, nedum in reges & principes hanc licentiam usurparunt. Quin e contrario tribunalibus Principum sæpè adstiterunt, verberandi, gladio puniendi, comburendi, cruci affigendi, & aliis suppliciis afficiendi, qualiacumq; iudicis sententia in eos decrevisset. Ergo ubi regalem induere potentiam, etiam jus regium simul se accepisse crediderunt, ne judicari possent. Quod jus ubi à se populus in regem quem sibi sumsit aut fecit transtulit, rex id habere incipit, populus vero non habere quod ante habuit. Ut enim populus, *rex d' omnia* sumptus, cum suæ potestatis est & sui juris, non potest à quocumque judicari, ita quando in alium hanc ipsam potestatem transtulit, ille tum jure quod populi fuit fruitur, nec potest à quoquam judicari. Nec dici hîc potest, quod quidam tanquam validum te-

lum

lum intorquent, eum qui constituit, semper majorem videri debere illo qui constituitur. Ita ergo regem qui à populo constitutus est, eo ipso tanquam minorem constituyente censerì oportere, quia populo debeat id quod sit. Qui sic ratiocinantur, quærant à Romano Pontifice an hoc argumentum in se valere velit; & ideo minorem Cardinalibus se esse habendum quod ab illis creatus sit. Aliud dicturos eos esse opinor. Milites qui imperatorem vel ducem in bello sibi legerunt, numquam ut ei parerent, in animum possent inducere si hæc sententia valeret, utpote superiores eo quem elegerint. Consul qui Dictatorem dicebat, non solum populo universo superiorem eum constituebat, sed etiam se ipso. Nam & Consulem à quo creatus fuerat, æquè occidendum poterat mandare ut alium de plebe quemlibet. Nec poterat idem qui à Consule Dictator dictus fuerat, ab eo destitui, antequam tempus Dictaturæ ejus exiisset. Clerici quem creaverunt Episcopum, non possunt degradare. Et sane ita rerum natura postulat ut qui potestatem in perpetuum ac plenam ab aliquo qui potest dare accepit, non possit nec debeat repenti eam reddere; quia jus hoc non retinuit  
ille

ille à quo potestas illa in alium transfusa est. Si enim hoc obtineret, omnia in irritum caderent, nihilque umquam firmum ac stabile posset permanere, quod ea ratione gestum foret. Quid opus esset aliquem constitui aut principem aut Regem, si constituens retineret potestatem ejus quem constituisset, destituendi quando vellet? Omnia paulo momento mutarentur ac turbarentur, & nusquam tuta pax esset, aut tranquillitas reipublicæ vel ecclesiæ secura. Donatio potestatis jure vocari potest id quod simili modo agitur, quæ ad nutum dantis non potest revocari, sed hæret perpetua penes eum qui accepit. Aliud est cum aliquis qui superior est manet semper superior, atque ita dat ut maneat, quia tunc sua potestate se non exuit, sed quamcunque aliam potestatem constituit, eam sibi subjici vult, & à se pendere. Ut populus qui liber est dum magistratus creat, non transcribit in eos totum suæ potestatis jus, sed imperium suum sibi retinet, vimque eos constituendi & destituendi ad libitum. Nam magistratus ille quem sibi legit populus populo major ac superior non est; ita cum Rex rectores provinciarum nominat, non majores eos semet ipso facit, nec illis in se  
sum-

summum imperium committit. Cum jurisdictionem alicui mandat, non eo ipso illum superiorem se esse vult. Cum Tribunalia summa, quæ *Parlamenta* vocantur, rex instituit ad jus reddendum subiectis, quamvis potestatem eis sine provocatione judicandi concesserit, non tamen intelligit eos de se judicare posse, aut eorum jurisdictioni se submittere. Aliud est cum populus potestatem suam in alium transferens, nihil sibi ejus reliquum facit, sed totam transmittit cum omni jure, cum toto, ita dixerim, pulvisculo quam habuit. Tum quod erat, esse desinit, & eum cujus in gratiam se sua potestate privavit, id vult esse quod fuerat, sine ulla in posterum revocatione talis donationis. Quod in omni administratione tam civili quam ecclesiastica semper ita obtinuit ut de juris naturalis fontibus quodammodo profluxisse videatur. Nusquam enim legimus, ab iisdem qui constituere aliquam supra se potestatem qua regerentur, eam fuisse destitutam. Cardinales Papam non destituunt, nec clerici Episcopum, nec milites suum ducem. Nam qui à Clericis creatus est Episcopus non potest nisi à Synodo Provinciæ deijci. Papa quia regiam vel majorem regia potestatem sibi quasi  
jure



jure divino vindicat, ne à Synodo quidem  
universali, id est ab universo Christiano  
populo, se judicari posse aut condemnari  
intendit. At reges jure divino constitui,  
quia per Deum regnant & regnum ejus  
ope adipiscuntur, inter omnes antiquos  
tam profanos quam Christianos auctores  
convenit. Ideo non solum ab illis à quibus  
electi sunt, sive senatus sit, sive exercitus,  
sive populus, expelli regno non posse,  
sed ne ab universis quidem subditis. Se-  
cundum hoc perpetuum ac constans re-  
gnorum & imperiorum jus, cum à Va-  
lentiniano milites poscerent ut vellet sibi  
consortem imperii adsciscere, in ea ver-  
ba respondit quæ jam supra retulimus,  
*in eorum fuisse potestate priusquam eum  
ad imperium vocarent, id non facere,  
jam vero vocato imperare eos non posse, nec  
ab eo impetrare quod nefas crederet illis con-  
cedere.* Sane, ut ante dicebamus, lex &  
ratio naturalis quæ publicæ salutis consulit  
in quacunque status forma instituenda  
qua populus gubernari queat & in offi-  
cio contineri, eadem exigit ut regimen  
semel institutum, quicumque ejus status  
sit, quam diutissime servetur, aut in-  
perpetuum, si id fieri queat. Nam si  
jus imperandi obnoxium foret arbitrio.

aut voluntati eorum qui reguntur, nullus esset finis aut modus turbarum & discordiarum in ea republica in qua talis mos obtineret. Numquam tranquilus foret, numquam securus ejus status. Duos modos rectoris habendi esse diximus, vel cum populus se sponte sua in ditionem alterius Regis dedit, vel cum vi ad hoc & armis victus cogitur. De priore modo certum, est quacunque de causa id fiat, ut se quis subjiciat volens alterius regis vel status imperio, non ad diem certum eam subjectionem & suæ potestatis alienationem ab illo populo fieri, sed in perpetuum & in omnem successionem & posteritatem regis illius cui se subdunt, si hæreditarium sit regnum, vel in omne tempus quo duraturum est illud regnum si regatur à principibus, eligi solitis; &, si sit Respublica libera cui se dedat in ditionem populus ille, quandiu staturus sit ille status. Nec etiam verum est quod quidam asserunt & pro certo obtrudunt, gentem armis subactam posse quandocunque occasio tulerit in libertatem se vindicare & jugum ejus regis excutere à quo fuere semel domiti. Ratio omnis tam divina quam humana id vetat. Primum quia quod armis quæ-

ritur,

ritur, transit in ejus dominium qui acquisivit. Hinc servati homines, in servitutem, ut bello capti & venditi, non poterant dominos mutare vel fuga vel alia in dominum rebellionem, sed in aliquo tali facto deprehensi cruci affigebantur olim, aut in ergastulum trudebantur. Ipsi deinde Apostoli servos dominis subditos esse jubent *cum omni timore*, nec solum justis & æquis, sed etiam *duris & dyscolis, cum simplicitate cordis, non ad oculum servientes, quasi hominibus placentes*. Ne quidem Christianos factos infidelibus heris obedientiam negare debere docet Augustinus in Psalm. cxxiv. dicitque ibidem, Christum *non fecisse de servis liberos eos qui serviebant, sed de malis servis bonos servos*. Par est ratio de subjectis quos tales reddidit vis armorum & belli jus. Non eos quippe de subditis liberos fecit Christus, nec docuit eos rebellare, ne contra infideles quidem aut impios & iniquos dominos, quamvis ipsi fideles essent & justis, sed de malis subjectis reddidit bonos sua doctrina, dum præcipit etiam per Apostolos subjectos eos esse debere qui tunc vivebant homines iis potestatibus quæ tunc regnabant. Atqui non aliæ tunc fuere quam

quæ libertatem populi bello oppresserant  
& imperium vi arripuerant. Eadem igitur  
ratio est domini in servos & Regis in subdi-  
tos. Pari modo hi & illi subiecti debent esse  
domino & Regi quamvis infideli & impio  
pii ipsi & fideles, siquidem voluntatem  
Christi facere volunt. *Prima*, inquit Au-  
gustinus eo loci, *& quotidiana potestas  
hominis in hominem, domini est in servum.*  
Quod autem dixit de domino & servo,  
hoc intelligi debere ibidem ait *de potesta-  
tibus & Regibus.* Nam *cum facti fue-  
rint vel iudices vel reges, quia hoc fa-  
cit Dominus propter disciplinam plebis  
sue, propter disciplinam populi sui, non  
potest fieri nisi ut exhibeatur illis honor  
debitus potestati.* Ordinavit enim sic Deus  
Ecclesiam suam, ut omnis potestas ordina-  
ta in sæculo habeat honorem, *& aliquando  
à melioribus.* Ergo etiam meliores pare-  
re debent deterioribus, optimi subditi  
pessimis regibus. Hoc etiam est quod  
bonos subditos facit, dum Dei voluntati  
obsequuntur in honore debito exhibendo  
Regi quem Deus constituit. Si gentes in-  
fideles hoc etiam fecerunt, quanto magis  
Christianos facere par est, cum Christus  
hanc disciplinam suæ esse Ecclesiæ volue-  
rit, teste Augustino? Christus suo exemplo  
hanc

hanc ipsam disciplinam firmavit, qui in  
Passione sua ea sustinuit quæ servi solent  
à dominis pati. Dominos illos & iudices  
agnovit qui tunc imperabant, qui im-  
perium vi & armis occupaverant, dum  
sub illis nasci voluit, & sub eorum suc-  
cessoribus qui tyrannicè regnabant, nec  
melioribus artibus regnum invaserant ju-  
dicari & morti addici sustinuit. Cujus  
exemplum & Discipuli ejus sequuti sunt,  
non recusando habere iudices vitæ &  
mortis suæ, quos noverant esse tyran-  
nos & Imperii usurpatores. Ratione e-  
tiam naturali pervinci potest, qui sic sub-  
jugati sunt perpetuo debere subjectos  
permanere illi qui sub jugum eos misit.  
Quos poterat jure belli perdere, servatos  
maluit. Hoc igitur debent beneficium  
victori pro data vita, ut fideliter illi ser-  
viant & subjecti sint. Multo magis id  
jus obtinere debet ubi tempore & usu  
convaluit. Cujus rei illustre exemplum  
suppeditat Historia Gergesæorum, quæ  
narratur ab auctoribus Talmudicis. Isti  
Gergesæi qui in Africa exulaverant à Ju-  
dæis pulsi quando terram Canaan occu-  
paverunt, Alexandri Magni temporibus  
ex Africa repetitum venerunt patriam  
suam, quasi per vim sibi ablatam ab Israëliti-

ris. Hujus litis disceptandæ arbitrium ipsi Alexandro tum permisere. Cum ergo coram illo iusta sua allegarent, & concluderent terram Canaan suam esse, quia in lege passim à se denominaretur qui originem duxerant à patre Canaan, contra ea Gabrias nomine Judæorum respondit, ejusdem Legis testimonium pro suis facere & possessionem Judæis legitimam ejus terræ adjudicare cujus restitutionem petebant Gergisæi, asserens, scriptum esse, Maledictus sit Canaan & servus servorum sit fratribus. *Si quis servus*, inquit, *acquirit, cuinam debetur illud & ipsemet? Nonne vos etiam in super tot annis serviistis nobis?* Alexander quem judicem ceperant, iussit eos hoc ultimum refellere. Petierunt illi dilationem tridui. Qua concessa cum vadimonium deseruissent & nihil respondissent, lis judicata est secundum eos qui possidebant. Ergo qui olim in servitutem redacti sunt, diuque in illa servitute manserunt, nullo jure postea libertatem suam recuperare satagunt, quā primò strenuè defensam oportuit, semel amissam nulla ratione repetere conantur qui amiserunt, nisi cum pari injustitia alienum invaderent. Nisi hic modus regnorum acquirendorum & tenendorum legi-

legitimus haberetur, nulla hodie legitima videri possent regna, cum paucissima sint, immo fere nulla, quæ non ad hoc instar nata vel facta fuerint. Alexander Magnus Persis imperium eripuit ex plurimis constans regnis, unde & qui ea possidebat *Rex regum* appellari jure suo merebatur. Post mortem ejus duces qui sub eo militaverant, totidem regna sibi fecerunt quot præfecturas antea singuli obtinuerant. Reges cum sic evasisent, tandem procedente tempore eorum ditiones in Romanum imperium velut absorptæ deciderunt. Quod & ipsum postea in varia regna scissum fuit à barbaris qui Europam & Asiam Africamque ex Septentrione adfluentes inundarunt & insederunt. Britannia quæ provincia fuerat Imperii Romani, sic ab Anglosaxonibus occupata regni formam induit, & priori statui reddita est quem ante Romanorum invasionem habuerat. Dani Anglosaxonibus illud regnum ereptum sibi vindicarunt. Deinde rursus & Saxones Danis. Idem passi sunt iidem mox à Normanis quod ipsi Danos pati coëgerant. Sic Guilielmo Victori cessit in Regnum Anglia, cujus familia cum nuper regnaret, hoc jure & possessione regni per rebel-



lem exercitum privata est, qui nunc loco regis imperat. Quo jure si quis quarat, tam nullo promptum sit dicere, quatinus maxima cum injuria & injustitia id factum liquet. Ne Saxones quidem quibus regnum eripuerunt Normanni, id nunc jure ullo facere possent, videri, utametsi illi res suas repeterent, & se vetustiores ejus regni colonos esse contenderent, novitiis istis migrare inde jussis. Sed ubi sunt illi Saxones qui possessione Angliæ se dejectos à Normannis queri possint? Si hoc facere velint, Dani intercedent, qui id sibi deberi potiori jure asserant. Immo se priores esse Angli & Saxones affirmabunt, qui Romanis Britanniam ademerint, & sic suam esse debere. Quinimmo exsurget Imperator hodie, vel Rex Romanorum, qui Britanniam sibi meliore titulo adrogaret, utpote quæ pars olim fuerit Imperii Romani. Nemo non videt quam nullo jure ac nulla ratione, qui Regem suum legitimum solio dejecerunt, hæc asserant quæ pro se ficere putant, ut videantur aliquo colore aut prætextu formam regni mutasse, & eam constituisse quam sibi ipsi subjecerunt, vero & naturali hærede excluso. Dani sunt an Angli vel Saxones qui

vi & armis hoc regnum hodie occupatum incubant? Fortasse Normanni sunt, vel Normannorum soboles, qui contra Normannici principis prosapiam insurrexerunt, & nefario parricidio regem inde ortum trucidarunt, totamque ejus stirpem legitima regni successione privarunt. Non ab exteris itaque hostibus, sed à suis subditis Carolus ille primus statione deturbatus est, quod nunquam antea in Anglia factum fuerat. Omnibus enim mutationibus quæ in illo regno acciderunt, non regni formam innovatam, sed solos dominos peregrinis nationibus ingruentibus alios factos constat. Romani regibus qui antea eam tenuerant, eripuerunt, Romanis Angli & Saxones, his Dani, deinde Danis iterum Saxones, postremo Saxonibus Normanni, qui à Guilielmi Normanni huc usque temporibus in illa regnarunt. Normanni ergo ex Normannis ortum Regem sustulerunt & statum Reipublicæ immutarunt, post paulo, siquid verumens auguratur, justitia divina & humana sic volente, regis quem regno & vita depulerunt legitimis heredibus restituendum. Cum omnia itaque in orbe vertantur passimque *seculares sortes variant*, ut ait

Tertullianus, dum regna è regnis nascuntur, aliis cadentibus, aliis orientibus; si quis vellet antiquis & primis possessoribus suum reddere, aut illi quasi jure manu confertum id repeterent, ima summis mutarentur & omnium rerum confusio & perturbatio per omnes gentes existeret. Nec hic locus est regnorum vices recensere, & quomodo bellis totum ferme licuerit in eorum mutationibus peragendis, dum gentes gentibus hoc modo miscentur, & alia etiam ratione velut ex surculis & propaginibus populi de populis, urbes de urbibus, regna de regnis ubique terrarum panguntur. In regno itaque hereditario & regum invicem sibi succedentium serie firmato, quamvis origo ejus ex usurpatione initium sumpserit, serum est vel illis qui primi subacti sunt priscam libertatem vindicare, vel illis qui eam numquam habuerunt, quia semper sub regum imperio fuerunt. Nam ante Guilielmum, cognomine Conquestorem, ut dictum est supra, Dani Reges Angliam tenuerunt, ante eos Anglosaxones, ante hos Romani, ante hos alii reges. Ergone, si quidem possent ostendere, se aliquando in libero statu & æquis legibus constitutam, & à populi potestate suspensam

Rem-

Rempubicam tenuisse, jus tamen haberent regem ejiciendi quem per tot sæcula sustinuerunt, & quem bello victi tot ab annis retro accipere coacti sunt, etiam si daretur hos ex victa gente & non ex victrice esse propagatos? Nunc quis eorum ficariorum qui regem suum perfido & nefario latrocinio ac scelere plusquam parricidali necarunt, potest dicere se ex Danis aut Anglosaxonibus aut Romanis aut antiquis Britannis ortum, & non potius è Normannis, qui postremi omnium insulam occuparunt, insederunt, reges ex sua natione habuerunt successionem annis plus minus sexcentis usque ad hoc tempus continuata? Tanta sanè multitudine tunc Normanni in Angliam transvolarunt, ut saltem se puros Anglosaxones & Danos non possint asserere, cum per connubia mixti indigenis advenæ gentem unam postea sub uno rege confecerint. Si hostis externus regem hostium bello illato vita & regno exuisset, ut sæpe in ea Insula usu venit, venia digna res foret, utpote usitata. Nō enim aliter hæc regnorum sacra constare videntur, quam ut ex unius interitu alterius ortus procedat. Ubi verò subditi regem suum legitimum, regē natum, hereditate & successionem

ne

ne regem factum, armis persequuntur nullis aut levibus de causis, captum in carcerant, capitis causam dicere adigunt, damnant, publico & infami supplicio addicunt, id vero tale est, ut omnium hominum non reprehensionem, sed detestationem incurrere debeat. Non enim subjectorum hoc facinus, sed perduellium, non hominum, sed belluarum, non de vulgari nota sceleratorum, sed plus quam parricidarum.

#### C A P U T VII.

**P**Ræcipuum hujus operis & defensionis Regiæ caput ac fundamentum est, reges judicari non posse. In hoc etiam veluti cardine tota quæstio vertitur, ut liquet jure an injuria Rex Magnæ Britanniæ à populi sui parte seditiosa & rebellis capitis damnatus sit. Multis jam rebus, suprâ demonstratum est, judicium illud quo rex à subjectis supplicio affectus est, stare non posse & re ipsâ nullum esse, parricidium, potius appellari debere, quam judicium, & qui id ausi sunt suscipere, crimen læsæ majestatis divinæ & humanæ incurrisse. Divinæ, quia reges à Deo con-

stituti

stituti sunt, quos nefas sit violare, neque id fieri queat quin Dei voluntati repugnetur. Humanæ, quia leges omnium gentium in hoc consentiunt, absq; offensione majestatis summi populi magistratum ledi non posse, qui solus habet majestatem. Ejus enim qui imperat majestas est. Aliis nunc porro rationibus evincendum est, eum qui regit & regnat non posse quemquam eorum vitæ suæ judicem habere qui reguntur ab ipso, atque ei subjecti sunt. Quarum hæc erit vel maximè potens & valida, quod rex parem in suo regno non habeat nec superiorem. Sensus quippe communis hoc docet ac dictat, non posse judicari vel condemnari majorem à minore, superiorem ab inferiore. Quis igitur ex subditis de rege judicabit qui imperium in omnes habet, & in quem nemo? Ideo Romanus populus post exactos reges cum magistratum creari placuisset qui summam haberet potestatem & regiæ proximam, sed annuam non perpetuam, duos constituit Consules non unum, ut nimirum si unus proditionis reus factus esset, aut in alio graviore crimine deprehensus, coerceri à collega posset. Unus quippe qui solus imperium obtinuisset quamvis annuum, multa contra-

rem-

republicam in eo anno tentare & ag-  
 gredi potuisset, quæ in perniciem publi-  
 cam eruptura essent, & ipsi impune ces-  
 sissent, cum non haberet à quo reprimi  
 posset. Nam primi illi Consules quales  
 creati sunt statim ab exactis regibus po-  
 testate plane regia censebantur, in popu-  
 lo cogendo per præcones & accensos, ex-  
 ercitu comparando, pace & bello geren-  
 dis, vel inconsulto Senatu, cum ab his pro-  
 vocatio non esset, & in caput cujuscunque  
 civis animadvertere possent. Hæc sola  
 duo ne veri reges viderentur vetabant,  
 quod longius annuo imperium non ha-  
 berent, & quod duo essent. Hoc enim  
 proprium imperii & majestatis regalis, ut  
 penes unicum sit. Inde illud Homeri, εἰς  
 ἑνὶ βασιλῆϊ ἔστω, Εἰς βασιλεύς. Si duo simul  
 regnent, hoc ipso reges propriè non sunt,  
 quia quod maximè regium est, non ha-  
 bent, ut judicari à quoquam non possint.  
 Nam alter horum si delinquat, aut læsæ  
 reipublicæ reus sit, alter de eo referre po-  
 test ad populum, vel ad senatum, ut accu-  
 setur & condemnetur, aut etiam vel in-  
 inconsulto Senatu ab eo coërceri & puniri,  
 si ita jus sit ut possit. Apud Carthaginenses  
 duo fuere Sufetes, id est Judices, similes  
 Consulibus Romanis, penes quos summa  
 potest-



potestas in populum fuit & planè regia, hoc uno dempto, quod duo essent; quem numerum binarium non admittit regius status, quia judicari à quoquam recusat, qui illum obtinet. At ubi duo sunt potestate ac imperio æquales, unus ab altero postulari capitis, & condemnari potest. Impropiè itaque Probus, in vita Annibalis, Sufetes illos Carthagenenses *Reges* appellavit *annuos*, quia ne reges essent, duabus his rebus efficiebatur, & quod annui, & quod bini. Judices Hebræorum meliori jure reges appellari potuerunt, qui & singuli fuere & æquale vitæ suæ spatio imperium obtinebant. Scriptura quoque Sacra reges eos vocat, cum dicit in libro qui ab his nomen habet, cap. xviii. *In illis diebus regem non fuisse in Israël.* Quod & alio loco repetit. Non tamen illud proprium regalis habuere potestatis, ut non judicarentur. Nam judicabant & judicabantur à Synedrio magno. Cum reges in eorum locum substituti sunt, ideo reges proprie appellati fuere, non judices, quia quod erat maxime regium, habere, à nemine judicari. In Optimatum statu, quem *ἀριστοκρατία* Græci vocant, quot sunt Optimates, à quibus administratur respublica, totidem sunt etiam reges, uno  
hoc

hoc excepto, quia cum sint plures, quod regum proprium est, habere non possunt, ut à nemine judicentur, cum collegas habeant pari præditos potestate & imperio. Nam & eam quoad vivunt, obtinent, & fortassean etiam ad natos eorum successione transiturem, si talis sit Reipublicæ consuetudo. Sanè patritiū ex patritiis orti, in plerisque civitatibus sic gubernatis semper administrationi præerant eodem modo ut in hereditariis regnis reges nati regibus imperant, ut erant *Porphyrogenneta*. Venetorum Respublica sic ab optimatibus suis gubernatur, in qua nobiles ex nobilibus regimen semper accipiunt, ducemque habent, qui quasi præses tantum est & princeps Optimatum, non rex, quia suffragia ibi valent omnium, nec ipse iudicii & condemnationis expers est, si proditoris reus peragatur. Tales etiam fuere Reges Lacedæmoniorum. Bini erant, judicabant & judicabantur, dignitatem in posteros per successionem trans mittebant, Senatui præsidebant. Unde Tyrtæus apud Plutarchum,

Ἄρχον τ' βαλῆς, dicit, θεοκμήτους βασιλῆας.

*Senatus principes esse à Deo honorandos reges.*

Nomen

Nomen regis non rem habuere, ut Sufetes Hebræorum & Carthaginienſium, quos etiam reges conſtat appellatos. Hujusmodi reges pares habebant in Republica, à quibus accuſari & judicari poterant. Nec plus auctoritatis habuerunt quam Romani Conſules, aut Sufetes Punicæ Romæ Conſul apud Conſulem compellabatur & poſtulabatur, quia in pari ambo poteſtate & imperio. At non Conſul apud Prætorem quia hic minor, ſed Prætor apud Conſulem ut majorem. Nam quamvis Prætor collega Conſulis haberetur, quia tamen minus imperium hic habebat, non poterat jure Conſulem rogare. Meſſala apud Agellium lib. xiii. cap. xiv. *Prætor, etſi collega Conſulis eſt, neque Prætorem, neque Conſulem jure rogare po- teſt, quia imperium minus Prætor, majus habet Conſul; & à minore imperio majus aut major collega rogari jure non poteſt.* Si major collega non poterat jure rogari à minore, quia minus imperium habebat, ut Conſul à Prætore, quid dicendum de rege? An ab illis jure rogari poteſt, qui ab eo imperium acceperunt? An non major eſt differentia regis & magiſtratus quem ipſe creavit, quam Prætoris olim & Conſulis Romæ fuit? Atqui Conſul non crea-

bat

bat Prætozem. Atqui Prætor & Consul collegæ erant. Atqui cum abessent Consules, si quando peregrè profecti erant, penes Prætozem urbanum summum imperium manebat. Certè utrumque magistratum populus creabat. Immane ergo quantum majus sit discrimen inter regem & magistratum à rege constitutum. Quale nempe est inter principem & subiectum, inter dominum & servum. Quomodo ergo dominus servum suum aut regem subiectus jure rogabit, legibus interrogabit, postulabit, aut etiam judicabit & condemnabit? Cum Cæsarem qui prætura functus fuerat, Quæstor Nonius Niger apud se nominari passus esset ab Vettio judice inter socios conjurationis Catilinæ, Cæsar *Vettium, pignoribus captis & direpta supellectile, malè mulcatum ac pro Rostris in concione pene discerptum, coniecit in carcerem, eodem Nonium Quæstorem quod compellari apud se majorem potestatem passus esset*, ut narrat Suetonius in vita Julii Cæsaris. Sæpe quidem & coram minore judice major potestas respondet, sed ita tantum si ab eo qui summum habet imperium, delegata & mandata in hoc nitatur jurisdictione. Jure ordinario id non fit. Et cum nemo sit, qui

qui sub regno majus rege habeat imperium, nemo etiam mandare jurisdictionem queat, nisi qui eam suo jure, non alieno beneficio habet; ut est in leg. v. D. de jurisdictione: Rex solus eam suo jure habet; at beneficio regis is, cui à rege mandata est. Jus gladii, id est, merum imperium, idem concedit quibus vult, non ab aliis accipit. Quod jus est animadvertendi in facinorosos homines. Hanc ergo potestatem cum solus dare possit qui jure suo eam possidet, non alieno munere obtinet, consequitur nullum esse præter regem in illo statu qui regali imperio regitur, qui judicare omnes queat, & à nemine judicari. Judicat vel per se, vel per eos quibus jurisdictionem mandavit, aut quibus merum imperium, id est, jus gladii, concessit, quibusque permisit vice sua judicare. Ex quibus certius eo omni quod est certissimum existit, non posse regem ab ulla potestate quæ in regno suo sit judicari, quia nemo nisi ab ipso potestatem accipere potest animadvertendi gladio in quemquam. Et ridiculum foret statuere, regem in se judices dare velle à quibus capite damnaretur. Nec potest porro accusari, quia cum major potestas apud minorem compellari & postulari non queat,

moult

multo minus is qui summam suo jure solus habet, legibus interrogari & reus agi possit apud eum qui nullam obtinet nisi vicariam & fiduciariam, id est à rege ipso concessam. Non ergo mirum est, si in populari statu magistratus à populo positus ab eodem ob crimen vel proditionem destituatur & plectatur, etsi optimates in statu Aristocratico, ab iis quos in potestate illa exercenda pares habent & collegas, ubi peccaverint contra Reipublicæ majestatem, puniri possunt. Sed pro monstro plane est ac portento, ut rex in regno suo cogatur causam capitis dicere coram judicibus qui jurisdictionem nullam per se habent, nullamque judicandi & animadvertendi potestatem quam non ab ipso acceperint. Sed quid juris esse dicemus in regibus qui eliguntur, & vitæ tantum æquale obtinent imperium, si non etiam ad hæredes suos illud transmittant? An successio duntaxat ita firmatam dat regiam potestatem, ut convelli non queat à populo, cæterum si cum vita finiatur & in ipso, magis obnoxia judicio videri debeat, quam quæ in natos & nepotes transit? Nullam quantum ad hoc differentiam statuendam censeo inter regna quæ vocantur *Electiva* & *Hereditaria*. in

nutriusque generis regibus est potestas, quæ non sit alteri potestati subiecta, ac proinde omnis metus expers qui à criminatione & iudicatione impendat. Cur optimates in Optimatum statu iudicium capitibus subeunt? Quia civitas ejusmodi potestates habet æquales aliquot, à quibus iudicari eos jus & fas sit. In populari quæ potestates regunt, à populo utpote constitutæ, nutu quoque ejus deponere vitam cum magistratu debent si tale quid commiserint propter quod id pati mereantur. In regno nemo rege superior, nemo par, nemo illi equalis. A quo igitur criminis postulabitur: à quo iudicabitur? In electivo, ut vocant, eadem omnia sunt quæ in hereditario, præter successionem. Namque populus quod habuit juris & potestatis, in eum id omne censetur contulisse cujus personam solam elegit ad se gubernandum, potius quam in talem cujus & liberos ad successionem admittat, totumque genus inde futurum. Lex sanè Regia non instituta est constituendo in populum principi qui heredem esset utique habiturus, sed in ejus gratiam duntaxat lata, qui electus est absque respectu successuræ stirpis. Ideo & renovabatur in aliorum principum initiis qui eligebantur, ut de  
Vespa-



Vespasiano supra diximus, cui Senatus decrevit omnia principi decerni solita. Si judicandus aut puniendus veniret rex qui suffragio eligentium suscepit imperium, idem in eum competeret cui jus esset & filio id relinquere. Quæ enim ratio diversitatis? In hereditario imperio, ubi rex ob crimen regno & vita damnatus excessisset, filio succedenti illud traderetur: in eo quod per electionem datur, si quid tale contigisset, de novo eligendo cogitandum foret. Non video igitur quid discriminis, quantum ad hoc, institui queat inter regem qui electione creatur, & eum qui hereditate regnum accepit. Fatendum quidem est, firmitus & stabilius regnum illud futurum, in quo filius à patre imperium accipit, multas ob causas. Nam diutina possessione, quasi jure & æquo, nititur. Deinde, propter meritum prædecessoris & metum successoris, sæpe majore cum venia peccat is qui importunus est dominus, quia favor patris qui modeste regnavit, gratiam ei conciliat. Sed & timor ex filio successuro interdum facit ut magis respiciatur persona morosi dominantis, citiusque ei parcat. Postremo hereditate devolvenda regna initium frequenter ab usurpatione habent. Sibi ergo &

& suis ea cum quæsit victor, non possunt tam facile extorqueri quasi jure possidentibus. Ideo & Augustus hoc inter arcanæ imperii reposuit, ut successionis lege sibi firmaretur principatus, & in domo sua hoc modo perpetuus maneret. Cæterum in hoc articulo, quo quæritur, an judex in regem dari queat, idem juris in electo convenit, & in eo qui patri hæres fit in regno suscipiendo. Nam nemo est sub rege, qui dandi in regem judicis habeat potestatem, & nemo dari jure potest à quo audiatur & cognoscatur ejus causa, cum ne testes quidem in eum produci queant, lege & traditione Hebræorum. Nec obstat, si is qui eligitur, aliqua vel cum sacramento promiserit, de quibus inter eum & subjectos convenit, quæ nisi promississet, fortasse nec sumptus esset. Reus quidem promissi est, sed sistare nolit conventis, à populo in judicium trahi non potest, nec jure ordinario interpellari ut pactionem servet. Multo minus extraordinaria cognitione in eum animadverti, judicibus datis, qui eum ultimo supplicio addicant. Cum enim summum habeat imperium, non illud potest amittere violatione fidei vel iurjurandi, non magis sane quam adulterio commisso vel

homi-

homicidio. Quod si subditis suis juraverit in electione vel inauguratione, se secundum jura ac leges regni justitiam administraturum, & nisi id faciat, eos sacramento fidelitatis quod sibi præstiterint, fore solutos, & facto ipso abiturum esse potestate, tenetur quidem apud Deum coram quo id promisit, pacti & jurisjurandi fidem servare; nec futurum hoc illi impune, si fallat, sed à Deo, non ab hominibus, poëna in fallentem expetenda & exposcenda est. Non enim possunt subditi cum eo agere vel jure, vel vi quæ licita sit, ut regno cedat, ob non impletas condiciones, quas ei, dum eligeretur, imposuerunt. Sæpe quidem Deus solet permittere, ut læsa sæpius populorum patientia in furorem erumpat, & armis se vindicet rebellibus, regemque impotenter & tyrannicè se gerentem opprimat, ac de medio tollat, sed judicium in eum constituere non potest, nec judices dare qui in eum causa cognita animadvertant & capitali illum poëna afficiant. Nam, ubi semel in alicujus regis à se electi gratiam potestatem suam exiit populus, ut jam dictum, non potest eam repetere quoad vivit. Eo demum mortuo libertatem suam recipit, & jus potestatis in alterum iterum

iterum conferendæ vel sibi retinendæ, si magis placeat popularis status. Ita servus liber fit morte domini, qui eo vivente non potuit jure se in libertatem vindicare, aut triste servitium fugere. Non sane magis obligatur rex, qui eligitur sub aliqua conditione ad pacti & jusjurandi proprii fidem servandam, quam ad legis divinæ observationem, quam omnimodo reges omnes Christiani tenentur custodire, tamen si verbis conceptis, dum eliguntur, eam se observaturos non juraverint. Atqui si jura divina & humana inter regnandum contempserint, si religionem violaverint, si cultum Dei profanaverint, non stare sub alio judice ac vindice quam Deo Scriptura sacra satis testatur, ac tam veteris fœderis quam novi Evangelicique disciplina. Quam multi enim in regnis Judæ & Israël reges adulteri, homicidæ, parricidæ, idololatræ, quibus tamen magnus Synedrî confessus hoc nomine nunquam diem dixit ut coram se sisterentur, rationem adeo execrandorum actuum reddituri, & sanguine suo pœnas persolaturi? Sub Evangelio, primis Ecclesiæ nascentis temporibus Tiberios, Claudios, Nerones, Caligulas, Domitianos, non solum Christiani, ut diximus, tulerunt, sed

P

etiam

etiam coluerunt, sed etiam pro iis Deo preces solennes publicè fuderunt, nec eis unquam, etiam ubi potuere, nocuerunt, nec ab iis defecerunt, nec in eorum necem conspirarunt, non cū conspirantibus unquā se confociarunt, non duces exercituum, non milites, non alii cujuscumq; homines conditionis. Ne resistendi quidem animum mentemque unquam acceperunt, quoties ad eos persequendos & omni scvitiā divexandos crudelissimi tyranni insurgere cœperunt, quos nihilo secius tanquam legitimos dominos semper observarunt. Alia etiam potentissima & invicta ratio adferri potest, cur in regem, qui subditi illi sunt, iudices dare non posse videantur. Nemo nisi lege aliqua reus fieri potest, & leges esse oportet quibus interrogari coram iudice tanquam reus debeat. Hinc illę loquutiones & formulę apud veteres jurisprudentes, de his, qui rei alicujus criminis postularentur, usitata, *legibus interrogari, lege reum fieri*. Quæ ergo lex, qua reus agi rex possit? Quibus legibus coram iudice interrogari? Cujus denique criminis accusari potest? Quo iudicio condemnari? Legibus solum esse regem, omnis antiquitas tenuit, tam profana quam Christo dicata. Leges solus rex  
omnes

omnes fert, aut ferendarum auctor est. Legis etiam à se latæ, vel privatæ, gratiam facere potest. An ipse, qui pœnam, quam lex irrogat, potest remittere, sibi ipse veniam non dabit, sed supplicium volens incurret ex lege quam posuit inferendum? Audio Zeleucum legislatorem Locrorum, cum adultero duos oculos erui lege sanxisset, filio in adulterio deprehenso, ne pœnam ex toto condonaret, partem ejus in se recepisse, & sic unum sibi, unum filio oculum effodi jussisse. Ipse sane sui fuit judex & filii, & recte quidem sic attemperavit pœnam ex lege quam sanxerat debitam, ut nec totam ipse quia innocens, nec totam filius quia regis progenies, sustineret, sed in se & filium eam partiens ita dispensavit, ut legi suæ satisfaceret, & pudori populi. Nec hoc in filio peccante adeo mirum, nec ad rem quam tractamus, planè pertinet. Quid si ipse stupri reus fuisset? An duos oculos sibi ipsi erui voluisset? An populus tulisset, & regem cæcum habere optasset? An vero populus in eum judex sedisset, aut judicem dedisset, coram quo accusari adulterii & puniri postea posset? Delicta sunt, ut judicia, alia publica, alia privata. Inter privata furtum & inju-

ria. Non hæc crimina regia sunt, sed privata. Nec enim regia, quia nec publica. Multa publica sunt ac dicuntur judicia, nullum regium. Rex adulter bene potest regnare, & homicida. Ideo propter homicidium & adulterium rex vita privari non debet, quia simul cum vita regno quoque exueretur. At nunquam hoc fuit probatum aut receptum legibus divinis nec humanis, ut duplex vindicta de uno crimine sumeretur. Rex, propter admissam hominis cædem qui vita careret & regno simul, poenam duplicem pro uno crimine solveret. Atqui poenas criminibus pares irrogari oportet. Ratione ergo caret, ut severius ac durius in regem animadvertatur quam in privatum. Privatus quippe homicidii reus, vitam amittit, rex verò vitam ob hanc noxam amittendo, regno pariter excideret. Præterea Reipublicæ interest, ut cum bene administratur ab homicida vel ab adultero, ne bonum rectorem cum suo magno malo ac detrimento amittat, ob peccatum quod in solis privatis & subditis per leges vindicari decet. Nec adulterium, nec homicidium, in regibus puniri solitum, David rex docet. Sed & bene imperare eos posse, qui homicidæ sunt & adulteri,

fin



si in cæteris recte imperandi artem teneant exerceantque, idem testatur. Publica judicia in Romano jure dici certum est, non ea propriè in quibus crimen vertebatur, sed ejusmodi tantum quæ ex legibus publicorum judiciorum veniebant. Nemo igitur ad aliquod crimen persequendum publici judicii accedere poterat nisi certa ex lege, quam accusator edere debebat, profitendo qua lege reum faceret, ut Iulia de adulteriis si adulterii crimen alicui intenderet, Cornelia de sicariis & veneficiis si quem homicidii postulare. Atque ita de cæteris. Ad privata quidem judicia quod attinet, certum est, regem ad interdictum non teneri venire, ut unde vi actionem excipiat, & cogatur ei restituere possessionem quem dejecerit. Nec eundem conveniri posse furti actione, rapinæ, injuriarum, de dolo malo, tutelæ, depositi, mandati, pro socio, & aliis quæ edicto prætoris dabantur. An ex publicorum judiciorum legibus magis postulari potuerit, videndum, & ex quibus. Adulterii, homicidii, parricidii, vis publicæ vel privatæ, peculatus, plagii, ambitus, falsi, an rite reus fiet, quæ publicorum sunt judiciorum genera? Cujus horum criminum publicam accusa-

tionem patietur? De homicidio & adultério jam diximus, allato Davidis exemplo. De parricidio Salomon ostendet, parricidam impune regem esse, & cum tali reatu regem manere. Is fratrem natu majorem interfici mandavit, & nihilo minus sapientis regis elogio in Scriptura donatur. Multi alii reges possunt ex historiarum monumentis nominari, qui parricidæ extiterunt Judæi, Gentiles, Christiani, quibus tamen eo nomine dica scripta non est, & qui non desierunt propterea reges esse. Primus Romulus fundamenta urbis suæ parricidio imbuat. Idem postea facinus successores ejus perpetrarunt non pauci, etiam Christiani, ut de Constantino nihil dicam. Si parricidium ex criminibus publicis gravissimum impune committant reges & sine judiciorum & legum metu, quæ non alia possint cum impunitate facere, quæ leviora sunt illo, ut plagium, falsum & alia? Sunt & quædam publicæ causæ judiciaque quæ reipublicæ causa constituta magis proprie esse videntur, ut repetundarum, ambitus, majestatis & cætera, ut ait Asconius, in Verrinas. Sed crimen repetundarum & ambitus & alia ejusmodi nemo dixerit in principem qui summum imperium tenet, cadere. Sed  
for-

fortassean majestatis reus ex lege Julia peragi potest. Nulla certe est ex publicorum judiciorum persecutionibus quæ in regem potius intendi videatur posse. Videamus ergo de isto crimine an ex lege super eo lata conveniri jure queat regia majestas. Si ita sit, majestas regis fiet rea majestatis. Quod quomodo stare possit, fateor me non videre. Nisi quis ponat aliam esse majestatem præter regiam cujus læsæ crimen rex incurrere videatur. Si in populo qui regię potestati subjectus est, etiam majestas esse censetur, non dubium quin id criminis adversus populum qui majestatem quoque habeat committi possit a rege ipso. Sic ergo ex æquo majestas erit communis populo & regi, & tam rex adversus populum quam populus adversus regem hac accusatione pulsabitur, & ea lege quæ Julia dicta est de majestate, interrogabitur. Quod esset magnopere absurdum. Nam eo sensu quò majestas nunc appellatur & appellari jam olim cœpta est Constantini ævo, ubi majestatem populus habere desuit, jure ejus & potestate in principem translata, tum principis esse cœpit. Non ergo majestatis crimen potest admittere princeps qui eam solus habet, adversus populum qui

ea caret. Atqui populus quando majestatem habuit & vim ejus exercuit, cum Reipublicæ nimirum dominus foret, non poterat ipse in majestatis crimen incidere, quia nec poterat quicquam facere propter quod ejus criminis reus fieret, nisi in semetipsum delinquere vellet & propriæ majestatis reus fieri. Quod ratione caret, quamvis certum sit eum magistratum qui patiebatur imminui jus suum, & qui potestatem suam in administrando non defendebat, imminuti magistratus, & veluti majestatis læsæ reum fuisse, ut scribit Asconius in Verrinas, de Prætura Verris. Alias non potuit populus adversus semetipsum crimen majestatis committere, cum summum imperium in Republica administranda obtinebat, sed alii adversus illum huic crimini obnoxii fieri poterant. Hoc tenentur nimirum qui armati cum telis lapidibusque in urbe sunt, conveniuntque adversus Rempublicam, locaque publica occupant vel templa. Cujus opera dolove malo consilium initum fuerit quo hæc quæ dixi fiant, sed etiam cœtus conventusque coëant, hominesque ad seditiones convocentur, & alia multa quæ in Titulo Digestorum ad Legem Juliam Majestatis enumeran-

tur. Hac lege etiam tenebatur, *cujus opera & dolo malo consilium initum erat quo quis magistratus populi Romani, qui- que imperium & potestatem habet, occidatur.* ut habetur Leg. i. D. quo supra. Maneamus in hoc, cui & cætera facta quibus hoc crimen incurritur similia sunt. Per quæ igitur factum erat ut magistratus populi Romani & qui imperium potestatemve habebat occideretur, ex hac lege Julia id crimen in illum animadvertebatur. Quid si populus ipse qui tum imperium tenebat cum lex illa lata est à Julio primum Consule, id per seditionem fecisset, aut fieri probasset, an ipse crimen læsæ Majestatis admisisset? Nequaquam. Ergo nec Princeps, postquam eam quæ populi erat, majestatem & potestatem Lege Regia sibi delatam accepit, si magistratum populi aut eum qui imperium potestatemve à se delegatam haberet, occidisset vel occidi jussisset, hac lege teneri videretur. Ne si quidem ejus consilio vel mandato homines armati in urbem convenissent, aut si muros urbis diruisset, aut aliquid tale perpetrasset, quod in privato quidem crimen Majestatis induceret, in rege ipso qui majestatem habet, neutiquam. Non enim ipse

contra se peccare posse intelligitur, nec quicquam facere quod in exitium Reipublicæ quam gubernat, redundet. Certè quædam facta quæ ad crimen Majestatis pertinent si ab aliis commissa fuerint, nec cadere quidem posse videntur in personam ejus, cujus dominatio est & majestas. Ut si consilium ceperit quo quis contra subiectos suos arma ferat. Si hostibus nuntium literasve miserit ut regni sui limites intrent, & præsidia occupent. Si milites sollicitaverit concitaveritque quo seditio tumultusque adversus Rempublicam cui præest, fiat. Hæc omnia, inquam, & cætera his similia, non cadunt in principis personam, quia contra ipsum fiunt, & majestatem ejus potentiamq; imminuunt & perdunt, quibus connivere nisi stultus sit, aut quæcumque autor esse nisi insaniat, non possit. Ut ergo populus cujus potestas est ac majestas, non potest lege, quæ de majestate lata est, teneri, ita nec rex qui eam obtinet, quiq; populum sibi subiectum habet. Privatus sanè accusatur majestatis læsæ si quid fecit quo majestatem populi cujus imperiū est læserit, aut principis qui similiter habet imperium. Nam dominantis, ut dictum, majestas est. At nec populus qui rempublicam administrat nec prin-

ceps qui eam sub potestate habet, majestatis damnari possunt, quia non intelliguntur nec præsumuntur minuere ipsi velle majestatem imperii sui. Si privatus mœnia civitatis solo æquasset aut aliquid ejusmodi in publicum damnum fecisset, lege majestatis hoc in eum vindicaretur. At si populus idem jussisset fieri cujus esset jubendi facultas aut princeps, non eo animo id facere putarentur, ut suam ipsi majestatem læderent, ejusque magnitudini detractum vellent aut derogatum, sed boni publici fortasse gratia, aut etiam ad urbis illius cives puniendos, aut alia de causa. Sine causa quidem videretur princeps id committere quod lege majestatis esset vindicandum, si nempe in exitium totius populi hostili animo ferretur. Sed talem casum dari posse non puto. Amittit quidem regnum reapse qui hunc animum habet, vel saltem amittere vult, sed non propterea majestatis accusandus est, aut damnandus, quia nemo est à quo possit hujus criminis subscriptio in illum edi, nec iudex qui in eum sedere jure queat. A populo deferi potest, sed non condemnari majestatis. Suæ spontis non esse qui tale quid tentaret, dicendus potius esset, & tanquam furiosus abdicandus.



us. Qui jus suę majestatis libens imminutum iret miseratione potius dignus censeretur quam supplicio, ita qui totam simul abjiceret, non pœna plectendus majore videretur quam qua se ipsum judicavit dignum, hostilem animum gerens ad exterminandum universum populũ cui dominatur. Nam majestas regia sine regno non est, nec regnum sine populo. Quid si populus in perniciem suam totus rueret num majestatis crimine teneretur? Nullo modo. De eo loquor qui liber est. Sed nec talis populus facile inveniatur. Nec fortasse rex etiam qui meditaretur perniciem universorum suorum subjectorum. Hostis quidem publicus esset pronuntiandus, nisi hostis potius sibimet ipsi videretur esse. Olim in publicis judiciorum causis quilibet ẽ populo poterat esse accusator. An ergo secundum hunc morem & ordinem judiciorum antiquum, Mævius aut Sempronius vel Titius libellum inscriptionis vel accusationis contra regem edendæ ita concipiet? *Die illo, anno illo, apud prætorem illum, Lucius Titius professus est se regem suum lege Julia de Majestate reum deferre, quod dicat eum die illo novum genus tributis subditis indixisse.* Enimvero nec accusator hic admittendus esset,

nec iudex agnoscendus, nec crimen ex hac lege regi intentandum. Primum quia nec subditus regem suum potest accusare, haud magis quam servus dominum. Deinde quia iudex dari in regem non potest, quia nec judicari rex potest. Postremo quia crimen majestatis non potest committere rex adversus populum suum, sed populus hoc in eum committit. Denique quia nulla lex est ex qua fieri reus rex possit cum legibus sit solutus, & qui lege aliquem potest absolvere, non potest ipse ea teneri nisi velit. Quid si ex novo more & usu judiciorum qui nunc receptus est Advocatus vel Procurator fisci, aut qui Balivus vulgo appellatur, munus accusandi regis sui suscipiat, an erit recipiendus ejusmodi accusator? Sed quis ei partes dabit accusandi? A quibus auctoritatem regis sui deferendi accipiet? An ab iis qui nec ipsi eam dandi jus habent, ipse subditus & servus regis? ab æque servis & subditis? Coram quibus iudicibus hujus persecutio criminis agitabitur? Nempe coram illis quos ipse rex non adversus se constituit, quia judicari à nemi- ne potest, sed adversus delinquentes ex populo suo, cum nec minus regi subjecti esse debeant tales iudices quam quilibet

ex media plebe. Præterea videndum an eadem pœna competat in reum regem si accusari posse detur & judicari, quæ in subditum quemlibet competeret si ejusdem criminis reus fieret. Constat legibus Romanis pro qualitate personarum crimina eadem aut levius aut gravius fuisse vindicata. Alia quippe pœna humiliores, alia honestiores coërceri apud eos jus mosque fuit. Tradit Paulus libro v. Sentent. Tit. de seditiosis. *Auctores seditionis & tumultus concitato populo pro qualitate dignitatis, aut in crucem tolli, aut bestiis objici, aut in insulam deportari.* Ergo in vilioribus concitatio tumultus & seditionis capite puniebatur & servili quidem supplicio, in honestioribus deportatione in insulam. At hoc crimen ne in regem quidem cadit. Non enim seditionis auctor esse potest contra populum, nec tumultus vel turbarum. Similiter nec populus cum imperium habet. Secessio populi Romæ facta quam Mænenius Agrippa composuit & alia multæ similes sine pœna autoribus suis steterunt. Lege Cornelia de Falso, si quis ob falsum testimonium perhibendum, vel verum non perhibendum, pecuniam accepisset, dedisset, judicemve ut sententiam ferret vel

vel non ferret corrupisset aut corrumpendum curasset, humiliores capite puniebantur, honestiores cum ipso iudice in insulam deportabantur, ut scribit idem Paulus libro quo supra, ad Legem Corneliam. Atque ita de aliis multis publicis judiciis. Levior erat poena in eos constituta qui alicujus dignitatis essent, alia in capita viliora, cum tanta saepe differentia, ut mors in istis esset supplicium, in illis vita incolumi alia poena constitueretur. Quid de rege dicendum qui non solum supra omnem dignitatem positus, sed etiam supra leges? An eadem poena teneretur eodem crimine admissio quo quilibet subditorum? Ita visum est fanaticis rebellibus Angliæ, qui regno & vita privarunt per infame supplicium regem suum propter eas noxas quæ ne quidem exilio dignæ sub justo iudice visæ essent vel in privato. Præterea contra legem facere ne videri quidem possit ille qui supra leges est, cui eas figere & refigere pro arbitrio licet. Lege Pompeja de parricidiis tenebantur qui patrem, matrem, avum, aviam, fratrem, sororem, patronum, patronam occidisset. Olim insiti culleo in mare præcipitabantur, postea teste Paulo vivi exusti sunt, vel ad bestias

dat

dati. Qui patronum occideret hanc pœnam patiebatur. An non hanc meriti sunt illi qui suum Regem capitali supplicio affecerunt? Nam quis major aut verior patronus rege, qui etiam parens patriæ est & populi, quique adeo sine parricidii summo scelere necari non potest? Hoc crimen quod *asperrimum* vocat Gajus in Institutis, & nova pœna persequendum, in regibus non puniebatur, ut docuimus exemplo Judæorum regum, Gentilium & Christianorum. Nullum in Deum majus crimen committi potest quam idololatria, neque quod severius umquam à Deo vindicatum sit. At fideles populi tulere Imperatores cultui idolorum addictos & Christiani nominis persecutores, Judæi reges idololatrias. Et perjurium quoque in privatis soli Deo puniendum reliquerunt leges civiles. Ita in rege omnia crimina solum Deum habere vindicem tota antiquitas consensit. Nullam esse legem ex qua regis accusatio institui possit aut damnatio statui, ipsi parricidæ Anglicani profitentur. Sed quare non est, inquiunt, lex quæ crimen læsæ Majestatis regi intendat, ut est quæ subjectos hujus criminis reos facit, qui in Regis necem conspiraverint? Ubi hoc sibi objecerunt,

runt, stulto & se digno responso id diluunt vel eludunt, Antecessores suos non sibi persuadere potuisse quemquam Angliæ regem tam stolidum futurum ut bellum inferret Senatui & populo. Qua ratione nihil fingi potuit stolidius. Atqui caret prorsus ratione ut reus læsæ majestatis fieri possit is qui majestatem habet, aliquid committendo contra eum qui eam non habet. Quomodo enim lædi potest majestas in eo qui caret majestate? Nulla certe læditur quæ nulla est. Sed & in legem quæ non est nemo committere potest; nemo contra eam facere quæ nec jubet, nec vetat, & quam, si esset, ipse qui legum condendarum potestatem habet, posset abolere, aut ejus gratiam facere. Nam certe si nulla lex foret quæ regem læsæ majestatis reum faceret, aut eam posset abrogare jure suo, pro ea quam obtinet supra omnes leges potestate, aut ei impune non pareret, ut nulla teneretur nisi velit, quia ex nulla potest reus fieri, cum nemo sit à quo possit accusari, nemo qui in eum testimonium dicere, nemo qui iudex in eum dari queat, quia nec dominum à servo accusari jura sinunt, nec patronum à liberto, nec parentem à liberis, nec eos qui jus habent clientelæ à clientibus; ergo nec

Regem

Regem à subjectis, qui in eos hæc jura omnia & nomina simul obtinet, domini, patroni, parentis? Audent latrones Anglicani dicere ubi lex scripta deficit ad naturalem recurrendum esse. An ulla lex est scripta quæ potentius efficaciusque regum majestatem tueatur & inviolabilem esse sanciat, quam naturalis? A naturæ principiis deducta planè illa lex, quæ ut populum ab uno vel pluribus regi docuit ad ipsius qui regitur utilitatem & commodum, ita salutem rectoris cum subjectorum salute conjunctam modis omnibus conservandam præcipit. Præterea cum Lex Sacra, tam veteris quam novi fœderis, reges etiam malos, etiam pessimos, etiam tyrannos, etiam impios tollerandos esse præscribat, ubi de præcepti divini quod ab auctore naturæ datum est, sanctione constat, non alia lex naturalis qua nitamur quærenda est. Naturale est ut parentes colamus, ut patronos, ut dominos, ut his severis etiam & asperis non noceamus. Idem de rege observandum, qui hæc omnia solus est, & tanto etiam magis, quod omnes patres, omnes patronos, omnes dominos sub suo unius patrocinio, clientela, ditione, dominio continet. Nec testis igitur in eum potest dicere,

re,



re, nec accusator quisquam eum deferre, nec iudex condemnare, nec lex ulla est qua teneatur aut qua reus peragi queat. His opponunt nonnulli regem quidem plus quam singulos posse, sed non posse plus quam universos. Quæ absurda sunt & falsa. Si duntaxat plus potest quam singuli, an nec plus quam bini, terni, deni, centeni, milleni, decies milleni? Quid? an non plus quam dimidia pars populi? Quid si alterius dimidiæ pars altera accedat? Quid si in parte quæ minor est optimates reperiantur? An non Rex cum optimatibus junctus plus quam cæteri omnes potestatis habebit, qui alteram partem constituent e plebe indocta & stolidâ opificum aut rusticorum constantem, quæ major tamen numero fuerit? Certè plures numero, sed opibus, virtute & prudentia minores, minus etiam possident, & revera minus possunt, quam minor numerus sapientia, aut nobilitate, aut divitiis præpotentium. Sed quota portio minor censebitur? Utrum tertia vel quarta? Sistamus in quarta. Quid si unum ex ea demas, deinde unum, & mox unitate semper adjecta plures tollas? Quo in numero pedem figemus? Quid si duo vel tres ad summam desint universitatis im-

plen-

plendam? An efficient ne universus dicatur populus, & ne plus quam universi rex posse videatur quia summæ tres vel quatuor defuerint? Major pars semper minorem in suffragiis ferendis vicit. Si ergo rex plus valet quam major pars, *συμπλεϊότερος* dicit Aristoteles cum de hoc loquitur, minor addita nihil momenti adferet quin plus quam utraque possit, cum plus possit quam major. Enimvero si plus quam universi non potest, ergo rex erit tantum singulorum, non omnium universim sumptorum. Ergo legem ferre non valebit quibus universi teneantur, sed quibus tantum singuli. Quid si tertia pars aut quarta vel etiam dimidia per seditionem in unum coacta legi à rege latae, vel ipsi regi recuset parere, an jus coërcendi eam non habebit? Fortasse habiturum concedent quia non est universus populus. Immo etiam fortassean negabunt quia sunt plures singulis, Rex autem non potest nisi plus quam singuli. Quid si universus populus in concione collectus reclamet regiis mandatis & edictis? Hæc quidem vis erit si concitatae multitudini resistere Rex non valeat. Sed si armis militum & vi possit eam disturbare & in ordinem cogere, jure suo uti sic posse quis nega-

negaverit? Certè rex non erit nisi plus valeat quam universi. Nam ut universus populus lege Regia in regem contulit suam omnem potestatem non singuli, nec pars ejus aliqua, ita datam ab omnibus potestatem in omnes potest exercere etiam collective sumptos. Populus cum dominatur in Republica libera, in concione convocatus quam ἐκκλησίαν Græci vocarunt, suffragia ferebat manu extensa, ἀποτονία dicebatur, vel ad magistratus legendos, vel ad leges rogandas, veletiam ad judicia exercenda: ἢ γὰρ ἐκκλησία, inquit Aristoteles in Politicis, κυρία πάντων τῶν τοιούτων ἐστίν. *Concio enim omnium horum domina.* Εὐκκλησίαν paulo post τὸν δῆμον appellat, id est concionem, populi nomine convocatam, quia populus universus in concione congregatus intelligitur. Hoc in Græciæ civitatibus obtinuit. Etiam Romæ concio totum populum designavit quæ ad leges rogandas conveniebat & plebiscita facienda. Ubi translata est hæc omnis ad singulare imperium potestas, quæ multitudinis fuerat, concionis auctoritas evanuit, & quod plurium sive omnium jus erat, unius esse cœpit. Ita ergo unus ille instar concionis, id est totius populi fuit, & plus quam universus

potuit

potuit in concionem coactus. Concio autem idem poterat quod universus populus ; nam omnes vocabantur per præconem & nemo excludebatur. Ut singuli porro non erant talium iudices idonei, ita omnes postquam in unum convenissent ad hoc videbantur apti, ut de rebus & personis commodè judicarent. Idem Aristoteles: ἔστι γὰρ ἕκαστος μὲν χείρων κριτής, ἢ οἰδόντων, ἅπαντες δὲ σωεληθόντες ἢ βελτίους, ἢ & χείρους. Hoc ergo jus est populi in concione judicantis, magistratus legentis, leges ferentis, de bello ac de pace quæ visa sunt statuentis. Ubi hæc omnia in unam potestatem concessere, ipse de concione, id est de populo universo quod vult judicat & leges fert, quæ universos obligant. Nam concio regem potest etiam eligere quem volet, & formam mutare Reipublicæ quæ libera est sed dominum quærit. Ita Pittacon à Mitylenæis electum Alcæus his verbis significabat. Τὸν κακοπαίτριδα Πιτταχὸν πόλεως τῆς ἀχόλῳ ἐβαρυνδαίμεν ὅτι ἐστάσαντο τύραννον μὲν ἐπαυνέοντες ἀολλέες. Populus nempe in concionem adgregatus Pittacum elegit tyrannum suæ civitatis infelicitis. Tunc ille unus à concione lectus habet omnia jura concionis, id est populi totius, & sic plus potest quam

quam concio, id est quam populus universus. Leges etiam sancit quæ ad universos pertinent non solum distributivè sumptos, ut vulgò loquuntur, sed etiam collectivè. Nam edicto prohibere potest ne in concionem conveniant, ne collegia faciant, ut metata militibus præparent omnes, agros universos tributo onerare, capitationes imponere, tirones ad militiam indicere, leges de religione sancire quæ cœtus habendi Ecclesiastici modum & tempus definiant, & alia sexcenta. Nunc discutienda illa quæstio quæ jam contra reges à parricidis Anglicanis ita deceditur, ut dicant penes populum jus majestatis ex origine & naturæ ipsius vi residere. Ideo quoties ipsi placet aut ex usu esse videtur, posse regem quem post mille annorum successionem habuerint, indicta causa tollere quasi gravem & molestum, & sic libertatem recuperare qua per tot sæcula lubenter caruerint. Hoc vero est omnium statuum everfionem inducere, bella intestina ubique terrarum commovere, vexillum ad seditiones & tumultus in omnibus regnis erigere, egenos adversus aliquid habentes suscitare, plebem in optimates accendere, omnia turbis miscere, totum denique orbem Christianum  
cla-

cladibus & calamitatibus implere. Sed an  
verum sit quod ponunt, videndum, quod  
etiamsi verum esset, certum tamen est,  
sicut jam diximus, semel ab illo traditam  
& in unum translatam potestatem postea  
revocari non posse. Caterum nihil esse  
falsius illa propositione, si sic generaliter  
& universim accipiat, jam demonstrabi-  
mus. Ante omnia nos doceant oportet  
quid nomine *populi* intelligi velint. Popu-  
lus quippe generatim sumptus dividitur  
in procures & vulgus, sive quod idem est,  
in optimates & plebem, in opifices & in-  
genuos, in nobiles & obscuros. Sunt &  
mercatores, sunt milites, sunt rustici in  
populo, sunt divites & egeni. Si populus  
in hac significatione quæ omnia genera &  
conditiones hominum comprehendit, ac-  
ciperent, minus fortasse hallucinarentur.  
Sed *populi* notio sicut Romanis usitata  
erat, ordinem tantum plebejorum designat  
ut distinguebatur à Senatu, id est proce-  
ribus, & ab ordine equestri. Nam ita di-  
cebant cum cives omnes Romanos com-  
plecti vellent, S. P. Q. R. id est, *Senatus  
Populusque Romanus*. Qua formula etiam  
Equites sub nomine *populi* comprehendi  
solitos planum est. Sed interdum etiam  
equestrem ordinem à *populi* nomine dif-  
cer-

cernebant ac dicebant, *consensu Senatus & Equestris ordinis populi que Romani*. Et sic sæpe plebis & populi appellationem indiscretam apud optimos Latinitatis autores positam legere est. Hoc significatu Anglię perduelles *Populi* vocem intelligere, cum penes populum summam potestatem & imperii maiestatem originaliter & naturaliter hæreret & morari pertendunt, nemini obscurum esse potest qui scierit, quomodo optimatum confessum abrogaverint, sola relicta plebeiorum domo quæ vocatur vulgo *Communium*. Ita *commune* & *communitas* de plebe Latinis autoribus dicitur ut Græcis τὸ κοινὸν, ut τὸ κοινὸν Κορινθίων *Communitas Corinthiorum*, id est plebs Corinthiorum. In plebe igitur Fanatici illi jus imperii summum esse sicut in fonte suo fundo que & origine contendunt. Quam falso quæ jam dicemus probabunt. Ridiculum primò est penes eos velle esse summi regiminis auctoritatem & maiestatem qui tam regi planè nequeunt, quam regere nesciunt. Quid enim plebe ventosius, vanius, levius, mobilius? Ex spe ac metu que pendula est. Paulo momento huc illuc impellitur. Sæpe vel unus animi fidens & loqui promptus, ducit eos quo vult ac reducit.

Q

cit.



cit. Nihil in eo stabile, nihil solidum, quod semper varium est ac mutabile. Quomodo igitur facultatem vel artem regendi cuiquam dare posset, quod ipsa non habet? Si penes ejus arbitrium esset dare cui vellet imperandi ac in se dominandi potestatem, ut nec judicio nec consilio valeret, mente bruta & cæca sæpius eam indigno committeret, aut certè raro sibi constaret in eo eligendo qui cæteris præstaret. Cum suffragiis plebis in urbibus Galliæ Major urbis creatur, nunquam sine rixis, seditionib<sup>9</sup> & tumultu illæ electiones trās mittuntur. In partes & studia contraria scissum vulgus frequenter saxis & fustibus rem gerit. Romæ ad creandos magistratus cum populi comitia habebantur, quot turbarum causæ subinde in iis exortæ sunt ex dissensione competitorum & studiis fautorum diversis? Quandiu in Ecclesia plebs partem habuit in episcopis & presbyteris legendis, numquam discordiis & factionibus civitates caruere, donec res ipsa & pax Ecclesiarum docuit plebi hoc jus ademptum, magistratibus & clericis primo relinqui debere; quod postea soli sibi clerici vindicarunt. Sed cum plebs Episcopis faciendis suum suffragium dabat, an ex eo quis arguere possit penes ple-

plebem esse originaliter characterem qui Episcopis & Presbyteris imprimi à quibusdam nunc creditur, aut certè Spiritum Sanctum naturaliter possidere quem traderent electo à se præsuli? Per impositionem manuum quæ in consecratione ab Episcopo & presbyteris celebrabatur, conferri ille character vel illud charisma solebat, quo potestatem regendæ Ecclesiæ ordinatus accipiebat, & jus Sacramentorum Christi conficiendorum. Nec ergo plebs quæ regem facit dare illi potest quod non habet, artem nimirum bene imperandi, & potestatem ejus artis ad bonum publicum exercendæ. Sanè & characterem suum sacrum habent reges, & *Vncti Dei* vocantur in Scriptura, etiam infideles. Etiam ungi oleo sacro solent ut pontifices. Hoc illis dare non potest populus quo regii pontificatus eorum majestas & inviolabilis & sancta redditur. Ne quidem id illis tribuere quiverit quo bene regnare possunt, id est scientiam, ut dixi, regnandi. Ponamus liberum aliquem populum de rege eligendo consultare, aliis placere eum qui robustior sit capiendum esse, aliis eum qui prudentior, aliis denique talem qui forma omnes antecellat sumi debere. Nam constat, quibus

busdam gentibus in more fuisse, ut ei qui omnium esset pulcherrimus regnum darent. Sic sanè vel vires præcellentes, vel rerum prudentia major, vel eximium formæ decus regem faceret, non populus ipse qui eligit. Qui propter pulchritudinem excellentem rex electus fuerit, formæ suæ acceptum referret imperium: & ita de aliis. Sed præcipuè dignus est imperio qui bene regendi artem tenet. Is si suffragiis populi ad hoc fastigium evectus sit, quia imperandi industria super omnes polleat, tum sane peritiæ suæ & scientiæ regendi tribuet quod rex factus sit. Si medicum respublica ad valetudinaria civitatis curanda publicè constituat, medendi artem illi non impertit, sed propter scientiam medicinæ quam habet, judicat & declarat dignum qui nosocomio publico præsit. Si populo de Rege sibi constituendo agitante sederit sortito esse eligendum qui rex sit futurus, utrum populo ipsi an sorti regnum debebit, cui sic illud quæsisse contigerit? Sanè sorti potius. Ita hinnitu equi Darius imperium Persicum nactus est, quia ita convenerat inter eos qui de rege faciendo deliberabant. Non fors tamen propriè regem creat sed ille qui sortem regit: nempe Deus. Is pri-

ma

ma causa est & efficiens regum constituendorum. Secunda interdum hominum ministerium, interdum fors. Ita cum de Apostolo in locum proditoris qui defecerat inter discipulos Christi subrogando quaestio esset mota, sorti permiserunt. Ita per sortem in quem ea cecidisset Deum indicaturum quem magis probaret. Si suffragiis plurium hanc electionem commisissent, an non & sic Deus voluntatem suam de electo significasset? Ita quidem, sed magis indirectè. Ipse enim suffragia & sententias hominum dirigit ad id quod vult. Inde est quod non Scriptura tantum sacra, sed omnes auctores tam profani quam sacri, tam poëtae quam oratores, reges à Deo constitutos, & omnes potestates à Deo ordinatas esse unanimi consensu dixerunt. Sic reges à Deo tam boni quam mali, neutri à populo suam potestatem acceperunt sed ab illo à quo sunt constituti & ordinati; mali quidem ad eos puniendos quibus dantur tales ob scelera sua, boni ad felicitatem eorum quibus Deus ita factum cupit. Atque hæc de regibus quos constat à populis qui liberi sunt & nullo adhuc imperio tenentur, eligi. Et proprie quidem illi non potestatem regi dant, quia non habent, sed

ab eodem numine à quo potestas ordinatur, jus etiam potestatis exercendæ derivatur in eum qui sumptus est, ut inter omnes convenit. Tamen si autem hoc liqueret potestatem suam lege Regia populum in eum quem regem legerit transferre; alienatum hoc modo jus imperii revocari à populo non posse, nec ab illo auferri cui semel donatum fuerit, jam ante multis rationibus probavimus. Nunc vero cum sint alii plures modi regum constituendorum, quicunque dari possunt præter illum, quo à populo libero rex eligi solet, nihil populo debent hoc nomine, nec ei potestatem suam acceptam referunt. Primum reges plurimos in terris esse constat qui non fiunt, sed nascuntur. Omnia regna hæreditaria tales habent. Natalibus igitur suis regni majestatem quam adepti sunt imputant, non populo. Qui jus hoc inhærens forti nascendi suæ retinent, & à natura habent. Hæreditas est quam cernunt, & quidem paternæ. Sive autem ex recta linea, ut vocant, sive ex transversa, & ex collateralis propinquitate veniat, tantumdem est. Nec est quod quis ad originem dicat esse recurrendum, quia nulla regni hæreditas non habuit aliquod principium quod ab hære-

hæreditario succedendi jure diversum fuerit. Hæc igitur principia percontemur & examinemus. Aut bello quæsitum est regnum, aut voluntaria deditione acceptum, aut libera electione delatum. Quocunque ex his modis regni status ab initio constitutus fuerit, si lex successionis in ipsis primordiis dicta sit, in totam posteritatem durat ejus qui primus rex factus est. Ubi ea deficit, tum populus libertatem suam denuo recipit, & jus alterius principis eligendi. Successione autem semel instituta & stabilita, omnes descendentes ab illo qui regnum primus alio quocunque modo adeptus est, non jam electioni vel legitimæ acquisitioni, aut etiam usurpationi potestatem debent acceptam ferre, sed naturali beneficio quo hæredes facti sunt & legitimi successores illius qui imperium à principio quocunque quæsit. Hoc si lecum habet in successionem ejus qui natus est illo primo regni fundatore, quanto magis obtineat in illis qui successionem jam firmata, & multa annorum serie, longaue præcedentium linea corroborata id jus sibi vindicant? Nec secus est in patrefamilias qui labore proprio, vel arte, vel mercatura, vel militia magnas opes peperit. Is pro-

priæ quidem industriæ quod dives sit tribuere debet, at liberi quibus hæreditas ejus obvenerit, non ulli suo labori aut studio vel artificio eas imputare possunt, sed paternæ successioni. Qui deinde illi succedent nepotes & abnepotes, dicere jure suo poterunt, se natos esse divites, non factos. Ex illis porro principiis regnorum acquirendorum multa sunt quorum ut à se concessorum vel delatorum titulum populus non habet. Qui armis sibi regnum fecit, & provincias multas suæ ditioni vi subactas adjecit, populum non potest autorem agnoscere prolati imperii vel etiam usurpati. Quos bello victos & domitos poterat perdere, servare maluit, ea conditione ut sibi obsequium fidele præstarent, & in numero subditorum essent. Nullum hodie in Europa, nec in Asia vel Africa regnum nominari potest, quod non ita cœperit & propagatum sit. Imperium Romanum quo totius fere orbis dominatus in unius populi potestatem cesserat, hæc initia habuit quæ nihil populo acceptum ferrent. Non enim populus Romulum regem fecit, sed ipse sibi populum. Asylo constituto cum omnes undique ex vicinis regionibus homines perdit, aut ære alieno obruti



ti confluxissent, ex hac multitudine subditos sibi conciliavit, quibus & urbem condidit. Cum populus esset virorum, uxores illis vi raptas paravit. Solis urbis conditæ pomeriis continebatur illud regnum, sed ita postea dilatatum est, ut totum ferme orbem comprehenderit, plurimum etiam regnorum accessione auctum, quæ Alexandri Magni successores simili usurpatione quæsierant. Cum Persarum ille imperium evertisset, ex illo multas ditiones regali imperio obtinendas duces qui sub eo militaverant, confecere. Ut ergo imperii Persici occasus plurimorum regnorum causa fuit, quæ postea absorpta fuere Romanæ quasi potentiæ voragine, ita & Romani cadentis imperii ruina plura etiam regna de se dedit, barbararum gentium ex septentrione erumpentium inundatione occupata & infessa. Eæ laciniatim vastum corpus imperii discerpserunt, & ex particulis ejus varia regna minora, Principatus, Exarchatus, Ducatus, Comitatus, etiam Respublicas conflaverunt. Ita ergo regnum Hispanicum, Francicum, Britannicum, quæ nunc vigent, orta sunt. Italicum Burgundicum & alia multa, aliquando nomen habuere, quæ nunc nusquam sunt.

Multi alii minuti principatus qui nunc sunt inde originem cepere. Nec in his tamen regnis eadem familiae hodie regnant quæ tunc dominabantur cum Vandali Hispaniam, Gotti Italiam, Burgundi & Franci Galliam, Anglosaxones Britanniam occuparunt. Qui nunc in Gallia regnum tenent alieni sunt à Pharamundi posteris. Hi Galliarum eam partem, quæ Francia ab ipsis denominatur Romanis ereptam invaserunt. Ne quidem pertinent ad Carolidarum prosapiam. Non minus tamen legitimi sunt regni possessores quam si Carlomanidæ hodie imperarent vel Merovingiani. Britannia magna has etiam vices dominantium experta est; non solum in familiis regnatricibus, sed etiam in gentium generibus quæ sub diversis regibus fuere. Angli quippe suos reges habuere, Dani suæ, & postremo suos Normanni, quibus si externus hostis regnum vi ereptum venisset, tralaticium esset & exemplis frequens: sed quod subjecti rege suo legitimo deturbato tyrannidem ipsi arripuerunt, res novi est & perniciosi exempli. Primus Nembrotus armis potentiam suam extendit, & regni Babylonii fuit autor, Ninive condita. Ab eo igitur usur-

pa-

ationes regnis evertendis & adstruendis cucurrerunt, alienis evertendis, suis adstruendis. Antea, ut diximus, solus notus erat regnandi mos per patres familiarum quos πατριάρχους appellabant. Unusquisque enim qui primus esset autor generis, omnes ab uno capite prognatos sub suo imperio continebat. Sic una gens quæ in plures familias erat divisa ab uno communi parente regebatur. Πατρίαν Græci nominabant, quæ ut scripsit olim Dicæarchus vetus & optimus autor rerum Græciæ, ἀπὸ τοῦ πατρὸς οὗτος τε καὶ μάλιστα ἰσχύσονται ἐν τῷ χρόνῳ ἐπὶ πωρὶ μίλιον. Quæ gubernatur ab eo qui in gente est antiquissimus & potentissimus. Is pater erat. Quo autem tempore ad nongentos annos vitam producebant homines necesse fuit amplam gentem natu-  
 torum & nepotum ex uno oriundam propagari quos omnes paterna simul & regia potestate sub se continebat ex se ortos. Hæc maxime naturalis & vetustissima singularis Imperii ratio. Unaquæque quippe familia sub uno patre, quasi rege, instar habet exigui regni. Hanc primam communitatem & societatem naturalem ponit Arist. Πᾶσαι γὰρ οἰκίαι, inquit, βασιλεύει ὑπὸ τοῦ πατρὸς οὗτος τε καὶ μάλιστα. *Omnis domus regio more regitur.*

*tur ab uno qui major natu est omnium. Ubi multitudo natorum nepotumque major esse incepit quam ut una domo posset contineri, dū grandes virgines nuptui dantur & filii uxores ducunt, tum domo paterna egressi, privatas sibi quisque domos constituerunt, quæ plures junctæ κώμῳ, sive vicum & pagum fecerunt. Hæc proprie φρατρία Græcorum est. Inde Aristoteles κώμῳ sive vicum ἀποικίαν τῇ οἰκίᾳ esse dixit, vicī coloniam. Ubi vero unus vicus crescentem & abundantem multitudinem cognatorum & agnatorum tenere non potuit, plures ex eo vici extitere, qui in unam civitatem postea coeūntes tum perfectam dedere κρινωνίαν. Ita Theseus Athenienses cum prius viciatim incoerent, in unam civitatem coactos induxit. Hæc proprie φυλὴν sive tribulium κρινωνία dicebatur. Nam ut definiebat Dicæarchus, φυλὴ καὶ φυλὴν πρῶτον ὠνομάσθησαν ἐκ τῆς εἰς τὰς πόλεις καὶ τὰ καλὴ μὲν ἔθνη συνώδου ἡνομήνης. Tribus & Tribules primo nomen habuerunt ex conventu & cœtu qui in civitates & populos congregabatur. Inde φύλαρχοι Arabum, quia universa illa gens per Tribuum principes regnabatur. Hinc duodecim Tribus populi Israëlitici cum principibus Tribuum. Hinc etiam*

etiam à Mofe Legislatore ipforum vetitum his fuit Dei mandato, ne fi quando regem fibi constituerent, alium acciperent nifi ex numero fratrum. Ea etiam ratio fuit, cur antiquitus omnes civitates à regibus regerentur, ut poftea populi. Aristoteles: Διὸ καὶ τὸ πρῶτον ἐβασιλεύοντο αἱ πόλεις, καὶ νῦν ἐπὶ τὰ ἔθνη. Hæc prima origo regalis regiminis, & ab his principiis repetenda, ut maxime naturalis, ratio & caufa monarchici imperii. Nam fingulæ domus veluti unius regio imperio, ejus nempe qui primus & antiquiffimus effet generis autor, tenebantur. Ad hoc exemplum & colonia, five vicus qui pluribus domibus constabat, quæ ex una familia fluxerant, fimiliter regali potestate gubernabatur. Hinc etiam petendum abfolutæ potestatis in regibus exemplum. Nam patres familias jus vitæ & necis in liberos olim tam apud Græcos quam Romanos habuerunt. Homerus de Cyclopibus,

Θεμισδίδ' ἧ' ἔγκειτο παίδων ἡδ' ἀλόχων.

*Ibi quisque uxoribus unus*

*Iura dat & natis.*

Disperfi illi in montibus & fylvis non vicatim fed domatim vixere, quomodo & plures olim homines vitam egere solitariam

riam cum sua quisque uxore & natis, ferarum more. Hodieque magna pars orbis incogniti, aut nuper detecti tales homines habet. *Σπογάδες* enim sunt & *νομάδες* ut olim plerique. Ab uno aliquo qui prudentia valebat congregatos, & in unum coactos, & legibus positos in eadem communitate & vitam agere persuasos fuisse plane constat. Sic orbis ex inculto & belluino ritu viventibus hominibus referto, paulatim cultior redditus & ad societatem factus aptior, atque ita naturæ suæ convenienter vivere edoctus est, quia homo animal est omnino ad societatem natum. Ex hoc principio & alia regnorum acquisitio nata est, in quibus dandis populus partem sibi non potest vindicare. Nam qui dispersos & vagos antea populos convenire in unius civitatis cœtum docuerunt, quasi Dii ab illis ipsis habiti sunt & culti, qui tanti boni eis auctores fuerant, quod sapientia scilicet & potestate plusquam humana præditi viderentur. Eosdem & reges habuere. Inde primi & antiquissimi reges à subditis suis certatim Dii facti sunt & cælo donati, ex quibus religio gentium tota conflata fuit. In America ante sexcentos annos cum plerique illius orbis homines sibi quisque  
in

in antris & speluncis cum uxoribus & iatis viverent, prodiit inter illos quidam Incas nomine, quem quasi cælo lapsum existimarunt & filium Solis dixerunt, ut uxorem ejus filiam Lunæ. Non enim meus homines congregavit & in unam *ἡνωσαν* compulit, ut quidam opinantur. Immo potius formido est quæ eos dissipavit & solitariam vitam agere adigit, dum sibi quisque à vicino metuit parum noto, tanquam ab aliqua bellua. Et revera sicut antiquis dictum est, *homo homini lupus*. Palantes autem & vagos & ferarum ritu degentes, ad vitam civilem & communem agenda reduxit alicujus eloquio & sapientia juxta potentis blandiloqua & prudens oratio, hoc maximè consilio ut suos faceret, & in congregatos imperium haberet. Nec omisit Aristoteles de hoc genere regni acquirendi monere; cum inter alias differentias regii regiminis & hanc posuit, cui causam dedit hominum antea dispersorum in unum conventum & cœtum compulsio. Quam quartam speciem facit singularis imperii; ἢ *ἀπὸ τῶ σπαραγμῶν, ἢ πορείᾳ χώραν, ἐγγιγνόντες βασιλείαν ἐκόντων καὶ τοῖς ὡφελὰ λαμβάνουσι πατέριοι*. Vel quod dispersos congregassent, aut agrum iis attribuisent, facta sunt regna in-  
volens.



volentes, & hereditaria hac regna evasere accipientibus. Ad tempora heroica refert hoc genus status regalis, cujus & speciem alteram tradit, Ἀλλὰ τὸ ποιεῖται χάριτον. Ubi aliquis potens & dives agros assignasset multitudini, ex eo suam fecit, & sic volentibus imperitavit. Aliam etiam causam ibi adfert qua ejusmodi regna instituta sunt, Ἀλλὰ τὸ τὰς πρώτας γνώμης ἔπληθους οὐεργέταις καὶ τέχνας ἢ πόλεμον. Quod primi ejusmodi reges bene de populo meruerint artibus tradendis, aut bello gerendo. Ob ista ergo benefacta regnum in populum acceperunt & semet ipsos hoc pacto reges fecerunt, non à populo facti aut electi sunt. Hædrum regum officium fuisse scribit exercitum ducere, sacris præesse quæ non sacerdotalis essent muneris, & jura reddere. Prætermisit Aristoteles & aliam Monarchici imperii originem causamque quæ populum non habet autorem nec datorem. Cum civitas aliqua multitudine nimia civium laborabat, redundantia inde examina exhibant & in exteras regiones transvolabant, duce aliquo ex popularibus potentiore & audaciore qui colligebat volentes & se lubenter sequuturos in hac migratione. Ubi locum accepissent in peregrina regione ad civitatem

ratem condendam vel indigenarum voluntate, vel invitis & bello coactis, tum se reges eorum constituebant quibus se duces migrationis & itineris præbuerant. Ita sunt facti reges Vandalorum in Hispania, Gothorum in Italia, Francorum in Galliis & Burgundionum, Anglorum & Saxonum in Britannia. Quidam & finibus suis excedentes quia bello vastati essent, novas quærebant sedes, cum profugis qui se voluissent sequi. Sic Æneas ex Trojæ incendio & captivitate collectam multitudinem quæ evaserat navibus in Italiam portavit. Rex eorum ibi fuit & novum regnum ducta in uxorem regis Latini filia condidit. Omnium horum regnorum sive monarchiarum quas recensuimus nulla fuit quæ populi auctoritati accepta sit ferenda. Falsum igitur quod ajunt, omnis singularis imperii jus & potestatem penes populum tanquam fundum & fontem suum residere. Et satis est si vel uno exemplo ostenderimus non semper esse verum quod prætendunt, nullam esse regnandi facultatem quæ non à populo obtineri debeat. Quid vero dicent quando constat tot imperiū monarchici generis posse memorari quæ populum autorem non agnoscunt? Omnia certè hæreditaria  
regna

regna qualia fuere omnia in Asia olim & Oriente toto, & nunc sunt ferme in Europa universa, paucis exceptis, non populi beneficio tenentur, sed successionis merito. Unde πατερίς & πατερικὰs appellat Philosophus ejusmodi Monarchias, & κτ νόμον, id est paternas & legitimas, quia lege successionis deferuntur, non à populi voluntate & arbitrio pendent. Quamvis Tyrannicæ sint & despoticæ nihilominus & πατερικὰs esse & κτ νόμον affirmat. Quia servilia sunt ingenia plerarumque Barbararum & Asianarum gentium, ideo talia facile ferebant imperia, nec dominos abnuebant quamvis severos & asperos. Et potestas quidem sic imperantium erat tyrannicæ similis quia summa, ut esse solet tyrannorum qui vi regnum occuparunt & vi retinent, sed quia in volentes & lubenter parentes exercebatur, ideo & legitima videbatur, & hæreditate tanquam patrimonium aliud devolvebatur à patribus in natos & natorum natos. Τυραννικὴ γὰρ μὲν ἔν ἐπὶ τὸ τοῦτον εἶναι, ἀσφαλὲς δὲ διὰ τὸ πατερικὸν καὶ κτ νόμον εἶναι. Tyrannica quidem sunt propter hanc causam, quia nimirum potestate utuntur qualem Tyranni usurpant, sed tuta ac secunda quia paterna sunt & legitima. Ergo omnis Monarchia, vel

ob hoc ipsum quod est hæreditaria & legitima successione. defertur, debet esse tuta & secuta dominantibus, quamvis tyrannicæ propior sit. Hæc enim differentia tyranni veri & legitimi Regis quod ille vi rapiat imperium & per vim raptopotiat, hic involentes dominatur & regnum tuctur benevolentia subditorum. Ideo Tyranni proprium est ut ex mercenario milite custodes corporis habeat, cum legitimi Reges ex civibus propriis eos adsciscant. Aristoteles legitima imperia *πατρια* vocat & *πατρις* eoque nomine distinguit ab his quæ vocat *αιρετα* quia non sunt *πατρις*. Nec consideravit initia in *πατρις* sive hæreditariis regnis. Nam quamvis primò *αιρετα* sive *electiva* ut barbari loquuntur, fuerunt pleraque tamen ex titulo usurpationis vel alterius talis acquisitionis originem duxere, quæ aliam causam habeat, in ipso nempe qui acquirit positam, non à populi, qui imperium patiocogitur, voluntate pendentem. Enimvero & Asiaticæ illæ nationes & barbaræ quas Philosophus ad servitutem magis natus esse notavit quam Europæas, reges potius passæ sunt quam fecerunt. Omnis igitur in his imperiis causa regni extra populum est, non in ipso, totaque in eo  
qui.

qui accipit non extra ipsum. Nam ob ingenium servituti paratum primi occupantis factæ sunt illæ nationes, & imperare in se cupientes non respuerunt. Aliud est cum voluntate plebis imperium accipitur, id est ea permittente, aliud cum ejusdem decreto datur & ipsa deferente. Servilia ingenia sinunt & patiuntur sibi jugum imperii imponi. Eorum igitur voluntate fit quod agitur. At gentes magis liberæ, hoc ipso suæ libertatis signum dant, dum cui volunt, regnum in se tribuunt & dominos eligunt. Scribit Æmilius Probus de Miltiade, *Nam Cherronesi omnes illos quos habitarat annos, perpetuam obtinuerat dominationem tyrannusque fuerat appellatus sed justus. Non erat enim vi consequutus, sed suorum voluntate, eamque potestatem bonitate retinuerat.* Non appellatus fuisset tyrannus sed rex si imperium illi decreto suo detulissent Cherronesenses. Volentibus illis & patientibus id usurpavit, ideo tyrannus dictus est sed justus. Ita *τιτῆνες καὶ νόμοι* Aristoteles appellat reges Orientis, id est legitimos & justos tyrannos, quia non vi sed voluntate populorum imperium obtinuerant. Etiam per vim occupatum longi temporis successione legitimam usurpatoribus pos-

possessionem solet conciliare. Regna itaque omnia apud eos fuere *πατρικὰ* & hæreditaria, quia qui regnum manu facit, aut volentibus id populis obtinet, sibi & posteris illud acquirit. *Πατρικὸς* autem sive *πατρὶς βασιλείας* ideo appellat Aristoteles ejusmodi regna hæreditaria quia de patribus in natos transeunt, eaque à patre semper habet filius ut & *patrimonium*, quod etiam à patre eadem de causa dictum est, cum sit propriè *πατρικὸν κτῆμα*. Virgilius *patrium regnum* eodem sensu appellat,

*Et patrio insontes Harpyias pellere regno.*

Quasi major injuria sit patrio & hæreditario regno expelli, quam eo quod suffragio populi delatum est. Talia enim ad hæredem non veniunt. Alibi idem poëta *paterna*, & *avita regna* ea nuncupat. Hujus tamen generis regnorum etiam dux species fuerunt, ut & *ἡ πατρικῶν*, quæ tyrannicæ non dissimilem potestatem habent, & quæ remissiore. Prioris generis scribit Philosophus veterum Græcorum *Αἰσυρινήτας* fuisse. Eorum dominatus non differebat ab Asiatica & Barbarica dominatione, nisi hoc uno quod non esset *πατρικὴ* & hæreditaria. Quo ostenditur etiam in imperio quod populi arbitrio datum est,

est, summam inesse potestatem nec nisi  
vita finiendam, nec ab ullo judicandam ne  
quidem ab ipsis qui dederunt. Nam pote-  
statem quam habuit propriam populus  
eam in illum transfudit quem sic elegit,  
nullo facto revocandam. Sic nec Consu-  
les nec similes magistratus quibus parre-  
giæ potestas deferebatur, poterant in jus  
vocari nisi abissent magistratu cui geren-  
do certum tempus erat præfinitum. At  
Reges *αἰπετοὶ* æqualem vitæ potestatem  
acceperunt atque ideo non possunt judi-  
cari nisi per maiorem potestatem. Hæc  
cum nulla sit, nec videntur posse ab ul-  
lo in iudicium vocari, nec rei fieri. Si  
consulem ad causam dicendam in iudi-  
cium venire oportuisset prius quam ma-  
gistratu abisset, dictator ad hoc creandus  
fuiſſet, qui diem ei dicere deberet, & causa  
cognita in illum pronuntiare. Certè ne in  
illis quidem regnis quæ *αἰπετὲ* dicebantur  
& populi suffragiis dabantur, qualia pau-  
cissima fuere, locum habuit id quod An-  
glicani asserunt latrones, à populo judi-  
cari posse & damnari reges, quia à populo  
ipsi quasi à sua origine & principali causa  
potestatem quam acceperunt habeant. Sed  
ut initio hujus capitis diximus, explican-  
dum illis est quid nomine *Populi* intelli-  
gant,



gant, sive populus dicatur regem constituere, sive destituere. Nam certè necesse est, ut eadem potestate Rex constituatur & destituatur ab iis qui illam potestatem habere existimantur. Ubi ergo populus divisus est in optimates & plebem, si talis populus de eligendo sibi rege deliberet, utrum solis optimatibus hoc jus dabimus, an soli plebi? Si in altera tantum parte residere debet potestas creandi regis, longe præstat ut pars prior & potior populi eam habeat, in qua viri honestiores, cordatiores & doctiores, genere antiquiores, opibus potentiores sunt, quam in ea quæ vi-  
liores & sordidiores & egentiores continet. Nam si hi soli id jus haberent exclusis proceribus, tum *ὀχλοκρατία* vera esset, quæ ita excessus est *δημοκρατίας*, ut tyrannis excessus habetur legitimæ & regię dominationis. Quippe cum ut tyrannus omnia ad suam utilitatem & proprium commodum refert neglecto publico bono, ita minuta plebs de solis suis commodis cogitat, publicorum secura. In multis sanè regnis soli optimates regis faciendi jus & arbitrium habuere totiusque reipublicæ gubernandæ. Apud Judæos cum populus regem in sacra Scriptura constituere dicitur, de solis populi senioribus id intel-

telligendum, hoc est de Synedrio magno quod septuaginta & uno viris constabat, ætate, experientia, doctrina & prudentia præstantibus. Præterea ratio melior exigit ut qui in populo prudentiores habentur, & autoritate potiores atq; experientia priores, reliquam partem præcedant, & pro ea faciant, eamque, ut vulgo loqui amant, repræsentent, in republica administranda & in magistratibus creandis aut rege etiam constituendo, quam ut viliora & indoctiora capita de plebeculæ luto pro honestioribus spondeant, cum plebs sub clientela, ut plurimum, vivat nobilium, non e contra nobiles & divites clientes sint cerdonum & aliorum opificum. In Gallia olim nostra plebs pene servorum habebatur loco, quæ per se nihil audebat, nulli adhibebatur consilio. Plerique enim, ut scribit Cæsar, aut ære alieno, aut magnitudine tributorum, aut injuria potentiorum pressi sese in servitutem dicabant nobilibus. Nec aliter nunc fit in plerisque Europæ provinciis & regnis, immo & Rebus publicis. Nobiles Veneti quo loco plebem habeant, sciunt qui eas oras lustrant. Diu Romæ penes solos patricios summa potestas fuit, cujus in partem plebs non veniebat. In toto Oriente hodie & plu-

pluribus partibus Septentrionis ea populi pars nullo numero habetur, & servorum loco est. Sueci, Poloni, Dani, Persę, Tartari iisdem moribus utuntur. Nec aliis, ut videtur, usi sunt olim Angli & Saxones qui ex septentrione venientes Angliam occuparunt. Nam sub antiquis regibus Anglo-saxonicis & Danicis, immo & sub prioribus ex Normannici Victoris domo, plebs ad comitia regni nunquam vocari solita est, sed ad Senatum illum, qui nunc Parlamenti nomine nuncupatur, soli Episcopi & proceres convenire regis edicto juebantur, plebeiis exclusis. Sanè sub illorum regibus qui ante Normannorum imperium in ea insula principatum tenuere, Regis, Episcoporum, & Optimatum tantum mentionem fieri legimus ubi de majoribus rebus deliberandum erat, nullam omnino plebis. Hodie in tota Germania nobiles in dignitate & pretio; plebs non magni fit. Apud veteres Germanos, teste Tacito, de minoribus rebus principes consultabant, de majoribus omnes, ita tamen ut ea quoque quorum penes populum arbitrium erat, apud principes pertractarentur. Reges ex nobilitate tantum sumebant. Ergo maximam in eo sumendo partem habuere nobiles, ex quo-

R

rum

rum corpore solo Rex capiebatur. Idem institutum apud plerasq; gentes constantissime olim viguit, nuncque viget, ut ex solis nobilibus rex fiat, ubi eligitur. Si sola plebs ejus faciendi arbitrium haberet, solius plebis is rex esset, non etiam nobilium & procerum qui in ejus electionem non consensissent, aut quorum suffragia non essent requisita. Sic sola plebs Tribunos creabat Romæ, qui Magistratus ad plebem defendendam institutus fuerat contra Optimatum potentiam. Nulla itaque ratione aut jure fieri potest aut concedi ut Rex à plebe sola factus imperium habeat in proceres & principes qui ad eum eligendum admissi non essent. Quid ergo? Si concedamus, quod & dandum est, universi populi, id est nobilium simul & plebis consensum ex æquo concurrentium necessarium haberi ad regem creandum qui universis debeat imperare, non erit pro legitimo habendus is qui ab altera tantum parte constitutus fuerit, præcipuè si mos sit ab utroque ordine eum deligi. Ex eo consequitur penes utrumque ordinem potestatem residere regis faciendi, id est optimatum & plebis. Quid inde sequi putabimus? Quid? nisi ut ad eum destituendum necessaria quoque videatur optimatum & ple-

his

bis consensus ? Ut enim non legitima habetur illius Regis electio qui à nobilibus & plebe unanimiter sumptus non fuerit, ita nec legitima potest haberi ejusdem destitutio, quæ ab altera tantum parte facta sit, altera non consentiente, vel etiam plane & apertè dissentiente. Quid si illa quæ dissenserit, principalior pars fuerit & potentior ? Tanto magis irritum statuendum sit, quod factum est. Nam, ut ante ostensum est, eadem potestas esse debet quæ regem destituit cum ea quæ constituit, & eorumdem, siquidem hoc detur posse semel constitutum destitui. Quod negavimus. Idque magis locum habet in iis regnis quæ ad arbitrium populi ut *αἰσθητὰ* non sunt ita nec *ῥεῖθρα* esse debent, qualia sunt hæreditaria. Non enim ad nutum populi dantur, nec deponuntur, sed ex solo successionis jure sumuntur tanquam aliqua patrimonii hæreditas. Angli isti fanatici quantum à bono jure & æquo distet quod egerunt, hinc discant, qui regem in patrio regno positum, optimatum exclusis suffragiis, quæ potiora in hoc facto videri & esse oportuit, capite damnarunt, & inde quasi legem nulli refingendam sanxerunt, penes plebem solam jus esse plenissimum &

liberum regnandi, reges constituendi & destituendi, judicandi eos & condemnandi. Hoc si ita est, ut volunt, cur eorum qui *Peraquatores* dicuntur, factionem & sectam omnimodo subvertere contendunt, quibus placet dignitatem omnium & opes quasi ad libellam exæquari, & ad plebeitatem deduci quicumque nobiles sunt? Et sanè si nemo esset nisi plebejus penes solam quoque plebem jus esset regis potestatis, quod versatur in eligendis & abdicandis regibus. Nunc quomodo possunt sibi constare dum optimates & proceres, Ducum, Comitum, Marchionum & Baronum nominibus superare volunt, nec tamen eis locum relinquunt quem antea habuerunt? Quasi nusquam fiat, qui tamen sunt, nihil eos posse, nullam partem habere in republica administranda, & nullum discrimen ex dignitate inter eos & plebem fieri volunt. Cur igitur ducem belli nuper Baronis titulo insignierunt? Magis tamen ridiculum est quod etiam gradum doctoris ei attribuerunt, ut & plerisque Tribunis militum quos Artium Magistratos crearunt. Ita jam milites esse nolunt videri qui regnant, sed doctores & sapientes; quasi titulus doctum faciat & pru-

prudentem, qui doctorem facit & magistrum artium. Si propter simulandi, dissimulandi, fallendi mentiendique artes, titulus & gradus magisterii daretur nemo palmam in hoc genere posset ipsis præripere nec de primatu Doctoratus cum his contendere. *Dulce de labris loquuntur, corde vivunt noxio.* Aliud agunt, aliud se simulant agere. Libertatem populi crepant, cui & in speciem tribuunt omnem potestatem quam ipsi totam sibi vindicant. Novam suam Rempublicam venditant, in qua nec sentire quæ velis licet nec quæ sentias loqui. Simulacrum Parlamenti & umbram habent, cum re ipsa penes Consilium militare sit omne imperium quod *Consilii Status* appellatione ab illis donatur. Nam magnam partem ex centurionibus & tribunis compositum est. Iisdemque ferme constabat confessus ille ex luto & sanguine concretus, qui de Rege sumpsit supplicium. Hoc est populo imperium dictis dare, factis negare, & nihil non armis arrogare, & jura pro se non esse facta affirmare. Consilii illius militaris præfides, reges sunt & regnum tenent. Quam Reipublicæ formam, si nunc viveret Aristoteles, *τυραννίδα σπαρτηνικὴν* appellaret,



quæ illa ætate nusquam erat cognita, nec ab illo tempore fuit audita, nisi nunc cum milites & belli duces titulos ambiunt scientiarum, & cum re ipsa tyranni sunt, & quidem omnium qui umquam dominati sunt, sævissimi ferocissimi & crudelissimi nomina affectant quibus feritas mitigari videtur & humanitas ostentatur. Sic cum sint toti ex fraudibus & dolis confuti, vulpinamque pellem leoninæ perite adsutam gerant, magistri & doctores in utroque vere dici possunt, non jure, nam nullum jus noverunt, sed in lupino molossicoque & vulpino ingenio.

---

## C A P V T V I I I.

**D**E Regum jure & Majestate quæ potuimus, quæ debuimus, tam ex sacris quam profanis monumentis deprompta ad hoc exposuimus, ut constaret, jus illud nullum esse, si jus aliud super illud agnoscat, cum in eo præcipue potestas vere regalis consistat ut nullis legibus nullique judicio sit obnoxia. Gentium præterea omnium consensum huic assertioni firmandæ adduximus, cum nulla nunc sit nec fuerit umquam quæ Regis appellatione

tione non intellexerit eam potestatem quæ solo Deo minor est, quæque solum Deum judicem & ultorem criminum ac delictorum suorum habere mereatur. Nunc propius accessuri ad defensionem Caroli Regis Magnæ Britanniae, explicata generali quæstione quæ causam spectat omnium Regum qui sic vere appellantur & imperium isti nomini conveniens nullo reclamante possident, considerabimus utrum hæc causa defendi tantum possit ex jure illó communi regum, an vero aliquid habeat speciale quo sejungi debere videatur ab aliarum potestatum ratione cum quibus nomen habuit commune. Hoc enim volunt illi ductores exercituum, doctoresque iidem artium, Carolum quem supplicio per carnificem affecerunt, non fuisse regem, sed præsidem tantum Parlamenti Anglicani, & primatem populi magistratum; ne scilicet hæc infamia apud posteros factum eorum sequatur, quod Regem suum tam nefario & parricidali scelere capitis damnarint. Ita aliquis qui patrem interemisset ut parricidii crimen ac notam effugeret, negaret eum qui dictus est patrem suum fuisse, se enim adulterio à matre conceptum. Perhendunt iidem parricidæ, regni Anglica-

ni statum mixtum esse ac dilutum populari imperio, non mere regium nec monarchicum. Penes Parlamentum quod vocant, solum majestatis nomen numenque fuisse, non penes Regem. Hæc igitur dispicienda sunt, & ad hanc lineam consistendum nobis, utrum Rex Angliæ, Scotiæ & Hiberniæ non vere fuerit qui semper sic dictus est & ubique agnitus, & qui hæreditate hæc tria regna à patre accepisse omnibus sine controversia visus est semper. Fatendum quidem est, nomen Regis datum vel olim fuisse ejusmodi potestatibus & magistratibus qui plenum & liberum jus non haberent, sed à populi nutu dependens, quique à populo constituti ab eodem etiam destitui poterant, qui postquam magistratu quem cum summo imperio gesserant abiissent, privati rursus existerant. Sic reges etiam appellatos constat Suffetes Carthagenensium qui Judices erant populi, & quorum potestas annua tantum erat, ut Romæ Consulium. Judices quoque Hebræorum, id est Suffetes sive Sophetim, quamvis æqualem vitæ magistratum gererent, non plus potestatis quam illi Phœnicum annui habuerunt, quos tamen etiam reges in Scriptura nuncupatos scimus. Illud etiam certum est,

Reges

Reges Lacedæmoniorum adeo non regiam potestatem habuisse, ut etiam ab Ephoris in vincula conjici possent, cum tamen vulgo Regis appellatione censerentur. E contrario, multos olim & hodie notos principes videre est sub nomine non regio plusquam regale imperium tenuisse, ut de Romanis Imperatoribus constat, & de Duce Moscoviæ, & aliis quibusdam Europæ Ducibus qui libera & nulli obnoxia potestate regiæque simili prorsus imperant, cum tamen Reges non appellentur. Unde possumus recte concludere, istos reges vere esse quamvis non dicantur, illos reges non fuisse quamvis sic dicti fuerint. Ad Regem Britannia Magnæ quod attinet, non quærendum est an Rex appellatus sit, cum nemo id neget, sed illud in quæstione est utrum potestatem tali appellationi consonam habuerit, & an ex illorum regum genere fuerit quales habuit Lacedæmonia, qui in jus vocabantur & causam dicebant coram Ephoris & ab eis vel absolvebantur, vel condemnabantur, prout de eorum innocentia aut reatu illis constitisset. Notat certè Aristoteles in omnibus ferme generibus status fuisse qui βασιλῆς dicerentur, id est reges. Ideo non ponit inter genera status hoc nomen, cum

ex æquo reperiat<sup>ur</sup> & in statu populari & in statu optimate. Omnis enim legitimus magistratus qui cum summo imperio est, si<sup>ve</sup> dux belli à populo creatus ut exercitum ducat, hac appellatione venire potest. Olim quippe plures civitates habuere ad bellum Imperatores qui quoad viverent hoc imperium tenebant, quique reges etiam appellabantur, ut de Carthaginensibus notum est duces quos ad bellum gerendum eligebant, ita vocasse. Nonnulli etiam populi totius Reipublicæ administrationem uni mandabant, quem quasi Reipublicæ principem faciebant, & regem ex lege. *Κύριον τῆς διοικήσεως* vocat Aristoteles lib. III. de Republica cap. XVI. Et talem magistratum apud Epidamnios & Opuntios fuisse ibidem dicit, qui rex quodammodo erat. Idem & *στρατηγὸν ἀββίς*, ducatum belli ad totum vitæ tempus, genus esse dicit *βασιλείας*, id est regni. Verum de istis non quarimus nunc, sed de ea dominatione regali quæ tertium genus facit in his tribus generibus Reipublicarum quas veteres solas cognovere, cum definierunt quot modis respublica constitui posset ut recte regeretur. *Μοναρχίαν βασιλικήν* Philosophus ille appellat, id est dominatum singularem regium.

gium. Hujusmodi singularis imperii plures quasi gradus dari necesse est ab eo qui maxime intensus est & in summo veluti fastigio plenæ potestatis locatus, ad eum qui maximè remissus habetur, & non in plenissimo & liberrimo imperio versatur. Quinque igitur species talis Monarchiæ statuit Philosophus, quarum una in summo cacumine posita est absolutæ potestatis, altera in imo. Inter quæ duo extrema potentia Regalis & Monarchicæ tres aliæ species interpositæ, magis temperatæ videntur, & partim plura jura habent meræ potestatis, partim pauciora, perinde ut ad summam illam propius ascendendo, aut ad infimam descendendo magis accedunt. Ut inter Zonas calore nimio coctam & frigore nimio damnatam quæ mediæ jacent, temperatæ ita sunt ut minus frigida vel calida habeantur prout ad hanc vel illam magis vergunt. Quam in summo ponit ea est quæ ipsi *παμβασιλεία* appellatur, & quæ ab eo definitur in qua *τὴν αὐτῆς βέλησιν πάντα πράττει*. Is ab eo vocatur proprie *βασιλεύς*, id est Rex. *ὡς δὲ τῆ βασιλείας τῆ τὴν αὐτῆς βέλησιν πάντα πράττειν*, ὅ τε λόγος ἐφείηκε νῦν. De eo rege qui omnia suo arbitrio facit nunc sermo nobis institutus est. Alio loco hanc domi-

dominationem regiam, ut singularem, hac definitione explicat, ὅταν ἡ πάντων κύ-  
 ρει εἰς ἓν ὥσπερ ἕνασιν ἔθνη καὶ πόλεις ἐκεί-  
 ηται καὶ καὶ τῶν τετραγώνων καὶ τῶν οἰκονομικῶν.  
*Cum unus super omnes & omnia potesta-  
 tem habet, ut & singula gentes & singula  
 civitates cum dominantur, reipublica sua  
 administrationem habent, ad instar ejus  
 quam paterfamilias in procuratione sua  
 domus gerit. Nam, ut ibidem continuo  
 subjicit; Quemadmodum rei familiaris  
 procurandæ ratio, quæ οἰκονομική vocatur,  
 regnum quoddam domus est, sic regnum,  
 civitatis aut gentis unius aut etiam plu-  
 rium quædam est velut οἰκονομία, id est  
 rei familiaris administrandæ ratio. Hæc  
 vera est dominatio regia, similis patris fa-  
 milia dominationi, quam ut hic in pro-  
 priam domum & rem familiarem habet,  
 ita Rex in civitatem unam aut gentem,  
 aut etiam plures, si plures illi regno sub-  
 ditæ sunt. Hanc quintam speciem statuit  
 regalis dominationis Aristoteles, in qua  
 unus est omnium dominus, qui omnia ex  
 sua libidine agit. Istam igitur quæ omnia  
 potest quæ vult & πανβασίλειαν ea gratia  
 vocitat, opponit Laconicæ dominationi,  
 quæ licet regio nomine censeretur, nihil  
 tamen habuit potestatis regiae præter no-  
 men.*



men. Ideo Aristoteles *στρατηγίαν* eam definit *καὶ ἡγεμονία*, ducatum militum hæreditarium & perpetuum, potius quam regium dominatum. Nam semper ex eodem genere sumebantur isti duces belli, sive reges Lacedæmoniorum. Alio loco, nempe cap. xiv. eadem repetit, hoc regnum Laconicum fuisse meram *στρατηγίαν αὐτοκρατορεα* & *ἡγεμονίαν*, ducatum belli cum summa potestate & perpetuum, id est hæreditarium. Quare igitur Autor vitæ Lyfandri scribit post ejus mortem in domo ejus repertam esse orationem, *in qua suadebat Lacedæmoniis ut regia potestate dissoluta ex omnibus dux eligeretur ad bellum gerendum?* Atqui Aristoteles clare scriptum reliquit eos Lacedæmoniorum reges, duces tantum revera fuisse belli gerendi causa. Certè nihil aliud ea oratione voluit Lyfander quam regiam appellationem & successionem istorum ducum aboleri, & deinceps eos ex omnibus deligi qui quoad viverent, id munus haberent, non vero suis posteris relinquerent, ut tum mos erat Lacedæmone. Nam & Philosophus horum ducatum qui belli causa ad vitæ tempus erant in variis civitatibus instituti, duo genera statuit, unum hæreditarium, alterum suffragio dari solitum, nec ultra

ultra vitæ tempus duraturum. τῶν δὲ στρα-  
 τῶν Ἀὐτῶν βίαι, αἱ μὲν κτ' ἑστὶν, αἱ δ' αἰ-  
 γεταί. *Horum ducatum militarium, quod  
 vita æquales sunt, alii hæreditarii sunt  
 alii suffragio dantur.* Apud Lacones fui  
 hæreditarium hoc munus, quod mutare  
 Lyfander cogitabat. Æmilius Probus in  
 Agefilao: *Mos est à majoribus Lacedæmo-  
 niis traditus, ut duos semper haberent re-  
 ges, nomine magis quam imperio, ex duabu-  
 familiis Proclis & Eurysthenis qui princi-  
 pes ex progenie Herculis Sparta reges fue-  
 runt.* Cur igitur cum duces verius essent  
 quam reges, & regio magis nomine quam  
 imperio regnarent, Aristoteles regnorum  
 veris generibus, quæ ab eo recensentur,  
 illud accenset, qui tamen fatetur calculum  
 rectè ponendo, esse ducatum belli hæredi-  
 tarium & perpetuum? Sciendum est du-  
 bus de causis id ab illo factum. Prima est,  
 quod regio nomine ille ducatus Lacedæ-  
 moniis vulgo diceretur, quod hæreditarius  
 esset, ut regia dignitas tunc erat in pluri-  
 bus regnis, quod non reliquarum civita-  
 tum ducatus habuerunt. Secunda est, quod  
 ille ducatus belli tempore & cum expedi-  
 tio sumpta erat, summum habuit impe-  
 rium, & jus vitæ & necis. Nam ubi extra  
 fines Laconicæ eductus fuerat in hostem  
 exerci-

exercitus, tum plena & libera potestate & plane regia illi belli duces potiebantur, adeo ut quemlibet occidere possent impune. Præterea quæ ad sacra spectabant isti reges procurabant, quod solenne fuit omnibus antiquorum regibus. Unde & concludit Aristoteles illam Laconicam βασιλείαν fuisse οἷον στρατηγίαν πρὸς αὐτοκράτορα καὶ αἰῶνον, *veluti quendam ducatum ad bellum gerendum cum summa potestate & perpetuum*. Subjicit continuo: Κτείνειν γὰρ ἐκύριον, εἰ μὴ κατὰ πρῶτον ἐπὶ τῷ ἀρχαίων ἐν ταῖς πολεμικαῖς ἐξόδοις ἐν ἡρώδους νόμῳ. Non ille potestatem necis habuit nisi, quemadmodum in veteribus belli ducibus obtinuit, bellicæ expeditionis tempore, ut quem morte dignum judicarent, statim occiderent; ἐν ἡρώδους νόμῳ, id est eo jure quod in armis & manu positum est. Exemplum ibidem adfert Agamemnonis qui in concione militū sæpe eorum maledicta & convitia patiebatur, extra concionem jus vitæ ac necis habebat. Is *Rex regum* appellabatur, cum revera esset *Dux ducum*, sed cum potestate regia. Romani quoque belli duces ac proconsules olim, & postea præfides provinciarum, & legati Cæsaris, cum in expeditione erant jus vitæ & necis habebant & sine provocatione judicia in milites exerce-

exercebant, pœnas & præmia quibus vel-  
lent ex merito decernebant. Sic hæ *σπαρ-  
γία* Romanorum non fuere *Δι' ἑβίς*, sed ad  
certum tempus. Regnum illud Laconi-  
cum, cum sui generis esset, & nullum  
in totâ antiquitate simile habuerit neque  
nunc habeat, non potest conferri nec  
comparari cum ullo quod hodie in Europa  
notum sit, quia nullum ad hoc exemplum  
reperiri potest. Nisi si cui placeat huic si-  
mile fuisse regnum Arragoniæ. Celtiberia  
fuit, priusquam in regis Hispaniæ potesta-  
tem cessisset. Is enim privilegia eorum  
abolevit. Quamdiu sub regibus suis stetit  
inter regem & populum iudex erat insti-  
tutus, qui de querelis populi contra regem  
& regis contra populum cognosceret. In  
eo inaugurando nomine populi aliquis di-  
cebat, populum tam bonum esse quam  
rex esset, ut æqualitatem inter utrumque  
testato confirmaret. Sed ille iudex inter  
populum & regem quasi médius arbiter,  
non magis regem capitis condemnare po-  
tuit quam populum ipsum. Ipse rex po-  
pulum ad comitia convocandi jus habuit,  
non populus regem. Sic majorem habuit  
potestatem ille rex quam Laconicus. Non  
vere, ut dixi, hoc regnum fuisse vel illud  
estendit quod duo semper in eo fuere re-  
ges.

ges. At Rex non est nisi unus sit & unic-  
 cus. Non enim parem habere potest,  
 non superiorem in suo regno, siquidem  
 rex vere habeatur. Ubi verò duo sunt,  
 alter alteri parem habet potestatem. Ta-  
 met si autem regibus Lacedæmoniorum  
 quos negat Aristoteles πάντων κυρίως fui-  
 se, id est plenam potestatem in omnibus  
 habuisse, dies dici posset ab Ephoris ac in  
 vincula publica conjici eos liceret legibus  
 quibus utebantur, non tamen morte mul-  
 tari & capitali supplicio affici illos fas fuit.  
 Unum Agidem damnatum & necatum ab  
 Ephoris ex omnibus Regibus quos Lacedæ-  
 mon habuit, tradit Plutarchus in ejus  
 vita. Quod factum omni detestatione  
 execrandum visum esse populo Spartano  
 ibidem narrat. Ne in præliis quidem &  
 certaminibus quæ cum Græcis gesserunt  
 Lacedæmonii, quibus reges eorum quia  
 duces quoque belli erant, interesse o-  
 portuit, temere quenquam ab hostibus  
 interfectum in acie memorat, propter  
 reverentiam regii nominis, ac majestatis.  
 Βασιλεῖ γὰρ, inquit, Λακεδαιμονίων ἔσθ' ὅτι οἱ πο-  
 λέμιοι ῥαδίως ἐν ταῖς μάχαις ἀπαντῶντες ἀεθ-  
 σέφειρον τὰς χεῖρας ἀπὸ ἀπειτῆς ἐποντο δειδότες καὶ  
 σεβόμενοι τὸ ἄξιόν. Neque enim regi Lacedæ-  
 moniorum hostes ipsi in acie occurren-  
 tes,

tes, facile manus inferebant, sed averterebantur, quod timerent & revererentur regiam majestatem. Unum itaque memorabant ex omni memoria ante Philippi ætatem ictu lanceæ transfossam in pugna Leuctrica occubuisse. Hodie ne subditi quidem in Anglia regum suorum capiti sic pepercerunt, ut olim hostes in ipso pugnae ardore regum sibi bellum inferentium & arma contra se tenentium suo lateri fortisan hæsuræ, vitam servare studuerunt, sola permoti regiae dignitatis reverentia. Sed seposito hoc genere regalis regiminis quod solo nomine sine potestate viguit, nihilque omnino commune habuit cum regia dominatione & *μνηαρχικῇ* nisi titulum, sive tempora antiqua respiciamus, sive nostra, de aliis generibus ab Aristotele recensitis videamus quæ vere ad hanc formam & appellationem *μνηαρχίης βασιλικῆς* pertinent. Quatuor omnino genera numerat Monarchici & regii status Stagiritæ ille Sophus, quæ legitima sint & à tyrannico imperio sejuncta. Unum ex his, ut dixi, in summo gradu collocat in quo unus omnium dominus est, & omnia ex libito facit in tota civitate vel populo, eadem ratione qua paterfamilias supremam in domo sua potestatem

testatem habet ad agenda quæ vult omnia  
& quo vult modò. Primum ponit quale  
fuit Heroum temporibus, quod in volen-  
tes imperium sumebatur, sed certis re-  
bus definitum, ἐπὶ πῶν ἁριστῶν. Hi ad  
bellum gerendum, exercitus ducendos,  
jus reddendum & sacra procuranda sum-  
mam habuere potestatem. Tales fuere &  
Judæorum reges, excepto jure circa sa-  
cra, quod solis sacerdotibus compete-  
bat. Sed dicit Aristoteles, illos reges Heroico-  
rum temporum potestatem habuisse cir-  
ca sacra, & sacrificia ὅσα μὴ ἱερατικὰ, quæ  
non erant muneris sacerdotalis. Et cer-  
tum est talem quoque potestatem regi-  
bus Judæorum competisse. Quinimmo  
& aliquando in eo populo reges eosdem  
& Pontifices fuisse. Qui non sacerdotium  
cum regno junctum habuere, ipsos etiam  
sacerdotes ad libitum dejiciebant. In  
aliis, ἐπὶ πῶν ἁριστῶν, quædam ex legis  
præscripto gerere tenebantur. Justitiam  
administabant subditis, eos ut fratres re-  
gere debebant, jus vitæ ac necis habebant  
cum certo temperamento. Et tamèn li-  
cuit his bella sponte suscipere ad fines im-  
perii extendendos. Legem Dei in omni-  
bus observare debebant. Uxores plures  
habere non licuit nec plures equos nisi  
qui



qui necessarij essent. Divitiis amplificandis operam dare etiam illis nefas. Sed si in vetita niterentur, inultum tulere, nec propterea cuiquam actionum rationem reddere debuerent, nec in iudicium citari eo nomine eos fas fuit. Ægyptiorum quoque reges, ut diximus, pluribus legibus obstricti erant, cœnantes, prandentes, cum uxore concumbentes, ambulantes, iudicantes & alia quæcumque agentes. Si tamen has omnes leges violarent vivis impune id fuit, à mortuis pœnas reposcebant ejusmodi ut non laudaretur eorum memoria & legitima ac solenni pompa funeris fraudarentur. Secundam speciem Monarchiæ memorat quam appellat βασιλικὴν, & definit esse ἀρχὴν ἐν νόμῳ διαποικιλὴν καὶ νόμον. *Imperium hereditarium despoticum, id est quale dominorum in servos, & legitimum.* Regendi modo tyrannicum esse ait, sed ideo legitimum quia ex lege successionis manaret & minime indignantibus sed facile ferentibus imponeretur. Custodia autem uti solitos non mercenariorum militum, ut tyrannis in more fuit, sed ex civibus, quam propterea vocat βασιλικὴν φυλακὴν, non τυραννικὴν. Tali generi dominationis assuetos fuisse dicit Asianos populos & Græ-

ciæ & reliquæ Europæ Barbaros. Affyrii, Medi, Persæ, ad hunc modum instituta regna tenuere. Longe tamen magis despoticum hodie est Turcicum. Nam & possessionum omnium dominus alius non est nisi ipse. Ideo mortuo qui ab eo jus possidendi impetravit, si filius & hæres superstes sit, ut possidere possit, hanc veniam iterum petere tenetur ut beneficio principis paternum hæredium habeat. Avorum nostrorum ævo multi privati Toparchæ in Galliis hoc idem jus in subditos suos tenuere, qui tanquam *Adscriptitii* propterea censebantur. *Manus mortuæ coloni* vulgo vocantur. Sunt & hodie reliquæ hujus despotici domini in aliquot locis Galliæ & in Burgundia præcipue. Omnes subditos suos Turcarum Imperator quasi adscriptitios habet, tributarios & colonos, vel plæne servos, vel non plene liberos. Si in minoribus dominiis & privatis & sub regno tales subjecti reperiuntur, non est absolum in majoribus imperiis & tales haberi. Turcicam monarchiam Aristoteles legitimam pronuntiaret quia *πατρις* est, & hæreditaria, eoque differt à tyrannide. Tertio loco numerat inter genera Monarchiæ regalis eam dominationem quam vocatam Græcis

cis scribit *Αἰσχυρήλειαν*, & explicat *αἰσχυρή*  
*τυραννίδα*, nempe dominatum tyrannico  
quantum ad potestatem similem, sed suf-  
fragio mandari solitum, & hoc ipso legi-  
timum. Ex quo prorsus liquet etiam in  
regnis quæ deferuntur per suffragia po-  
puli, summum & non limitatum regnan-  
di jus esse quod daret cum vita ejus qui  
electus est, nullo casu & nulla causa eri-  
piendum nisi morte fatali. In veris quippe  
tyrannis vis illud imperium conservat, si-  
cut vi acquisitum est, sed in legitimis qua-  
les illi sunt quos populi voluntas liberis  
suffragiis delegit, jus ipsum electionis  
salvam eam potestatem custodit usque ad  
finem vitæ. Duo genera tamen facit hu-  
jus electilis, ut ita dicam, tyrannidis Ari-  
stoteles. Unum quod perpetuum & vitæ  
æquale fuisse dicit: quo casu non poterat  
ante mortem ei qui delectus erat auferri.  
Alterum quod ad certum tempus daba-  
tur & ad res certas gerendas. Re confecta  
cujus gratia fuerat institutum, aut tem-  
pore quod præstitutum erat finito, priva-  
tus fiebat qui talem potestatem accepe-  
rat. Certum quoque est in regnis quæ  
populus suffragio suo mandat, quæque  
*αἰσχυρὰ* Philosophus appellat, tales condi-  
tiones imponi posse à populo, quas ser-  
vare

vare teneatur is qui imperium accipit. Et ille quidem si cogi possit ut fidem pactam custodiat, bene est, sed injus eo nomine appellari aut judicio capitali puniri nequaquam potest, præcipuè si ad vitam datum sit imperium. Nam cum non habeat parem in regno rex electus, non potest ab inferiori potestate conveniri. Nulla est autem nisi inferior. Si ad tempus tantum electus sit, ubi tempus venit quo abire debet potestate, jam privatus factus potest ob res male gestas in imperio conveniri & postulari, ut in iis summis magistratibus fieri solet quos populus creat, ubi magistratu decesserunt. Tum enim ratio gestorum ab iis reposcitur. Quarto loco eidem Aristoteli Laconica regum dominatio memoratur de qua jam diximus. Quinto quam œconomica patrisfamilias dispensationi comparat. Præter unam Laconicam regendi rationem, quæ non plene nec plane regiam potestatem habuit, cum solo nomine censeretur, cæteræ quatuor summam & liberam dominationem exercuere, cum jure vitæ & necis, sine quo jure rex non est, cum etiam illi Laconici quando in expeditione bellica extra limites Reipublicæ versabantur, eandem necis potestatem habebant.

haberent, ut omnes olim qui belli geren-  
di causa duces constituebantur, habuisse  
constat. Componamus nunc Regni An-  
glici jura cum uno ex illis quatuor ab Ari-  
stotele recensitis generibus, ut videamus  
an hodie regnum aliquod in Europa &  
inter Christianos tale extet quod sub re-  
gia appellatione re & effectu regalis po-  
testatis careat. Nam si tale est Anglica-  
num, ut rebelles & parricidæ qui regis sui  
sanguine carnificis securim tinxere, co-  
nantur omnibus persuadere, ne scilicet  
videantur regis cervicem defecuisse, mul-  
to etiam minor hujus regis potestas fue-  
rit quam regum Lacedæmoniorum. Illi  
saltem cum bellum gerebant extra fines,  
militiam cum summo imperio admini-  
strabant. Duo illi fuere, ut Monarchia di-  
ci non possit eorum regnum. In Anglia  
unus semper fuit. Ostendant olim ali-  
quod regnum fuisse aut nunc esse quod  
sub unius imperio foret qui regis nomine  
dictus sit, cui non potestas etiam eo no-  
mine digna adjuncta fuerit. Excepto La-  
conico, cujus forma peculiaris fuit & om-  
nino unica, omnia alia plane *μνηστική*  
fuere & cum absoluta potestate, quæ in  
quibusdam tamen magis remissa erat,  
in aliis magis intenta. Ad Laconicum  
etiam

etiam quod attinet, non semper ita fuisse certum est, sed primo æquè τὸ μοναρχικὸν habuit, ut aliæ tunc temporis regiæ dominationes. Postea per Lycurgum facta remissior, participata cum Senatoribus regni regali potestate. Centum demum & triginta annis post Lycurgum sub Theopompo rege Ephoros accepit, qui frenum Monarchiæ iniecerunt, & in eam formam rede gere quam narrat Aristoteles, cum *σπαρτηρία* potius esset quam *μοναρχία*, ducatus ad bellum gerendum, quam regia dominatio. Nunc nulla talis est Monarchia & olim nulla fuit præter unam quam & verè talem esse bini reges pro uno vetabant. Hodierna Christianorum principum regna, ut illa antiquorum, plus aut minus de Monarchia despotica retinent: sed quæ vel minimum hujus habent cum singulare obtinent imperium & planè Monarchicum, hoc jure suo etiam sibi vindicare possunt, ut à nemine judicentur eorum reges, solo Deo minores sint, nullum parem aut superiorem in regno suo agnoscant. Quod de illis præcipue regnis dici debet quæ hæreditaria sunt & patria, & quorum initia ignorantur quæ ex causa producta sint, vel si liqueat, armis & bello quæsitæ esse constet. Non

S                      enim

enim possunt talia acquiri nisi cum summo plenissimæ & liberrimæ potestatis jure. De Anglicano cum sit nunc quæstio videndum quo jure hætenus à regibus illius magnæ Insulæ id possessum fuerit. Hereditarium esse negari non potest cum res ipsa quæ sole clarior est, id testetur. Britanniam quippe semper à Regibus gubernatam fuisse certa est fides, & iis quidem regibus quorum licet interruptiones sæpe passa sit hæc insula & mutationes frequentes ex crebris irruptionibus exterorum hostium, nunquam non sub regno mansit & quidem hæreditario perpetuoque. Nam dominorum mutatio nunquam immutavit statum Reipublicæ qui semper regalis in ea terra fuit & semper hæreditarius. Si ad primam quæ nosci potest recurramus antiquitatem, cum Cæsar in eam insulam venit, reges eam tenebant plures. Strabo lib. iv. scribit de Britannis, *δυναστείας αὐτῶν πλείους* Quibus significat principatus plures in ea insula fuisse, regulorum scilicet. Cassivillanus cum Cæsar eam insulam attentavit inter eos præcipuos fuisse videtur, cujus regni fines à maritimis civitatibus Tamesis flumen dividebat. Ei tunc imperii bellicæ administrandi summam cæteri permiserant.



ant. Pomponius Mela : *Fert Britannia  
 populos, regesque populorum.* Tacitus de  
 Britannis sui temporis ait: *Olim regibus  
 parebant, nunc per principes factionibus &  
 studiis trahuntur.* Cæsar tamen lib. iv.  
 de Bell. Gall. *Principum Britannia me-  
 ninit, qui sunt illi Dynastæ* Straboni me-  
 norati quos regulos constat fuisse, qui sin-  
 guli aliquam ditionem potestate regia ob-  
 tinebant, alii majorem, alii minorem.  
 Ipse Tacitus principes à regibus ita distin-  
 guit & principatum à regno ut Imperato-  
 ris nomine principem intellexerit. Ita  
 enim Hist. lib. i. *à regibus usque ad princi-  
 pes, id est Cæsares.* Sub Nerone Prasuta-  
 gus rex fuit Icenorum in eadem insula, qui  
 Tacito auctore lib. xiv. Annal. moriens  
 Cæsarem hæredem duasque filias scripsit,  
*tali obsequio, ut idem auctor scribit, ra-  
 tus regnum & domum suam procul injuria  
 fore. Quod contra venit, adeo ut regnum  
 per centuriones, domus per servos velut ca-  
 pta vastarentur.* Quæ verba indicant hæ-  
 reditarium illius fuisse regnum, ut & re-  
 liquorum quibus Britannia regnabatur.  
 Idque etiam indicatur verbis Taciti de  
 Bondicea Prasutagi uxore, quæ tunc præ-  
 se ferebat, *non ut tantis majoribus or-  
 tam regnum & opes, verum ut unam è*

*vulgo, libertatem amissam se velle ulcisci.* Idem Tacitus in vita Agricolaë refert paulo ante Vespasianum, *domitas in Britannia gentes, captos reges, & monstratum fatis Vespasianum.* Facit ibidem mentionem Cogiduni regis Britanniaë, cui donatas à Romanis quasdam civitates scribit. Deinde addit: *Is ad nostram usque memoriam fidissimus mansit, vetere ac jam pridem recepta populi Romani consuetudine, ut haberet instrumenta servitutis & regni.* Domitiano imperante Arviragus in Britannia regnabat, ut testatur Juvenalis,

--- *Et de temone Britanno*

*Excidit Arviragus.*

Circa illud tempus penitus à Romanis subacta & in provinciæ formam redacta, Imperatoribus subjecta est. Cum sub illo imperio esset, aliquot etiam mutationes pertulit, pluresque tyranni jugum Romani Imperatoris excutere conati sunt: sub Gallieno Lollianus, Victorinus, Posthumus & Tetricus: sub Aureliano Bonosus & Proculus: sub Diocletiano Carausius: sub inferioribus imperatoribus plurimis populis ad prædam patuit, idemque fatum sensit quod aliæ multæ provinciæ Romani imperii. Sic tandem Romanis  
crepta

erepta per Saxones & Anglos, mox istis per Danos. Iterum à Danis ad Saxones rediit. Postremo Normanni Saxonibus eam abstulere duce Guilielmo Notho, cognomento Conquæstore, qui eam ita subjugavit ut regnum inde sibi fecerit & suis, qui etiam nunc dominantur penè sexcentos per annos. Sive armis eam occupavit & jure belli quæsit, sive legitimæ successionis titulo tenuit & beneficio concessionis à cognato ejus Eduardo Confessore factæ, à quo per adoptionem hæres regni institutus fuerat, ut in ipsius charta scriptum est, certè quocunque modo imperium Britannia cepit, vel hoc vel illo, vel etiam utroque junctim, non potest videri nisi summo jure ac regio illud obtinuisse. Sed armis & vi regnum Angliæ eum sibi comparasse vel cognomentum *Conquæstoris* indicio est, ut alia præteream, quibus se gessit ut victores solent erga populos vi & bello subactos. *Provinciales adeo nutu suo substravit*, verba sunt Guilielmi Malmsburiensis lib. III. *ut sine ulla contradictione primus censum omnium capitum ageret, omnium pradiorum in tota Anglia notitia sua per scriptum adjiceret, omnes liberos homines, cujuscunque essent condi-*

*sionis, sua fidelitati sacramento adigeret. Nonne hæc sunt argumenta victoris plena & integra potestate imperantis in populo jure belli subjugato? Henricus Huntingdoniensis lib. vii. Divisisse eum terram militibus suis dicit; Misit autem, inquit, dehinc Rex potentissimus iusticiarios per unamquamque Scyram, id est provinciam Angliæ & inquirere fecit per iusjurandum quot Hyda, id est jugera uni aratro sufficientia per annum, essent in unaquaque villa, & quot animalia. Fecit etiam inquireri quid unaquaque urbs, castellum, vicus, villa, flumen, palus, sylva redderet per annum. Hæc autem omnia in chartis scripta delata sunt ad Regem & inter Thesauros reposita, usque hodie servantur. Deinde addit continuo de juramento fidelitatis ei ab omnibus hominibus insulæ præstito his verbis, Deinde recipiens omnium terrariorum Angliæ, cujuscunque feudi essent, juramentum etiam fidelitatis recipere non distulit. Super Angliam solus regnaverat, ita quod nec ibi una sola Hyda inerat de qua nesciret cujus esset & quid valeret. Paria scribunt cæteri Angliæ Historici Rogerus Hovedenus, Matthæus Paris & Thomas Walsinghamus. Ex quibus Hovedenus ait, de unaquaque Hyda  
five*

sive jugero terræ per Angliam sex solidos nomine tributi scilicet accepisse. Matthæus autem Paris tradite eum, *com-militonibus suis Normannis qui in bello Hastingsensi patriam subjugaverant, terras Anglorum & possessiones ipsis expulsis manu distribuisse affluentibus & modicum quod illis remaneret sub jugo perpetua possuisse servitutis.* Nunc quæro cum ista sic se habeant, & generis autor regnique conditor talem potestatem sibi manu fecerit, posterisque etiam suis acquisierit an ejus successores quibus hodie jure hæreditario regnum competit, pro Senatus tantum Anglicani principibus habendi sint, & locum duntaxat habere videantur magistratus populi primarii. Et an populus Angliæ instar figuli sit, Reges autem qui Guilielmo hæcenus succedere, quique ex ejus prosapia orti sunt, ceu vasa vilia cense-ri debeant ad libidinem populi qui ea formavit confringenda? Sed insanum esse oportet figulum hunc populum, qui nobilissima quæque & maxime pretiosa vasa à se facta, qualia reges esse videri necesse est, tam facile nulla de causa conterat ac comminuat. Hæc sunt dictata perditorum nebulonum, qui Carolum primum Norman-nica stirpe Guilielmi Conquæstoris, id est

Angliæ domitoris & dominatoris editum, regno & vita spoliarunt tanquam publicū plebis ministrum, filium autem ejus Carolum secundum successionē paternā per tot avos atavosque ab ipso Guilielmo ad se devoluta expulsum cogunt exulare. Ut hærediū paternum transiit ad heredes cum suis causis, ita regna hæreditaria non minorā nec minori cum jure transmitti debent ad successores. Si quis autem prædecessorum Regum factionibus procerum vel seditionibus plebis coactus aliquid de suo jure remiserit, id non potest successor obesse. Quinimmo ipse qui passus est auctoritatem suam imminui, læsæ suæ majestatis reus est, & filius vel propinquus qui in regno ei succedit jure suo potest quod deminutum aut deterius factum culpa priorum regum fuerit, refarcire & recuperare, iterumque id sibi vindicare. Quod ad leges attinet in quibus rogandis aut abrogandis principalis pars regalis potestatis posita est, certum est Guilielmum Normannum familiæ in Anglia regnatricis primum autorem, cum ad imperium venit, partim novas constituiſſe veteribus abolitis, nonnullas etiam antiquitus receptas confirmasse. Quod utrumque fecit eodem potestatis jure. Nam qui vim

red.

reddit veteribus regni legibus quas poterat abolere, idem est ac si novas statueret, quia vigorem legis ab eo de novo accipiunt. Eiusdem quippe potestatis est novas condere, & antiquas renovare, sive ratas facere & validas. Gervasius Tilburienſis perhibet illum, *propositis legibus Anglicanis secundum tripartitam earum distinctionem, hoc est Mercenlaga, Dene-laga, VVeſt-Saxonlaga, quasdam repro-basse, quasdam autem approbantem trans-marinas Neustria leges quæ ad regni pacem tuendam efficacissima videbantur, adjecisse.* In libro de priscis Anglorum legibus adjectæ sunt & Guilielmi Nothi leges, tam quas ipse denuo sancivit, quam quas ab aliis regibus sancitas confirmavit. Inter quas præcipue leges Boni Eduardi plurimas ratas fecit. Enimvero de Guilielmo isto. qui ante sexcentos plus minus annos Angliam subjugavit, quique in eo regno etiam aliquid juris habuit ex cognatione & adoptione Eduardi illius Confessoris qui sine prole obierat, nemini dubium esse potest quin Rex summo cum imperio & potestate illius insulæ fuerit. Nam eodem jure cœpit institui hoc regnum in ejus familia, ut antea fuerat in Danorum & Saxo-



num domo, immo & Imperatorum Romanorum, quandiu Britanniam ut imperii sui partem & provinciã tenuerunt. Omnia certe regna quæ nunc in Europa jure & statu regio niti videntur, non alio modo cœpere, nec aliam originem habuere quã hoc Britannicum. Quid ergo facit, ut rex Britannia hodie debeat haberi pro magistratu tantum regni præcipuo & Senatus principe, qui autem alia regna in Christianitate obtinent, pro veris ac legitimis Regibus plena & libera potestate pol-  
lentibus habeantur? Sanè ex quo Guilielmus regnum sibi illud quæsivit & posteris reliquit hæreditarium, successoribus ejus proximis numquam controversia facta est sui juris & suæ potestatis. Immo in tota successionis serie quæ per sexcentos circiter annos à Guilielmo prædicto usque ad Carolum Martyrem, nuper sacrilega & parricidali conspiratione sectariorum, quibus Independentium nomen est, extinctum, duravit, nemo regio nomine caruit, nemo etiam visus caruisse potestate quæ huic appellationi convenit. Sunt qui dicant ut favere videantur immanicariorum factioni, quæ vult videre se regem verum non sustulisse, sed simulacrum vel umbram regis, Guilielmum

num non tota sua potestate usum esse cum imperium in Anglia arripuit. Quod quam sit falsum & ridiculum, ex his quæ supra attulimus apparet. Cur nulla igitur mutatio vel imminutio juris regii in tam longa regni successione à prima ejus institutione facta est, quæ Regi nomen suum abstulerit & regendi modum mutarit? Primum Reges pleriq; successores hoc nomen præscripserunt suis edictis & constitutionibus cum hoc adjuncto, *Dei gratia*. Quæ duæ voces regiam potestatem non ab alia nisi divina dependentem & ab eadem constitutam designant. In plerisque præterea regni statutis, ut sub Henr. III. & Eduardo primo, *Dominus noster Rex & supremus noster Rex* passim appellatur. Quomodo & infimi imperii temporibus Imperatores suos appellare soliti sunt Romani, *Dominus noster Rex*. In præfatione Statuti Mertonensis facti xx. Ann. Henrici III. habentur hæc verba, *Provisum in curia supremi domini nostri Regis habita Mertoni*. Item in præfatione statuti vocati, *Articuli super Chartas*, tempore Eduardi I. sic expressum est, *Dominus noster Rex ad petitionem suorum Prelatorum, Comitum & Baronum con-*  
gre-

*gregatorum in Parlamento constituit certos articulos. Item in Statuto Escheatorum facto xxix. ann. Eduardi ejusdem ita scriptum est. In Parlamento supremi domini Regis illius concilium convenit & ita præceptum est ab ipsomet. In quibus vides non solum regem Angliæ supremum dominum appellari, sed etiam Parlamentum Regis vocari, & quod in eo constitutum fuerit, ab eo præceptum dici. Quo solo retundi possunt improbæ voces facinorosorum sectariorum clamantium Regem Angliæ non esse regem, sed caput Parlamenti. Ergo si rex est tantum Parlamenti pars non *Parlamentum regis* appellari potuit, qui in eo tantum præsidis vel primi titulo potitur. Quis enim Parlamentum præsidis primi dixerit? Certè Regis est, ut *Concilium Regis* etiam vocatur in eodem statuto. Et cur non Regis, cum ab eo convocetur & quæ in eo sanciuntur Regis leges & Statuta nuncupentur? Sic in Statuti Mertonensis præfatione *Curia Regia* appellatur, quæ postea Parlamenti nomine dicta est: *Provisum in Curia supremi Domini Nostri Regis*. Enimvero rex quatenus est rex, etiam Parlamenti caput habetur. Sed non tantum primus est Parlamenti, cum præ-*

præterea etiam Rex sit. Nam quo tempore Parliamentum non habetur, etiam plenè planeque totum regni statum regio jure gubernat. Cujus administrandi & hæc pars non minima est, ut Parliamentum quando lubet ipsi, congregari jubeat ad deliberandum de rebus gravioris momenti quæ salutem reipublicæ spectant, & ad leges condendas, & alia magna negotia decidenda. Eorum, cum jussu ejus convenere quos convocavit de proceribus & plebe, ipse caput est. At capitis est imperare, non pedum nec manuum. Nam ad capitis arbitrium & nutum pedes eunt, manus agunt, totum corpus movetur, quod sine capite iners & exanimis truncus est. Idem est de Parlamento sine Rege, quia semet ipsum movere, & quoquam venire & coire non potest absque regis, id est capitis sui vocantis, jussione. Sic merito *Parlamentum Regis* & *Curia Regis*, & *Conciliū Regis* vocatū est. Hinc & falsum probatur quod afferunt, majestatem in ipso Parlamento residere non in persona Regis. Ergo, si ita est, Parliamentum semet ipsum convocandi & congregandi jus habet & Regem citandi ad suum conventum. A Parlamento suam potestatem & jus majestatis rex mutuatur, non

non à Rege Parlamentum auctoritatem quam habet. Si hoc est, tum Parlamenti majestas dicenda dictaque est, non Regis. Sed quis Parlamenti Majestatem unquam audivit? Cum populus Romanus dominabatur in Republica libera, majestas populi erat: ubi cuncta in unius potestatem cessere, majestas Imperatorum dici coepit. Ut sciamus cujus partis majestas propria sit, utrum Parlamenti an Regis, videndum est, utrum Parlamentum primum ex domo Normannica regem fecerit, an Rex ipse Parlamentum instituerit. Nam si Parlamento regnum suum debet Guilielmus tum ab eo majestatem acceperit. Sed ne sic quidem majestas erit Parlamenti. A Parlamento in Regem translata, non amplius erit cujus fuerat, & esse incipiet ejus qui eam non habebat. Sed hoc inspiciamus, an Rex Angliæ à Parlamento creatus sit Guilielmus ille cognomento Conquæstor. Sed quid opus? Nonne jam satis notum est ab armis jus suum accepisse, non ab ullo Senatu qui tunc fuerit, aut qui hoc potuerit? Ad originem igitur Parliamentorum qui & Senatus, si recurramus, in genere primum videmus omnia à regibus ipsis fuisse instituta, non ab ipsis reges ullos constitutos,  
sive

sive reges eos cogitemus qui à populo electi sunt, sive illos qui semet ipsos reges manu fecerunt & regnum sibi vi pepere-  
runt. Cum populus aliquem suffragiis suis regem deligit, dum in eum potestatem suam transfert, ut lege Regia Populus Romanus in Augustum eam contulit, inter alia jura hoc etiam dat, ut non solum Magistratum omnium creatio ad ipsum pertineat, sed etiam ut quos sibi velit à consiliis esse, ipse deligat, cum quibus de summis regni rebus deliberare queat. Certè populus non dat Senatum Regi à se electo, non dat consiliarios, sed ipse de populo quos vult accipit, ut eorum opera utatur. Cum enim unus qui ad regimen constitutus est, per se omnia providere & curare non possit, necesse est ut plures sibi sumat adjutores, qui in partem sollicitudinis veniant & eum adjuvent. Quod & Aristoteles vidit lib. III. De Republica his verbis: ἀλλὰ μὲν ὁ δὲ ῥέ-  
διον ἐφορᾶν πολλῶν ἓνα. δεινὸν ἄρα πλείονας εἶναι τὸς ἀπ' αὐτοῦ κατισχυμένους ἀρχοντας. ὥστε πᾶσι Διὰ φέρει τὸ ἓν ἐξ ἀρχῆς αὐτοῦ ἐπ' ἀρχῆν, ἢ τὸν ἓνα καὶ ἰσῆσαι. Iam vero haud inprocu-  
vi est unum multa procurare; plures itaque ab eo qui rebus curandis praesint necesse est constitui. Quare quid interest hoc sta-  
tutum.

*tim ab initio esse, aut unum hoc modo plures gerendis rebus proponere.* Certè nihil interest utrum hoc an alio modo fiat, statim ab initio sint qui Regi adesse queant an ab ipso tales constituentur. Sed magis usitatum est ut ipse postquam electus est, eligat vicissim per quos in administranda republica juvari possit. Ita Romulus Senatum ipse sibi legit ex centum senioribus populi viris. Galba postquam Imperator consalutatus est à legionibus, è primoribus prudentia atque etate præstantibus, velut instar Senatus, ad quos de majore re quoties opus esset referret, instituit. Adeo nimirum hoc naturale est ut cum unus omnia non possit prospicere, de quibusdam videat sumendis quorum consilio & opera utatur ad res gerendas. Si tales reperiat jam constitutos, ut Romani Imperatores Senatum, tum ei jus est, ut ex Lege regia liquet, eum convocare, ad eum referre, convocatum dissolvere, Senatusconsulta per relationem discessionemque facere, ei permittere ut de causis reorum cognoscat. Nam Senatus ipse non minus principi subjectus est quam populus, sive offenderit jam factum, sive ipse fecerit. Romulus fecit, reliqui reges factum offenderunt, ut & Cæsares qui Rempublicam

cam



eam liberam regno mutarunt ac Senatum Populumq; Romanum sibi subjecerunt. Cum Rex Judæis datus est, habuere illi Senatum sive Synedrium ex septuaginta compositum senioribus. Non novi illi reges veteri Senatui subiecti fuere, nec ejus judiciis obnoxii facti sunt. Immo contra Rex supra Synedrium semper fuit, donec tandem Herodes quamvis precarium à Romanis Imperatoribus regnum Judææ obtinuisset, totum illum confesum abrogavit & sustulit. Si Senatus in Anglia fuit quo tempore Guilielmus eam sub jugum misit, tam Senatum quam populum Angliæ subiectum habuisse dici debet, & ab utroque pariter sacramentum fidelitatis exegisse. Si non fuit, vel ab eo primum institutum vel ab aliquo successorum oportet, nisi, ut dixi, ab antiquis Saxonibus & Danis regibus acceperit. Quodcunque horum verum sit non Parlamentum supra Regem, sed Rex supra Parlamentum. Priore, quia cum populo Parlamentum subegit. Posteriore, quia Parlamentum ab ipso Rege constitutum, non Rex à Parlamento. Falsum certè est quod sanctæ Independentiæ cultores asserunt, Parlamentum à populo fuisse institutum. Quod ita veritati contra-

trarium est, ut omnia quæ in regem dixerent bipedes istæ bellæ omnium mortalium mendacissimæ. Nullum omnino unquam regnum fuit sine aliquo consilio seniorum qui Regi adessent in rerum majorum deliberatione capiunda. Persarum reges quamvis absoluta & liberrima potestate regnarent, habuerunt suos iudices sive consiliarios, quos Herodotus *Βασιλῆες δὲ καὶ αἰετῆς* appellat, quos Rex consulabat cum quis nodus vindice dignus occurreret, de quo scire eorum sententiam expetebat. Nam Cambyfes cum vellet in uxorem ducere sororem suam germanam, an liceret id sibi eos rogavit. Cum nullam legem quæ id permetteret, extare dicerent, ad aliam legem confugerunt, qua dixerat regi Persarum licere id quod vellet facere. Non igitur in argumentum trahi potest imperii vel regni potestate populari temperati, quod in eo vel Senatus, vel Parlamenta reperiuntur cum summa autoritate judicandi & leges ferendi. Hanc enim auctoritatem omnem ab ipso rege mutuam acceperunt, ut Luna lucem à Sole fœnerat. Vice versa malè de statu Romanæ reipublicæ cum libera erat, ex Aristocratico & regali genere eam compositam esse contendere voluit

Poly-

Polybius, quod in ea Consules essent potestate regia, & quod Senatores quasi statum optimatum referrent. Cum enim tam consules quam reliqui magistratus à populo crearentur, populus imperium planè habuit non mixtum, sed plenè meracum, nec ulla alia potestate temperatum, quia ipse omnia poterat. Idem est & in regnis quæ Parlamenta habent & Senatum sine provocatione judicantem, aut secundam à Rege auctoritatem obtinentem. Nam cum eam quam habet à Rege totam acceperit, nihil sibi inde adrogare debet quo imminuatur regis potestas. Siquidem sæpe reges de suo jure summo remittunt, atque ut cum bona gratia populi regnent, multa ei largiuntur, quæ repetere possunt ac revocare si populus à Rege per nimiam indulgentiam aut facilitatem concessis abutatur. Solet enim illa bestia, quæ *Populus* vocatur, non raro ex uno semel concessio plura trahere concedenda, quæ & per vim interdum extorquere pergit, si nimis prolixam bonitatem principis sui experiatur. Certum quidem est optimos principes debere non omnia velle quæ possunt, sed si præter æquum indulgentes plebi se præbeant & auctoritatem suam calcandam ei

tradant, vix posse postea quod imminui de jure suo & majestate passi fuerint tam facile recuperare, quam facile eam projecerunt. Ita sæpe ex paterna non moderata clementia filii immodestiam suam & immorigerum animum in tantum exaugent, ut in nervum tandem erumpat, & ad parricidium usque per inveteratam inobedientiam veniant. Neque ergo justo duriora Regum imperia qui Patres patriæ sunt, neque æquo remissiora decet esse, sed imitari debent patrum verorum temperamentum, quos nec nimia lenitas contemptos filiis reddit, nec nimia severitas exosos. Exordia regnorum, præcipue quæ armis occupantur, asperiora esse consuevere, quia recens domiti, fræni adhuc impatientes ac jugum jactantes, pressius sunt tractandi. Ita post Guilielmum Conquæstorem mansit in aliquot Regibus proxime succedentibus purum putum jus *νομαρχικόν*, ut sub Guilielmo secundo, Henrico primo, Stephano, Henrico secundo & Richardo primo. Johannis regno aliquid titubatum est circa plenam potestatem, postulantis Nobilibus antiqua jura & privilegia sibi restitui, in quibus libertatem suam sitam dicebant. In paucis articulis ea consistebant quæ nihil

hil supremæ auctoritati derogabant. Hæc enim semper & sub omnibus inviolata duravit usque ad hæc tempora, quibus demum violata est à perjuris & perduellibus subditis. Sub regibus ante Guilielmum nulla *Parlamenti* mentio extat. Rex cum optimatibus de rebus ad publicum bonum pertinentibus deliberabat. Notavit Guilielmus Prinnius in Historica collectione de antiquis Parliamentis Angliæ à regno Æsuvini & Kentuini circa annum Domini 10 c lxxiii usque ad Johannem, anno nimirum Christi c10 cc xvi. id est per annos quingentos quadraginta tres, regium Senatum, quod Parlamentum postea dictum est, compositum tantum fuisse ex Rege, Principibus, Episcopis, Ducibus, Comitibus, Nobilibus Baronibus, quæ infimo ævo *Domus parium* appellata est, absque ulla domo inferiori qualis *Communium* nunc vocatur, quæ constat ex equitibus provincialibus & civibus urbium à populo deputatis. Sed quod ait de Ducibus Comitibus & Baronibus ne eorum quidem appellatio cognita fuit sub prioribus regibus qui ante Gulielmum in Anglia regnarunt, & satis longulo tempore post Gulielmum eorum nomen non auditum est. Ipse Gulielmus, postquam  
regnum

regnum adeptus est cum leges condere  
vellet quæ ad statum firmandum face-  
rent, dicitur *cum principibus suis consti-  
tuisse post conquestionem Anglia*. Sub an-  
tiquioribus Guilielmo regibus ex Saxoni-  
co & Danico genere nulla uspiam extat  
mentio Ducum vel Comitum, vel Baro-  
num. *Sapientum Concilium* vocatur sub  
Ethelredo rege. Is dicitur in legibus Sa-  
xonicis *habuisse sapientum Concilium  
promovenda pacis causa VVodstoci Mercia*.  
Is regnare cœpit anno DCCCC LXXIX. Ca-  
nutus quoque rex Anglorum & Dano-  
rum, *Concilium Sapientum* vocat in legi-  
bus suis. Senatus vocatur in legibus Ed-  
gari quas dicit se sanxisse, *frequenti sena-  
tu ad Dei gloriam, regia majestatis orna-  
mentum, ac reipublicæ utilitatem*. Hic  
Senatus Parlamentum fuit tunc regis, cu-  
jus senatores à consiliis regi videntur fuis-  
se ordinarii, iidemque optimates ac præ-  
fecti regni. Nam olim semper Senatus  
regum compositus erat ex primariæ no-  
bilitatis viris, ut etiam apud Romanos, &  
in aliis imperiis. Saxonice dicuntur Eal-  
dormani, id est *Aldermanni*, quod ab æ-  
tate factum est vocabulum, quasi *seniores*.  
Qua voce etiam *proceres & domini* in Eu-  
ropæis linguis quæ à Romana fluxere,  
signi-

significantur. In legibus Ætelfsthani regis circa annum Christi 10 cccc xxiv. fit mentio Episcoporum, Senatorum & præpositorum regis. Senatores vocantur in Saxonico *Aldermanni*, præpositi sive præfecti *Graphiones*. Aldermanni pro comitibus sunt in singulis comitatibus, Graphiones pro vicecomitibus. Notant quippe Aldermannum proprie fuisse comitem provinciæ, Graphionem vero vicecomitem. In singulis enim provinciis sive comitatibus duas præcipuas fuisse dignitates, *Aldermanni* & *Graphionis*, quasi comitis & vicecomitis. Ideo in Legibus Anglosaxonum Regum post Episcopos nominantur Aldermanni, & post Aldermannos Graphiones. Quamvis nomen Graphionis etiam de Comite usurparint. Utrique ad conventum de rebus maximis agendum à regibus vocabantur, & præter hos si qui erant in populo doctrinæ fama & legum jurisque prudentia spectabiles. Qui *Sapientes* nominantur in iisdem legibus. Qua voce doctos & scientia celebres viros istæ linguæ è septentrione designant. In legibus Inæ Regis circa annum 10 ccxx. isti sapientes juncti reperiuntur cum Aldermannis, id est Senatoribus, in conventu à rege convocato, his verbis;



verbis: *Suasus & instituto Cendredipatris  
 mei, Hedda & Erkenvaldi Episcoporum  
 meorum, omnium Senatorum meorum, &  
 natu majorum sapientum populi mei.* Ubi  
 notandum *Episcopos suos* à rege vocari, &  
*senatores suos*, quia à rege creantur, non  
 autem de sapientibus populi idem dicere.  
 Quia qui tales sunt, rex non eos facit.  
 Mentio est & in legibus Aluredi regis,  
 qui regnare cœpit anno DCCC LXX *Sena-*  
*toris regii. Si quis cum senatore regio in*  
*frequenti plebis concione dimicarit.* Nulli  
 ergo tum regis Senatores præter nobiles  
 & optimates qui à rege de corpore nobi-  
 lium sumebantur, quique senatum ejus,  
 quod postea fuit parlamentum, compo-  
 nebant. Cum quibus etiam aliquando  
 convocare solebat majores natu è populo  
 scientia legum ac doctrina spectandos. Ut  
 autem in aliquot legibus cum his senato-  
 ribus sapientes è populo evocantur, ita  
 legibus Æthelstani optimates & sapien-  
 tes. *Decreta ac laque hæc sunt omnia in*  
*celebri Grantaleone consilio, cui VVulhel-*  
*mus interfuit Archiepiscopus & cum eo*  
*optimates ac sapientes ab Æthelstano evo-*  
*cati frequentissimi.* Post Gulielmi tem-  
 pora isti optimates sive Senatores in va-  
 rios dignitatum titulos discreti sunt, du-  
 cum

eum nominibus, comitum, vicecomitum & Baronum, quos omnes dignitatum titulos concedebat Rex, eodem ferme modo quo Imperatores Romani consularia & prætoria ornamenta, & post Constantinus varios comitivæ gradus, quibus comites fiebant primi secundi & tertii ordinis. Parlamenti igitur sub regibus qui ante Gulielmum in Anglia imperarunt nullum reperitur vestigium. Errant qui sub Edgaro rege volunt Parlamentum bis in anno convocari solitum, idque esse manifestum ex legibus ejus in quibus legitur Titulo de Comitibus, oppidana ter in anno haberi, celeberrimum autem ex omni Satrapia conventum bis singulis annis agi. Sed illo capite non agitur de Comitibus, vel conventu regni generali qui à rege vocabatur, sed de cujuslibet provinciæ, sive comitatus, sive satrapiaæ conventu, quem bis in anno tunc coire mos erat. Quod sequitur, id clare ostendit, cum jubet ejusmodi conventui Episcopum illius dioceseos & senatorem interesse, hoc est Aldermanum, sive comitem, sive judicem sæcularem, quorum alter jura divina, alter humana exercere debuit. *Comitatus Curia* vulgo vocabatur hujusmodi conventus, *Countie court*. Qui duorum erat generum.

T

rum.

rum. Unus nomine generis proprie vocatus est, qui singulis mensibus agebatur à vicecomite, aut ejus deputato, alter bis quotannis in festo Paschatis, & Divi Michaëlis. Hic dicebatur Anglice *The Turne*, quod in orbem & per vices in singulis centuriis, sive centenis in quas comitatus dividebatur, convenire soleret. Sed Centuriarum, *Hundreda* vocabant vernacule, Curiis abolitis, à temporibus Eduardi tertii in principali civitate comitatus agebantur. Senatus autem regni convocandi non statum fuit tempus, sed cum ejusmodi negotia emergerent ad quæ tractanda Rex judicabat Optimates & Satrapiarum præfectos convocandos ut ex eorum consilio quid agendum super his foret, statuere posset. In his generalibus regni conventibus hi soli regis edicto adesse consueverant. Plebis deputati neque sub anterioribus Gulielmo regibus, neque etiam sub primis aliquot ejus successoribus, unquam ad ea comitia vocati fuere. Soli, ut dixi, proceres ad ea evocabantur mandato regis, interdum & sapientes aliqui ex plebe, id est juris & legum patriarum periti. Post Guilielmum diu altum silentium Parliamentorum fuit. Reges qui ei succedere, quando visum erat, & quos volebant ex  
pro-

proceribus evocabant ad consultandum de magnis negotiis more superioribus regibus usitato. Confessus ad hunc modum convocatus, vocabatur *Regis Curia*. Hoc nominis habuit sub Henrico tertio Ioannis filio, qui per vim coactus fuerat relaxare rigorem Monarchiæ qualis à Guilielmo usque ad suam ætatem tenuerat. Sic enim in Prefatione Statuti Mertonensis facti vigesimo anno prædicti Henrici tertii scriptum habetur. *Provisum in Curia supremi nostri Domini Regis habita Mertoni coram Guilielmo Archiepiscopo Cantuariensi & aliis Episcopis & maiore parte Comitum & Baronum Angliæ ibidem congregatorum ob coronationem Regis & ejus Regina, ad quam omnes erant vocati, ubi actum fuit de publico bono Regni.* In hac Curia regis convocatione, Archiepiscopi & Episcoporum, Comitum & Baronum tantum fit mentio, non etiam communis plebium. Vocati hi omnes fuerunt ad solennia coronationis Regum, atque etiam ut obiter de publico bono regni pertractaretur. Ne sub Eduardo quidem primo qui nonus fuit à Guilielmo Nicator ducentos circiter per annos alia ratio convocandi Parlamenti fuit, nec alia forma hujus cognita usque ad Eduar-

dum III. & inferius, quam ut plene ejus congregandi jus à regis voluntate penderet. Si quid esset majoris momenti de quo cum proceribus suis tam Ecclesiasticis quam sæcularibus deliberare vellet *Parlamentum* Regis ac *Curia* vocabatur. Exemplum extat antiquissimum litterarum quæ quidem notæ sint, quibus rex evocabat Episcopos & Optimates ad Senatum, quod postea *Parlamentum*, sub Johanne anno regni ejus sexto, quarum forma ita concepta est ad Episcopum Sarisburiensem missarum: *Mandamus vobis rogantes quatenus omni occasione & dilatione postposita, sicut nos & honorem nostrum diligitis, ad nos apud London die Dominica proximè ante Ascensionem Domini nobiscum tractaturi de magnis & arduis negotiis nostris & communi regni utilitate, quia super his quæ à Rege Francia per nuntios suos nobis mandata sunt, unde per Dei gratiam bonum speramus provenire, vestrum expedit habere consilium, & aliorum Magnatum terra nostra, quos ad diem illum & locum fecimus convocari. Vos etiam ex parte nostra & vestra Abbates & Priores conventuales totius diœcesis citari faciatis ut concilio prædicto intersint, sicut diligunt nos & communem regni nostri*

*Striutilitatem.* In his litteris nulla fit mentio communium, sive plebis deputatorum, quia nondum eo tempore quisquam ex plebejorum ordine ad eos conventus à rege solèbat evocari. Sub Henrico III, ut jam diximus, non aliter se res habuit. Rerum Anglicanarum periti existimant, sub Eduardo III. primum contigisse, ut Communes, ita vocantur, domum per se constituerint separatam. De quo tamen dubitari potest, an tum vocari primum cœpti sint plebei ad illos conventus. Sed quocunque tempore id fuerit institutum, nunquam tamen ad hoc usque tempus judicandi potestas penes hanc domum fuit, sed semper penes solam domum Parium mansit. Paulo post Eduardum III, ut videtur, in domum superiorem optimatum, & inferiorem communium corpus Senatus divisum est. Nulla ne tunc quidem regi necessitas erat imposita alios vocandi, quam quos ei placeret vocari, interim plures, interim pauciores e plebe cum proceribus, sæpe & nullos: quod olim semper fuit, idque pari semper potestate, qualis sub prioribus obtinuerat regibus. Nondum institutæ illæ duæ domus fuerunt, quæ totidem essent Parlamenti partes, id est unius corporis cui Rex tanquam ca-

put præflet, & sine quarum consilio nullas novas leges condere poterat nec veteres abrogare. Sed hæc duarum domuum Parlamenti institutio, superioris è prælatis & optimatibus regni constantis, & inferioris ex plebeiis aut minorum gentium nobilibus, nihil etiam ad supremam Regis potestatem imminuendam aut delendam pertinuit. Nam ut semper liberum fuit anterioribus regibus quos vellent ad Curiam quæ regia dicebatur convocare, sine ulla distinctione superioris aut inferioris ordinis, quem utrumque necessario congregari oporteret ut esset legitimum Parlamentum: ita ab ipsis regibus certum est constitutam fuisse hanc novam Parlamenti formam quæ ex utraque domo composita erat, quasi ex duobus membris quibus Rex tanquam caput imponeretur. Ut autem hic novus Parlamenti status quem ad hoc instar formaverant melius procederet, diversi Reges plura oppida hoc privilegio donarunt ut ad Parlamentum si quando vocarentur Regis mandato suos deputatos possent mittere. Non enim unius regis concessio & beneficium fuit, qui aut quot ex oppidorum civibus vocarentur. Primo indefinitum fuit quot vocandi essent & in

Regis



Regis positum arbitrio. Atque ita diu observatum. Postea singulos constat vocatos è singulis comitatibus, ut apparet ex præfatione Statuti Stapli vigesimo anno Eduardi tertii facti. In eo Statuto Rex *magnum suum concilium* vocat, quod antecessores ejus reges *Curiam suam & Parlamentum suum* nuncuparant. *Eduardus Dei gratia, quoniam matura deliberatione habita cum Episcopis, Ducibus, Comitibus, Baronibus & Magnatibus Comitatum, id est de singulis civitatibus pro toto comitatu vocatis ad magnum nostrum Concilium VVest-monasterium.* Notandum est, in hoc constituto, sub Eduardo. III. facto, nullam etiam fieri mentionem civium sive Burgenfium, ut vocant, è comitatu deputatorum ad Senatum; sed magnatum tantum comitatum, qui è singulis civitatibus pro toto comitatu citabantur. Quidcunque sit, post mutatam Parlamenti formam, nihil imminutum de Regis potestate, quin etiam tum *Concilium suum & Parlamentum suum* vocare potuerit & vocaverit conventum illum qui jussu ejus & mandato congregabatur. Postea statutum fuit; à quo nisi à rege; ut duo equites de singulis provinciis, duo cives de unaqua-

que civitate, & duo municipales de quoque municipio vocati adessent parlamento. De quare & decretum factum est anno septimo R. Henrici IV. Sic semper ad Regis arbitriū spectavit minuere vel augere numerum vocandorum ad suum magnum Concilium, quod nunc Parlamentum dicitur. Quod vel ex hoc argumento maxime clarum est. Regis est de vico municipium facere, de municipio civitatem. Ita constat ex Regis beneficio qui privilegium municipii vel civitatis vico indulserit, numerum augeri domus inferioris. Idem etiam equites facit. Ergo & illos creat qui constituunt corpus ordinis, sive domus inferioris. Nonne etiam ad regis potestatem pertinet, duces, comites & vicecomites creare, atque etiam Barones, & sic corpus superioris domus quod compositum est ex procerum & optimatum variis generibus multiplicare? Cum etiam ex comitatibus sive provinciis deputarentur cives & minores nobiles ad comitia, cui dubium est quin à regum nutu & arbitrio penderet plures in regno comitatus facere, hoc est plures provincias sive præfecturas rectoribus ab ipso constituendis cohitum titulo ac jure regendas? Volunt quidam, primum Alfreðum Anglosaxonem regem,

regem, qui regnare cœpit anno DCCCLXXVIII, regnum Angliæ distribuisse in comitatus. Quod cum verum sit, nescio qui pro certo possim affirmare, non ante comitatus, id est præfecturas comitum institutas fuisse, quam comites feudales & patrimoniales facti sunt. Tales comitatus vix notos putem fuisse ante Guilielmum Normannum. Antea quidem constat, Angliam & Britanniam totam in plures provincias fuisse distinctam, quæ singulæ à rectoribus gubernabantur, sub Romanis quidem nomine *consularium* & *presidum*, tunc enim sex fuerunt, sub Anglosaxonibus vero per *Here-tochios*, *Aldermannos* & *Graphiones*, id est præfectos qui instar Ducum, Comitum & Vicecomitum fuerunt. Ipsas Provincias sive Satrapias vocabant sua lingua *Eole*. Tam *comites* autem provinciarum fuisse certum est, quam civitatum & quam etiam pagorum. Nam sub infimo imperio vocabulum *Comes* de quolibet & cujuslibet rei, regionis, vel officii præfecto usurpatum est. Sic majores comites, iidem fuere cum provinciarum rectoribus & ducibus, minores cum urbium præfectis. Postea quæ præfecturæ erant tantum & præsidatus, benefi-

cio & indulgentia regum in dominium ac possessionem pari titulo ac jure tenendam & heredibus transmittendam iis qui eas regebant concessæ fuere. Quod sub Ottonibus in Germania factum esse convenit, in Gallia sub Carolidis tentatum; postremo sub Hugone Capeto id plenè effectum est. Ad hoc exemplum videtur Guilielmus Normannus cum Angliam subjugavit, & regni jure invasit, talem feudorum formam introduxisse cum expeditionis suæ comitibus terras & agros victorum Anglorum divideret, partem etiam veteribus colonis relinqueret. Ab illo igitur, aut ab aliquo proxime succedentium regum videntur esse Comites feudales instituti, ut & Barones: quorum mentionem tantum reperire est sub Normannis regibus, non sub Anglo-saxonibus. Primi ergo comites non fuisse sine comitatu, id est sine aliquo territorio vel ditione, quam jure ac titulo comitis tenerent. Inde enim *Comitatus* in Anglia nomen accepere. Sed dubitandi causa est an à Guilielmo tales instituti fuerint. Certe de illo omni constare debet, sub anterioribus Guilielmo Anglo-saxonum regibus non fuisse notos Comites, nisi quis velit nominibus *Alderman-*  
*norum*

*norum & Graphionum*, de quibus supra diximus, esse intelligendos. Ut dignitas & officium horum & illorum non disparile fuerit, res tamen cum nomine diversa. Nam illi quidem præfides & rectores provinciarum, aut civitatum fuisse quoad viverent, isti verò hæreditarii & feudales earum possessionum domini quas titulo *comitum* tenebant. Vox ipsa *comitum* Latina à Normannis cum corruptione retenta. Nam *Comitis curtem* sive curiam dixere *Countie court*. Quæ appellationes sub Anglosaxonibus & Danis incognitæ. Ergo & comitatum sic propriè dictorum divisio, aut sub Guilielmo cœpit, aut post etiam Guilielmum. Certe non ante feudorum institutionem cogniti isti comites fuere, ut neque Barones feudales. Cujus nominis generali notione comprehendebantur Duces, Comites, Marchiones, Vicecomites & omnes omnino Vasalli majores qui à rege feuda sub his titulis immediate tenebant. Inde in veteribus litteris Dux Burgundiæ Philippus secundus *Honorabilis Baro* appellatur. *Honorable Bers*. Hinc & sub regibus qui Guilielmo proxime succeſſere, *Baronum* appellatione omnes magnates quos rex suis litteris evocabat ad Parla-

men-

mentum, designari solebant. Atque ut olim sub Saxonibus *Aldermanni* & *Graphiones* noti sunt, id est Optimates qui his nominibus à rege per litteras ad Senatum citabantur, ita sub Normannidis *Barones*, id est omnes magnates, sive vasalli majores & capitales, qui ejusmodi feuda à rege ipso ceu capite dependentia possidebant, qui & ex eo *Parlamentarii Barones* vocabantur. Stricta tamen appellatione inter Comitem feudalem & Baronem sic propriè appellatum, hæc fuit differentia, quod Comites dicebantur, qui terras & redditus possidebant ad æstimationem comitatus, quæ definiebatur viginti feudis unius militis, Galli vocant *Chevalier*, quolibet feudo taxato viginti librarum redditu, hoc est quadringentis libris in totum. Barones autem hi erant qui tredecim feuda & tertiam partem feudi militaris tenebant, cum eadem singulorum feudorum æstimatione. Cum igitur ejusmodi Barones quorum etiam generali appellatione Comites comprehendebantur, hoc juris & privilegii se habere intenderent ut regis litteris vocandi essent ad Parlamentum quoties ejus convocandi necessitas regi ingrueret, ex majorum rerum de quibus esset deliberandum occasione, inde



ob autoritatem quam ex eo sibi arrogabant, sæpius contra reges suos cornua extollebant, crebraque propterea bella & discidia inter regem & Barones regni nascebantur. Quo fiebat non raro ut rex eos Barones in conventu regni congregando præteriret, alios vero qui Barones non erant eorum loco citari curaret. Hoc enim semper regibus licitum & liberum fuit quoscunque vellent ut convenire ad Senatum juberent. Quibus rebus contingebat, ut à rege ad Senatum vocati nomen & dignitatem Baronis acquirerent, eoque titulo in posterum fruerentur. Id magnates sub Johanne qui veri & antiqui Barones erant, gravatim ferentes, bello lassitum eum coëgere pacationem secum facere sigillo magno Angliæ firmatam, ut Archiepiscopos, Abbates, Comites & majores Barones regni peculiaribus litteris evocaret ut Senatui interessent. Hoc vi ab illo extortum, non jure, non diu etiam tenuit. Nam Henricus tertius ejus filius & successor in regno hanc legem cui se pater subdiderat adeo contempsit, ut ex ducentis quinquaginta Baronatibus qui tunc numerabantur in Angliâ, viginti tantum & quinque Barones ad Comititia mandavit venire. Quem morem etiam sequutus est

filius



filius ejus Eduardus primus, multis eorum præteritis quos pater vocaverat, pluribus vocatis qui Baronis dignitate carebant. Atque hæc consuetudo sub omnibus sequentibus regibus ad hæc usque tempora invaluit ut quoscunque regi placitum esset ad concilium regni vocare, pars essent domus dominorum ac procerum, eoque ipso Barones fierent, quamvis non essent. Sic tandem exolevit antiquorum & feudaliū Baronum auctoritas & pro iis duplex gentis Baronum introductum: *Codicillares*, id est quos titulo Baronis rex codicillis donabat, & qui eo quo diximus modo creabantur, evocatione nempe regis ad majorem domum. *Rescriptitios* Barones hos vocant rerum Anglicanarum auctores. Comitum quoque antiquorum & feudaliū abolita est in Anglia dignitas & soli remansere quos Rex Comitum, ut ita dicam, insignibus & titulo per codicillos decoraret. Non alii igitur domum superiorem Parlamenti constituebant quæ sola judicalem potestatem habuit quam qui à rege facti erant Comites vel Barones. Ut inde mendacium impudentissimum Independentium Ducum patefeat, qui in defensione scelerati sui facti quam divulgandam sub nomine *Declarationis* curant,

runt, affirmare non dubitant Parliamentum à populo creari. Quia deligantur scilicet à populo qui Parliamentum componunt. Atqui omnes istæ dignitates vel dignitatum tituli, quibus qui donati sunt in Senatum ingrediendi jus habent, & jurisdictionem summam accipiunt, à rege ipso proficiscuntur quibus vult eas concedente. Nam populi non est Duces, Comites aut Vicecomites facere, & alios denique quicumque aliqua nobilitatis prærogativa potiuntur, hoc privilegio beare. Unde enim populus daret quod non habet? Quomodo nobilitatem concederet ignobilis? In populari statu origo nobilitatis non alia habita est quam quæ ex censu proveniret. Hinc Senatores & Equites in Romana republica qui Equestrem & Senatorium censum haberent. Nunquam sub Republica Consularia aut Prætoria aut Triumphalia ornamenta cuiquam qui non triumphasset, aut qui Consul aut Prætor revera non fuisset, legimus data. At sub Imperatoribus passim id obtinuit, & honorariæ plures dignitates codicillis Imperatorum privatis quos sic ornare vellent, datæ sunt. Idem in Anglia factum. Etiam minores nobiles, hoc est equites vel scutigeri qui inferiorem domum Parlamenti complebant,

bant, à rege fiebant, si qui ab origine tales non erant. Et sic à rege, ut ita dicam, nobilitati, locum inter nobiles illius domus habuerunt. Eant igitur & dicant perfidiosi & scelerati sicarii, Parliamentum à populo constitui, & fieri. Sed quis eos fecit id quod sunt? A quo potestatem & imperium quod nunc possident, acceperunt? Vis, violentia, jus armorum & scelus. Ducem quoque & Marchionem eodem modo rex faciebat ut Comitem & Baronem. Apud nos, de Barone Comitem, de Comite Marchionem, de Marchione Ducem Rex creat, & terras ipsas quas tenent, titulis Baronatum, Comitatum & Ducatum donat. De Eduardo tercio narrant Anglorum Historiæ eum filium suum Eduardum Cornuvallia Ducem creavisse, atque inde plures hereditarios duces ad illud exemplum factos fuisse. Marchionis dignitatem quæ secunda est à ducatu, à Richardo secundo primum donatam fuisse memorant eadem historiæ. Vicecomitis appellationem & dignitatem primum Henricus sextus proceribus quibusdam detulit. Sic omnes majores nobilium dignitates cum à Rege concedi certum sit, non minus id verum est, ut diximus, de minorum gentium nobilitate. Hos om-

nes pro arbitratu suo Rex creat. Ita nemo ferme est ex nobilibus tam superioris quam inferioris ordinis qui utramque domum componunt, quin à rege creari possit, qui & per hoc beneficium jus accipiunt quo pars esse possunt inferioris aut superioris domus Parliamenti. Præterea juris est apud Anglos ex omni temporum memoria indubitati & minime controversi, potestatem penes Regem esse & semper fuisse Parliamentum quoties libet convocandi, & quando vult dissolvendi. Si aliqua lex esset quæ sanciret Regem arbitrio populi creari posse & abdicari, nemo foret quin ex hoc argueret populum supra Regem esse. Nunc cum sit certo certius Regem Magnæ Britanniae arbitratu suo Parliamentum congregare & dimittere, quis non inde adstruat Regem supra Parliamentum esse, & non Parliamentum supra Regem? Quod ita demum esset verum si Parliamentum potestatem haberet semetipsum convocandi, & postea ubi convocatum esset per eum qui tunc consessui præficeret, Regem ad se pro imperio citaret: tunc certè merito dici posset, superius esse rege Parliamentum. Nam semper hoc obtinuit in omnibus Rebus publicis, ut major potestas minorem ad se venire juberet, &

& quæ minor esset majorem coram se conveniri non posset pati. Papam supra concilium esse non ante creditum est quam etiam hoc ejus ab æcclesiis suis arrogatum est ut soli potestas esset concilii convocandi. Quod Imperatoribus olim Romanis & postea Regibus in sua cuique ditione sub primis Christianis tantū licuit. Hoc enim summæ potestatis tam in Ecclesiastico quàm in civili statu argumentum. Ubi Papæ regium, immo majus regio imperium sibi vindicarunt, tum jus illud quoque arripuerunt quod Regum & Imperatorum erat proprium. Ex his quæ supra dicta sunt, luce clarius liquet mendacium esse non ferendum quod in principio sue defensionis paricidæ Anglicani posuere, Parlamentum Angliæ à populo electum & constitutum esse ad boni publici procurationem. Quid fidei habendum est illis impostoribus, qui in re tam clarā tam impudenter & improbe coram toto orbe mentiuntur. Non minoris imposturæ est, quæ dixere regnum Anglorum esse electivum. Reges porro Angliæ Parlamento majus imperium habuisse alio quoque argumento probari potest, eoque invincibili. Regis potestas perpetua est & ordinaria, quæ & per se sine Parlamento regnum administrat & populum

lum sibi subiectum gubernat. Parlamenti  
extraordinaria est autoritas & ad certas  
tantum res constituta, nec sine Rege quic-  
quam validi statuere idonea. Quod sem-  
per est suapte vi nititur, nec ab alio ut sit  
potestatem accipit. Quod non semper est,  
ut aliquando sit ab alterius virtute pendet.  
Nam si à sua penderet semper esset, cum  
subinde res emergant in regni statu expe-  
diendæ quæ potestatem ordinariam & per-  
petuam qua dirigi queant & ordinari, ne-  
cessario requirant. Quæ potestas igitur  
semper manet non mutuatur vim suam  
vel jus suum ab ea quæ interim est, inte-  
rim non est, sed contra. Sol perpetuo lu-  
mine fulgidus non mutuam accipit lucem  
à Luna, sed ille potius huic foenerat id quo  
lucida est, ideoque non semper ea fulgo-  
rem habet. Si Parlamentum alterum re-  
gni caput est, ut fanaticis placet merum  
monstrum de illo regno fabricantibus,  
duo capita habebit quorum alterum sem-  
per vivit, alterum per vices vitam accipit  
& moritur. Nam ubi dissolutum est Par-  
lamentum cessat vivere; cum Regis po-  
testas semper vivat & vigeat. Hoc etiam  
telo confoditur quod ajunt iidem Enthu-  
siastæ & phrenetici, majestatem non esse in  
Regenisi quando ipse est in Parlamento.

Quid

Quid ergo? Utrum dicent, majestatem Parlamento regem, an Parlamentum Regi conferre? Si Rex eam confert propria Regis est. Si Parlamentum Regi illam dat, Parlamento propriè competit. Sed Rêx Parlamentum convocat. Ergo majestatem Parlamenti creat hac ipsa convocatione. Eadem dissoluto & missò à Rege Parlamento rursus evanescit. Ita Rex solus in causa est, ut majestas illa oriatur & extinguatur. Oportet igitur aliquid majus esse in Rege quam ipsa est majestas, cum ejus excitandæ & solvendæ vim habeat. Præterea cum Rex sine Parlamento regnat, qua potestate id facit? Cum summam eam esse constet, an diversum quid est à majestate? An nulla fuit in novem Regibus majestas, qui Guilielmo Normanno succedere, quia tum Parlamentum nullum fuit ex duabus domibus, quasi membris, compositum, ut postea factum est? Mira igitur & planè monstrosa Anglicani regni forma sub posterioribus regibus extitit, quod utique regeretur à majestate, quæ æternis cadit & resurgit. Quo tempore cessat, dormit fortasse an tantum, & postea excitatur velut è somno. Sed Rex est qui illam in soporem dat ubi satis vigilavit, & rursus eam de somno suscitatur cum satis

ipst



ipſi dormiſſe viſa eſt. Sic ſemper Rex dominus erit talis maiestatis, quam ad arbitratum ſuum modo ſenſu omni ac motu privat, modo cum vult ita vegetat ut vitam ſtatim recipiat amiſſam. Sed ſibi non conſtant in ſomniis ſuis miſeri homines, atque dum regiam poteſtatem deſtruunt ut eam populo adſtruant, inter ſe diſſident & ſæpe contraria alii aliis dicunt. Quod bene convenit prodigioſæ eorum ſectæ quæ ſingulis dat plenam libertatem etiam in religione ſentiendi quæ velit & docendi quæ ſentiat. Quidam ex his affirmant, ut jam dictum eſt, Regem adeo populo ſuppoſitum eſſe & infra eum abjectum ut vaſis inſtar ſit, populus quaſi figulus haberi debeat qui conterit vaſa ſua ut libet, fingitque & reſingit ad placitum. Hæc impuri Coci ſententia eſt, juxta quam Parliamentum ſupra regem tanto intervallo debet elatum videri, ut major non ſit intercapedo quàm cælum altius terrâ eſt. Nam ut ſub pedibus figuli eſt vaſ quod frangere deſtinat, ita rex cum vaſ ſit ad populi arbitrium quaſi figuli ſui frangendum nihil habet quod hiſcere contra eum poſſit, haud magis quam vaſ ubi figulus de eo confringendo cogitat. Nonnulli horum modeſtius de rege ſentiunt, & ſaltem de pari cum Parlamento

mento

mento posse ambulare eum existimant & passibus æquis sequi. Ferunt quippe, ut eorum utar loquutionibus barbaris, cum sint mente & animo quam loquela barbariores, non esse Parlamentum Regi *subordinatum*, sed *coordinatum*. Tres quippe esse ordines Parlamenti, nulla re inter se differentes, non jure, non auctoritate, non potestate, Regem nempe, Domum superiorem, & Domum inferiorem. In his tribus ordinibus nullum dari altero altiorrem aut humiliorem: æquales inter se esse. Tali mixtura invicem teneri ut unum esse videantur corpus, personis non distinctum. Portentum hoc sane est quale nunquam pictum vel fictum quisquam vidit nisi ipsi qui finxere in cerebro suo, vel in somniis viderunt cum ægrotantes delirarent. Secundum hæc sanè non jam figuli instar populus habet, Rex vasis, sed tria vasa sunt, vel certè tres figuli, Rex, proceres & plebs. Monstrum sanè triceps & tricorpor, vel unum corpus potius, cujus quot membra sunt, totidem capita videri debeant. Sed ex his tribus capitibus unum semper oculis apertis vigilat & excubat ad regni curam, duo alia modo somno premuntur, modo vigilias agunt, sed quando placitum est alteri capiti semper vigili hæc duo

duo de somno suscitare. Hæc doctrina de tribus regni capitibus, qua cerberum aliquem Stygium canem depingere nobis videntur voluisse, Independētium deliriis adprime convenit, qui ita nullum caput agnoscunt nec in Ecclesia nec in republica, ut totidem capita velint esse quot personæ sunt. Ad se regendum cuilibet latis à Deo & natura datum esse opis & præsidii, sive id curam corporis spectet sive animæ. Non enim de religione aliter sentiunt, cui & multa capita tribuunt & nullum. Magistrum sibi esse posse unumquemque, & doctorem & præceptorem idoneum ut non aliorum opera opus habeat. In republica tamen regenda aliud dicunt, aliud faciunt. Aliter præcipiunt, aliter vivunt. Verbis regem populo subjiciunt, re ipsa populum sibi. Ideo sectam in secta exsurgentem oppresserunt, quæ omnia exæquari vult & omnes. Illi sunt fortasse qui tres ordines regni pares esse contendunt. Quod istis displicuit qui populi figlinam adstruunt & regem vas ad ignominiam factum esse velut opus figuli ebrii jactant. Sed quæ comparatio est figuli cum vase, id est populi cum Rege, eadem est figuli ministri cum domino, qui ejus ministerio utitur ad vasa fingenda. Qui

nunc

nunc regnat in Anglia, quem nuper sex  
albæ equæ currui triumphali junctæ in ex-  
peditionem Hibernicam vexerunt, domi-  
nus est figuli, id est populi, ut figulus est  
vasis, id est, populus regis. Sed ne iste qui-  
dem figulus vas à se formatum frangere  
potest sine consensu domini sui. Si faciat  
plagas accipiet & removebitur à ministe-  
rio. Si jubeat dominus figulo ministro vas  
quod fecit abjicere & solo illidere, tene-  
bitur obedire. Nonne ad hunc modum  
dominus figuli, id est Tyrannus ille qui  
nunc populum Angliæ servitio premit, per  
eum curavit regem folio & vita expellen-  
dum, ut figulo Magister officinæ imperat  
vas quod non probavit pedibus conterere,  
aut ad parietem jactare? Non vident ho-  
mines mente perditæ & capite perdendi,  
quam dant populo quasi figulo potesta-  
tem adversus Regem suum legitimum  
quæ eum perdat quasi si vas esset fictile,  
meliori jure in semetipsos concedi debere  
eidem populo, quia tyranni sunt ac Rei-  
publicæ perturbatores, usurpatores & in-  
vasores. Caveant ergo sibi si populus resi-  
piscere incipiat, & verba in jugulum re-  
ditura parcant fundere contra regiam  
majestatem, cum suis met ipsi pennis ca-  
pi queant, ut qui doctrinam capeffant  
nulli

nulli magis quam sibi perniciosam & exitialem. Quæcunque enim in reges etiam justos & pios ex penu profanæ & impiæ discipline deprompta evomunt, quanto magis in tyrannos populi germanos, quales re ipsa se præstant, retorqueri possunt? Nec minore imperitia quam insania objectant potestatem Regis in Parlamento non esse regalem, sed politicam. Quid istis phreneticis facias qui quod ad Regem jure regio pertinet non esse regale autumant? Quod Rex ex propria potestate facit, an id non est regale? Quid ergo est? Politicum. Væ miseris parricidis, ita usum sensus communis etiam cum mente amiserunt. Quasi gubernatio Regis non sit politica nec ad ullum genus πολιτείας referri possit. Atqui tria esse genera πολιτείας didicisse eos oportuit, nec ullum esse statum reipublicæ bene constitutæ, quin ad unum ex his tribus genus politicum revocari queat. Ut non miscenda miscent isti turbones, ita non separanda distrahunt. Tantopere quippe insaniunt ut personam Regis à potestate ejus sejungant, & politicum in eo corpus aliud faciant à naturali corpore. Quod prodigium est omnibus portentis opinionum quas umquam fanatici induerunt, monstrosius. Inde concludunt,

V

dunt, cum Apostolus *potestatibus non esse resistendum* præcipit, non de persona Regis, sed de ejus corpore politico in quo potestas residet, id esse accipiendum. Bicorpor igitur est rex omnis & aliud corpus habet naturale, aliud politicum. Naturale corpus ejus, hoc est persona sive *personæ* caret omni potestate. Cum occiditur, non plus in ejus cede committenda criminis versatur, quam si homo de media plebe necaretur. At politicum ejus corpus non potest occidi, non vulnerari. In eo hæret potestas illa ipsa cui mōnet Apostolus non esse repugnandum. *Nam qui potestati resistit, Dei ordinationi resistit.* Sed velim scire si potestas à persona quæ potestatem habet, separabilis sit, quomodo ei possit resisti, aut non resisti? Res est imaginaria plane & chimærica, potestas sine subjecto. At persona sine potestate sæpe reperitur ut omnes qui privati sunt & magistratum non gerunt. Sed de his Apostolum non loqui, plusquam manifestum est. Nihil autem facilius est quam illis resistere qui potestatem non habent, quia metuendi non sunt. Solus magistratus hac potestate quæ timetur præditus est, quo eam libere exercere queat sine cujusquam rebellionē & contumacia. Id-

eo Apostolus ei resisti vetat. Potestas hac notione in concreto accipitur pro persona quæ potestatem habet. Qua loquendi forma nihil tritius est Græcis Romanisque scriptoribus. Sic *potestas* apud Juvenalem pro magistratu:

*Malim Fidenis Gabiorumque esse potestas.*

Id est, magistratus. Inde hodieque in plerisque Italiae urbibus *Potestas* dicitur de rectore qui urbi præest. Ita passim Græcis *ἄρχαι* & *κυβερνήταις* & *ἐξουσίαι*, *δυνάμεις*, de Angelis & Dæmonibus, quorum *ἰσχύος* non distinguitur à potestate qua pollent. *Ἀρχὴ* pro Rationali, id est eo qui rationibus privatis Principis præpositus est, legimus apud Strabonem. Sic *conjugium* pro conjuge, *servitium* pro servo. Ita *Majestatem* vulgari usu dicimus de eo in quo majestas est. Sane qui Regem dicit, non intelligit nisi personam quæ cum regia potestate est. Si illa privetur, tum potestas illa ab ejus persona separatur. Ita *magistratum* Romani dixere de persona quæ in magistratu constituta est. Si magistratu abierit, tum persona evadit privata, & potestate caret quam habuerat. Sed quandiu Rex imperium obtinet regium, aut magistratus potestatem sibi à Rege vel populo commissam, corpus politicum & natu-



rale unum est in utroque, nec potest dividi potestas à persona. In crimine læsæ Majestatis cum in Regem committitur, quæro quid majestatis nomine significari velint; Utrum personam tantum an ejus potestatem sive dignitatem? Atqui certum est cum persona regis violatur dicto aut facto, huic crimini quo læsa dicitur majestas, locum esse. Ergo majestas in persona ostenditur & in majestate persona. Et majestas quidem in persona læditur cum regis ipsius persona injuria afficitur aliqua, vel contumelia, vel verberatione, incarceratione, vel etiam morte. Nam qui hæc committunt contra personam regis, crimine Majestatis tenentur. Immo qui mortem regis machinantur non tantum majestatis rei sunt, sed etiam perduellionis. Ad personam quoque Regis pertinet cum bellum ipsi inferitur, aut cum inferentibus quis se socium addit. Sed & cum majori natu ejus filio insidiæ quibus opprimatur struuntur. Quæ omnia in crimen læsæ Majestatis cadunt Acto Parlamenti xxv. anno Eduardi III. Statuas & imagines principis confringere vel conflare, etiam quodammodo regis personam spectant, & qui hæc admiserint lege Julia Majestatis tenebantur, ut ex Digestis sub eo titulo

notum

notum est. Moneta: falsæ percussio etiam videtur regis personam respicere quadatenus. Unde & vulgo *alapam regi incutere* dicuntur, qui adulterinos nummos cudunt forma regis percussos. In maiestate autem persona lædi existimatur per ea commissæ quæ non directè personam regis tangunt, sed quibus dignitas ejus violatur. Qui Regis injussu bellum gerit, in ejus regno qui delectus habet, aut exercitum comparat præter ejus voluntatem, quamvis non contra ipsum id bellum susceptum sit, maiestatis tamen reus est, leg. vi. D. ad legem Juliam maiestatis. Lædit Regis maiestatem qui aliquid ejus nomine facit quod vetitum ab eo sit, vel etiam quod non jussum sit. Legatus qui falso ferret mandata nomine Regis sui ad extrarium principem aliter quam rex dedisset, hoc crimen incurreret. Qui privatus se pro potestate magistratuque sciens dolo malo gesserit tenetur hac lege. Multa hujus generis memorari possent, quæ nunc lubens omitto. Quæ attulimus, satis evincunt in persona regis maiestatem ejus offendi & in maiestate personam, ac proinde non dissociabili vinculo hæc duo invicem connexa teneri, corpus regis naturale & politicum, personam ejus & potestatem, personam &

majestatem, personam & coronam. Sub Rege Eduardo II. duo Spenceri, ut prodicionem suam tegerent, ex illa divisione corporis politici & corporis naturalis seorsim in una regis persona considerati, has consequentias regibus regnisque perniciosas eliciebant; Quod cum subjectio quæ Regi debetur, corpus ejus politicum magis respicere videatur quam personam, ideo regem si impotenter & injuste agat removeri à subjectis posse, & si lege id fieri nequeat, per vim esse faciendum. Quæ consequentia pessima ex falsa propositione deducta est. Illa autem ideo excogitata & inventa, ut specioso prætextu ad nutum subditorum reges sceptrum & vitam possint deponere. Sed cum regis potestas separari non possit ab ejus persona, si crimen aliquod admittat, non potest puniri ut privatus, quia majestas ab ejus persona inseparabilis est. Sin autem in ejus personam peccetur, non impunitum id esse potest ei qui commiserit, sed reus læsæ majestatis peragitur, quia quicumque personam ejus lædit, etiam majestatem ejus violat. Inde est illud vulgare apud Anglos in eorum legibus, *Regem non posse facere injuriam*. Injuria id omne est quod non jure fit, & quod jure vindicatur in eo qui commisit.

misit. Cum vero regi liceat facere & quidem impune quodlibet, ideo non est injuria quam facit, quia non in eo punitur, sicut in alio plecteretur. Criminibus adulterii, homicidii & aliis capitalibus non tenetur rex, quia legibus solutus est quibus ejusmodi criminum rei conveniuntur. Rex igitur tanquam privatus non potest propter ullum crimen lege postulari, quia non discedit ab eo majestas sua, sive dignitas regalis. Ideo in lege Anglicana dicitur, *regem Dei esse vicarium & non posse ullum malum facere*, ut habet Jenkinus iudex in principatu Walliæ in libro cui titulum fecit, *Lex terra*. In magistratibus qui à Rege, vel à populo cujus dominatio est, creantur, aliter se res habet. Quia enim potestatem suam amittere possunt, vel ea excidere ob criminis causam, idcirco persona eorum distingui potest à potestate. Majestatis quippe rei fieri possunt, quod non cadit in regem qui ipsa Majestas est. Cum igitur qui in Magistratu est, adulterium committit aut homicidium, tanquam civis & privatus, stupri causam dicet & cædis, non tanquam magistratus. Si vero dum magistratus est, aliquid fecerit contra dignitatem potestatis quam gerit, tum majestatis læsæ reus fit. Si contra le-

ges faciat, si judicia vendat, si autoritate publica utatur aliter quam debet, si de capite innocentis pactus sit, tunc tanquam magistratus peccat & lædit majestatem, vel regis qui eum creavit, vel Reipublicæ. In tali itaque homine qui magistratus est, persona distingui potest à potestate, quia interdum peccet tanquam civis, interdum tanquam magistratus qui potestate sua abutitur. Sed in rege hæc divisio personæ & majestatis recipi non potest, quia non potest delinquere tanquam privatus, cum in ordinem redigi non queat privatorum. Non peccat tanquam rex, quia rex non posse peccare intelligitur, quia peccatum ejus pœna non consequitur, quia denique legibus solutus est quæ pœnam delicto statuunt. Potestate autem quam habet nulla ex causa privari potest, quia ipsi inhæret per jus genituræ, per naturam, per Dei legem & regni. Reges enim à Deo constitui, ex verbo Dei supra probavimus. Qui vero hæreditarium regnum tenent, lege successionis illud obtinent, quæ *lex* est *terræ*, ut appellant. Fiduciarium itaque non est regis officium in Anglia, nec delegata quædam potestas, non magistratus publicus primarius, vel populi ministerium, ut hariolantur rebelles fanatici, qui-

quibus hæc ita credi expedit, ne majestatis læsæ divinæ & humanæ, immo perduellionis atrocissimæ omnium & immanissimæ quæ umquam fuit ab ullo commissâ, convicti teneantur. Cum hac absoluta potestate quæ ita regiæ personæ adhæret ut avelli ab ea non possit, an Rex supra Parlamentum sit, frustra quaritur, de quo dubitare nemo nisi qui sit fanaticus potest. Convocat Parlamentum quod jussu ejus convenire tenetur, non ab eo convocatur, nec adesse quamdiu durat cogitur. Præterea sic illud convocare solet ut non tanquam præsidens vel princeps Senatus id facere possit videri, sed tanquam auctoritatem habens & imperandi jubendique potestatem, quæ non nisi supremo rectori convenit. Hæc enim solennia verba sunt Codicillorum regiorum sive Brevis, quo rex *Communia* Regni Anglicani ad Parlamentum suum convenire jubet. Rex N. N. *Salutem. Quia nos de admonitione & assensu consilii nostri, pro quibusdam arduis & urgentibus negotiis, Nos, Statum nostrum, & Defensionem regni nostri Anglicani spectantibus, quoddam Parlamentum nostrum apud B. teneri statuimus, & ibidem cum prelati & proceribus dicti nostri regni Colloquium habere & Tracta-*

tum, tibi præcipimus firmiter injungendo, ut facta proclamatione in proximo comitatu tuo post receptionem ejusdem Brevis, duos milites gladiis cinctos eligi facias ad faciendum, & consentiendum his quæ tunc ibidem de communi nostro Consilio Anglicano, favente Deo, contigerit ordinari super negotiis ante dictis. Ubi vides Regem ita Parlamentum suum appellare, & Regnum suum, ut Consilium suum. Præcipit iis quos convocat, & firmiter injungit ut veniant. Si talibus verbis Parlamentum uteretur, regis ad se evocandi gratia, non dubitarem tunc dicere & credere Parlamentum esse supra regem, & posse statuere pleno jure & tota libertate de quibuscunque rebus vellet, etiam citra regis assensum, sicut hodie yefani Independentes affirmant. Et sane probabili admodum ratione niterentur ad hanc assertionem defendendam. Nunc cum omnia contraria vera sint, jus quod habent, in armis & violentum situm esse confiteantur necesse est. Codicilli Regii per quos Proceres ad Parlamentum à Rege vocantur, iisdem ferme verbis concepti sunt, sed in ipsa formula præcipiendi aliquantum variant, sic enim habent: *Vobis sub fide & homagiis quibus nobis tenemini, firmiter injungenda*

man-



*mandamus ut personaliter, & quæ sequuntur.* In rescriptis ad prædictos Regis Codicillos, *Parlamentum Domini regis* appellatur. Si rex *dominus est supremus Parlamenti*, ut in aliis Actis & Statutis variorum Parliamentorum passim nominatur, non est disquirendum an suppositum sit regi Parlamentum; cum res ipsa id iudicet. Nec ambigendum sane foret subjici regem Parlamento ipso jure debere, si uspiam mentio extaret in vasariis publicis Regni Anglicani, in qua Senatus *Regis dominus* nuncuparetur. Nunc tanta rerum nominumque permutatio viget apud illos Sectarios, ut servus pro domino exeat, dominus pro servo, Tyranni multi pro rege uno imperent, Πολυαρχία cum ἀναρχία sit mixta, Regnum Christi cum regno mundi sit idem, Respublica sine libertate, Religio sine fide, Enthusiasmus sine veritate, Ecclesia sine disciplina. Omnia inversa ac perversa; omnia monstruosa, capite in pedes dejecto, pedibus in caput erectis. Infima summis, dextra lævis, recta pravis, religiosa profanis mutata. Merum denique omnis generis confusionum Chaos. Hic status est regni Anglicani sub dira & immani Independentium tyranni-

## C A P V T IX.

**D**EMONSTRAVIMVS superius, ex conuocatione Parlamenti, ex conuocandi modo, ex iis personis quæ conuocantur quibus eæ dignitates à rege conferuntur, cum earum gratia ingressum habeant ad Comitiam, regem esse supra Parlamentum, quia ejus indicendi potestas penes illum sit, non autem in potestate ipsius Conuentus ut regem ad se euocent. Quis vero nescit eum cui iubendi jus est, maiorem esse illis qui iussa accipere & facere tenentur? In his quippe subiectio, in illo imperium per hoc denotatur. Nunc ex rebus ipsis propter quas ea Comitiam indici solent, & rerum fini quæ in iis tractantur & statuuntur, proclive est ostendere penes quos summa autoritas resideat. Utrum sit in conuocante an in conuocatis, cum tamen vel ex sola horum verborum differentia rei utriusque natura satis sit perspicua, quæ non minus est manifesta quam inter iubentem & iussa capeffentem, inter vocantem & vocatum, inter imperantem & imperio parentem. Primum sciri debet, non esse ordinarium conuentum eum de quo hîc agimus, quod

*Par-*

*Parlamentum* vocatur, nec perpetuum. Ex quo & illud necessario consequi necesse est, non ad omnia quibus administratio regni constat, solere congregari, sed ad majoris tantum momenti negotia, cum illa nimirum incidunt, in quibus regni salus & populi versatur. Ut cum cavendum est ne quid detrimenti Respublica capiat: cum leges aliquæ novæ constituendæ sunt. aut veteres abrogandæ: cum res ad religionem pertinentes procurandæ: cum pecunia ad exercitus conscribendos imperanda est: cum alia ejus generis quæ ad summam rem pertinent: tum regis jus ac munus est conventum ex tribus Regni ordinibus ad ea discutienda convocare. Si quid præterea sit in quo populus de communibus suis privilegiis queratur & ea restitui sibi petat: rex ejus postulatis annuens & satisfacere cupiens, Senatum hunc ex Episcopali ordine, Optimatum & populari jubet convenire, ut res examinentur & componantur ex desiderio populi, si ratione niti videatur. In tribus præcipue capitibus sua privilegia consistere populus hujus Insulæ contendit, ne vœtigalia sibi imponantur nova nisi decreto ipsius Senatus, ne leges novæ nisi in illo conventu sanciantur, & ne aliter  
abro-

abrogentur quam consensu ejusdem Senatus. In iis tamen omnibus consultandis quæ in Senatu proponuntur, neque aliis quibuscunque quorum gratia hic cœtus congregatur, nihil fit nisi Rex assensum suum præbeat, quem exprimere his verbis solet imperiosis, *Rex ita vult*. Si rejiciat proposita, nec quicquam ex his concludi velit, non planè & abscise negat sibi placere ea de quibus deliberatur, sed molliore responso, ea differre & eludere suevit per hæc verba, *Rex videbit*. Potest & statim cœtum dissolvi jubere, si ita ei visum fuerit. Ad summam in omnibus quæ ibi consultantur aut decernuntur, nihil ratum aut validum esse potest, nisi à rege confirmetur. Nec sanè mirum, cum neque ea Comitia coire fas sit, nisi regis mandato. Quippe cum & quos velit ad illa admittendi aut inde abjiciendi jus habeat, & plebei ordinis homines, si eos evocet ut sint Pares superioris domus, eo ipso Baronum titulo & dignitate insigniantur, ut jam supra diximus, eamque posteris suis transmittant. Nunquam etiam controversi juris fuit in illo regno, quin Rex habuerit plenam liberamque potestatem augendi numerum utriusque Do-

mus,

mus, aut etiam minuendi. Præterea si  
lex aliqua adprobantibus & consentienti-  
bus omnibus ordinibus in eo Senatu sanc-  
ta fuisset, ut executioni mandaretur ad so-  
lam potestatem Regis pertinebat, qui &  
legis gratiam poterat facere, & legi con-  
travenientibus vel indignationis suæ me-  
tum denuntiare, vel veniam committi  
dare, eaque diplomate, *Litteræ patentes*  
vulgo vocantur, expedire, citra consen-  
sum ordinum ex quibus Senatus compo-  
nitur. Leges à Senatu ad hunc modum la-  
tæ, ab ipso Rege censebantur rogatæ, quia  
domus utraque caruit potestate condendæ  
ullius legis nisi regis accedente assensu,  
nec ulla definitio ab ipsis prolata vim & vi-  
gorem legis habuit, antequam ratam Rex  
esse voluisset. Fatendum interim est ne-  
que regem posse in Senatu novas leges  
statuere aut veteres abolere, nisi consen-  
tiente utraque domo. Sed in eo regis po-  
testas superior & plenior apparet, quod in  
rejiciendis de lege nova facienda utrius-  
que domus postularis potest libere pro-  
nuntiare, vocemque in his, ut vulgo lo-  
quuntur, absolutè negativam habet. Quod  
enim ajunt regiæ autoritatis hostes & ty-  
rannidis popularis patroni, Regem per  
vim compelli posse ad perferendas leges,  
fibi

sibi in Senatu ab Ordinibus propositas, id non magis justum ac verum est, quam Regem citari ab ipso Senatu posse, & ad causam capitis dicendam cogi. Si ne Rex quidem cum amplissima illa & summa sua potestate jure potest utramque domum adigere ad legem approbandam, quam ipse latam vellet, an rationis est ut qui Senatus princeps est & caput à cæteris ejus membris potius cogatur, quam ut membra à capite? Nisi quis dixerit subditos non subjici debere regi, sed regem subditis, qui pro rege exinde subjectus evadat. Rectè itaque Nobiles superioris domus qui à rege facti sunt Duces, Comites, Barones, regem à quo sunt creati & cui suas dignitates debent, in verba sua dare jusjurandum subigent, tuti ipsi à tali per regem patiendâ necessitate. Ita minor potestas majorem compellet ad faciendum quod volet, non major minorem. Quod contra jus gentium & legem naturæ esse nemo non dixerit. Judæorum reges plenum habuisse & absolutum jus potestatis, ne ipsi quidem perduellium patroni negant. At qui vel teste Josepho nihil illis licuit quod alicujus esset momenti agere *δὲ καὶ περιεποιεῖσθαι πρὸς τὸν λαόν*, nisi de Synedrii magni senten-

tia. Imperatoribus Romanis, quamvis ea potestate in imperio regendo uterentur, quam omnes norunt, non potuerunt tamen Senatores condemnare aut morte multare sine Senatus consensu & autoritate. Senatusconsulta ipsa vim semper legis habere quamvis facta non essent ad relationem principis, & Senatus ejus vocatu non coactus esset. Jus fecisse Senatusconsulta etiam libera stante Republica Pomponius scriptum reliquit in Tractatu de jure. Alii auctores id disertè negarunt. Ut ut sit, certè mirandum est, hoc jus ferendarum legum quod Senatus Romanus vix habuit florente Republica id sub ipsis Imperatoribus planè habuisse, eorum nempe facilitate & indulgentia. Nam cum populus dominabatur, quod Senatus jussisset & constituisset, pro lege non habebatur nisi à populo probatum foret. Rogatione ad populum facta tum demum quod Senatus decreverat, vim legis accipiebat. At sub Imperatoribus. Senatusconsulta pro legibus valere, idque jus postea Senatui ademit Leo Philosophus. Regnum Galliae non esse optimato statu temperatum, sed mere regia dominatione gubernari, palam est; Edicta tamen Regis tandiù censentur irrita & invalida, donec



nec à summis tribunalibus regni, quæ & ipsa vocantur *Parlamenta*, recepta fuerint & adprobata. Eorum etiam scita, quæ vocantur *Arresta*, legum instar valent. Sed hanc ipsam potestatem legum faciendarum & sine provocatione judicandi à Regibus adepti sunt. Comititia quoque generalia ex tribus regni ordinibus congregata, clero, nobilitate & plebe, plurimum olim potuerunt ad res quæ summam rem Status spectabant decidendas & constituendas. Nunc nulla convocantur. Ipsa quinetiam imperia Orientis olim, quæ *δῆμοι* fuisse tradit Aristoteles, & Senatum habuere, ad quem de magnis rebus referebant, quemque adeo consulebant in negotiis difficilibus & dubiis dignisque vindice. Certis etiam legibus obligabantur, quæ tanquam regni leges censebantur. Josephus de rege Artaxerxe, in Historia Vastæ; *Ἀγαλλῶν τῇ Οὐάσῃ Ἀγὲ τὸν νόμον οὐκ ἔδυνάμην*. Reconciliari Vastæ, quia lex obstabat, non poterat. Cambyfes quamvis regum impotentissimus & *τυραννικώτατος*, tamen cum vellet sororem germanam in uxorem ducere, consuluit regios iudices, id est Senatum regni, an ulla lex esset quæ id permetteret. Nolebat  
nimi-

nimirum quicquam fecisse contra leges videri, & cupiebat esse legem aliquam qua tueri factum posset, id quod facere destinabat. Nemo certe fuit Rex, nec in Oriente olim ubi maxime autocratorica potestate pollentes potentesque erant, nec in Eúropa nunc est, qui in Senatu & conventu generali ex omnibus Ordinibus regni coacto plus solidæ & mere vereq; regalis autoritatis habuerit habeatve quã Rex Angliæ. Id eludere, vel elidere potius, omnibus modis conantur, qui de rebellionem artem facere contendunt. Nihil intentatum reliquerunt quo illam omnibus suis numeris perfectam reddant, adeo ut regem nolint esse regem, sed aliquam potestatem imaginariam & prioribus sæculis inauditam, nostro incognitam, quæ nomen habeat sine re, à populi nutu suspensam, quæque regi potius quam regere debeat. In quo imperitiam sæpe summam cum pari improbitate conjunctam produnt. Nam quæ destruere volunt, adstruunt, & plus regi largiuntur quam ipse sibi possit sumere. Dum omnia argumenta conquirunt quibus regi autoritatem quam in Senatu à se convocato de jure habet adimant, suo semet ipsos telo confodiunt, quo jugulari putant causam.

causæ regię defensores. Ajunt Senatum Anglicanum supremum esse regni tribunal. Regem ubicunque corpore sit, quamlibet à Senatu illo absentem, in eo tamen censerì præsentem vi potestatis. Quod *virtualiter* dicunt tam lingua quam mente barbari homines. Ergo quodcunque in illo Ordinum conventu per absentiam regis agitur, geritur, decernitur à rege ipso actum, gestum, decretumque intelligi. Accipimus quod dant. Non potest id esse quod volunt, nisi concedatur supremam esse regis in illa prima regni Curia potestatem, sed ipsam non alia potiri quam vicaria & delegata à Rege. Sic in aliis Curiis in quibus jus nomine regis redditur, rex quamvis absens, semper præsens habetur, sed virtute ejus potestatis, qua semel à rege accepta, in justitia nomine ejus administranda utuntur, ita ut non opus sit in singulis causarum judiciis ad regis auctoritatem recurrere, & ejus assensum requirere. Adeundem plane modum qui duces exercitus à Rege vel Imperatore deligebantur beligerendi gratia, quamvis eo à quo missi fuerant absente, auspiciis tamen ejus ductuque copias contrahere, in hostem ducere, pugnare, vincere censebantur. Nec minus togata  
militia

militia quam sagata auspiciis principis exercetur qui duces & iudices instituit suos ad utramque administrandam. Hinc & in summis Galliaë tribunalibus, cum rex non adest, regis tamen nomine quasi præsentis, omnia Senatusconsulta concipiuntur, quia adesse semper existimatur, non corpore sed nomine, non re sed potestate. Si idem est in generalibus Angliæ Comitibus & suprema regni Curia, ut præsentia regis non corporalis sed *poteſtati-va*, ut loquuntur, tantum videatur necessaria, ex eo concludetur, non nisi delegatam potestatem & fiduciariam in illo conventu hærerè. Nec potest aliter statui. Cæterum quocunque modo præsentia regis in illis Comitibus ad confirmationem Actorum videbitur requirenda, sive *virtualis*, ut barbare cum barbaris loquar, sive *realis*, sine rege non posse Senatum illum quicquam agere aut statuere quod firmum ratumque sit, plane inde colligi necesse est. Nam si Rex non sit, neutra sua præsentia potest assensum præbere iis quæ in Senatu acta fuerint aut constituta. Sed quia assensus regis, ut firma habeantur quæ gesta sunt, necessario requiritur, hoc argumentum est, non sufficere præsentiam qualis intelligitur in illis Curiis &

Tri-

Tribunalibus quæ justiciam administrant regis vice & nomine. Nam ubi semel ad actus omnes justitiæ celebrandos, aut ad militiæ armatæ functiones perficiendas, Rex alicui vicem suam ac potestatem commisit, tum ad singula actionum momenta non postulatur ejus assensio, ut rata sint quæ fiunt. Ubi vero potestas alicujus corporis vel ordinis quasi pari passu cum regia ambulat, sed cum hac restrictione ut nihil statuere queat quod legis vim habeat rege dissentiente, quia majus illius est imperium, tunc consensio ejus vel præsentis exigitur, vel si absens sit, rescripto sub magno sigillo dari debet, quæ æquè valet ac si constituendo & firmando decreto adesset. Adeò verò præsentia regis in Parlamento primis saltem diebus & ultimis necessaria semper visa est, ut si causa fontica adesse impediretur, deberet tres ex numero procerum nominare, qui suam vicem Parlamento interessent, quibus hanc provinciam mandabat rescripto magno Angliæ sigillo firmato. Ita Elisabethæ regni anno xxxi, cum per morbum adesse non posset, tribus mandavit qui pro se adessent, Archiepiscopo Cantuariensi, magno Angliæ Thesaurario, & Comiti Darbiensi. Ad præ-

præbendum etiam assensum iis quæ Parliamentum statuisset, præsentia ejus utique necessario requirebatur, vel saltem rescriptum. Ergo quicquid in Parlamento decretum fuerit præter Regis voluntatem & assensum, nullius erat autoritatis. Sic ex his ita positis constat, si Rex non sit, non esse Parliamentum, quandoquidem sine Rege nullus est Parlamenti conventus, ut sine capite corpus est truncus, non corpus. At perduelles Rege sublato & Parlamenti præcipua & principali parte dempta, quod inde reliquum manet, pari jure Parliamentum nunc vocant, ac si serpenti capite ablato cum majore corporis parte, serpentem esse vellent quæ cauda esset tantum, aut si hominem appellarent truncum hominis qui solis cruribus ac pedibus reliquis, nec caput nec etiam corpus alio tenus haberet. Qui mutarunt faciem Reipublicæ hac etiam parte debuerunt totam innovare, ut Parlamenti amplius nullam facerent mentionem, cujus forma non potest constare in minimo sui membro, quod caudam vel pedes liceat Parlamenti nuncupare. Quas igitur leges nunc potest sancire, quod jus facere, in quo nec præsulum ordo comparet, nec optimatum, nec Rex etiam præest; qui  
ani-

anima fuit Comitiorum, qui vim legibus eorum dabat, qui trium regni ordinum caput habebatur, ex quibus illa Comitia componuntur, Ecclesiastici, Optimatis & Popularis: Desistant igitur nominare Parliamentum, quod militare est consilium, vel plebeculæ imperitæ, stolidæ, seditiosæ & rebellis conciliabulum. Ad Acta Parlamenti redeamus. Jure & more quo semper usa est Anglia perpetuo recepta fuit differentia inter Actum, ut vocant, Parlamenti, & Ordinationem. Actum dicitur quo novæ leges sanciantur, aut veteres confirmantur vel explicantur, aut nonnullæ earum abrogantur, quas usus & experientia parum commodas esse monstraverit, & quæ in defuetudinem sponte abierint. Quod Acta attinet, nullum eorum vim legis potest obtinere ita ut obliget vitam aut fortunas subditorum, nisi Rege, Ecclesiastico ordine, nobilibus & plebeiis conjunctim & unanimi consensu subscribentibus. *Ordinationes* quæ dicuntur, privatim spectant directionem utriusque domus peculiarem in his quæ amborum consensu ad nonnulla ordinanda statuuntur, eaque pertinentia ad ipsarum statum. Ad hæc Regis consensus & approbatio non desideratur. Sed in his quæ  
publi-



publicum bonum concernunt, & legum sanctiones quibus omnes subditi tenentur, non potest quicquam à Parlamento constitui nisi rege adprobante & consentiente. Trium generum illa sunt quibus tanquam firmamenti & fundamenti stat regni Anglicani Monarchia: Acta Parlamenti, leges regni, & jus municipale. Hoc ultimum consistit in consuetudinibus locorum. Leges Regni veteres, consuetudines sunt ipsius Status antiquitati æquales, in quibus tota regiminis regii ratio fundatur. Unde & *Lex Fundamentalis* & *Lex Terra* nuncupatur. Acta Parlamenti quæ essent jam diximus. Acta vel statuta non sunt nec dicuntur quibus rex non adfuerit ac præfuerit. Primis diebus adesse tenetur vel ipse, vel si id fieri non potest, tribus ex proceribus qui pro se adsint, vices suas committit, & ultimis, aliis non item. Is ergo ultimo confectus die purpureo paludamento amictus & stipatus spissa Procerum corona, intra cancellos superioris domus, editiore suggestu, in throno residens, sub aureo cælo. Communes accersi jubet, quibus ingressis, Acta confirmanda à Clerico coronæ singulatim proferuntur, & Rege annuente clarè pronuntiat, *Rex id vult*. Quibus

peractis, & interdum brevi aliqua oratione à Rege habita, Orator cum universi populi multitudine ad septa stans, gratias ei agit senatus populi que nomine, quod eam boni publici rationem habere voluerit ut eos ad ardua regni negotia stabilienda & reformanda convocare, & statuta super his communi Senatus populi que consensu facta assensu suo comprobare dignatus sit. Quæ clare ostendunt eandem in his fuisse potestatem regis Angliæ supra populum & Senatum quæ olim fuit populi Romani cum imperium habebat. Nam consules in legibus ferendis orabant populum in concione, ut vellet & juberet legem illam adprobare quæ rogabatur, *Velitis, jubeates, Quirites*. Advocatus infamis parricidarum cum non posset negare effatum abnutivum, *vocem negativam* vulgus appellat, regem habere in Parlamento, concessit locum ei tantum esse in negotiis parvi momenti, interim rem se aliter habere ubi salus populi periclitatur. Strenuè sunt impudentes in mentiendo isti perfidi perditique Sicarii. Cocus ille respondeat, si tantillum pudoris restat in ore ejus ferreo & animo cruento, an ea quæ in Parlamento tractabantur, & propter quæ à rege convocabatur, exigui essent

sens momenti ? Hoc refutatur ipsis solennibus verbis Codicillorum sive Breuium regionum , quibus tam populus quam optimates ad Parlamentum evocari solebant. His enim expresse declaratur, Regem ibi tractaturum esse de quibusdam arduis & urgentibus negotiis ad statum & defensionem Reipublicæ & Ecclesiæ Anglicæ pertinentibus. Ad has ergo ipsas res tanti ponderis consultandas & decidendas per litteras Regis vocabantur, & in repudiandis aut comprobandis quæ decreta forent Rex assentiendi aut dissentientiendi potestatem habuit. Hoc Coqui mendacium altero etiam longe maioris & confidentioris improbitatis superatur quo novæ Reipublicæ Fanatici fundatores primum versus Declarationis suæ concipere voluerunt in hæc verba ; Parlamentum Anglicanum electum esse à populo quem refert, & ab ipso auctoritatem suam & potestatem omnem accepisse. Quid de cæteris quæ ea Declaratione continentur, sperare veri possis , cum prima scripti nefandi periodus tam detestandam & horribilem imposturam præ se ferat ? Unde ostendent Parlamentum à populo esse electum ? Cur igitur populus ad ejus conventum non eos accersit qui tenen-

tur adesse? Cur non citantur nomine populi, sed Regis? Quis ille populus est de quo intelligunt? An domus *Communitium* ut appellant? Ergo ea semper potestatem habuerit Regis ipsius convocandi ad Senatum, ut præcipuum suum ministrum: deinde post eum, reliquos Proceres qui superiorem domum, quæ & *Dominorum* dicitur, componunt? Ergo populi est creare nobiles quibus ea domus constat, Duces, Comites, Vicecomites & Barones? Contrarium supra demonstratum est, omnes eos nimirum à Rege ipso creari & suas illi dignitates ferre acceptas, quarum beneficio jussu in illo consessu sedendi & suffragii ferendi adipiscuntur. Patrium omnium, ut vocantur, honor ac decus regii est beneficii & muneris, qui domum *Dominorum* dictam constituunt. Nemo eorum à cæteris duobus Parlamenti corporibus creari potest. A solo rege creantur. Ipsi præsules, qui in ea domo confidendi quoque jussu accipere, non aliunde illud habuere quam à Rege. Eant nunc novi & veridici sancti, & dicant Parlamentum à populo electum esse, & ab eo omnem quam habet potestatem nactum esse, cum certo certius constet ex his quæ diximus, Parlamenti convocationem,

rem, continuationem, dissolutionem, numerum & qualitates convocandorum, loci & temporis definitionem ad quem & quo coire vocati debeant, à Regis arbitrio pendere. Sed cum horum regni Comitiorum, quorum congregandorum aut dimittendorum, ubi aut quando aut quoties placuerit, Rex potestatem habuerit, extraordinarius hic confessus fuit, & non omnis temporis. Quid interim Rex fecerit, quomodo Rempubli- cam rexit cum Parliamentum non erat, an alia tunc potestas ad regnum admini- strandum cognita fuerit, videndum. Si nullam aliam possunt dicere eo tempore fuisse, quid de rege sunt dicturi? An, ut populus Parliamentum ex Fanaticorum sententia eligit, ita & regem regno re- gendo præficit cum Parliamentum di- misit? Qui regem nihil tale meritum po- tuerunt infami capitis supplicio addice- re, poterunt tanto facilius de jure ejus & potestate falsa omnia confingere & comminisci, quem arcessitis & alienis pluribus criminibus nefarie obruerunt. Melius igitur sacrilegos istos non audire, sed quod omnes audiant aut legant, ex veracium Angliæ monumentorum fide, rerumque ipsarum & auctorum certis te-

stinioniis quæ nemo refutare possit, de-  
 promere. Cessante itaque à sessione Par-  
 lamento, si Rex fuit atque ita verè di-  
 ctus est quem pro rege non habuerunt  
 qui capite damnatum obtruncandum car-  
 nifici dederunt, regio more ac jure de-  
 buit imperare, atque omnia cum summa  
 potestate administrare. An ita regnave-  
 rit, quærendum, & an à suis prædeces-  
 soribus regibus talem regendi morem  
 acceperit. Aristoteles lib. iii. de Repu-  
 blic. cap. xiv. in regnis Græciæ antiquæ,  
 quæ hæreditaria fuere, & *πάτρια* vocat,  
 tres partes facit regis potestatis, in quibus  
 administratio imperii versabatur, belli  
 ducatum, sacrorum curam, & jurisdictio-  
 nem. Tradit enim priscos illos Græcorum  
 reges fuisse, *Κυβερνῆς τὸ τε καὶ πόλεμον ἡγε-  
 μονίας, καὶ τὸ θυσίων ὅσα μὴ ἱερὰ ἔσονται, καὶ  
 πρὸς τοῖς τὰς δικαιοκρίτων.* Erat penes eos  
 belli gerendi & exercitus ducendi pote-  
 stas, item sacrificiorum cura quæ ad sa-  
 cerdotale munus non attinebant, & præ-  
 terea jus reddebant & judicia exercebant.  
 Easdem prorsum habet & totidem statuit  
 regalis officii sive administrationis partes.  
 Diotogenes Pythagoricus in libro de Re-  
 gno. *Ἐξ αὐτῆς βασιλείας, ἵπτα, τὸ τε  
 στρατηγεῖν, καὶ δικαιοκρίτειν, καὶ περὶ τῶν θεῶν*

*Tria sunt opera regis, exercitus ducere, jus reddere, & Deos colere.* Unde & in frequentibus concludit, perfectum regem debere esse bonum belli ducem, judicem & sacerdotem. Imperandi autem artem in bello non posse tenere nisi bellum gereritè sciat. Neque judicandi scientiam habere qua subditorum causas audiat & disceptet, quin didicerit juris & legum sanctiones. Neque pie & sancte Deos colere, nisi qui naturam & virtutem Deorum noverit. Dionysius quoque Halicarnasseus ad munia quæ in rege ait desiderari, adjungit etiam curationem sacrorum lib. II. Eam ad se revocavit Romulus cum & cæteras Reipublicæ partes ornaret & ordinaret. Omnes antiqui Reges in omnibus his ferme gentibus idem fecisse constat. Rationem addit Diotogenes, cur præ cæteris cultus divini procuratio ex regia sit dignitatis officio. Quia nempe decet optimum quod sit ab optimo coli, & summum à summo. In terris autem neminem supra reges esse, qui solo Deo minores sunt. Inde est, quod apud plerasque gentes iidem reges & sacerdotes fuere. Virgilius: *Rex idem Anius Phœbique sacerdos.* Ægyptiorum antiquissimi reges, sacerdotes etiam erant. Scribit Herodotus, tre-



centos & amplius colossos ligneos sibi in Jovis cella apud Memphim monstratos qui pro totidem regum eorundemque sacerdotū simulacris positi erant. Judeorum post migrationem ē Babylone maximi Pontifices etiam regali potestate imperarunt. Primus inter eos Aristobulus etiam diadema sumpsit, & pro rege se gessit tam re quam nomine & habitu. Ante captivitatem omnes qui regnarunt tam Israëlitis quam Judę reges, in ipsos etiam pontifices supremam habuere potestatem, & eos deponere sacerdotium, aliquando & vitam, coegerunt. Primus Salomon Abjatharum pontificem abire pontificatu ad egit, & parum abfuit quin etiam occideret, in locum ejus subrogato Sadoco. Hoc jure alii reges post captivitatem etiam aliquoties usi sunt. Moses ipse cum civilis esset Magistratus, Aaronem consecravit ut summus esset pontifex. Hoc factō ostendit synagogam esse in republica, non rempublicam in synagoga. Idem dicendum, immo & dictum est, de Ecclesia Christianorum. Cum Aaron peccasset aureum vitulum fabricando, & nequitie populi morigerando, graviter à Mose hoc nomine increpitus ac reprehensus fuit. Moses autem regis officium semper fecit. Unde &

rex etiam, ut supra ostendimus, in sacra Scriptura vocatur, idemque jus successoribus suis populi iudicibus, & regibus porro qui iudicibus succedere, transmisit. Non solum autem primi Romanorum reges hanc curam ad se pertinere voluerunt, sed etiam posteriores Imperatores propter hanc rationem se Pontifices dici Maximos affectarunt. Servius ad illum poetæ locum; *Sane majorum hæc erat consuetudo, ut rex esset etiam sacerdos vel pontifex. Unde hodieque Imperatores dicimus Pontifices.* Hoc jus transit ad Christianos ipsos. Hinc & Constantinus se Episcopum esse extra Ecclesiam intendebat, ut est apud Eusebium. Hoc est *ἡγεμον εἶναι τῆς ἐκκλησίας, ὅτι μὴ ἰσαλγῇ.* Arbitrium habere sacrificiorum quæ non sunt sacerdotalis muneris. Episcopus in religione Christiana idem est qui Pontifex in pagana. Unde & leges quæ Ecclesiæ bonum & sacra spectabant, Christiani Imperatores omnes à Constantino & deinceps usque ad Justinianum & sequentes sancire soliti. Qui successerunt Imperiū Romani partibus in Occidente, idem sibi sumpserunt, ut Carolus Magnus & Ludovicus Pius, sicut testantur Capitula quæ leges tam Ecclesiasticas quam civiles continebant ab illis Regibus promulgatas. Idem

jus usurparunt eorum successores usque ad infima penè sæcula. Concilia convocabant, Episcopis denuntiabant ut ad Synodos venirent, inter eos lites obortas dijudicabant, Ecclesiarum & Monasteriorum curam gerebant, omnia Ecclesiastica munia administrabant ὅσα μὴ ἐπὶ βασιλεὺς, quæ ad internum conscientie forum minime pertinere videbantur. Episcopos coercerant delinquentes, & ab officio removebant. qui digni viderentur Ecclesiis dabant, aut electos confirmabant, non legitime ordinatos abiciebant. Juxta hanc ergo consuetudinem & jus tam gentilium quam Christianorum veterum principum Reges Angliæ hanc quoque partem regii regiminis sibi semper vindicarunt, non solum Guilielmo Normanno anteriores, ab eo tempore ex quo insula illa Christi fidem profiteri cœpit, sed etiam omnes Guilielmi successores. Alvredus Anglorum rex Dunevvolphum litteris excultum Vintoniensi præposuit Ecclesiæ. Idem, ut Historici docent, neminem illiteratum ad quamcunque dignitatem Ecclesiasticam promoveri permisit. Idem plures leges de Ecclesia & rebus personisque Ecclesiasticis tulit, ut & ejus antecessores ac successores. Stephanus Angliæ rex anno c. lxxx.

xxxvi. Investituram prælatorum sibi reservavit, Matthæo Parisiensi teste. Quod etiam jus sequentes Angliæ reges habuerunt, ut ex monumentis Anglicis constat. Itapost & ante Reformationem religionis, jurisdictionem Ecclesiasticam semper obtinuere. Quinimmo & *Defensores fidei* se appellarunt, postquam Reformatam in eo regno fuit Ecclesia. Eduardus Coke plura refert exempla jurisdictionis Ecclesiasticæ quam Reges Angliæ exercuerunt, à Guilielmo cognomento Conquæstore usque ad Elizabethæ regnum sub quo vixit & scripsit. Ea regnante nemo in Anglia dubitavit subditorum ejus fidelium, quin omnis jurisdictio tam Ecclesiastica quam civilis autoritate & auspiciis regis exerceretur. Idque etiam Parlamenti sanctione confirmatum tunc fuit, quod omnis jurisdictio spiritalis & Ecclesiastica per quolibet de Clero personas exercenda vel re ipsa exercita ad jus regium pertineret, ita ut diplomate suo sub magno sigillo Angliæ potestatem habuerit designandi, nominandi & autoritate muniendi quos vellet, quando & quoties, & quandiu sibi visum esset & hæredibus suis regnique successoribus, qui de causis omnibus Ecclesiasticis cognoscere possent,

sent & executioni mandare, quæ super his decrevissent. Quamvis autem procedendi & agendi formulæ ac modi in Curiis Ecclesiasticis & de rebus ad Ecclesiæ jura pertinentibus sub Episcoporum nominibus fierent, nihilominus illæ ipsæ Curia regis esse dicebantur, & leges quibus agebant in quamlibet personam Ecclesiasticam & judicabant, Leges regis erant. Hoc multis probat Eduardus Cokius in quinta parte Relationum sub Elizabethæ nomine. Nec secus res habuit sub regibus qui Reformationem præcessere quam qui post Reformatam Ecclesiā regnarunt. A. xxxiii. Eduardi iii. sancitum fuit, *Reges sacro oleo unctos, esse jurisdictionis spiritualis capaces.* Eodem regnante sapientius statutum esse idem Cokius observat, omnes Episcopatus Angliæ per Regis prædecessores constitutos fuisse. Ideo advocaciones eorum omnium ad Regem spectare. Ex lege quippe communis & generali regni Angliæ descendere, si Metropolitanus officium suum non faceret de novo Episcopo intra sex mensium spatium in locum demortui constituendo, tum Regi licere pastorem Ecclesiæ illi providere & nominare, tanquam supremo, ordinariorum regni sui, nec

nec eam potestatem concedi Pontifici Romano. Per statutum etiam factum anno xvii. ejusdem Eduardi iii. Rex personam quancunque Ecclesiasticam ab ordinarii jurisdictione potest eximere, atque etiam jurisdictionem Episcopalem ipsi mandare. Multa exempla ibi profert supremæ regis jurisdictionis in Ecclesiam & personas Ecclesiasticas in libro de jure Regis Ecclesiastico. Secundum eam potestatem spiritalem quæ Regibus Angliæ semper fuit legitima, Rex suo diplomate de canonicis sæcularibus regulares facere potuit & sæpe fecit, quod nullo jure potuisset, nisi jurisdictionem habuisset Ecclesiasticam. Statuto quod anno ix. R. Henrici vi. factum est, Rex solus, non alius, poterat licentiam dare in Angliæ regno fundandi collegii vel corporis alicujus Ecclesiastici. Sub Henrico viii. definitum est statuto Parliamenti, Regem esse personam mixtam, quia tam Ecclesiasticam, quam sæcularem jurisdictionem habeat. Legibus Ecclesiasticis in Angliæ cautum erat eidem sacerdoti duo beneficia habere non licere, nec eum qui ex legitimis nuptiis natus non esset, sacris initiari posse. Utriusque legis gratiam facere in potestate Regis fuit.



fuit. Si ab Episcopo cum collegarum assensu lata esset sententia de causa aliqua vel persona Ecclesiastica, non erat rata priusquam legis communis iudices, id est regii, eam comprobassent. Et hanc esse receptam opinionem in omnibus libris Constitutionum regiarum, idem Cokius tradit, nec minus usitatam fuisse in Ecclesiasticis Episcoporum Curiis sententiarum formam. Atque ita suo tempore observatum ait sub regno Elizabethæ. Et hæc Regina potestatem habuit exercuitque, vi prædicti statuti, delegandi iudices ad causas Ecclesiasticas. Notatque ibidem statutum quod erat factum anno primo ejusdem Elizabethæ, de jurisdictione antiqua coronæ restituenda, super Statum Ecclesiasticum & Spiritalem, nihil novi juris regibus attribuisse, sed quod ante habuerant, iisdem reddidisse. Causas recenset eo loco, omnes Ecclesiasticas de quibus decernendi aut ad quas determinandas iudices dandi potestatem penes Reges fuisse ostendit. Eas non opus est hic reponi, quæ apud ipsum Cokium videri possunt, in quinta parte Relationum de jure Regis Ecclesiastico. Sufficit dicere, omnes qui ante Guilielmum Normannum reges & post eum ad hæc usque



usque tempora in Anglia fuere à primis Christianæ fidei quam Britanni receperunt incunabulis, hoc jure in Ecclesiasticis non minus quam in sæcularibus negotiis summo potitos fuisse. In legibus sancti & boni Eduardi qui Confessor dictus est, disertè habetur cap. de Regis officio & jure. *Coronæ regni Britannia: Regem qui vicarius summi regis est, ad hoc constitutum, esse ut regnum terrenum & populum Domini, & super omnia sanctam veneretur Ecclesiam, eam regat & ab injuriis defendat.* Inter ejus leges sunt, *De clericis & possessionibus eorum. De justitia Ecclesie. De universis de Ecclesia tenentibus. De reis ad Ecclesiam fugientibus. De fractione pacis Ecclesie.* In ea lege sancitur si quis pacem Ecclesie violavisset, Episcoporum esse justitiam. Quod si nocens sententiam eorum diffugisset, clamorem de eo deferri ad Regem post quadraginta dies, ut nempe executio mandaretur, quod Episcopi in ea causa statuissent. Omnes antiqui Reges illius Insulæ qui Christianam fidem receperunt, leges de Ecclesia tulerunt, de personis & rebus Ecclesiasticis. Ut videre est in vetustissimo Codice Legum Saxonicarum ab Ina rege Occiduorum Saxonum; qui anno Christi

regnare cœpit dccxii. Sed Canutus five Knutus Anglorum, Danorum & Norvagiensium Rex qui in Anglia paulo ante Eduardum Confessorem regnavit, longe plures ad Ecclesiam pertinentes leges tulit, quæ habentur in eo Legum Saxonicarum Codice. Cum igitur summa in Ecclesiam jurisdictio ab omni ævo Regibus Angliæ competierit, quid nunc fiet de religione & Ecclesia eo statu rerum qui hodie obtinet sub tyrannide sectariorum militari, Rege amoto cujus auctoritate Episcopi Ecclesiasticam & spiritalem justitiam exercebant? Episcopis etiam de medio sublatis qui sub Rege, & ex ejus arbitrio de causis ecclesiæ cognoscebant, ad quos redibit ea cognitio, cum nec ministeris Reformatis quidquam juris ad eas res relictam sit? An militum erit omnis super ecclesiam, resque ad eam pertinentes jurisdictio? Dabiturne potius plebi sectariorum? Nulli hodie præter eos in Anglia regnant. Cum religio hæc unica eorum sit, plures habere, & omnes tolerare, & in Ecclesia nullum superiorem agnoscere; dijudicandum hominibus sanæ mentis relinquo, an qui ita sunt animati, inconsutilem Christi tunicam sat-

tam

ram rectam recte conservaturi sint. Antea Reges soliti erant negotium dare Episcopis, & iisque injungere, aut quibus vellent aliis personis Ecclesiasticis curam committere, de Apostasiis; Hæresibus; Schismatibus tollendis; Hodie vero quis ipso custodes custodiet & coërcebit, cum illi qui imperium tenent, Apostatae sint; Hæretici, Schismatici, aut Α'ποστατοι, Hæreseon & Schismatum fautores ac patroni unici & protectores; Sequitur altera pars muneris & officii regalis, quæ juris reddendi potestatem spectat. Hæc ita regum propria est, ut reges non esse videantur qui non habent jurisdictionem. Potestas quippe minor regali etiam eam habuit, ut judices Hebræorum, & duces in exercitu. Nam omnis jurisdictio à regibus sicut à fonte derivatur & manat. Eam ipsi mandant quibus volunt, judices dant, judicare jubent. Quæ omnia faciunt tanquam qui jure suo jurisdictionem habent, non alieno beneficio, ut hi qui delegati sunt ad judicandum à Principe. Regis etiam est, jus gladii concedere, & nominare qui sua vice judicent sine provocatione. Cum Israëlita regem à Deo petierunt, ad hoc eum sibi constitui voluerunt, ut judicaret, per se nimirum,

rum, vel per eos quibus iustitiæ exercenda partes suo nomine concederet. Iudices quoque quos ante habuerant, ab hoc ipso juris dicendi munere dicti sunt, cum tamen & duces essent, atque ita etiam appellarentur, ab exercitibus ducendis & bello gerendo. Hos etiam Reges scriptura nominat, ut & ipsum Moſen cui ſucceſſere. In hac ipſa parte Reges Angliæ plenam ſummamque poteſtatem habuiſſe conſtat, iudiciorum nempe exercendorum, tam in civilibus quam criminalibus cauſis. Et cum in Eccleſiaſticis habuerint ſupremam iuriſdictionem, ut ſupra monſtravimus, tanto magis & in ſæcularibus hoc jus illis competiſſe dicendum. Statutis plerique Parliamentariis ſub diverſis regibus promulgatis hoc oſtenditur. Sub Eduardo IV. ſanctio facta eſt, Regem poſſe erigere tribunal communium placitorum, in quacunq; parte regni ipſi viſum fuerit, per diplomata ſua, Litteras Patentes vocantur. Ea ſunt in quibus lites & negotia privatorum diſceptari ſolent. Sub Henrico VII. ſancitum eſt, Regem habere plenam poteſtatem in omnibus cauſis iuſtitiam adminiſtrandi quibuſlibet. Anno primo Eduardi VI. factum eſt ſtatutum, quo declaratur; Omnem autorita-

tem

*rem & jurisdictionem spiritalem & temporalem derivari à Rege.* Omnes Curiae justitiae quae in regno sunt, potestatem judicandi habent à Rege, & nomine ejus jus reddunt, ideo & praesens in his semper esse existimatur. Præterea Regem dare judices & commissiones, ut vocant, ad judicandum per diplomata sua nemo infitias ire potest, & officia judicaturae quibus velit, conferre. Quod adeo verum est ut inter crimina Regi objecta à perduellibus, hoc etiam fuerit, mutasse illum formam Codicillorum quibus judices creare solet. Nam cum antea ejusmodi potestatem iis Reges se dare dicerent quoad viverent & quandiu se in officio recte gessissent; Carolus in diplomatis quibus dignitatem eam iudicibus conferebat adponere solitus est, tandiu munus judicandi obituros esse, quandiu libitum ipsi esset. Quod cum gravatim tulisset Senatus, & Regem de eo admonuisset, ille pristinam formam revocavit. Et tamen si res rectè aestimetur, iudicibus ipsis Rex eo pacto consultum ibat, quos sine ignominia sic poterat dimittere, cum diceret sibi non placere ut diutius eo munere fungerentur. Antiqua autem illa formula dandorum à Rege iudicum

quæ

quæ obtinuerat, semper Rex poterat iis imputare quod male se gessissent, si quos in eo munere diutius nollet retinere. Cum cæteræ omnes Curia regni & tribunalia à regis summa jurisdictione penderent, fuit & proprius regis ad judicandum confessus qui ex eo *Bancus regius*, hoc est subsellium regis, dicebatur. In eo disceptabantur causæ publicæ ad jus regni & coronæ pertinentes, aut quas Rex ipse ibi vellet dijudicare. Atque hæc sunt quæ regum Angliæ in jure dicundo & justitia administranda summam & vere regiam potestatem testantur. Nunc restat tertia pars quæ circa militiam versatur. Regum omnium semper ea sic propria fuit, ut qui in cæteris duabus prioribus summum imperium non haberent, in hac tamen plenissima cum auctoritate & libertate imperarent. Stante Romana Republica quandiu penes populum fuit imperium, ipsi tamen proconsules qui provincias regebant & bellum gerabant Reipublicæ nomine, summo jure exercitibus præerant, ac vitæ & necis potestatem habebant. Apud Lacedæmonios cum reges eorum nomine potius id essent quod dicebantur quam re ipsa, ad bellum tamen gerendum neminem superio-



periores agnoscebant, & summo cum imperio exercitus in hostem ducebant & rem militarem administrabant. Judices quoque Hebræorum cum in cæteris Synedrio subessent, in his quæ ad munera belli spectabant & ducatum copiarum militarium, nemini erant obnoxii. Multo magis qui reges fuere ejusmodi, quales *αυτοκρατορες* Greci nuncupabant, & *παμβασιλεις*, cum nulla in re superiorem ullum aut parem haberent, in militari exercitio & summa belli gerendi, sui juris omnimodo fuerunt, & potestatem habuerunt a nemine dependentem. Tales cum fuisse Angliæ reges ostenderimus, nec minus hanc quoque partem sine pari & æmulo tractarunt. Et omnino vel testimonio iudicioque eorum ipsorum qui regi vellent omnia adempta jura regalia, ita esse oportet. Nam si, ut asserunt, rex protectionem debet subditis, ut subditi regi subiectionem, quomodo eos protegere poterit & defendere ab intestinis bellis & externis hostibus, nisi arma virosque habeat in sua potestate, ad hoc ut delectus possit indicare & exercitus comparare, tam ad hostilem vim propulsandam quam ad internas civium seditiones coercendas? Quo colore igitur, nisi sibi ipsi contradicere



cere velint, perduelles fanatici negare possunt, militiam regni ad regem pertinere? Eodem jure hoc negaverint quo Angliæ regnum hæreditarium esse infitias eunt, & tam Senatum quam regem ipsum à populo eligi contendunt, illum ut boni publici procurationem gerat, hunc ut populi protectionem curæ habeat: Sed minimum est vitiorum quibus scatent, impudentia in infitiando quod veritatis est non dubiæ. Hic primus gradus eorum, quibus ad summum scelus evaserunt. Cujus ergo erunt, arces, præsidia, castella, armamentaria, portus, naves & alia sine quibus munera militiæ non possunt exerceri, si militia regni ad regem non pertinet? Sane si hac parte deficiatur regiæ administrationis potestas, non solum manca erit, sed etiam nulla. Pacis & bellorum gubernatio non ab ipso dispensabitur, quia pax fit post bellum. Si belli gerendi potestatem rex non habebit, ne quidem pacis faciendæ jus cum hoste habiturus est. Ejusdem quippe est hominis utrumque curare. At si militia & armorum jus ab alterius arbitrio pendeat, is bella pacemque geret, non rex. Si regi denegant rebelles jus armorum movendorum, cuinam illud dabunt? An Senatui?

Ita

Ita sane oportet. Ergo subditi, non rex, plenum ad bellum indicendum, incipiendum, gerendum, finiendum, jus obtinebunt. Ita subditi reges sui regis ac domini erunt, & rex subditus subjectorum & servus. Regni quippe potentia præcipuè in armis & militibus consistit. Certè Senatus ille vel Parlamentum totum ex subditis Regis constat. Superior enim domus Episcopos habet quos rex facit, Comites & Barones per regem fiunt, qui illius beneficio jus confidendi in eo conventu accipiunt. Rex tam nobiles quam plebeios ad conventum illum regni vocat, nec convenire in unum possunt absque permisso regis. An ergo æquum videtur ut rex eos in concilium evocet qui sibi sint imperaturi, qui tanquam ducem mercenarium ad bellum ire jubeant, expeditionem in hostes sumere, arma cum volent, deponere & pacem facere, præcipuè cum possit eos non vocare? Miram certè ac novam Regis iconem nobis exhibent perduelles isti, qui picturam tantum ejus inanem sine re ac corpore eum volunt habere, & sibi potestatem solis regis regendi reservare. Justinianus in principio Institutorum præscribit; *Imperatorem sive regiam majestatem armis decoratam*

*ratam & legibus armatam esse oportere, ut utrumque tempus & bellorum & pacis rectè possit gubernare.* Permutavit utriusque operis elogia, quia alterum alteri mutuas operas confert. Nam pacis æquæ sine armis ratio iniri non potest, & bellum sine legibus & jure injustum est. Ita legibus armata debet esse regis majestas, & armis decorata. Alterum sine altero subsistere non potest, neque regia potestas sine utroque consistere. Non audent Perduelles apertè abjudicare militiæ summum imperium regi suo, sed obliq; illud detrahunt dicendo militiam non stare sine pecunia, pro nervis belli eam esse, sine qua non possit procedere. Pecuniæ autem ad bellum faciendum copiam Regi non suppetere nisi ex Parlamento. Inutilem proinde ei esse militiam, qui illam per se & ex se non possit instructam habere rebus necessariis, quique ad illa obtinenda quæ opus sunt bello administrando, alterius opem implorare cogatur. Ponamus ita esse. Hæc ipsa causa ne Parlamento hoc jus tribuatur, prorsus efficere potest. Nam nec Parlamentum sine rege aut rege nolente quicquam potest. Non pecuniam imperare, non tributa aut vectigalia populo imponere. Quid ergo proderit Senato-

natoribus militiae magisterium habere, cum ne teruncium quidem ad eam sustinendam queant de populo cogere? Cum nec ipsi in unum cogi possint nisi Regis mandato? Cæteris ergo paribus Regi potius adjudicanda quam Senatui, qui & Senatus convocandi jus habet, & regni necessitates in eo proponendi, & pecuniam jure suo ab eo exigendi ad res & negotia id requirentia. Præterea redditus regni qui in regis sunt potestate, alendis exercitibus magis idonei videntur; quam privatae facultates eorum qui Parlamenti conventum componunt. Si singuli considerentur, regias opes ad hoc non habent ut sumptus suppeditare possint exercitibus sustentandis. Si universi spectentur, prout in corpus conjuncti congregantur, nullum jus habent pecuniae conficiendae ex tributorum, portoriorum & vectigalium rationibus. Portoria ipsa ad Regem pertinent atque inter ordinarios regni redditus computantur. Ex his collegisse dicitur Rex Iacobus initio regni trecenties sexagies millenas libras. Patrimonium præterea regum Angliæ amplissimum fuit. *Domanium* vulgo vocant, & sæpè ex eo solo maximas largitiones facere soliti sunt, si qui inter illius Insulae Reges liberali-

ralitatis laudibus emicuerunt. Prædicare solebat Rex Iacobus nullum in Europa principem existere qui tot & tanta latifundia coronæ suæ annexa possideret. Status ex eo redditus annuus fuit quingenties quadragies millenarum librarum cum sexcentis sexaginta. His accedebat ex Abbatibus & aliis domibus sacris è quibus Rex Henricus monachos & moniales eiecerat, earumque proventus patrimonio regio adjunxerat, in millies quingenties milles septingentis quinquaginta libris duabus. Postremo legibus Angliæ Rex pupillorum tutelam quam *custodiam nobilem* appellant, suscipit, & usque eo servat donec vigesimum primum ætatis annum attigerint, atque interim donec tutelæ suæ facti sint, omnes eorum redditus percipit, certatantum parte, quanta videtur necessaria, eorum alimentis destinata. Magna inde vis nummorum ad fiscum regis redit. Nec minima est quam ex recognitione feudorum recipit, quorum tantus est numerus, ut equestrium sexaginta circiter millia in censum referri velint qui de rebus Anglicanis scripsere. Nunc quaero, cum hæc ita sint, utrum Rex an Senatus majores de suo sumptus ad exercitus cogendos & alendos facere possit, cum

præ-

præter hos ordinarios redditus etiam extraordinariorum subsidiorum facultas regi pateat, qua Senatus caret. Nam si quando bellum externum ingruat, aut alia quæcunque major vis aut necessitas, tum Rex Parlamentum indicit ut ejus autoritate possit à subditis suis impetrare pecuniarium auxilium. Numquam id Senatus recusavit. Et duplici quidem genere hujusmodi subsidium regi concedebatur, vel æstimatis singulorum bonis certa indemnificatione regi solvenda tam ab indigenis quam advenis, vel impositione facta singulis civitatibus, oppidis, pagis. Et civitates quidem decimam taxationis bonorum, quæ generatim fiebat, non viritim, pendebant, pagi autem decimam quintam. Fuere & aliæ multæ rationes quibus fiscus regis augebatur, quæ ordinariæ quæ extraordinariæ. Ex quibus omnibus constat ad militiam tuendam longe majores opes regi præsto fuisse quam Senatui, cum hic nullas habuerit nisi de arca singulorum depromi vellet jubere, aut de publico ærario sumi, cujus tangendi nullum jus illi fuit, ut nec quicquam oneris eo nomine populo imponendi. Erectio regii vexilli, *Standardum* appellant, quod specimen est exercitus imperati, ad alium etiam non

pertinet, nisi ad eum qui summum imperium in militia obtinet. Atque ita semper etiam apud veteres Latīnos in usu ac more fuit, ut nemo præter regem vexillum in belli signum ad exercitum cogendum & unde quaque evocandos milites elevare posset. Virgilius:

*Et belli signum Laurenti Turnus ab arce  
Extulit. ---*

Ubi reddunt rationem veteres interpretes cur Turnus hoc officium tunc arripuerit, quod regi Latino debebatur, utpote qui summum belli & pacis haberet imperium. Quoniam Latinus rerum habenas reliquerat & se domi abdiderat, Turnus ejus vicem, quia summe belli præerat, vexilli erectionem usurpavit. Negent ergo si possunt perduelles, vexilli ad bellum erigendi potestatem alteri in Anglia competisse quam Regi. Certe nec negare possunt, omnia mandata & imperia quæ dari solent delectus habendi gratia, a Rege solo fuisse data. Omnes Equites ratione feudalis patrimonii quod possidebant, tenebantur arma sumere & ad bellum exire quando Regi placitum erat, qui quidem libras viginti annuas ex agris perciperent, ut est in Statuto anni septimi Eduardi I. Idque sub omnibus deinceps regibus sem-

per



per servatum, donec Carolus quem per-  
duelles mactarunt, hujus obsequii gratiam  
illis fecit. Ratio porro ipsa prorsus evin-  
cit, regem non esse nec videri nisi qui ar-  
ma & militiam in potestate sua habeat.  
Non enim tutari auctoritatem suam sine  
armis potest. Inde satellites & corporis  
custodes armati semper regibus attributi  
sunt, tam tyrannis quam legitimis, cum  
hac differentia, quod tyranni ad corporis  
custodiam milite mercenario uterentur,  
legitimi reges è suorum civium & subdi-  
torum numero. Ipsi quinetiam antiqui  
populi Græciæ qui *Æsymnetas* suos eli-  
gebant cum potestate plane tyrannica &  
infinita, satellites eis & stipatores armatos  
dabant. Nam, ut recte scripsit summus  
Philosophorum, etiam si talis princeps de-  
tur qui nihil ex proprio arbitrio faciat præ-  
ter legem, ei tamen ex armis præsidium  
adstare necesse est quo leges tueri & exe-  
cutioni mandare possit. *Εἰ γὰρ καὶ νόμον εἴη  
κύριον μηδὲν πρᾶτῶν καὶ τὴν αὐτῆ βέλῃσιν  
ὑπὲρ τὸν νόμον, ἀναγκάζον ὑπάρχῃν αὐτῷ τε  
δύναμιν ἢ φυλάξαι τὰς νόμους.* Omnino ergo  
oportet regem plus armis posse quam po-  
pulum universum. Nisi hoc sit, regetur  
non reget. Rex erit sine auctoritate & po-  
testate, quam vindicare læsam non poterit.

Tunc omnia pessum abibunt, si arbitrio populi permittantur, qui leges non solet curare, si se iis superiorem esse videat. Militia itaque regis est, aut rex nullus est. Quid plura? Consuetudo constans regni & perpetuus omnium usus temporum, regumque Angliæ jus minimè controversum, militiam illis plena & summa semper potestate afferuit, idque confirmatum pluribus Parliamentorum statutis, & præcipue statuto anni septimi Eduardi primi. Cum igitur in his tribus quæ maximè regis & absolutæ gubernationis officium constituunt, nempe in religione, iustitia & militia, reges Angliæ omnes summo semper cum jure & imperio versati sint, non est dubitandum quo titulo majestatis suæ & dignitatis regis munus impleverint. Concedemus porro, hanc vim majestatis parem quoque in Parlamento fuisse, si potestatem habuit in religionem, si jurisdictionem suo jure exercuit, si bella suscipiendi & vexilli militaris ad hoc erigendi licentiam sibi arrogavit. Præter hastres partes, quas Aristoteles cum Pythagoricis præcipuas & principales esse regalis imperii statuit, alia quædam nonnullis autoribus memorantur, eodem pertinentes, ut jus magistratum

tuum

tuum creandorum, legum condendarum, tributorum imponendorum, monetæ cudendæ, & aliarum ejusmodi quæ nonnisi ab eo fieri possunt qui supremam habet regendi potestatem. Sed bene calculum ponenti, & rem ipsam ex veritatis merito æstimanti, omnia hæc apparebunt tanquam appendices & lacinie trium quæ supra proposuimus capitum. Immo nullum horum est quod non revocari possit ad alterum genus ex duobus quæ ultimo loco explicavimus. Nempe ad justitiam sive juris dicendi summam auctoritatem, & ad militiæ tractandæ supremum imperium. Primum, qui jurisdictionem suo jure habent, non alieno, nisi legum etiam ferendarum & abrogandarum potestatem simul habeant, haud rectè poterunt jura reddere, & judicia exercere plene ac libere, ut convenit illis, qui non fiduciaria nec delegata ad judicandum opera utuntur. Sæpe multæ causæ incidunt de quibus lex non est, aut si quæ est, interpretatione indiget, aut etiam incommoda videtur. Mutandæ aut novandæ legis arbitrium penes illum esse non potest qui secundum leges judicare cogitur, utpote qui judex ab illo datus est qui merum habet imperium & jurisdictionem suo jure obtinet. Qui

legis gratiam facere potest, is etiam novam potest facere. Hoc vero proprium summe potestatis & Regiæ vel Imperatoriæ. *Αὐτόδικος* Græci vocant & *αὐτονομός*, sui juris quasi dicas, & suæ sententiæ. Id est, qui sententiam ferre possunt quam velint, nec legibus obnoxii sunt, ne illis quidem quas ipsi sanxerunt. Unde & contra leges non posse facere intelliguntur, quia sunt supra leges. Non injuriam etiam facere existimantur, quia jus est quodcumque decreverint. Inde Græci, ut expriment civitatis liberæ summam & nulli obnoxiam potestatem, *τὸ αὐτόδικον* & *αὐτόνομον* conjunctim ei tribuunt, id est legum suarum & sui juris. Quia hæc invicem cohererent, jus dicere, & leges secundum quas jus reddas, facere. Præcipuè in eo qui, ut diximus, jurisdictionem habet *αὐτόδικον* & *αὐτόνομον*, id est, sui juris, non alieni. Eas qui fert etiam potest eisdem derogare, obrogare, & penitus easdem quoque abrogare. Hoc etiam habent Angliæ reges, leges condunt, conditas executioni mandant; contra leges etiam judicare possunt dum legum pœnam nocentibus remittunt. Nec est quod quis hîc objiciat, non posse eum leges ferre nisi in Parlamento & sine utriusque Domus assensu. Id etiam

in

in aliis omnibus regibus qui olim dominati sunt cum summo imperio, semper fuit, & in his qui nunc dominantur, videre est. Ut belli dux non fert leges militares in prætorio suo solus, sed tribunos militum & primos centuriones in consilium vocatos adhibet ut cum his decernat, ita nemo unquam rex repertus est qui solus in cubiculo suo edicta formaret, rescripta faceret, legesque sanciret, resque ad publicum bonum pertinentes tractaret, sed semper hæc omnia ex consilio suorum Senatorum & Procerum facere soliti sunt.

Quis Romulo βασιλεύς ἢ ὡς Regalior, ut ita dicam, fuit? Nō ille à populo rex factus est, sed populum sibi fecit. Non rex à Senatu renuntiatus est, sed ipse Senatum de senioribus populi quem a sylo constituto adgregaverat, constituit. Cum tamen de legibus ferendis & maioribus regni negotiis expediendis quæstio esset, Curiatis Comitibus, de his agebat cum populo. Sic enim scribit Pomponius de Origine juris Romani, *Romulum populum in triginta partes divisisse, quas partes Curias appellavit, propterea quod tunc Reipublicæ curam per sententiam partium earum expediebat. Et ita leges quasdam & ipse Curiatas ad populum tulit, tulerunt & se-*

quentes Reges. Sed quid opus veteres memorias ad id excutere & exoleta exempla arcessere, cum in promptu sint & ad rem ipsam facta de qua agimus? Ipse Guilielmus cognomine Conquæstor, & summus generis auctor dominantium hodie Angliæ regum, non aliter post redactum armis in suam potestatem Britannia regnum, leges pristinas emendavit & novas constituit, quam participato cum proceribus consilio & sententia eorum exquisita. Sic enim in legum principio quæ nomine ejus editæ sunt, habetur. *Hic intimatur, quid Guilielmus Rex Anglorum cum principibus suis constituit post conquestionem Angliæ.* Superiores omnes reges, Dani, Angli, Saxones, idem omnino observarunt quod iste Normannus, cum leges tulerunt, ut ex illarum præmio constat, in quibus hoc perpetuo legas, *Consulta sancivisse ex Optimatum, & Senatorum & Sapientum consilio.* Aldermannos & Graphiones appellant, ut supra notavimus, id est provinciarum præfides & civitatum præfectos, & alios optimates qui postea sub Normannis Comites, Vice-comites, & Barones fuere. Ita in Canuti legibus scriptum est. *Sic Rex Ethelredus concilium promovende pacis causa*  
*habuisse*

*habuisse dicitur Vostoci Mercia. Sic Rex Edgarus leges frequenti Senatu ad Dei gloriam, regia majestatis ornamentum ac Reipublica utilitatem, sancivit. Rex Edmundus ipso solenni Paschatis festo frequentem Londini tam Ecclesiasticorum, quam laicorum cœtum celebravit. Rex Æthelstanus, ex prudenti Ulfhelmæ Archiepiscopi, aliorumque Episcoporum suorum consilio, se leges sanxisse testatur. In legibus Alvredi in præfatione hæc habentur; Atque in istis discernendis ego Alvredus Occidentalium Saxonum Rex, prudentissimorum è nostris consilio usus sum atque iis omnibus placuit edici, &c. Inas Rex Occidentalium Saxonum qui anno Christi D C C. cœpit regnare, suasu & instituto Cenredi patris sui, Hedda & Erkenvaldi Episcoporum suorum, omnium Senatorum suorum, & natu majorum sapientum populi sui se illa decreta sanxisse testatur. Reges Normannidæ qui succedere Guilielmo orbitaivere præcedentium regum, atque Episcopos aliosque præfules cum optimatibus regni semper convocarunt, si quando de rebus majoris momenti & status salutem spectantibus aliquid statuere in animo haberent. Qui conventus cum antea nullo certo loco, tempore,*  
nume-



numero convocandorum, solerent haberi & quodocunque regi placuisset, postea ex regum ipsorum bono placito in Parlamento formam & nomen ut nunc sunt, & vocantur, concessere. Leges in his late quamvis validæ & ratæ non haberentur nisi consensus utriusque Senatorum ordinis accederet, nihilominus *leges regis* dicebantur. Quia, ut Academia Oxoniensis nuper scripto publico affirmavit, *Confessus duorum ordinum alter ambove jus non habent nec auctoritatem statuendi, jubendi, transigendi sine rege, sed cum eo tantum super arduis regni negotiis colloquium habendi, tractandi & consilium impendendi.* Unde etiam, inquit, *factum existimamus ut in supplicationibus, admonitionibus & declarationibus suis aliisque publicis scriptis Magnum Regis Consilium se passim appellare soliti sint.* Et sane, ut jam supra docuimus, reges omnes Angliæ; tam Saxones, quam Dani, quamque isti ultimi Normanni, *Senatum suum, Senatores suos, Episcopos suos, Consilium suum, Parlamentum suum*, ut & *Populum suum* vocare in rescriptis suis & statutis etiam Parlamentariis consueverant; ut significarent æque sibi subjectos esse Senatores istos & Episcopos & utriusque Domus Parlamenti

mem-

membra, quam de populo quemlibet. Ad convocationem Comitiorum quod attinet, cum eam Dionysius Halicarnassæus regii propriam muneris faciat, dependet etiam ab eo jure & imperio quod rex habet in judiciis exercendis & in legibus faciendis summum. Cum enim leges non dictet nisi communicata cum populi sui primoribus sententia, merito jus quoque eorum convocandorum ad comitia retinet, in quibus de rebus summis regni cum his deliberare eosque consulere possit. Hinc videmus penes omnes reges Angliæ hoc quoque arbitrium fuisse convocandorum comitiorum. Magistratuum etiam creandorum potestas cum eadem potestate conjuncta est quæ jus dicit & leges statuit. Cum enim Rex justitiam per se non possit omnibus administrare, necessario debet homines in certis regni locis constituere qui vice sua justitiam exerceant & jus populo reddant: Inde sunt sub principibus hodiernis Curiaë judiciales, summa Tribunalia quæ *Parlamenta* vocantur, in quibus jus redditur sine provocatione, Rectores provinciarum, consilia Status & alia jurisdictiones. Olim sub Romanis Imperatoribus, Præfecti Prætorio, Præfecti Urbi, Præfides Provinciarum, Legati Cæ-

saris,

faris, & alii Magistratus, quos Imperator  
 constituere & creare solitus erat, quibusq;  
 jurisdictionem mandabat suam. Nam ut  
 populus Romanus in libera Rep. magistra-  
 tus omnes ad jus reddendum creavit, ita  
 postea Imperatores postquam ad eos trans-  
 latum est imperium. Sed & Reges antea  
 idem fecerant. Restat de vectigalibus. Hec  
 quoque curationis sunt regalis, sed militiae  
 quadantenus adjuncta sunt. Frustra quippe  
 de militibus conscribendis & ducendis ad  
 bellum ratio ineatur, nisi sit unde victus &  
 vestitus & arma iis subministrari queant.  
 Vectigalia ad hoc & tributa populis impo-  
 ni oportet, quæ nec gravatim ferre debet,  
 quandoquidem ad ejus tuitionem militia  
 pertinet. Vectigalia omnium rerum quæ  
 importantur & exportantur, regibus  
 etiam Angliæ debentur, quibus tam mer-  
 ces peregrinæ & exoticæ quam domesti-  
 cæ continentur. Cum Rex vellet impo-  
 nere tributum, quod *Shipmoney* An-  
 gli vocitant, id est tributum in classem,  
 ναυλὸν πῆλ, consuluit legum peritos  
 regni sui, num liceret hoc sibi facere  
 absque Parlamenti autoritate? licere il-  
 li responderunt. Et sanè nullus umquam  
 rex fuit cui non necessitate aliqua ur-  
 gente fas fuerit tributa & vectigalia po-  
 pulo

pulo indicere, ad solennia regni onera sustinenda. Quæ sive propria auctoritate faciat, sive convocato Senatu ut assensum præbeat, potestatem semper eandem respiciunt, quam Græcorum nonnulli αὐτοτελή appellunt, & cum αὐτοδυνα & αὐτονόμα jungunt. Nam τέλη tributum est, vel vectigal. De bello & pace deliberandi jus, militiæ potestati adnexum est. Nam cuius est bellum indicere, ejusdem quoque est paci leges dicere. Item fœdera sancire cum externis populis & regibus, eaque dissolvere. Quæ in re etiam Reges Angliæ tam amplam habuere potestatem, ut si populus Britannia idem fœdus cum Principe extero vellet rumpere, rege solo renuente, id ratum tamen maneret, sicut pluribus Statutis confirmatum est. In his ergo tribus rebus principalibus quæ religionis & Ecclesiasticæ jurisdictionis curam spectant, quæ justitiæ civilis administrationem, quæ belli pacisque gubernationem, cum Rex Angliæ nihil non possit, ex eo summa ejus & αὐτοκρατορικὴ, atque independens; ita dixerim, potestas arguitur. Quia autem ad hæc tria capita omnes aliæ partes regalis officii revocari possunt, singillatim eas expendere non est.

est necesse, cum jam pleraque attigerim, & reliqua alii qui pro Regis causa scripsere, abunde exequuti sint. Si quis testimonia insuper autorum Anglicorum requirat, paucis, sed idoneis, confirmare possumus, statum regni Angliæ plane monarchicum fuisse & mere regalem, nec ulla mixtura alterius regiminis temperatum. Bractonus qui ante quadringentos annos vixit, temporibus Henrici III, in hæc verba de Angliæ Monarchia scripsit lib. IV. cap. XXIV. Sect. I. *Rex habet jurisdictionem super omnes qui in regno suo sunt. Ea quæ sunt jurisdictionis & pacis, ad nullum pertinent nisi ad regiam dignitatem. Habet etiam coërcitionem ut delinquentes puniat & coërceat.* Idem lib. I. cap. VIII, Sect. V. *Omnis quidem sub Rege, ipse sub nullo, sed tantum sub Deo.* Et ibidem paulo post: *Ipse autem Rex non debet esse sub homine, sed sub Deo.* Idem initio lib. II. de Rege: *Potentia vera omnibus sibi subjectis debet præcellere; Patrem habere non debet in regno, neque multo fortius superiorem.* Item paulo infra: *Exercere rex debet potestatem juris sicut Dei vicarius in terra & minister, quia ea potestas solius Dei est.* In Statuto XVII. Richardi II. cap. V. declaratur: *Quod Corona Angliæ.*

*Anglia libera fuit omnitempore, & quod non habeat terrenam subjectionem, sed immediatè subdita sit Deo in omnibus rebus, quæ concernunt regalitatem ejusdem Coronæ, & nulli alteri. Acto Parlamenti xxiv. Henrici viii. manifestè scriptum habetur; Regnum Angliæ esse imperium & ita ab Orbe fuisse acceptum. Per aliud Actum Parlamenti xxiv. Henrici ejusdem, Senatores Regem compellantes his verbis loquuntur; Quid hoc tua gratia regnum, nullum superiorem sub Deo, sed solum tuam gratiam agnoscat. Fuit & est liberum à subjectione quarumcunque legum humanarum, solummodo earum quæ fuere factæ & ordinata intra hoc regnum ob felicitatem ejus aut aliarum quæ per tolerantiam tuæ gratiæ & tuorum Progenitorum populus hujus regni sumpserunt. Statuto i. Elisabethæ cap. i. Corona regni Angliæ dicitur esse Imperialis corona. Clarius hoc etiam expressum est Acto Parlamenti quod primo anno Jacobi celebratum est, cui titulus inscribitur; Latissima & justissima recognitio immediatè legitima & indubitata successionis & juris coronæ. Ipsius Acti verba quia nimis prolixa sunt, parcam adscribere. Sed in eo agnoscit & declarat Parlamentum:*

*Vnio-*

Unionem magnam & illustrem factam  
 esse duorum potentissimorum, illustrissi-  
 morum & antiquissimorum regnorum  
 Angliæ & Scotiæ sub una imperiali corona  
 in persona regia Iacobi. Sed verba quæ  
 clausulam faciunt illius Acti, sine piaculo  
 præterire non possumus, neque vero de-  
 bemus, quæ sic habent ut regem allo-  
 quuntur. Atque illi submittimus humil-  
 limè & fidelissimè nosmet ipsos, heredes &  
 posteros in perpetuum, usque ad extremam  
 guttam sanguinis nostri exhaustam, &  
 obsecramus tuam Majestatem hoc accipe-  
 re ut primos fructus in hac summa Curia  
 tui Parlamenti, nostri obsequii & fidei  
 erga Majestatem tuam & regalem tuam  
 progeniem & posteritatem in æternum.  
 Quod si Majestati tua placuerit, in argu-  
 mentum gratiosa tua acceptationis, Ma-  
 jestatis tua regalis assensu condecorare, sine  
 quo neque plenum neque perfectum esse pos-  
 test, neque perseverare ad posteritatem,  
 secundum humile nostrum desiderium,  
 quasi monumentum principalis & teneri  
 tui affectus erga nos, addituri id sumus  
 reliquis tuis indicibilibus & inestimabili-  
 bus beneficiis. Aliam, ut ex hac oratione  
 apparet, linguam & aliam mentem habe-  
 bant tunc temporis Parlamenta, quam  
 nunc



nunc habent, non majore, quod mirum,  
temporis intervallo, quam quod patuit  
inter Patrem & Filium. Parlamentum  
illud patrem pro rege suo agnovit & ve-  
neratum est, eique humiliter se submisit;  
istud filium pro sicario, latrone & prodi-  
tore securi per carnificem publicè ferien-  
dum condemnavit. Parlamentum illud  
non solum patri sed ejus natis & posteris  
in æternum fidem & obsequium se esse  
præstiturum promisit: istud non solum  
filium illius patris vita & regno privavit,  
sed etiam totam ejus posteritatem jure  
successionis exclusit. Saltem ex illius Par-  
lamenti verbis luce meridiana clarius est,  
regem non subditum esse Parlamento,  
sed Parlamentum regi. Non enim ibi Rex  
Parlamento se submittit, sed contra. Non  
rex in eo Acto se profitetur obsequentem  
& fidelem subjectum esse Parlamento, sed  
è contrario Parlamento illius Senatores,  
tam Ecclesiastici quam sæculares, unani-  
mi consensu dicunt, *humillimo modo se*  
*obsecrare excellentissimam ejus Majesta-*  
*tem ut ad instar memorialis ad posterita-*  
*tem omnem, inter recorda summa ejus*  
*Curia Parlamenti, in perpetuum perma-*  
*nendi, sua fidelitatis, obedientia & cor-*  
*dialis humilisque affectus, publicari & de-*  
*cla-*

clarari possit in illa suprema Curia Parlamenti, & ejusdem autoritate in Acta referri. Ubi etiam notandum est, dixisse illos, *Summa tua Curia Parlamenti.* Quod etiam ferè in omnibus aliis statutis & Actis Parlamentariis, quæ sub prioribus regibus facta sunt, observare est. Unde igitur tanta tam brevi tempore mutatio? An Rex Jacobus hæredem populum suæ potestatis fecit, sola regis appellatione filio relicta? Non enim jam quæstio est scilicet an Parlamentum sit supra regem, sed non amplius dubitatur quin populus, id est minuta plèbes cerdonum & opificum, sit superior tam ipso rege quam Parlamento. Hæc non ipsius Parlamenti dictata sunt, sed sceleratorum Triumvirorum Soceri Generique, & ab his dependentis tertii, militum ducis summi. Hi, quam olim Rex habuit in Parlamentum suum autoritatem, nunc rege sublato soli possident. Hi sunt qui negant regnum Angliæ hæreditarium esse. Nec ergo transmittent ipsi ad posteros suos eam quam usurparunt tyrannidem. Hi sunt qui populo summam potestatem tribuunt. Ergo populus ad eos quoque injusta possessione regni deturbandos sua potestate utetur. Hi sunt qui dicunt tam  
regem

regem quam Parlamentum à populo eligi. Quis ergo eos elegit? Non sanè populus, non Parlamentum, sed ipsimet se vi & armis, oppressa populi ac Parlamenti libertate, in regis sede constituerunt. Male partum cito etiam dilabetur. Sed interim omnia quæ supra produximus argumenta & testimonia prorsus evincunt, reges Angliæ, reges esse per inhærens jus genituræ, per naturam, per Dei legem, & per terræ legem. Meritoque omnes tam Saxonici Danicique quam Normannici generis reges se Dei beneficio & gratia reges esse in Actis & Edictis proscripserunt, non populi. Eo jure Monarchico non solum usi sunt qui à Gulielmo descenderunt, ut ex Actis & Statutis Parliamentorum diversorum supra probavimus, sed omnes Gulielmo anteriores, ut constat ex legibus Sancti Eduardi cap. xvii. Anno Christi 1066. Ubi loquens de regibus qui ante Gulielmum Conquæstorem regnarunt, ait, *Regem quia vicarius summi regis est, ad hoc constitutum esse ut regnum terrenum & populum Dei sanctamque ejus Ecclesiam regat.* In re quæ tot regum successione, qui eadem potestate & eodem jure imperarunt, comprobata est, tot & tantis testimoniis autorum Angliæ &

Acto-

Actorum Parlamenti confirmata, non necessaria conquirere argumenta stulti laboris esset, nisi negotium nobis esset cum Fanaticis hominibus & sceleratis, qui parricidiale facinus haud alia ratione defendere possunt, quam negando regem esse regem, atque affirmando regium jus esse officium fideicommissarium & fiduciariū. Certè æquè sana mente inficiari possunt solem in caelo lucere quem omnes vident, ut pernegant regnum Angliæ esse hæreditarium, & pertendunt electione & suffragiis dari solitum, quod aliquot supra mille annos sæculis nemo nescit à patribus in natos perpetua succedendi serie fuisse devolutum, & cum familias dominantes aliquoties mutaverit, semper tamen fixum & immotum jus hoc successionis in regnantibus durasse. Huic tamen falso fundamento de regno per electionem deferri in Anglia consueto, falsam etiam doctrinam novamque superstruxerunt, tradentes *Protectionem* ex parte regis & *Subjectionem* ex parte subditorum invicem sibi respondere, & proinde ubi rex protectionem subditis non præstat, nec subitos subjectionem debere regi. Quod in regnis suffragio deferendis & vitæ ejus cui deferuntur, æqua-

æqualibus fortassean locum habeat, non in his quæ alia via acquiruntur, & quæ ad eundem modum quo quæsitæ sunt, jure ipso transeunt ad posteros & in hæreditate ejus manent qui primus ea adeptus est. Præterea non semper in rege culpa hæret ne officium suum protectionis populo exhibeat. Sæpius ipse populus in causa est; dum auctoritatem imminuit regis sui, dum potestatem ejus, quantum in se est, abrogat male parendo, obsequium denegando, rebellando, aut rebellionis principum suffragando. Per eunte quippe obsequio ex parte subditorum, intercideret auctoritatem ex parte regis necesse est. Ea auctoritate vel diminuta vel planè deperdita non potest rex protectionem quam debet, præstare, quæ versatur præcipue in malorum coercitione & bonorum defensione. Ne hostem quidem externum potest repellere & bella intestina prohibere si auctoritas ejus in artum redigatur. Profecto ut malus sit rex, non raro malitia & improbitas subditorum facit. Sæpenumero nimia principis indulgentia contumaces eos reddit. Ita cum nimis indulgentem nacti sunt parentem liberi, facilitate ejus abutuntur. Atque ubi ille auctoritate sua semel exci-

dit,

dit, nati in omne nefas ruunt, ex concu-  
cato patris imperio. Quod idem crebro  
populis certum est evenire, cum in boni-  
tatis excessu peccantes dominos incide-  
runt. Ad hoc ipsum, nempe ut in officio  
contineatur immorigera plebs, arma e-  
tiam regi necessaria sunt. Eorum ope pa-  
cem & quietem in regno tuetur, impro-  
bos coërcet, bonos defendit. Ideo & gla-  
dium eum gestare, Paulus asserit. At gla-  
dium suæ Regi eripuerunt qui militiam ei  
abstulere, conscii nempe suæ rebellionis  
eo gladio iuste puniendæ. Non malus est  
pater qui castigat liberos suos, nec malus  
Rex qui ad castigationem malorum sub-  
ditorum gladii jure sibi à Deo dati utitur.  
Sed quamvis malè id agant, qui subjectionem  
quam debent, non præstant, prote-  
ctionis in his vicem & quidem optimæ ha-  
bet coërcitio. Hæc enim prohibet popu-  
lum contumacem, ut oris tenacis equum,  
in præceps ruere. Insanus interdum filius  
dementiae patrem accusat. Et populus in-  
terdum non præstitæ protectionis & ma-  
letractationis regem suum arcessit, quam  
ipse provocavit. Testes sint Angli qui  
reum læsæ majestatis Carolum fecerunt,  
quod crimen ipsi commisere quale in re-  
gem non cadere certum est. Leges enim  
omnes

omnes humanæ divinæque constanter  
fanciunt regem etiam male imperantem,  
nulla protectionis non impletæ vetante  
conditione, ferendum esse. Pactio quam  
fungunt inter regem & subditos interce-  
dere, non minus futilis est. Certe nulla  
est in imperiis vi armorum partis, qualia  
sunt hodie ferme omnia. Nihili quoque est,  
immo ridiculum est argumentum quod  
afferunt, regna ante reges fuisse, quasi  
dicas lucem ante solem extitisse. Non e-  
nim reges à regnis, sed regna à regibus.  
Pone populum vagum, dispersum, libe-  
rum, in unum coisse ut consultet de re-  
ctore habendo. Inter dissidentes senten-  
tias, si pluribus unicum habere placuerit,  
is rex erit; & regius status talis Reipubli-  
cæ, regnumque, ditio vel tractus terræ  
intra quam potestatem exercebit, appel-  
labitur. Si paucos ad gubernandum deli-  
gi federit, is optimatum erit status: si  
plures qui in commune debeant consule-  
re, popularis habebitur. Ergo reges ante  
regna, non contra, fuerunt. Ut tandem  
hoc caput concludam, qui regem in comi-  
tiis regni viderunt, folio excelso seden-  
tem, sub aureo & serico cælo, cum omni-  
bus summæ potestatis insignibus, sceptro,  
corona, gladio, manu justitiæ, ut vocant,



miror eos indubium vocare potuisse, utrum penes regem an penes Parliamentum majestas sit. Quod si penes Senatum esset, Monarchicum Angliæ imperium non foret, quale tamen esse inter omnes legum prudentes & autores rerum Anglicarum convenit. Eduardus Cokius quem *oraculum legum* vulgo nuncuparunt, in libro de jure regis Ecclesiastico sic scribit: *Iuxta igitur leges hujus regni antiquas hoc Angliæ regnum absolutum est imperium, ex uno capite videlicet Rege, & corpore politico compacto & composito ex membris distinctis plurimis & fere infinitis, nihilominus inter se coherentibus consistens. Quæ omnia lex bifariam in Clericos & Laicos dividit, qui utrique proxime, & immediate sub Deo, suo capiti subjiciuntur & obsequuntur.* An aliquis est qui jam defendere velit aut possit, Parliamentum caput esse regni, regem ei subjici debere tanquam suo capiti & obsequi? Hoc præter fanaticos & rebelles nemo dicturus est. Camdenus summus rerum Anglicanarum autor in libro de Britannia scribit, *Rempublicam Anglicanam constare ex Rege sive Monarcha, nobilibus, civibus, ingenuis & opificibus.* Deinde subjicit, *Rex quem Saxonico verbo majores nostri Kyninge,*

*nos contractius Kinge appellamus, supremam potestatem & merum imperium apud nos habet, nec in imperii clientela est, nec investituram ab alio quovis accipit, nec prater Deum superiorem agnoscit. Qui plura ad hujus quæstionis definitionem, eorumque quæ diximus probationem requireret, in medio flumine aquam potest quærere, & in medio solis lumine lucem.*

---

## C A P V T X.

**H**Actenus visum satis, satisque dictum est, regem fuisse, quem Angliæ perduelles, nefario parricidio, infando iudicio, inaudito exemplo, indefensum & inauditum, publico supplicio per carnificem securi percusserunt. Eam nempe regiam Majestatem sic tractarunt, quam ex legibus divinis & humanis nefas erat ullo dicto vel facto violari. Cujus nomen sanctum magnumque apud omnes gentes semper fuit vel ab ipsis orbis conditi primordiis. Quam Deus ipse tam in veterè quam novo Testamento à se constitui & per se regnare dixit. Quam per Apostolos suos honorandam præcepit. Quam primi Christiani vestigiis magistri

insistentes & mandato ejus obsequentes, quamvis tyrannico dominatu religionem cui sacramentum dixerant persequentem non solum tulerunt, sed etiam coluerunt. Pro cuius salute & diuturno imperio Deum solenniter & publice semper precati sunt. Cui denique in ipso prælii certamine arma forsitan lateri suo hæsus ferenti hostes ipsi armati apud gentiles parcere consueverant, quia scelus esse credebant regem vel hostili animo contra se pugnantem interficere. Cæsar juvenis adhuc & Quæstor, quamvis in Republica natus & educatus, cum amitam defunctam laudaret pro rostris, dixit, *In genere ejus esse & sanctitatem regum qui plurimum inter homines pollent, & ceremoniam Deorum, quorum ipsi in potestate sunt reges.* Huic regum sanctitati duæ hodie sanctitates in orbe Christiano infestæ maximeque infensæ reperiuntur. Papalis & Independentalis. Papalis hoc saltem melior quod eos retinet & observat quos sibi addictos esse cognoverit. Independentalis sine discrimine omnes bonos malosque tollit, & nullos suos esse vult. Ideo eum regem interfecit, qui regnum populo non debebat sed generi, quem non electio solido impo-

fuerat sed hæreditas, cui jus successionis

hoc

hoc dederat, non suffragium Senatus nec  
judicium exercitus. Qualem illi sancti  
Rebelles regem trucidarint, morte ipse  
melius declaravisset, quam vita videri pos-  
set significasse, nisi & vitæ testimonium  
mors ipsa reddidisset. Sic moriens non in-  
nocentiam tantum suam mundo approba-  
vit, sed nocentes judices suos fecit. Non  
autem aliter potuit, quamvis nocentissi-  
mus fuisset, nisi pro infante perire & ini-  
qui iudicii crimen suis condemnatoribus  
impingere, qui nec defensus nec auditus  
perit. Carolus sane qui ita mortuus est,  
non potuit hanc de se opinionem relin-  
quere quod male vixerit. Mortem plane  
egit vitæ respondentem. Qui perduelli-  
bus suis tam facile tam libenter ignovit,  
cui homini videri debuit male imperare  
voluisse. Quam sollicitum se esse osten-  
dit de salute ingrati populi ac rebellis, no-  
vissimis verbis quæ de infami & noxio pe-  
gmate pronuntiavit! Si homines illum ad-  
eo pie & sancte extrema sua disponentem  
& tam constanter, tam secure animam  
creatori suo reddentem spectassent, ali-  
quo non dicam pietatis affectu, sed hu-  
manitatis sensu tacti, ad tale spectaculum  
inhorruissent. Sed belluæ & feri molossi  
hominum facie & habitu, sub carnifice

expirantem iisdem oculis & eodem animo viderunt, quo ignominiosam mortem immerenti & quidem regi suo ipsi subditi irrogarunt. Nunc ad eam quaestionem pervenimus qua tractandum est quinam fuerint rebellionis illius & condemnationis præcipui autores, quæ Anglis, Scotis & Hibernis optimum regem pessimo facinore abstulit, & tria hæc regna magnæ Insulæ sub uno rege florentia quondam & beata, tot ruinis, stragibus & incendiis miscuit. Nam si constaret, ab universis trium harum ditionum populis unanimi consensu regem vita & regno fuisse decussum, vix Caroli defensores haberent, unde memoriam ejus à calumnia male administrati imperii vindicare possent. Nam persuadere cuiquam difficulter posset non illum multis criminibus & sæva tyrannide populorum suorum odium meruisse, qui sic omnium iudiciis premeretur. Tunc non alia suppeteret ejus defendendi ratio præter generalem illam, quæque competeret etiam male & injuste dominantibus principibus, ut dicatur ex divinæ legis regula, regi quantumvis tyrannicè imperanti subiectos omnes dicto obediētes esse debere. Non licere, ne quidem contra tyrannum;

arma populo capere & bellum ei indicare, aut quicquam facere vi vel dolo, quo gubernaculum regni ipsi extorqueatur. Præter hanc justissimam verissimamque atque omnibus regnantibus communem defensionem, alia peculiaris ac propria Carolo regi debetur, quæ ne ipsi quidem, tametsi de regio suggestu in privati conditionem redigeretur, denegari posset. Ea nempe est qua contendere jure potest, ne privato quidem ad necem & capitis condemnationem nocere illa potuisse quæ sunt objecta regi crimina. De quo postea videbimus. Id ergo quæri jam dignum est: Cur Rex planè innocens, populi sui amans, cætera pius & sanctus, pro nocente condemnatus sit & supplicio affectus, cum in hanc condemnationem non centesima pars populi, non millesima consenserit, non centena millesima. Primum de tribus regnis quæ uni parebant, unum tantum culpam hujus necis sustinet. Deinde regni illius Senatus, cum ex tribus ordinibus esset compositus, Ecclesiasticorum, nobilium sive optimatum, & plebejorum, nullus Ecclesiasticorum assensum suum huic rebellionis accommodavit. Quin è contrario hic ordo primus hujus rebellionis fu-

rorem sensit, ab ipso Senatu ejectus, proscriptus atque è regno exterminatus. Senatus alter ordo, autoritate & dignitate potior, qui in proceribus consistebat, id est Ducibus, Comitibus, Vicecomitibus & Baronibus, etiam statione sua dejectus est, nec aliam partem in conspiratione rebellionis habuit, quam quæ in patiendò non in faciendò versatur. Regem non condemnarunt, sed cum rege condemnati sunt. Si unam omnes illi nobiles cervicem habuissent, statim post regem securem infamem carnificis trunco impositi sanguine suo cruentassent. Quod potuit fieri, latius sparsum est in plura capita supplicium, & quomodo potuit. Aliis exilium & fuga pro securi fuit, aliis ipsa securis contigit, alii ad plebeitatem redacti dignitatis detrimento vitam redemerunt. Tertia & infima Senatus pars plebeia & vilia capita habuit, & cum his minorum gentium aliquot nobiles ab urbibus deputatos. An omnes ex hoc inferiore ordine & loco Senatores subscribere capitali sententiæ, quæ Regem carnificis ferro supposuit? Etsi omnes subscripissent, ne sic tamen justa vel æqua videri potuit. Non una quippe nec deterrima portio Parlamenti hanc potestatem



tem sibi vindicare debuit regis sui iudicandi & condemnandi, cum nec totus Senatus ex tribus regni ordinibus collectus id juris per leges quibus regnum stat & semper stetit, habuerit. Atqui ne tota quidem hæc ipsa pars ad sententiam de regis capite ferendam admissa est. Multi ex his expulsi, fugati, in carcerem tracti. Partis hujus pars aliqua tantum remansit quæ selecta est ac destinata huic funesto & parricidali operi perficiendo. Sed quis eam selegit? Quis destinavit? Quis de illa tantum potuit, & tantam ei potentiam attribuit, ut contra totius Senatus consensum, contra populi votum, nobilitatis voluntatem, audax & desperandum facinus aggredi posset & perficere? Hoc vero est quod quærimus. Nec sane diu quæremus. Nam in promptu est, & vel non quærentibus occurrat, exercitum Anglicanum fuisse, qui hæc omnia peregit. Qui regem in potestatem suam primum redegit & captivum deinde modo hoc modo illo carcere inclusit. Qui Senatus superiorem domum ex nobilibus & proceribus constantem occlusit, atque hunc ordinem sustulit e Republica. Qui inferioris domus ordinem quam plebei generis ho-

mines componunt,decimavit. Qui quod voluit postea fecit. Qui tribunal summum instituit, & erexit ut de regis accusatione cognosceret, & inauditum & indefensum postremo condemnaret. Qui sententiam in eum latam executioni mandavit. Qui nunc regnum possidet. Qui Senatui quasi captivo imperat, & cum tyrannicam dominationem in Anglia exerceat, populo tamen persuadere conatur libertatem se illi multo sanguine suo comparasse. Qui cum Rempubliacam non tractim sed uno veluti ictu exhausserit, vult tamen videri se ejus conservatorem sospitatorem ac custodem esse optimum & fidelissimum. Cæterum ut sæpe in collegio unus qui cœtui præfidet, totum conventum ad id quod cupit, movet ac ducit, ita in exercitu quod à militibus fit, merito semper ipsis ducibus imputari solet, qui gregarios & manipulares incitant per tribunos & centuriones quos in potestate sua habent. Dicendum ergo de isto exercitu & de ejus ducibus, quomodo ad tantam pervenerint autoritatem ac potestatem ut regem primo, deinde & Senatum, postremo & regnum universum sub jugum mittere sibi que subjicere potuerint. Ex quo homi-

hominum genere collectus sit, cujus sectæ homines sint qui tunc militiæ nomen dederunt, quam religionem tam ipsi, quam eorum duces profiteantur, commemorabimus. Sic enim ex illis præcognitis occasio mirandi multis adimetur, qui factum sit ut tanta rerum conversio in Anglia acciderit. Causæ quippe veræ eorum motuum aperientur quæ hanc mutationem induxerunt. Dicetur quomodo Rex à subditis suis bello laceratus, victus, deditus, in carcerem conjectus, è carcere ad causam capitis dicendam tractus, supplicio affectus, regnum quadraginta tyrannis reliquerit. Hi sunt qui populo illudentes & insultantes libertatem vocant quæ tyrannis est. Qui pro beneficio illi imputant datæ publicæ salutis, quod in propriæ dominationis bonum fecerunt. Exercitus hic rebellium subditorum fuit qui ad bellum regi inferendum conquisitus & comparatus est à Senatu Angliæ, ut regem suum in ordinem cogerent, atque autoritate regali, id est majestate, nudatum ac penè privatum constituerent, planeque destituto similem. Longa est injuria, longæ ambages, quæ melius in Annalibus hujus regni legentur. Ea tantum hic persequi statui quæ  
ad.

ad causam pertinent, ac summa tantum rerum fastigia tangere: ex quibus perspicuum fiet, penes quos precipue crimen hæreat regis interempti, & tam scædo supplicio addicti. Qui priores bellum illud contra regem suum moverunt, non eum fortasse finem animo proposuerunt quem dedit eventus. Hic ut non responderit eorum votis, ut tamen talem exitum res & Rex fecerint in causa ipsi fuerunt. Ita libet sane credere. Quod aggressi sunt contra regem si id in voluntate eorum stetisset, citra mortem ejus constitisset. Fortasse an nec regno eum depulissent, si libertatem pergendi ut cœperat retinuisset. Quem admodum autem avis ubi viva capta est, accisis pennis avolare prohibetur, ita & regem ne tota sua autoritate uti posset, parte aliqua eam imminuere in animo habuerunt. Et quoniam non videbatur libenter hoc eis concessurus, quò vel invitùs id pati cogeretur, vi & armis fuit tentandus. Quæ ab eo petebant modica erant & mollia nimirum, nec difficultè à rege impetranda, ut militiam dimitteret, tamquæ in Senatus potestatem traderet, ut Parlamentum perpetuum esse permetteret, Episcopos jam contra ejus desiderium exauctorarent. Liturgiam à Reformationis usque

tem-

temporibus primis probatam in Anglicana Ecclesia & receptam abrogaverant. Cum partem abnuisset, partem concessisset, non dimidio contentis qui totum voluerant, sic ad arma itum est. Sed in his Rex capiendis, qui jura tantum sua defendere cogitabat, non primus fuit. Ita latronem viator non aggreditur, sed si potest, si gladium habet, eo vim sibi factam repellere conatur. Rex ad hunc modum cum se peti videret, & id agi ut sibi præter nomen nihil relinqueretur quo Rex esse posset videri, jus imperii & majestatem qualem à majoribus suis acceperat conservare ac tueri contendit. Quo in negotio si aequè felix fuisset, ut bonam causam justè defendebat, hodie patrio solio sederet, & eorum qui nunc ejus loco regnant capita summis hastis præfixa supra fastigium turris Londinensis, aut aulae regiae, aut ædium Parlamenti, è longinquo visentibus conspicerentur. Sed victus ille, deditus, captus cum in potestatem rebellium subditorum venisset, carcere ab his inclusus, expectabat quid de se hostes sui facturi essent. Fortasse autem qui tunc eum captivum detinebant, si semper tenere potuissent his conditionibus dimisissent, ut rex tantum esset nomi-

ne,

ne, res ipsa regendique arbitrium sibi  
permitteretur. Sunt qui putant in perpetua custodia fuisse ab his servandum donec fatum aut natura de ejus fine decrevisset. Sed de eorum proposito non est qui possit aliquid certi definire, nisi ad hariolos eat, aut ipse divinus sit. Illud constat in conjuratione quam fecerunt invicem Angli & Scoti pro defensione prærogativarum ac privilegiorum quæ prætendebant contra Regem, solenni conventionem & jurejurando promisisse, se regis majestatem comiter esse conservaturos, ut qui personam ejus omni modo incolumem & salvam vellent. Sed idem quoque sæpius constat eos juravisse, qui contra jus & fas, legesque humanas & divinas ac proprium sacramentum, cervicem illi per carnificem defecerunt. Interea Rege debellato & in carcerem detruso, cum jam pax & securitas ubique in regno speraretur, nusquam motus aut belli metus esset, armis undique quiescentibus aut cessantibus, nihil restabat nisi ut copię dimitterentur. De hoc dum deliberatur & pecunia prospicitur ad stipendii reliqua militibus persolvenda, duces exercitus qui secta Independentes erant, & in sua potestate habebant quodcunque erat

Presby-

Presbyterianorum militum in numeris, rationem excogitarunt, qua missionem exercitus quæ petebatur ac parabatur possent impedire. Nihil quippe magis rationibus suis expedire judicabant, quam ut ne dissolverentur copiae militares, sed sub iisdem ducibus ac signis manerent. Sic potentiam tremendam adversariis suis se acquirere, & leges Senatui ac regno facile posse dare. Quod pronum fore, regis autoritate prostrata, ipso captivo, si Senatum in leges suas possent addicere. Id etiam in proclivi visum armatis contra inermes, & quia plures in ipso Senatu sectæ & factioni suæ faventes & ad dictos haberent. Si qui adversarentur, posse expelli, donec in domo Communium nemo remansisset, nisi Independentens aut Independentibus obnoxius. Scoti qui Angliæ sinum tum persultabant, & timeri poterant, persoluta his quæ debebatur pecunia, in patriam remissi. Quibus porro artibus, fraudibus, dolis, strophis, machinis perfecerint antesignani Independentium focer generque, post exercitum totum sibi conciliatum, Senatum in partes vi transire coactum, ut regem ipsum quoque postremo redigerent in suam potestatem, dici vix potest.

Hunc



Hunc si haberent, si de ejus vita possent disponere, si fata ejus dispensare, nihil amplius reliqui fore, quin omne quod animo destinarant exequerentur, nihil esse quod ut contrarium suis votis timere deberent. Diu ante ne quis in exercitu esset de cujus fide dubitarent effecerant, expunctis non solum manipularibus, sed etiam centurionibus & tribunis quos parum suffragari sibi scirent, eorum loco succenturiatis aliis suarum partium sectæque. Sed idem quoque in Senatus domo inferiore, quæ *Communium* dicitur, efficere tentarunt. Nec eventus optatis defuit. Undecim præcipuos curarunt inde ejiciendos, hoc colore quod exercitus dimittendi auctores fuissent. Nihil autem magis præter votum esse tum militibus noverant quam ut dimitterentur. Hac arte tam esse inimicos eos exercitus facile omnibus militibus persuasurunt qui urgebant eorum missionem, quam amicos qui eam nollent. Sic suos fecerunt. Eadem via quoscunque e Senatu ejici voluerunt expulsi sunt, hoc obiecto quod militares copias sub signis manere non probarent. Restabat Rex, qui cum captivus in carcere Senatus custodiretur, non difficile fuit hunc illi eripere,

cum in exercitu totum possent, in Senatu  
plusquam dimidium. Vis & ars suas quo-  
que partes hic egerunt. Vis ad id valuit,  
quod invito Senatu ex ea custodia in qua  
ejus jussu tenebatur, rex extractus est.  
Ars in hoc profecit, qua persuaserunt Re-  
gi sic ipsi fore consultius ac tutius si de ar-  
tiore carcere in custodiam liberio rem tra-  
duceretur. Et revera libertas primo qua-  
lem potuit desiderare illi indulta est, non  
ut quo vellet ambularet, sed tantum ut  
longiorem quasi catenam traheret. Multi-  
tum ex regis amicis gaudebant mutatio-  
nem hanc fortunæ regiæ tanquam in me-  
lius factam accipientes, pluribus tamen  
minimè dissimulantibus sed aperte ipsi  
insinuantibus parum ei notas esse Inde-  
pendentium fraudes. Hanc falsam regis  
libertatem in aliquod magnum ejus ma-  
lum & perniciem esse aliquando eruptu-  
ram. Non enim de nihilo tanto ambitu  
pessimos hominum affectasse, ut regis  
domini essent, qui jam & exercitum &  
Senatum sub suas leges misissent. Socer  
ipse supra mortales ceteros juxta audax  
& callidus, nec minus leonina pelle quam  
vulpina prout res posceret uti solitus, ne-  
gabat se conscium illius facti fuisse quo  
Rex Senatus custodiæ exemptus fuisset,  
caput-

caputque uxoris & liberorum devovebat inferis si sciens mentiretur. Nihilofecius homo qui fuerat ejus satellites, ob ministerium fideliter & prompte in ea re præbitum satis amplam eo procurante retulit mercedem. Jam tenemus, ne rem notam amplius quærere necesse sit; Independentibus esse qui exercitum victorem suorum sectariorum numero repleverunt, qui ejus opera postea Senatum vi oppresserunt suumque fecerunt, qui postremo regem quoque ipsum de captivo magis ut esset captivus præstiterunt. Nam ad solitam illam sibi mentiendi artem decurrerunt ut de laxiore custodia in artio-rem rex miser pariter & miserabilis quasi sua voluntate traduceretur. Persuaserunt ipsi quosdam esse qui in necem ejus conjuraverant. Nolebant autem in loco illum tam urbi propinquo versari. Ita Rex assensus est se alio traducere gesti-entibus, dum iis credit ad locum magis liberum se esse deducendum. Illi vero in insulam Vectim clandestino eductum deportarunt, & angusto carcere clauferunt. Inde & in alium tetriorem transtulerunt, donec & inde extractum, ad supplicium rapuere. Sed priusquam hoc tentarent, urbem Londinensem armis occuparunt,

& tum demum regi diem dixerunt, instituto tribunali ex judicibus caligatis coram quibus accusaretur, & à quibus indicta causa nec defensus capitis damnaretur. Cæterum jam tempus est, ut expediamus quale illud genus hominum sit, quam religionem profiteantur, vel potius quid in religione sequantur. De adversariis quoque eorum Presbyterianis videndum, an nefario judicio condemnati regis penes Independentes solos omne crimen residere videatur, & an nullam hujus culpæ partem se sustinere ipsi Presbyteriani bona fide & pura conscientia possint confirmare. Enimvero, si res ipsa ponderibus suis & momentis rectè æstinetur, finis ac exitus facti nefandi ita Independentibus imputari omnino debet, ut principii & progressus gloriam Presbyteriani sibi possent vindicare, si rem tam laude dignam peregissent, quam certum est omni execratione damnandum facinus fecisse. Ab illo principio ad hunc finem facile fuit pervenire, his præcipuè qui plusquam dimidiam itineris partem confectam à Presbyterianis invenerunt. Quod scenæ fuit reliquum usque ad exodium tragediæ, Independentes absolverunt. Sed ad quartum actum & ultra in dramate

hoc

hoc, defultando frigultientes Presbyteriani spectati sunt. Solum quintum & ultimum actum sibi perficiendum sumpserunt Independentiæ histriones, prioribus explosis & exhibitis actoribus. Hi fortasse non adeo feralem & tragicam catastrophem fabulæ imposuissent. Ut tamen cœpta erat agi, non alium quam atrocem & regi funestum fortiri exitum potuit, cum hujus qui datus est causam ipsi primam præcipuamque dedisse videri debeant. Drama quippe illi integrum composuere, quod ut congruente initiis & mediis clausula finiretur, non aliam habere potuit quam quæ regem, si non vitam & regno depulsum, saltem omni auctoritate & potestate regali destitutum exhiberet. Et quinam alii merito regis occisi crimine notari magis debuere, quam qui viam ad eum occidendum munierunt? Illi sunt qui nefariam illam securim cervicibus ejus inflixerunt, non alii. Si latro viatorem per sylvam transeuntem insidiis exceperit, gladio discinctum, & crumena spoliatum, vestimentis etiam postremo nudatum, ut plerique faciunt, ad arborem religaverit, & fera sylvestris de nocte superveniens, ac miserum sic revinctum offendens invaserit, laniaverit &

consumpserit, cui debet adscribi mortis  
ejus causa? latroni an feræ? Ille amovit  
ensem viatori quo se defendere poterat, &  
insuper vinctum dilacerandum lupis ob-  
jecit. Ergo ille potius titulum hujus cæ-  
dis quam bellua feret. Mutatis nomini-  
bus hæc fabula Presbyterianis convenit  
quoniam res eadem est. Illi aliquot annis  
ante omnibus modis per varias petiti-  
ones jus regis imminuere & auctoritatem  
ejus infringere moliti fuerant. Diversa  
primo tentamenta impenderunt, quibus  
regem eo perducere nitebantur ut suis  
satisfaceret desideriis, eo colore & præ-  
textu, quasi nihil aliud animo postulatis  
illis agitarent, quam ut regem magnum  
& gloriosum redderent, & tam suis carum  
quam exteris timendum. Sed non diu in  
his fictis blanditiis manserunt, statimque  
atrociore stylo eas mutarunt, præten-  
dentes nullam se injuriam regi facere quia  
non fieret digno. Nihil ei se ademisse quia  
nihil proprii haberet. Alias deinde voces  
contumeliosas regi in vulgus sparsere, &  
illis ipsis libellis quos nomine Senatus Re-  
gi porrigebant, insertas publicarunt.  
Quod felicitas regni non ab eo pendebat,  
nec ab ejus stirpe. Se supra regem esse, &  
posse de rege facere quod ipsis placitum  
esset.

esset. Posse etiam intra fines modestiæ  
agentes eum destituere. Ad Senatum  
pertinere de omnibus quæ ad regni salu-  
tem & bonum publicum spectant, dispo-  
nere vel citra regis consensum. Teneri  
regem ad omnes libellos, sive schedulas,  
*Billas* vocant, quæ ipsi à Senatu offerun-  
tur, favorabiliter respondere. Si qui es-  
sent in Senatu qui vetera regni instituta ac  
leges retineri ac jura regis defendi debe-  
re contenderent, pro hostibus & prodi-  
toribus eos habere, & *Malignantium* no-  
mine & crimine denotare. Postremo li-  
bro edito sub titulo Admonitionis, sive  
Declarationis *Dominorum & Commu-  
nium* in Parlamento congregatorum  
xxvi. Maii anni cIoIo c xlii, aperte quid  
sentirent de regis autoritate & maiestate,  
aliquot perduellionem spirantibus & in-  
sanis positionibus facti sunt: *Quod penes  
ipsum potestas sit legis interpretanda, &  
quidquid statuerint ita explicari & esse  
oportere, non debere in dubium revoca-  
ri neque à rege, neque ab ullis subditis re-  
gis, ita ut salus & incolumitas regis & po-  
puli in ipsis sita sit, & à suo arbitrio pen-  
deat. Quod nulla exempla vetusta vel re-  
centia præjudicium suis deliberationibus  
& actionibus afferre queant, quia libere*  
quod



quod liberet facerent. Quod Senatus de quocunque negotio potest statuere in quo Rex vel subditi ius aliquod se habere intendunt, ad publici boni rationem: quia sine rege Parlamentum potest de bono publico judicare, nec ad hoc iudicium ferendum necessarium videri regis assensum. De vita quoque & libertate subditorum & de omnibus legibus latis ad eorum securitatem tuendam, posse quod velit, pronuntiare, easque abrogandi ius habere, si maior pars utriusque domus consentiat, quovis tempore, modo & quibuslibet rationibus, nec regem habere eos protegendi potestatem. Quod nemo ex utriusvis domus personis possit vexari aut accusari ob perduellionem aut crimen quodcunque majestatis, nisi prius causa disceptata esset coram ipsis, ut de facto ante cognoscerent, & accusatores postea procedere posse contra criminis reos postquam ipsi potestatem accusandi & iudicandi nocentes eis dederint. Postremo quod suprema potestas in utraque domo Senatus hareat, & quod Rex suffragium non habeat abnutivum; Vocant ipsi vocem negativam. Quid aliud his omnibus petebant, quam ut ius omne Imperii & majestatis Regi eriperent, & solum nomen relinquerent? Ita aliquis  
e fracta

ē fracta nuce nucleum sibi ſervat, putamen ſocio dat. Sed quod magis mirum eſt, dicta illa non factum ſubſequutum eſt, ſed poſt factum dicta denuntiata ſunt. Ut ſunt quædam genera canum quæ non latrant niſi poſtquam morſu tranſeuntēs appetierunt. Admonitio illa regi oblata eſt, cum jam Hullæ oppidi portas Hothamus præfectus cuſtodix ejus appoſitus, ipſi venienti occluſiſſet, qui à Senatu ut hoc faceret, tale mandatum acceperat. Quid Rex pati poſſet aut vellet, hoc primo rebellionis experimento cognoscere concupiverunt. Jam Rex antea poſtulatīs eorum ejusmodi plurimīs, quamvis injuſtis indulſerat, inter alia de trienniali Parlamento quādiu placeret ipſis ſtare permiſſo, quod in perpetuum conſeſſum facile ex eo degeneraturum apparebat. Quā in re dici non poteſt quantum ſuo juri & imperii majeſtati decedere Rex ea indulgentia paſſus ſit, cum nullus prædeceſſorum ejus, neque ante neque poſt Guilielmum Victorem, tale quidpiam ſuis ſubditis conſeſſiſſet. Sed ut inter edendum creſcit ipſa edendi aviditas, ita ab iſtis modum & menſuram excedentibus regis conſeſſionibus, majora adhuc petendi & impetrandi occaſionem,  
quæ-

quæ siverunt. Nihil modesti postea sperare aut spirare, sed subinde veterem rebellionem novis rebellionibus contegendo, ne perpluerent scilicet, ad extremū vi aperta contra regem suum grassari cœpere, sumptis armis & exercitibus conscriptis. Contra manifestam & confessam rebellionem jam armatam, jam in campum descendentem, quid Rex potuit facere nisi & ipse vim vi opponeret, arma armis, bellum bello, & de legitima defensione cogitaret? Quod sero factum, fateri amici ejus coacti sunt, cum prævenire debuisset qui præventus est. Sed dum bonitatem suam approbare indignis subditis contendit, medios in hostes & perduelles delapsus non sensit donec eventus docuit, pia & justa bella, quæque necessitas defensionis extorserit, non semper esse fausta, Deoque interdum securitatem regum minus esse curæ quam ultionem. Ita victus à rebellibus, deditus, captus, in carcerem conjectus, nullum genus est infelicitatis ac calamitatis quod non expertus sit, ut videatur ultima ejus vitæ pars ex perpetua quadam ærumnarum & miseriarum catena esse contexta. In qua maiorum serie indissolubili nova in illum hostium facies exorta est, à Presbyterianis

ad Independentes, ut à Pilato ad Caiphā traducta ejus captivitate. Postremi tamen de prioribus eum videntur vindicasse, dam victores ipsos oppresserunt, ut qui regem unum suumque habere noluerant, tyrannos pati plures fortunarum suarum damno, libertatis noxa, vitæ etiam detrimento ac pernicie nunc cogantur. Quod documentū esse debet populis, quantum salutis eorum intersit & quietis, regum suorum auctoritatem semper illibatam & intemeratam conservare, cum tyrannidis in regno affectores per calcitam regiam majestatem, ad improbi sui voti finem consequendum, viam sibi facere soliti sint. Cujus rei gravissimum & verissimum exemplum præbet id quod in Anglia nuper gestum est. In proculcata quippe per Presbyterianos regis auctoritate sanctæ Independentiæ Hierophantæ tyrannidis suæ fundamentum posuerunt. Quam enim illi pedibus suis tantum premendam & conterendam supposuerant, isti tanquam meliores magistris suis atque audentiores discipuli, ita prostratam nacti, impresso ferro jugularunt. Ita prima rebellionis jure suo sibi vindicant Presbyteriani, postrema Independentes. Sed quivis intelligit, quod nisi illa prima fuissent,

sent,

sent, ista postrema nata non essent. Finis à principio pendere visus est. Et qui exorsi sunt hanc telam, etiam detextæ decus merentur, quamvis aliena opera manus ei suprema imposita sit. Rem ipsam tamen ab alto revolventi, & à capite ipso gestorum seriem deducenti, causasque penitius & primordia reputanti scelerati & nefarii facinoris, tam primam quam ultimam ejus partem Independentibus deberi, facile constabit. Cum enim comparo professionem Parlamenti Anglicani quam edidit cum Rex Jacobus inauguratus est, cum ea quam idem Parlamentum filio ejus Carolo obtulit anno c 15 10 c. XLII, postquam Hullæ portæ mandato ipsius huic clausæ sunt, mirari subit, quanta horum Parliamentorum duorum sit differentia. In priore illos subditos se omnis subjectionis humilitate, obedientia & fidelitate Regi suo profitentur, in isto planè & disertè regem sibi subditum esse oportere pertendunt. Unde ista tropica putamus tam brevi temporis intercapedine accidisse? Num legum imperii veterum aliqua abrogatio hoc fecit, aut novarum sanctio, quæ in contrarium verterit receptas & inveteratas regni consuetudines? An religio mutata hanc etiam animorum

conversionem attulit? Nihil horum. Si dicamus mores populi immutatos, ut ita esse constet, illud tamen quarendum restabit, quæ causa eos depravaverit. Quid obsequium contumacia, obedientiam rebellionem, fidelitatem perfidia permūtaverit? De hoc igitur inquirendum. Nec longe ibimus tali insistendo inquisitioni, ut ad fontem ipsum causamq; criminis hujus & sceleris quod regem cum regno perdidit, perveniamus. Ecce illi ipsi Independentes in via nobis occurrunt, quorum doctrina, quasi tabes quædam, contactu nefando infecit miseram Angliam, odium adversus regem, contumaciam, regii nominis obtrectationem, rebellionem, post omnia, populis ejus insinuando. Hujus doctrinæ hæc summa est, regnum Christi non posse hære nec morari in eadem sede cum regno hominum. Reges omnes quamvis Christianos & fideles, pro Christi inimicis esse deputandos. Neminem quippe posse dari regem tam bonum & justum, quin sit injustus improbus impiusque, respectu sanctorum qui regnum Christi componunt, idemque promovere conantur. Se solos enim verosque esse sanctos, qui proinde nullum regem ferre nec pati debeant, quia fidelium sanctitas &

regum



regum majestas non bene inter se conveniant. Tantum quippe moræ afferri regno Christi, quantum temporis in sæculo reges durant regnantes. Eos verè esse libertatis Ecclesiæ hostes unicos & acerrimos. Hi nisi removeantur, Ecclesiam stare liberam non posse. Hinc igitur incipimus hoc genus hominum quale sit describere, suisque coloribus depingere, qui Carolum primum regem suum Martyrii passione coronarunt. Sanguis ejus sit super illos, cujus innocentia non melius nec certius potest probari, quam ex horum impia & cruenta doctrina, quæ in regibus non aliud crimen novit, quam quod reges sunt, quia nullos bonos agnoscit. Si quod in eorum vita vitium colligere & conquerere aliquando satagunt, id eo fit, quia pudet illos non aliud iis objicere posse delictum, quam ipsum regnandi officium. Ea gratia ne videantur in apertum disciplinæ suæ pestilentis virus effundere, quantum possunt, id celatum cupiunt, variorum criminum quæ dominantibus affingunt, prætextu. In quibus exaggerandis sæpe de festuca trabem vel tignum faciunt, ipsi interea omnium flagitiorum mole cooperti, quæ puritatis & sanctitatis velamento adumbrant. Conscientias enim



delicatas & teneras se habere dictitant, quæ tamen cameli deglutiendi capaces esse possunt, dum culices eliquare se simulant. Reges populariter possunt occidere, & lumbricum è terra prorepentem pede vix auderent premere. Tempus ergo est pandere, unde & quando proruperit inimica regibus secta, & omnis regiminis impatiens. Belli isti sanè Puritani, ut tum vocabantur, sub regno Elisabethæ prodire è tenebris orci & Ecclesiam inde turbare primum cœperunt. Immo Rempublicam ipsam. Non enim sunt minores reipublicæ pestes quam Ecclesiæ. Tria eorum genera numerabant: Qui se ab Ecclesia Anglicana prorsus separabant, qui non totos se ab ea segregabant, & qui licet statum præsentem non probarent, sese tamen ei accommodabant. Isti, ut inter malos, optimi, primi pessimi. Pudet nomina referre quibus appellabantur, sono ipso tremenda. *Separatistarum*, *Non-conformatistarum*, & *Conformatistarum*. Luculentas has appellationes aversus invitusque posui. Separatistarum natio in duas etiam classes dividebatur, à nominibus autorum suorum appellatas, rigidiorum & remissiorum. Illi *Brunista*, isti *Robinsoniani*. Nondum

*Independentium* nomen eventilatum erat. Jacobus Rex in Basilico suo Doro, mores istorum hominum, si homines sunt, egregie & graphice depinxit, & si patrem filius audisset, dum cavendos eos docet, melius rebus suis regnoq; consulisset. Ab hoc genere, inquit, quod cane pejus & angue, de Puritanis loquens, Fili, cave tibi, qui germanæ ac veræ pestes sunt Ecclesiæ & Reipublicæ. Hos nullū beneficium potest obligare, nullum jusjurandum, nulla lex tenere. Nihil spirant nisi calumnias & seditiones; semper altius assurgentes quam debent. De suggestu clamantes sine ratione & sine ulla divinæ Scripturæ auctoritate; quam tamen somniis suis & harionationibus tuendis prætendunt, ut inde regulam conscientiæ suæ fabricent. Deum deinde ibidem obtestatur, se quæ de his sentit, æque veraciter ac bona fide esse dicturum, ac si animi sui sententiam ac voluntatem supremis tabulis confignaret. Se igitur inter montanos latrones & sicarios limitaneos, non tam insignitam insolentiam, neque plus ad omnes excessus licentiæ notabilisque perfidiæ, quam in istis ambitiosis & fanaticis fantasticisque ingeniis reperisse. Postremò pro clausula filium monet his verbis, *Noli*, inquit,

pati, præcipuos horum fanaticorum duces  
in regno Anglia morari, si pacem cupis  
& quietem. Nisi si forte eos ad hoc ser-  
vatos velis, ut patientiam tuam exerceant,  
ut quondam Philosophum sua exercitum  
habuit mala foemina. Si prævidere po-  
tuisset nimis bonus & pacificus Rex, non  
ad exercitum tantum patientiæ molestos  
illos futuros filio suo, sed etiam ad mor-  
tis usque & infamis supplicii patientiam  
cum esse compulsiuros, fortassean jam  
tum eos regno suo extorres in Virginiam  
amandasset, nisi potius in Morboniam  
eos ablegare maluisset. Ut patri nocuit  
nimium pacis studium, & quietis amor,  
ita & filio, qui pestes istas quæ sub duo-  
bus prioribus regibus in Anglia jam in  
tantum succreverant, ad tale increscendi  
augmentum procedere permisit, ut im-  
pedire tandem non potuerit quin sibi ne-  
cem, regno excidium, posteritati suæ  
exitium adferrent. Doctrina tamen eo-  
rum majus etiam incrementum fecit,  
quam natio. Nam plerique Reformato-  
rum qui nomen sectæ non dederant, nec  
in alios disciplinæ ejus articulos jurarant,  
hunc tamen unum videntur approbasse,  
qui reges averfatur & regiae adversatur  
dominationi. Ut enim plebs prona est  
ad

ad novitatem, ægrorum more qui levius  
se morbo defungi credunt, si grabatum  
mutent, quamvis per omnia cubiculi lo-  
ca eandem valetudinem circumferant, ita  
qui ad conciones sacras itabant, avidis au-  
ribus audiebant novos Ecclesiastas hac  
contagione infectos, ac de ambone de-  
clamantes in Regem, in Aulam, in Mi-  
nistros regios. Vitia domus regię vide-  
bant, sua præteribant. Et quanto liben-  
tius & avidius hæc accipi ab insano popu-  
lo sentiebant, tanto ardentius ferebantur  
isti præcones ac tubicines turbarum ad ea  
detonanda, quæ auditoribus suis placere  
animadverterant. Ita facile sparsum, dis-  
seminatum & propagatum in omnes im-  
piæ & pestiferæ ac parricidalis doctrinæ  
virus. Hoc eo blandius intima sensuum pē-  
netrabat, quod ab his instillabatur qui ni-  
hil nisi sanctitatem & puritatem crepa-  
bant, quique his nominibus se noscitari  
præcipuè cupiebant. Primo ab his ad præ-  
textum belli regi inferendi sumptus E-  
piscoporum fastus, & liturgiæ, precum-  
que formulæ quasi parum verbo Dei  
congruentes, & libertati Ecclesiasticæ no-  
xia. Tolle igitur Episcopos petierunt,  
atque aboleri precum solennium pu-  
blicas formulas, Rex in retinendis his &

illis restitavit. Et magnis quidem rationibus, utpote quibus conscientia ipsa verificaretur. Liturgiarum formula probata jam olim fuit plerisque Reformatorum pastoribus, & quidem eorum tam in Gallia quam alibi præcipuis, ut quæ nihil continere videretur pietati & doctrinæ Evangelicæ non congruum. Episcopos invenit Rex cum ad regnum venit, non eos fecit. Tuendi itaque fuere, ne quid sacramento quod cum inauguraretur præstitit, derogatum iret, omnia quæ tum in statu erant, conservandi. Sed fastus in his nimius notabatur. An mansit in Reformatis idem qui fuerat ante in Pontificiis? Cur igitur fastus si retenti cum Reformatio facta est? An etiam accrevit? In ordinem ergo cogendi potius fuere quam tollendi. An ambitione vacui sunt Presbyterianorum pastores? De omnibus non dico, quia & non pauci modesti. Nonne etiam inter Episcopos Angliæ plures liquet fuisse modestia & moderatione commendabiles? Sane & Rex ipse Jacobus fastum illum in Episcopis agnovit ac damnavit, sed nec minus Puritanorum vanitatem exagitavit in eodem libello cui titulus Βασιλεὺς δῶρον. Nam ante omnia filio præcipit, ex equo fugiendam

dam esse *Puritanorum vanitatem*, & *fastum Episcoporum*. Utinam monitis paruiſſet. Sed fastus Episcopalis non tantum poterat ei nocere, quam vanitas Puritanorum poſtea nocuit. Nondum ſatis eam noverat optimus ille Rex. Nullum enim fastum Episcoporum comparandum cum hac ſuperbia Puritanorum ſciviſſet, quæ ad illud uſque inſolentiæ & impietatis faſtigium aſcendit, ut coronam ſucceſſoris ſui & hæredis legitimi pedibus proterendam ſubjecerint, & cervicem ejus ſecuri carnificis ſuppoſuerint. Quis non mallet mille Episcopos cum ſaſtu ſuo, quam unum Puritanum illorum ſimilem qui hodie Angliam tyrannide premunt? Non hic faſtus eſt Diogenis qui Platonis torum majore faſtu calcabat. Non eſt faſtus qui Episcopalem faſtum contundat. Faſtus eſt qui regale & imperiale faſtigium pedibus pulſat. Qui Dei ipſius tribunal conſcendit. Qui de regum capite cognoscit, quod ſolius Dei munus eſt, qui reges ut conſtituit, ita & deſtituere ſolus debet. Ergo inde merito facti *Independentes* pro *Puritanis* & *Bruniſtis*, ſicut ante ſub Eliſabetha & Jacobo nominati ſunt. Nam cum olim reges *Independentes* haberentur, utpote qui

qui à solo Deo penderent; isti qui se  
nunc supra reges collocant; & nullum  
nec in Ecclesia nec in Republica superio-  
rem admittunt; jure suo jam gaudeant  
hoc cognomine. Quod genus unde do-  
mo; qui mores; quæ disciplina; nunc dif-  
ferendum est, si modo verbis comprehen-  
dere dabitur; quod sub una *Independen-*  
*tium* appellatione, sectarum; hæreseon;  
schismaticum nomina & genera delitescant,  
quasi sub umbra opaca ac patula san-  
ctæ Independentiæ recubantia. Omnes  
enim quide hoc conveniant ut magistra-  
tum recusent; tam Ecclesiasticum quam  
civilem, istud amant nomen; & quasi hoc  
uno fœdere conjurati inter se sociantur;  
quamvis in aliis dissentiant. Nec mirum.  
Quotquot sunt Aedilem meruentes dis-  
ciplinæ; quæque sciunt se à magistratu  
non posse tolerari; in hoc omnes conspi-  
rant; ut magistratum omnem respuant, à  
quo nihil melius molliusque sibi possunt  
promittere quam exitium. Eadem causa  
fecit ut Episcopos odio Vatiniano prose-  
quantur, iisque bellum sine missione ge-  
rendum indixerint; quia sub Episcopali  
regimine se durare non posse noverant.  
Hæc igitur secta; quæ libertatem dari  
vult omnibus sectis; tam schismaticis  
quam



quam hæreticis, *Independentium* titulo  
superbit. Nec moror duarum eos familia-  
rum fieri, & inter *Orthodoxos* & *Fana-  
ticos* nequissimam gentem diduci. An il-  
li mihi erunt orthodoxi qui fanaticos e-  
tiam pro suis recipiunt, nec tolerant tan-  
tum, sed & in sinu suo fovent? Qui hære-  
sin permittit, facit. Nam quid, oro te  
interest utrum quis in doctrina fidei ma-  
le ambulet, an pervertentibus vias Dei  
& depopulantibus ovile Christi lupis det  
veniam? Si homines essent qui non ipsi  
quidem latrocinarentur, sed passim la-  
tronibus vagandi, villas expugnandi, do-  
mos expilandi, viatores spoliandi licen-  
tiam indulgerent, eosque adjuvarent &  
protegerent, quid ipsi à latronibus dista-  
rent? Orthodoxi certè non possunt dici,  
qui tot lapsis à regula, tot blasphemis,  
tot atheis impune esse volunt, quibusque  
adeo & blasphemias libere vomendi, Chri-  
stianismum oppugnandi, Dei ipsius ne-  
gandi potestatem concedunt. Nuper Rex  
*Independentium*, Angliæ Tyrannus, Re-  
gis sui perduellis & parricida, cum ex An-  
glia in Hiberniam cum exercitu solve-  
ret, non prius vela facere sustinuit, quam  
per socium rebellionis, & parricidii com-  
plicem, edicto Parlamenti omnibus  
sectis

sectis hæreseon & schismaticum quibus nunc scatet Britannia, professionem publicam ac liberam irreligionis suæ dari curaverat. Soli Pontificii ab hac libertate exciûsi, quæ concessa est Antinomis, id est legem & Prophetas repudiantibus, Arrianis, Photinianis, Chiliaftis, & mille talibus Fanaticis monstris. Cur Pontificios, quatenus & Christiani sunt, non admittunt? Causa in promptu est. Quia non admitterentur ipsi à Pontificiis. Non ferunt nisi qui se ferant. Ideo & Episcopos non tolerant Reformatos, sed Ecclesias sub illis pro Antichristianis habent. Ideo & Magistratum verè Christianum aspernantur, quia nec ille tales, si officium suum faciat, possit pati. Ideo denique nec Regem suum regnare & vivere passi sunt, quia videbant, se ab eo justè & piè imperante non fore tolerandos. Ideo nec ullos reges umquam agnoscere in animum inducent, nisi qui de suo sint grege, quique parati sint & mente obfirmati omnibus sectis fibulam laxare. Cum enim nec sibi ipsi consentiant harum sectarum pleræque, nec aliis consentiant, sed aliqua peculiari perversi dogmatis diversitate inter se divisæ sint, universæ tamen hanc communem habent pravitatē, qua  
pro

pro regula tenent, omnibus impiis pariter  
& profanis debere conscientiae liberta-  
tem concedi. Cum omnibus pacem mi-  
scere volunt; nec quicquam sua putant in-  
teresse singulae, licet diversas insistant  
vias, dum ad unius veritatis expugnatio-  
nem conspirent & in Reformatarum Ec-  
clesiarum ruinam conjurent, quas falsas  
esse pronuntiant & Idololatrias. Non  
enim melius de his sentiunt quam de illis  
quae Episcopos habent praesidentes, quos  
ministros Baalis, Antichristos, & Idolola-  
tras appellant. Una & eadem causa est er-  
ga hos omnes odii plusquam Vatiniani,  
quamvis disciplinae censu differentes,  
quod cum his se dextras jungere ac con-  
tesserare certo sciunt non posse. Ideo ab-  
horrent & abominantur, quos vident à  
sua communione abhorrere. Papista, E-  
piscopalis, Reformatus fuit, uno habent  
discrimine, & tanquam prophanos dete-  
stantur, quicunque judicant melius Eccle-  
siae Christi futurum, fideles, quales ipsi  
profitentur, haereses non essent. Si quis  
vel in articulo levissimo disciplinae quam  
probant, dissenserit, eum non solum sua  
communione sed vita etiam indignum  
pronuntiant. Ethnicum & publicanum  
esse clamant. Qui Trinitatem negaret;  
melius

melius ab his acciperetur, & favoris plu-  
apud eos inveniret. Non una autem est  
nec simplex hæresis: quam introduci cu-  
piunt, sed ea quam profitentur, omnium  
sentina est & cloaca. Non solum liber  
ipsi esse, sed etiam quodcunque credenti-  
bus eandem libertatem assignari student.  
Quicunque & cujuscunque pravitatis &  
blasphemiae sectarii in eadem cum ipsis  
sententia sunt, his parati sunt dicere, re-  
ster esto. Qui aliter opinantur, lupis &  
agnis quanta sortito obtrigit, tanta eorum  
cum illis est discordia. Magistratum om-  
nem Christianum cui sederit sententia  
eorum similes in republica non debere  
consistere, eum, si res suæ sit potestatis aut  
arbitrii, vita frui numquam sinent. Ideo  
legum condendarum ei potestatem adi-  
munt, quam soli Deo reservant. Reges  
non alio loco aut numero habent quam  
magistratum. Ideo ut inimicos regni  
Christi, id est sanctæ Independentiæ, ab  
se eliminant. Nec ullos tolerant, nisi si  
quos non possunt tollere. Semel nati po-  
testatem qua eos destruant, non contenti  
destituere; nihil parcunt quin vita regno-  
que exterminent. Sic enim se libertatem  
votis omnibus petitam assequi sperant, si  
nemo sit quem timeant. Hoc ut citius

con-

consequantur & plenius cupitis potiantur, emet ipsos in ejus locum evehere con-  
endunt unde timeantur. Ita in Germania  
Anabaptistæ duce Johanne Leydenſi cum  
animo concepissent regimen tam civile  
quam Ecclesiasticum immutare, poten-  
tiam primum in populum acquirendam stu-  
dierunt, & miras turbas dederunt, atque  
in bona omnium qui de grege sanctorum  
non essent, involarunt, pari, ut aiebant, ti-  
tulo & causa qua Israëlitaæ Ægyptiorum  
supellectilem compilarunt, & Chana-  
naeos possessionibus suis expulerunt. Non  
minores in nova Anglia tragedias exci-  
tarunt Independentes, ubi dux femina  
facti fuit Hutchinſonia nomine, quæ illis  
in locis civilem statum & Ecclesiasticum  
in summum discrimen sanguinariis fa-  
ctionibus adduxit. Et actum tunc fuisset  
de republica nisi mature providisset præ-  
fectus, exarmando perditos sectarios, qui  
nisi hoc fecisset parem Monasterienſi ſtra-  
gi ruinam ibi erant edituri. Atque hæc  
tempeſtas hætenus in orbe novæ Angliæ  
detonuerat. Utinam quidem hætenus.  
Sed post paulo circumagente se maligno  
fidere tanta vis horrendæ procellæ inde  
effusa veteri Angliæ incubuit, ut terribili  
tumultu totam eam magnam insulam  
quas-

quassaverit. Hanc novus Independentia  
signifer, excitavit, qui quod voluit, fecit  
& ne nihil ageret, primo exercitum  
deinde Senatum, postremo & Regem  
sub suam potestatem redegit. Sed Re-  
gem sustulit, Parlamentum oppressit  
per exercitum nunc regnat. Qui nul-  
lum alium errorem in eorum doctrina  
hære præter hunc unum, persuadere  
nobis conantur, errant ipsi. Quod nem-  
pe Ecclesias particulares ab una aliqua  
generali Ecclesiarum congregatione no-  
lint dependere, quales Synodi sunt. Pri-  
mum ab hoc uno errore multos catena-  
tim alios cum eo nexos oriri posse res ip-  
sa monstrat. Quippe cum septem apud  
eos Ecclesiam faciant qua viri qua fœmi-  
næ, qua pueri qua puellæ, nam & senten-  
tiam rogantur & dicunt, & hæc ipsa Ec-  
clesia ab altera se corrigi aut reformari  
nefas putet, nec eundem singulæ possint  
tenere cum aliis doctrinæ aut disciplinæ  
consensum, quis mihi repromittet idem  
de fide omnes sentire? Deinde nondum  
ausi sunt confessionem fidei suæ vulgare,  
unde sciamus nihil eos habere in dogma-  
te quod sit damnandum. Neque verò, ta-  
met si vellent, id præstare possint. Nam  
cujus Ecclesiæ confessionem publica-  
bunt,



bunt, cum tot sint, & omnes quidem *αὐτοκέφαλοι*, atque, ut ipsi se vocant, *Independentes*? Citius & facilius Lunæ crescenti subinde ac decrescenti, varioſque in orbem habitus ſumentī, depo- nenti, & reſumentī, certa ac ſtata ve- ſtis poſſet induci. Hoc facile quidem fa- ctu eſſet ubi plures Eccleſiæ unam com- pōnunt, dum unam omnes probant uni- tatem, ut quibus ejuſdem ſacramenti una ſit traditio. Independentium verò infinitæ numero ſunt Eccleſiæ, etiam eo- rum quos quidam volunt à Reformatis non alia re differre quam Eccleſiæ regi- mine. At ſi in hunc cenſum veniant om- nes quæ idem nomen affectant, citius are- nam maris numeraveris, quam dixeris quot ſunt & quam variæ earum ſpecies, tam doctrina quam diſciplina diviſæ. Nul- la autem ex his pura eſt ac ſincera, ſed aliæ ex aliis partem aliquam uſurpant ejus quod credunt traduntque, & tam prodi- gioſa mixtura confuſæ ſunt invicem ac diffuſæ, ut nullum cuiuſquam earum dog- ma certum atque impermixtum erui poſſit. Præterea illi ipſi quos tales fingunt, Orthodoxi Independentes, Spiritum qui eorum ſanctos facit, tam variū habent ac mutabilem, & non ſolum ubi velit &  
quando



quando flantem; sed etiam quod alias inspiraverit, sæpe reflantem, ut instar Vulcani Romanorum, Protei Ægyptiorum & Empusæ Græcorum, planè quadrigenus Deus esse videatur. Mille formas induit exiitque, in dies & horas & momenta dubiæ & fluxæ inspirationis. Ideo nihil habendam esse sanciunt doctrinæ regulam nec disciplinæ. Omnia soluta apud eos & vaga. Meraque, ut veteres Numidæ, faciunt Mapalia. Conscientia ipsi pro regula & norma tam fidei quam doctrinæ. Scripturam ipsam ad hujus amissum exigunt, non conscientiam ex Scripturæ præceptis dirigunt. Non locis, nec temporibus, non personis, non rebus seerviunt. Cuilibet, ubivis, quando libet verbum Dei prædicare licet, sine ætatis, aut sexus, aut muneris, aut conditionis discrimine. Servos & reges in Ecclesia eodem loco habent, & pari modo utrosque arcent à communione. Sæpe & servus regem potest excōmunicare, quia & servis datur prædicandi licentiam. Formulas præcursum respiciunt. Ideo & Dominicam orationem rejiciunt tanquam libertati spiritali extialem. Ut cuique spiritus dicat, ita esse orandum præcipiunt. Nec semper eodem modo, quia non semper ad idem exemplum

plum Spiritui preces placet, ut concipi debent, dictare, etiam eidem homini. De genere autem eorum conversationis qualitas fidei æstimari potest, & iudicium de doctrina facit disciplinæ ratio. Cujus everfionem pro ipsa disciplina habent, & qui hujus curam habent tanquam lenocinii artifices in nostris reprehendunt. Laicis pastoris munus injungunt, pastores loco laicorum ducunt. Fœminis etiam suis permittunt in Ecclesia docere, concionari & de fidei dogmate disputare. Cœtus Ecclesiastici sine gravitate & auctoritate, sine ordine. Dum alii inter se de rebus ad deliberandum propositis ad mensam loquuntur, alii de aliis negotiis seducti garriunt. Quidam interim hausti fistula tabaci fumos in angulo revomunt. Utinam pravissimus esset errorum quibus hæc hæresis laborat, disciplinæ prostratio. In Spiritum Sanctum passim peccant, quem imperfectæ operationis arguunt, dum nondum omnia ab eo revelata & monstrata pertendunt, quæ ad salutem necessaria videntur. Hunc desultoriæ varietatis insimulant, & modo hoc modo illud, interdum quæ invicem pugnant, ab eo inspirari volunt. Quem denique fraudis & mendacii reum faciunt, atque etiam

sce-

scelerum omnium conscium, dum a eundem usum impendunt ejus energemata: quomodo varias imposturas & fucos multi antiqui duces ac reges adhibuerunt populis seducendis, Minos suum cum Jove colloquium, Numa suum cum Egeria nymphea congressum, Scipio suum in cella Jovis Capitolini accubitus, Sertorius cervam suam, Muhammedes suam columbam. Ita spiritum suum sanctum Dux Independentium nationi Anglicana decipiendæ commentus est. Hac arte homo hypocrita falsas & mendaces revelationes spiritus nequam divinitati non fallentis Spiritus solet adscribere. Si quid promittit eo sensu ut fidem mox pactam fallat, ubi fefellit, spiritus divinus auctor est illi talis mutationis & effectus in contrarium dati. Pontifex ille sanctæ Independentiæ Regi captivo pollicitus fuerat custodiam laxiorem & locum liberiorem si se fineret educi ex eo carcere ubi tum detinebatur. Egresso inde contra promissum in insula brevis circuitus angusta & mala mansio assignatur. Querenti de perfidia, allegatur Spiritus Sancti monitus, qui fidem non tenere auctori suaserit. Cum nefaria factio Regem morti destinasset, nonnulli procures cum ducibus factionis

tionis agere cœperunt precibus, pollicitationibus, ne ad exitum perducerent tam crudelia & impia destinata: Viderent quantum in se sceleris susciperent: numquam tale fuisse ab aliquo susceptum. Fateri illi ita esse, etiam per se videre execrabile esse ac detestandum facinus, sed tamen non posse repugnare Spiritui qui illiorum eos traheret, & ad vindictam de Rege sumendam impelleret. Ita blasphemias suas & scelera homines impuri iniquique mantelo divinitatis & justitiæ obambrant. Sic illudere non solum hominibus norunt, sed etiam ipsum Deum audent deridere, si modo potest summum munus à sceleratis latronibus naso suspendi. Habent & aliud sectæ suæ dogma, quo sibi persuadent se posse cujuslibet sceleris esse affines & tamen sanctitatem in medio sceleris actu retinere. Quod enim in aliis hominibus peccatum censetur, hoc in sanctis non esse. Sanè, ut Grammaticus solæcisimum non facit, quem facit sciens, ita sanctus potest quidlibet contra legem Dei committere, & tamen ut alicujus mali vel delicti conscius nō potest argui, quia scit in conscientia sua quid egerit. Ita non infirmas habent sed delicatas conscientias, quæ omnis criminis & flagitii

giti in proximum, sed cum charitate, capaces sunt. Satis est si firmiter credant non esse peccatum quod admiserunt quia nunquam eos charitas tale quid patran-tes, nec bona conscientia deserit. Memorant aliquando deprehensum fuisse in sancta ex illo grege quendam sanctum, qui nullo rubore suffusus confidenter dixit, se non voluptatis efficiendæ gratia torum ejus inscendisse, sed ut sororem male affectam refocillaret & frigentia misellæ membra gremio ejus infusus recalfaceret. Nomina sancti & sanctæ habet historia, quibus hanc paginam commaculare nolui. Inter criminationes Regi objectas infamis Cokius, Advocatus & accusator in illum datus à sacrilego sanguinariorum Judicum cœtu, hanc etiam posuit, quod Sanctos, id est perduelles illos à quibus erat condemnandus, non *Sanctorum* appellatione decoraret, sed *Brunistas & Independentes & Sectarios* vocaret. Nonne tibi videris meretrices videre quæ castæ & pudicæ velint vocari, & nisi vocentur, injuriæ actionem se nomine vero appellantibus intentent? Profecto si talibus sanctis paradisus esset destinatus, aut si nunc iisdem refertus foret, plurimi hodie viri boni reperirentur qui dubita-  
rent,

rent an sibi locum esse vellent in cælo ut ibi consortium habere cogerentur ejusmodi sanctorum, quibus si larva detrahatur nihil impurius, nihil magis profanum quicquam inveniri queat. Nam quidquid ajunt aguntque sanctitatis minus est, ipsique veræ pietatis simiæ sunt, quam simulant non præstant, sepulcris veterum Romanorum similes, quæ in titulo divinitatis nomen præferebant, *Diis Manibus* consecrata, sed intus ossium & cinerum sordibus & inquinamentis scatebant. Verisimile est cum Deo præces faciunt, eodem modo eum alloqui, ut olim fures, impostores, nebulones, laverniones & id genus omne fraudis dolique & furtorum præsidem Divam suam precabantur his conceptis verbis:

--- *Sancta Laverna*

*Da mihi fallere, da sanctumque pi-  
umque videri.*

*Noctem peccatis & fraudibus objice nu-  
bem.*

Lupos esse rapaces sub pelle ovium, non illi modo qui eos merito oderunt dicunt, sed ipsi magis id de se fatentur. Stoici dicebant, sapientis, quem describebant nec tamen noverant, esse omnia. Non tamen ut cuiquam quod proprium ei esset, au-

ferrent suumque facerent, sed alio intellectu, quæ cuiusq; essent, sapienti suo vindicabant. Sanctorum bona esse omnia quæ omnes habent, etiam isti sancti asserunt, sed re ipsa quando occasio est aut potestas, doctrinam suam usu & effectu confirmant. Adeo non contenti privatis quod suum est, ubi id possunt, eripuisse, ut etiam sua regna regibus non relinquunt. Ne patrimonium quidem eorum pupillis aut viduis salvum volunt quas ipsi fecerunt. Mirum est profecto novumque genus sanctitatis quod isti cerebrosi commenti sunt, immisericordis, crudelis, avaræ, & ambitiosæ. Diceres nihil aliud eos pro sancto habere velle quam quod primis Christianis impium habitum est ac profanum. Ludus illis est profanationem omnium rerum sanctarum inducere, ut sanctificationem & consecrationem profanarum invexere. Christum in spiritu crucifixisse videntur, quem olim in corpore Judæi, ut alium nimirum resuscitarent in carne sola regnaturum, contraria priori præcipientem & docentem. Regnum ille suum dixit non esse de hoc mundo, isti Christi regnum cælo detractum in cœnum detrudunt, terrenæ potestatis illigatum ditionibus & possessionibus. Christus olim  
cru-



crucifixus pependit inter duos latrones, Christum hodie hi nobis dant inter plures latrones regnantem, id est inter Independentes, qui dum omnia omnibus per vim rapta auferunt, vitam & regnum Regibus, patrimonium & dignitatem Nobilibus, bona & libertatem Popularibus, hoc Christi regnum esse prædicant. Ita certe omnia sanctorum istorum esse libenter fatemur præter ipsam sanctitatem, quam solo nomine venditant, factis refutant. Cæterum ne quis putet ex orbe nostro foeturam prodiisse talium portentorum, sciat novæ Angliæ suam originem debere hæc hominum monstra. Inde in Hollandiam redundarunt. Ex Hollandia porro in Angliam veterem regirarunt, ubique jactis seminibus impietatis, & in reges ac magistratus rebellionis. Inde enim sunt quicunque in Batavia regum parricidiis suffragantur aut patrocinantur; Sed venenatum illud semen ut ab Anglis productum, ita & in Anglia soli feracis uberes glebas nactum, feliciora quam alibi & promptiora cepit incrementa. Brevi temporis spatio totam penè occupavit Britanniam. Nam ejectis iis qui noxia hæc plantaria extirpari suadebant, res ad eos rediit qui summa ope cultu-

ram ejus foverunt. Ita ad eam copiam & mensuram fruticavit, ut veterem & bonam Evangelicæ culturæ frugem penitus obruerit & suffocarit. Cum prima improbæ scētæ vota sint locum habere liberum ubi regnet, paremque agendi libertatem omnibus hæresibus amicis concedi flagitat. In secundis habent votis amoliri eos per quos eam libertatem quam ambiunt, impediri posse existimant. Sic Episcopos ab Ecclesia primum removerunt. Deinde ab exercitu expulerunt, quos parum sibi favere sciebant. Postremo e Senatu ejecerunt quos contrarios proposito suo fore suspicabantur. Tum demum Regem adorti solio excutere, quem, ut veræ Religionis defenforem & protectorem decuit acerrimum, non minus acrem suarum blasphemiarum vindicem erant sensuri. Per Senatus partem reliquam quam furialis & feralis illa Alecto pestiferæ hæreseos halitu afflaverat, id egerunt. Ejusdē sanè operis fuit Regis auctoritatem impugnare, majestatis ejus culmen infringere, & hæresibus quæ tunc pullulare per Angliam incipiebant, licentiam qua crescerent & corroborarentur, indulgere. Utrumque Senatus ille eodem tempore fecit. Nunquam id juris se habuisse

buisse noverant, ut quicquam sine Rege statuerent majoris negotii, multo minus ut ea decernerent quæ religionē spectant. Hæc prima rudimenta posuere criminis læsæ Majestatis quod incurrerunt. Episcoporum ab Ecclesia & Senatu ejectionem absque Regis assensu decreverunt. Libertatem conscientiæ damnabili conniventia dederunt omnibus sectis, quarum receptaculum fuit & asylum Independentia. Sic ei vires addiderunt. Sic securim porrexerunt quæ regis cervicibus impacta est, & sacrosancto innocentis hostiæ sanguine imbuta. Dicit itaque verè potest victimam Presbyterianos ligasse, Independentes jugulasse. Debilitatum illi & fractum Regem, atque autoritate non solum omni privatum sed etiam libertate, in manus Independentium traditum, postea recuperare ac retrahere ad se contenderunt, tractatu interposito & conditionibus pacificationis propositis, sed Independentes, irrisi illis, negotium suum peregerunt. Sero itaque resipuerunt Phryges. Si bene igitur rationes subducamus, non solum finem, sed etiam initium calamitatum quibus hæctenus Anglia conflictata est, quæque adhuc eam affligunt, & porro pergent affligere, In-

dependentes sibi vindicant. Per eos semina jacta sunt perditionis quæ Ecclesiam & Rempublicam pessundedit. Ab eorum doctrina infectus populus cœpit controversiam regi movere de jure suo. Prima inde fundamenta substructa sunt rebellionis quæ infecuta est. Postremo ubi potentiam sibi armis fecerunt, vi non solum libertatem Senatus oppresserunt, sed etiam regi vitam & regnum ademerunt. Quam boni & exoptandi sint cives & incolæ hujusmodi homines, viderint regna & respublicæ, quæ nisi eos finibus suis exterminare omni modo laborent, ultimum exitium ab his sibi esse metuendum sciant. Volumen ingens esset condendum enumerare volentibus quot hydrys pullulet & sibilet ista excetra. Sed hoc non agimus. Docuimus supra etiam Idololâtras Reges & Imperatores à primitivâ Ecclesiæ veris Christianis honoratos fuisse & cultos. Isti ut Christianos Principes quoque, immo & Reformatos, cum aliquo prætextu possint odisse & occidere, omnes pro Idololâtris habent, à quibus sciunt sibi denegari regnandi libertatem. Duo sunt præcipuè quibus censentur, reges alios esse nolle sed regnum sibi velle, & omnium bonorum quæ ab omnibus possi-

possi-

possidentur Christianis, se justos & legitimos esse dicere possessores, utpote solos sanctos, & regni Christi in terris promotores & fautores unicos. Non igitur regem Angliæ quod malus esset, supplicio affecerunt, sed eo ipso tanquam malum condemnarunt, quod rex esset, & rex quidem talis, qui tales sanctos in regno suo ferre non posset. Si quando isti sancti aliquo Pauli testimonio urgeri se sentiunt pro regibus faciente, atque ubi veritati adeo firmata non possunt obstrepere, dicunt, Apostolum Spiritu Sancto defectum ea tum posuisse de quibus nullam revelationem ex alto haberet. Toti autem sunt in revelationibus somniandis, expiscandis & explicandis. Nullam Scripturæ sacræ partem magis admirantur & recipiunt quam Apocalypsim. In ejus secretiore & penitioris sensu rimando, noctes diesque consumunt, quam & interpretantur ex suo cerebro, & novas ἀποκαλύψεις hiantes è cælo expectant quibus intima ejus penetrare ac revelare queant. Quantum possunt etiam in actum producere gestiunt fanatica quæ commenti sunt ad eam interpretamenta. De Draconis septem capitibus diadematis jam se unum defecuisse glo-

riantur, mactato rege Britanniae Carolo. Expectant ut alii populi exemplum suum sequantur, & regibus à quibus regnantur occisis, cætera bestiae capita diademate regali redimita audacter ampu-  
rent. Restare sex adhuc recidenda, Galliarum regis, Hispaniarum, Sueciae, Daniae, Poloniae. Et quod erit sextum? Imperatoris Germanorum an Turcarum? Illud potius. Nam Pontificios omnes habent pro idololâtris, magisque favent Muhammedanis. Miseret me prorsus status Anglicani non tantum propter immanem tyrannidem, quam rege sibi legitimo ablato sub alienis dominis patitur, sed etiam propter colluviem innumerabilium & multiplicium hæreseon, quibus inundatur, è quarum cœnosa & profunda voragine quando emerfurus sit, Deus scit. Subit etiam miserari fatum infelicitis regni, quod cum duæ sint sectæ inter Christianos, una apud Pontificios Jesuitarum, altera apud Reformatos Independentium, quæ doctrinam capiti regum infestam profitentur, utriusque rabiem miserè sensit. Sed ex altera pestem vix evasit, ex altera incurrit, inde Pater, inde Filius reges. Sub Iacobo Loiolitæ conjuraverant pulvere nitrato subterra-  
neis

neis ædium cryptis abdito, in quibus Rex cum proceribus Senatus confestum habiturus erat, omnes ignis vi sulfurei disiectos ac dissipatos cum ipso ædificio in ærem mittere. Carolum ejus filium & successorem Independentes eadem pestifera disciplina imbuti, non solum innocentem, sed & pium regem, carnificis manu per justitiæ simulacrum trucidarunt. Quod successum facinus habuit, non minus sceleratum habendum est, quam cui exitus defuit. Sed prioris conspirationis autores furca suspensi fuere; posterioris sceleris duces hodie regnant. Credimus ergo Deum esse aut vigilare? Immo credimus utrumque. Sed sæpe sane quo tardior est numinis vindicta, eo gravior nocentibus incumbit, & lapsu præcipitat profundiore quos ipse ad poenam altius extulerit. Fiat, fiat, ut vel impiorum judicio Deus absolvatur, qui facti justitiam de prospero eventu aestimari defendunt. Quod faciunt Independentes, qui causam suam Deo placuisse ex continua serie secundorum successuum, quos largitus est, gloriantur: immemores sceleratis sæpius quam bonis ex voto res fluere, sed Deum tandem ultorem insurgere, atque iræ suæ moram



lentius in malos inardescantis acerbitate supplicii pensare. Fiat, iterum fiat. Tuque Deus, exaudi.

---

## C A P V T X I.

**Q**uis capitis damnatus sit, diximus: Nempe is quem, quia Rex erat, ne quidem accusari à quoquam subjectorum potuisse docuimus, nec cuiusquā testimonio premi. Qui eum condemnarint quales sint, etiam ostendimus: Nempe illi, quos tametsi Rex jure damnari potuisset, non ejus tamen judicandi jus aut potestatem habuisse constat. Et hi sunt qui ex sectæ suæ disciplina ne regum quidem innocentissimum ferre potuissent, quia nullum ferunt. De tertia ergo juris quæstione jam tractandum, qua autoritate de Regis capite pronuntiarint qui mortis sententiam in eum protulerunt. Vix quæstioni huic locum reliquit qualitas hominum qui id fecere, nec qualitas facinoris quod ab illis peractum est. Nam cum tales tale flagitium designarint, quale ipso facto fuisse demonstravimus, frustra quæraturo quo jure autores facinorosi & impii id commiserint. Nisi si quis putet ad rem per-

pertinere ut requirat, cum latro viatorem pecunia & vita spoliavit, qua auctoritate eum trucidarit. Cum infita perfidia aliquem incitavit ad fidem frangendam aut jusjurandum violandum, an auctoritas facti petenda? Si quis libidinis suæ servus per vim stuprum matronæ intulit, aut nimis reluctantem telo confodit, quod incendente jecur libidine flagitium admisit, an aliquo jure aut ratione ad id faciendum, aut alio impulsore usus est, quam animo libidinoso? Unusquisque vitium sibi innatum sequitur autorem ad scelera quæ patrare destinat. Quis in rebellibus requirat auctoritatem ad hoc scelus, præter ingenium contumax, refractarium, legibus inimicum & dominantibus infestum? Et minor quidem furor est, simplici rebellionem defungi, regem suum bello persequi, in prælio resistentem interficere, captum in carcere vel veneno vel gladio vel laqueo necare. At cum perduelles subjecti jure cum suo Rege agere voluerint, reum eum peragere, legem ad facinus committendum advocare, justitiam instrumentum injustitiæ reddere, Themimque ipsam ἀθέμιτον, ut Græci loquerentur, facere, si facti ratio ab auctoribus reposcatur, nullam queant dicere, præ-

præter perditæ profligataque & omnibus flagitiis vitiisque incoctæ mentis immanem vecordiam, cui nec honestatis, nec pudoris, nec famæ, nec religionis ullus respectus sit. Quibus omnibus divini juris & humani legumque omnium contemptus & numinis ipsius derisio adjungatur. Ex pravitate quadam naturæ desperatæ, & audaciæ inusitatæ instinctu quam insanæ ac pestiferæ doctrinæ virus adjuverit & ad hoc nefas impulerit, videntur in istam vesaniam præcipites dati Anglicanæ conjurationis rebelles. Quales sint, jam superiore capite monstravimus, & quali disciplina imbuti ad hanc scenam desaltandam processerint, ut præinde videatur omnis cura interrogandi, qua autoritate tantum scelus aggressi sint, supervacua. Pro autoritate habent impium & detestandum omnibus Christianis dogma, *Tyrannum occidi jure licere*. Ex duobus diversis hominum generibus hæc abominanda sententia mentibus Anglorum illapsa est, Jesuitis & Independentibus. Hinc & inde emanans plurimorum etiam Presbyterianorum animos qui Insulam illam incolunt, & quasi geminis flabellis excitatus & insinuatús error intravit. Hoc posito, insanæ  
opi-

opinionis fundamento , quæ tyrannum statuit interfici posse ac debere, non difficile fuit omnis regiminis & omnium proinde Regum osoribus , adplicare id illi Regi quem perditum voluerunt , ut tyrannus esset. Si quis sit qui dixerit, canem rabie laborantem lapidandum esse aut mergendum, haud difficulter postea reperientur , qui canem suum pro rabioso lapidibus obruere aut in aquam præcipitare gestiant, si quando illi irati fuerint, aut eo carere quoquomodo velint. Independentes hoc sequuti sunt in Rege suo tollendo. Ubi semel persuasi sunt omnem Tyrannum omni ratione à Republica esse amovendum , non diu laborarunt ut etiam aliis conjuratis , sibi que similibus nebulonibus persuaderent talem esse quem perdere destinatum habuerant. Sed homines pii, justi & sancti , non via per vulgata rebellium sibi eundum esse existimarunt in rege temere ac sicut fit interficiendo, sed novum exemplum introducere voluerunt , de quo fama posset anus & hoc & venturis sæculis loqui. Sine forma, ut ajunt, justitiæ & figura processus noluerunt eum à vita facere extorem, sed ut sacros decuit Themidis antistites & sanctos Divæ Independentiæ Pontifices,

tifices, Tribunal summum instituerunt, coram quo sisteretur accusandus & iudicandus Rex ille quem pro tyranno mactare decreverant, quia tyrannus non erat. Sic locum quæstioni fecere quam nunc agimus, qua autoritate homines scelerati, & iniustitiæ tyrannidisque satellites nefandi, iustitiæ nomine abusi sunt. Cur enim jus servire fecerunt injuriæ, & iniquissimum atrocissimumque omnium quæ umquam ab ullis tyrannis patrata sunt, facinorum, velo æquitatis & iudicii specie obumbrarunt? Si simpliciore insania hoc nefas exsecuti essent, non de eo nunc contenderemus, ut quo jure id ab ipsis factum esset, explorandum putaremus. Nam quis auctoritatem requirat in scelere, cum ipsum scelus improbis instar sit auctoritatis? Sed quoniam ad summum flagitium, hoc etiam flagitii fastigium & cumulum insuper addiderunt, ut tegere illud & amicare iustitiæ operimento voluerint, ex ipsis postsceniorum sipariis hypocritæ in mediam theatri orchestram protrahendi sunt, ut nefandi eorum sceleris scena aperiatur. Videamus ergo, quem auctoritatis fucum, aut quem juris colorem pro eo facto allegent, quo tyrannum, aliter quam semper mos fuit tyran-

ran-

rannos à populis tolli qui tollendos eos crediderunt, ipsi vocatum ad iudicium puniendum esse rati sunt. Antiquæ Græciæ civitates tyrannos suos aut vi ex arce depellebant, aut si id non possent, dolo aggressos necabant. Nullum umquam in jus ad causam capitis dicendam vocarunt. Sed ponamus Britannicæ rebellionis auctores, non Regi suo, sed Senatori uni ex domo nobilium, ob crimina perduellionis, vellæfæ Majestatis, aut proditionis, diem dixisse, & ad cognitionem talium criminum & animadversionem nocentis Tribunal erexisse, coram quo sisti accusandus & judicandus deberet. Tum sane si in eo erigendo & iudicibus eligendis in personam talem, & ob talia delicta, aliquid contra leges & jus patrium fecisse viderentur, merito quæri posset qua auctoritate hoc ab illis factum foret. Primum quæreretur, an ejusmodi homines qui ad cognoscendum de causa & capite ullius Senatoris selecti essent, iudices esse competentes videri possent atque idonei. Deinde an illi ipsi quorum jussu ad iudicandum convenissent, quique eos delegissent ad hoc munus, hanc potestatem habuerint. Ut id in hoc iudicio sciatur, videndum est qui dati sint iudices, & qui eos dederint.

derint. Dati sunt partim ex domo plebeiorum, partim ex militum numeris. Ponamus vel totam domum inferiorem ad hoc judicium faciendum fuisse delegatam, vel ipsam per se domum id suscepisse. Si per se id suscepisset, contra lege Regni & potestatis suæ terminos ac auctoritatis mensuram hoc fecisset. Numquam enim id juris habuit ut vel de unius civis ex media plebe fortunis aut capite cognoscere posset. Superioris domus solius in qua proceres regni confesum habent cum Rege, hæc jurisdictio fuit, ut de proceribus, id est paribus & æqualibus suis cognoscerent, si quando prodicionis aut læsæ Majestatis insimulantur. Nam eorum causæ ab ipsis dominis qui Parlamenti superiorem domum componunt, examinantur & judicantur, ut tradit Richârdus Cromptonius in libro de Parlamento, & alii qui de rebus & judiciis Angliæ scripserunt. Si per se domus inferior non habuit id juris ut de Senatoris capite cognosceret, quamvis nullo de suis absente & integra ad hoc convenisset, utpote quæ nec in civem de media plebe quemlibet hanc licentiam potuerit usurpare, quid dicendum de parte ejus tantum exigua? Ea pars igitur id



sibi non potuit sumere quod nec toti licuit. Ab alio hanc potestatem accipere ne quidem potuit. Nam quis posset dare? Non sane domus tota. Quod enim non habet ipsa, dare aliis nequit. Non domus superior, nam tunc nulla fuit, utpote abolita. Si mansisset, ipsa quidem in caput Senatoris potuit animadvertere, qui reus ad eam delatus esset, sed eandem potestatem domui inferiori non potuit mandare, nec jurisdictionem suam alteri delegare, cum ipsa quasi delegatam à Rege habeat, sine quo tanquam capite suo praeside ac principe, jus facere ac leges ferre non potest. Cum his autem iudicibus è domo inferiori selectis juncti etiam iudices fuere ex cohortibus militaribus sumpti. Nunquam militum fuit judicare, quorum proprium est pugnare. Consilio quidem de rebus militaribus cogendo interesse possunt. At nulla in Republica unquam, nec Regno, nec Optimatum statu, militibus jus fuit de causis civium aut Senatorum disceptationem audire, aut crimina eorum iudicio capitali expendere. Legibus Romanis militaris Iudex de causis criminalibus aut civilibus paganorum, id est eorum qui milites non sunt, iudicium habere non potest. Leg. ii.

Cod.

Cod. *Si à non competente iudice judicatum esse dicatur*, difertè habetur, Si militaris Judex super ea causa de qua civilibus actionibus disceptandum fuit, *non datus à quo, dari poterat, cognovit, etiam remota appellatione, id quod ab eo statutum est, firmitatem judicati non habere*. Multo minus firmitatem haberet, si de capite civis ageretur, cujus cognitionem sibi vindicaret Judex militaris. Quanto etiam minus in Senatorem, qui sit ex domo superiore Procerum, quam *Domum Dominorum* appellant, hæc militaris daretur licentia? Qui sunt autem illi qui dederunt? ut constet an auctoritatem dandi habuerint. Nam etsi quis dandi iudices potestatem habeat, & possit jubere judicare, eos tamen ad hoc debet nominare & legere qui idonei sint & capaces judicandi. Quid enim si infamibus hoc jus mandaverint? Quid si legum imperitis? Quid si ære alieno obrutis & egenis? Quid si denique vilibus personis & sellularias artes & turpes exercentibus? Certe quamvis is qui tales dederit dandi potestatem habeat, si idoneos & competentes dedisset, non illi qui tales dati sunt auctoritatem judicium habere possunt, nec judicandi jus. Quid si autem tam ii qui de-

derunt,

lerunt, quam qui dati sunt, autoritate ca-  
eant, & tam illi inhabiles ad dandum  
quam hi ad recipiendum. censerī debent,  
n ulla per hos redditi iudicii autoritas esse  
poteſt? Hoc verò eſt in quo nunc ſumus.  
Duæ erant in Anglia poteſtates legitimæ,  
major altera, altera minor; illa Regis, hæc  
Parlamenti. Nulla erat præterea cui iudicis  
andi jus competat. Ne Parlamentum qui-  
eid habuit, quamvis domus ejus ſuperior  
quæ Nobilium erat, judicialem obtineret  
poteſtatē, quæ non erat in domo inferiore.  
ſolus Rex igitur qui juriſdictionem habet  
uo jure, non alieno beneficio, eam auto-  
ritatem poſſidet quæ judices dat & judicare  
ubet, aut magiſtratus omnes creat qui ju-  
licia exerceant. Ab eo omnis juriſ dicun-  
li & judicandi poteſtas manat. Eam quibus  
ult mandat, & delegatos etiam quando  
ibitum eſt ſubmovet, ſi male ſe in judi-  
ando aut magiſtratu gerendo geſſerint.  
Et hoc jus habere reges Angliæ, omnes  
qui de juriſ & privilegiis prærogativis-  
que Coronæ Angliæ ſcripſere, teſtan-  
tur. Hoc jus ne Parlamentum quidem  
cum utraque ſua domo poteſt ſibi arroga-  
re, Sed nec Parlamentum ex utraque do-  
mo compoſitum hos judices in Senatoris  
quem fingimus, caput ſeſſuros dedit, non  
ſupe-

superior domus Parlamenti, sed milites  
 five duces militum. Unde hæc igitur po-  
 testas istis data, aut à quo? An leges regi  
 hoc illis dederunt? An rex ipse? Manemus  
 adhuc in ea *æque*, quasi de Senator  
 tantum judicando quæstio fuerit. Duce  
 ergo exercitus jam facti sunt supremi An-  
 glia judices? In Senatores animadvertunt  
 Parlamento & Rege ipso exclusis & ha-  
 potestate privatis? Summum ipsi tribuna-  
 justitiæ instituunt ad cognoscendum d-  
 Senatus supremi membris, de regni con-  
 siliariis, de optimatibus omnibus? Mili-  
 tes igitur qui jussu Senatus conscripti sunt  
 qui quo imperatum erat, eo ordinante va-  
 dere debebant, qui arma ad ejus libitum  
 ferre, qui stipendia sua ab eo accipiebant  
 mercenarii Parlamenti, repente domini  
 ejus evaserunt, judices, reges? Duo sunt  
 omnino in Anglia Tribunalia quæ de cau-  
 sis perduellionis, læsæ Majestatis & pro-  
 ditionis cognoscendi jus habent, *Bancus*  
*Regius*, qui sic vocatur, quod est Tribu-  
 nal Regium, & Parlamentum. Sed Par-  
 lamenti jurisdictio fuit de solis paribus  
 Regni eaque penes solam domum supe-  
 riorem quæ domus est parium & domi-  
 norum. Tribunalis vero regis de omni-  
 bus aliis personis quæ his criminibus tenen-  
 tur.

ir. Inauditum autem prorsus, ut tam  
um criminum inquisitio & judicatio pe-  
es milites aut exercitus duces steterit.  
ta qui ne iudices quidem per leges An-  
liæ & jus omnium gentium legitimi &  
ompetentes esse poterant vel minimi  
e plebe opificis, nunc iudices etiam  
immos constituunt, qui de Senatoribus  
apitalem ferant sententiam? Quid di-  
o Senatores? Quamvis hoc magnum ef-  
et & in militibus intolerandum, longe  
majus est quod ausi sunt, & omnium sæ-  
ulorum & populorum detestatione &  
execratione dignum. Milites qui nec de  
erdonis vita iudicium legitimum, ju-  
tum, validum reddere potuerunt, Re-  
gem ipsum capitis damnarunt. Ad eum  
condemnandum iudicum sanguinis à  
quibus appellari non posset, confes-  
um instituerunt. Hanc illis potestatem  
dederunt, quasi ipsi haberent, qui  
non solum Regi subiecti, sed ipsi etiam  
Parlamento esse debuerunt, si tam bo-  
ni essent Christiani quam se Reforma-  
tores etiam Reformationum esse ven-  
ditant. Et quæritur jam quæ autoritate  
id fecerint, qui pro autoritate solam  
audaciam ostentarunt ad omne flagi-  
tium pronam, & ad illud scelus quod  
omnia

omnia quæ unquam facta sunt ab hominibus sceleratissimis, longè supergræsum est? Rex optimus & meliore fato dignus cum ad illum sanguinarium confectum accusandus pertractus esset, & coram illis barbaris & molossica feritate præditis iudicibus staret, & pro se loqui seque defendere ipse juberetur, causamque capitis dicere, unum ab ipsis petiit, ut sibi dicerent, qua autoritate ad eos esset adductus tanquam reus, cum Rex eorum esset legitimus. Viderent quid agerent. Ne in capita sua sanguinem innocentis, & qui dem Regis, arcefferent, nec in gentem universam justum Dei iudicium provocarent. Ubi edoctus foret qua autoritate reus ab his fieret & ad causam capitis dicendam coram his vocatus esset, tum se ad objecta sibi crimina responsurum. Illi cum nullam legitimam possent ostendere, satis esse putarunt de ea quam vi sibi fecerant, latronum more, testari. Et cum pluries à Rege de hoc essent interpellati, responderunt semper sibi suam sufficere autoritatem, debere quoque illum eam admittere & adprobare. Non aliud latro responsum daret viatori ipsum interroganti quo jure post pecuniam ablatam, vitam quoque sibi eripere postularet.

Latro-

latrocinandi propositum hanc illis datur  
utoritatem qui vias insident ut merca-  
tores spolient & interimant. Sed Angli-  
ani latrones viarum in sefforibus & fica-  
riis ut se justiores esse probarent rogan-  
ti talia Regi etiam aliud pro responso ad-  
iderunt, *Hanc Dei esse autoritatem & re-  
ni.* Ad latrocinium nimirum etiam blas-  
phemiam adjecerunt, qua Deum autorem  
infandi parricidii facere conati sunt. Sed  
unde didicerunt, autoritate divina se ad hoc  
incelus fuisse impulsos? Ut prophetæ sunt  
omnes, an spiritum sanctum per auras hæc  
vobi à Deo mandata deferentē acceperunt?  
An vocem divinam ex aëre editam auribus  
auferunt? An vero somnii visu ac moni-  
tu tale oraculum susceperunt, quo jube-  
rentur in Regem suum rebellare, eundem  
captum incarcere, & de carcere extra-  
ctum ad judicium vocare accusandum &  
capitis damnandum? Idem divinum &  
propheticum oraculum dedit quoque iis  
autoritatem, hostium & rebellium perso-  
nam in judicium habitum commutandi,  
& hostilem quem in Regem sumserant  
inimicum & omnibus factis talem semper  
ostenderant, convertendi in æquorum &  
iustorum assessorum sanctam & incorru-  
ptam religionem. Sed bene est quod a-  
liam



liam orationem adjunxerunt, *Hanc quæ  
que esse regni auctoritatem.* Jam tenem  
mendacii manifesti convictos egregi  
Prophetas & sanctos viros, & fideles D  
servos. Possunt igitur aliquid afferre qu  
proben legem in regno fuisse, quæ R  
gem accusari permetteret & judicari co  
ram tribunali summo justitiæ, quod de  
ces militum constituissent, conlatu  
partim ex militum tribunis & centurion  
bus, partim ex imperitæ & stolidæ plebe  
culæ hominibus vulgaribus. Qui nun  
quam per leges regni ullam habuere judi  
candi vel de infimo opifice, immo ne a  
ullo quidē carnifice, auctoritatem, repent  
in hanc novam scenam prodierunt iudice  
non planipedes, nec imi subsellii, nec pe  
danei, sed cum summa animadvertend  
potestate in caput Regis ipsius. Et hæc *au  
toritas regni* vocatur à perduellibus Re  
gis. Sed non meminerat Advocatus eorum  
Cocus hæc tum ad Regem dixisse præsi  
dem latrocinantis conventiculi, cum ipse  
confessus est nullam legem in regno esse  
Angliæ scriptam quæ crimen læsæ Maie  
statis intentari Regi sanciatur. Si verum  
hoc est quod Cocus dixit, ut indubitate  
verum est, cur *autoritas regni* vocata est  
tum à præside iudicii ea auctoritas quæ Rex  
tan.

tanquam reus læsæ Majestatis citatus est ante illum confessum, & pro fonte talis criminis capite obtruncatus? Hæc inter se pugnare nemo non videt. Sed ideo Cocus addit, nullam olim legem ab Anglis sanctam fuisse, quæ Regem postulari hujus criminis juberet, quia non credebant quempiam Angliæ regem tam perditè stolidum futurum in sæculis sequentibus ut bellum inferret Senatui & Populo. Et sanè hæc pro sano scripsit Coquus. Nemo enim revera tam stolidus & stolide stultus rex unquam extitit neque existet, qui populo suo bellum moveat, eo modo quo in hostem exterum exercitum moveret, non aliam ob causam quam ut fines imperii dilataret. Ne nunc quidem Christiani principes vicinis suis principibus aut rebus publicis ulla ex causa bellum inferre debent, nisi prius ab ipsis injuria laceßiti. Nam vim vi licet repellere, non vero vim inferre nihil novi agitantibus & quæris, quæ injusta arma forent. Ea verò non injusta tantum essent, sed etiam insana, si quis principum subditos morigeros, & ad obsequium promptos bello & armis vexaret. Nonne eodem hic princeps genere insanix & phrenitidis laboraret atque ille qui membra sua sibi ferro proprio

secaret? Non idem de illo Rege sentien-  
dum, qui subjectos contra se armatos ar-  
mis vellet compescere & rebellantes re-  
primere? Non enim aliter ageret quam  
qui putridum & corruptum sibi mem-  
brum chirurgi opera curaret resecandum,  
aut vomicam lethalem ferro aperiendam.  
Hic verò est casus, quo Rex Angliæ Sena-  
tui & populo suo bellum movit, non no-  
vum inferens, sed motum contra se à po-  
pulo & Senatu repellere ac retundere cu-  
piens, & rebellionem subjectorum ulcif-  
ci conatus. Quo in proposito si bona ejus  
causa non parem habuit fortunam, sed  
mala triumphavit, non id novum nec in-  
solitum. Plena sunt veterum historiarum  
monumenta exemplorum, quæ victrices  
partes pessimas & detestandas fuisse osten-  
dunt, cum victæ fuerint optimæ ac lauda-  
tæ. Sed quod hos successus in argumen-  
tum trahunt perduelles favoris divini,  
quasi Deus pro eorum partibus steterit, hac  
eadem ratione probari etiam posset, Mu-  
chamedem justissimam causam, & sanctis-  
simam habuisse religionem, qui ab initiis  
parvis, perpetuo secundorum eventuum  
tenore, maximam & florentissimam or-  
bis Christiani partem armis subegit, &  
idem infidelitati succumbere coëgit. Hoc  
autem

autem novum & prorsus inauditum quod rebelles victores regem quem vi & armis in suam potestatem redegerunt, forma etiam ac more judiciali condemnare ad capitis supplicium voluerunt. Romani ne in hostes quidem externos, postquam eos cepissent & triumphatos per urbem traduxissent, hoc genere crudelitatis & contumeliæ usi reperiuntur. Aut enim in custodia libera eos vivere sinebant, aut si talia eorum essent merita carceri mancipatos secreto necabant, non per theatralem & ignominiosam pompam publico spectaculo expositos, longe quam mors est peiore mortis genere exanimabant. Saniore profecto dementia & venia digniore peccassent rebelles Anglicani si simpliciter essent professi hoc se fecisse ad ludibrium iustitiæ, Dei contemptum, & contumeliam Regis majorem. Quod quidem esse verissimum constat, sed non minus verum est eos se æterna infamia traducendos toti nunc orbi & omni ævo venturo dedisse, omniumque populorum execratione detestandos, hac iudicii iniquitate, cui nulla par umquam fuit, nec erit. Mitto quod Regem suum, mitto quod innocentem sic iudicarunt, sed quod eo modo, ea forma procedendi & agendi

& judicandi, qua quemlibet vel nocentissimum & gravissimorum criminum convictum probassent infontem. Cum apud Romanos sortitio judicum fieret in reum dandorum, ubi nomina eorum edita erant quos fors dedisset, tum licebat reo quos ex iis vellet rejicere, ut infamia notatos, pretio corruptos, vel gratiæ in accusatore suspectos, sed præcipue quos sibi inimicos esse diceret, aut quorum cum patre inimicitiam exercuisset. Hoc secundo fiebat, ubi altera sortitione, quæ sub sortitio dicebatur, numerus judicum tam ab reo quam ab accusatore rejectorum suppletus fuerat. Hoc enim juris in Anglia morisque in judiciis obtinuit. Nam si reus capitalis noxæ crimen inficiatur, solet interrogari quomodo judicari velit. Ubi respondit, quod utique respondere tunc necesse habet, causam suam Dei & populi judicio examinari se velle, tum Scriba eum interrogat, an ex eo numero judicum qui in ejus causa sessuri sunt, quique populum referunt, aliquis sit, adversus quem aliquid possit objicere. Spectaret verò & consideraret attentè dum liceret; agi enim de vita ejus ac necesse. Cur hoc Regi non licuit, quod privato licitum esse omnia jura semper voluerunt,

runt, etiam Anglicana? Nam quid inju-  
stius est quam dare judicem hosti ipsum  
hostem, præcipue apud eos qui justitiæ  
supremum tribunal se erexisse jactabant?  
Cum & Cocus eorum advocatus in sua  
Declamatione sive Provocatione dixerit,  
supremum illud Tribunal quod militum  
duces in Regis caput statuerunt, *simile  
esse magno illi Dei judicio, cum venturus  
est ad judicandos vivos & mortuos.* Quæ  
horrenda blasphemia mille ictibus crucia-  
bilis tormenti ad mortem meritam de-  
buit autorem perducere. Qui vero certio-  
res Regis hostes quam subditi rebelles, qui  
armis contra eum nefarius sumptis bello  
devietum ceperunt, captum carceri man-  
ciparunt & judicandum iis tradiderunt,  
qui judices ejus esse hoc ipso non pote-  
rant quod hostes erant? Si ergo inimi-  
cos suos antiquo novoque more & jure  
judiciali rejicere debuisset ex illo pesti-  
lentiæ confessu, non unum aut alterum  
recusasset, sed una litura omnes. Nam  
quis in illo conventu non hostis Regis a-  
cerrimus consedit? Selecti ad hoc fue-  
rant. Rejecti sunt quicunque mitiores  
aut æquiores futuri videbantur. Ideo  
primum totam superiorem domum pro-  
cerum sustulerunt, quæ tamen sola fem-

per judiciario munere fungendi jus habuit, cum inferior numquam ad hoc munus admissa fuerit, de qua tamen sola iudices in Regem sumpti sunt. Deinde ex hac ipsa inferiore demo certos quosdam decerpserunt, quos immortali in reges & regna odio flagrare cognoverant, ut eos in istud iudicium introducerent. Non enim tantum qui hostes Caroli peculiare fuere, in Carolum iudices dati sunt, sed etiam illi qui ad reges quoscunque & qualescunque ex sectæ suæ disciplina ex genibus abolendos & exterminandos animati sunt. Hi si sub regno Elisabethæ nati essent, Elisabetham reginam eodem loco habuissent, quo Regem Carolum. Nec aliud de Eduardo bono statuissent, si vivere tunc illos contigisset, & parem voluntati potestatem habere. Mirum profecto est qui testimonio suo vel minimum civium lædere non potuissent in eum testes producti, & inimicitiam cum illo habere comperti; Regem ipsum, cuius apertissimi, professissimi, flagrantissimi & animosissimi hostes fuere, sententia sua ad mortem condemnasse, iudices in illum datos. Sed à quo dati sunt? An ab illis qui dandi jus habebant? Populus ergo dederit, in quo supremam potestatem origin-



ginaliter residere tanta vi pertendunt furiosæ rebellionis scelerati duces. Certè aliunde quam à populo secundum eorum doctrinam hanc jurisdictionem accipere non potuerunt. At isti postea rursus illam delegarint iudicibus selectis, à quibus Rex iudicatus est. Atqui jure quod semper & apud omnes obtinuit delegatus ab alio iudex, alterum delegare non potest iudicem, ut habetur Leg. v. Cod. de Judiciis: *A iudice iudex delegatus iudicis dandi potestatem non habet.* Nempe ab eo iudice qui jurisdictionem habet suo jure, non alieno beneficio. Is autem Rex est aut summus Reipublicæ magistratus. Atqui constat duces exercitus rebellis cum tribunis & centurionibus qui consilium militare constituebant, eam summam Justitiæ *Cameram*, ut vocant, erexisse ad Regem & alios regni Proceres hoc objecto crimine solo quod Regi suo fideles extiterant, iudicandos. Quis ergo hanc potestatem his ducibus dedit, dandorum iudicum? Aut eam à se habuerunt, & suo jure, aut alieno beneficio. Si à se habuerunt, recte quidem sic iudices illos delegarunt, cum à nemine ipsi delegati forent. Ergo in Anglia milites summum semper imperium obtinere, non solum

in populum, sed etiam in Regem & Parliamentum! Quis vero hoc unquam audivit? Ne ipsi quidem id sibi sumunt, sed in populo harere, ut in origine sua, summam imperii potestatem autumant. Ergo à populo jurisdictionem acceperunt. Si ita est, delegandorum judicium potestatem habere non potuerunt, cum ipse essent delegati. Præterea, quomodo aut quando hanc facultatem acceperunt à populo? An populus legem aliquam sanxit, non regiam certe illam sed militarem, quæ suum jus in istos militum duces transtulit? Sed ubi ea lex? Quis deinde populus, aut quæ pars populi hoc fecit? Si per populum, ut diximus, intelligunt plebem ipsam, & eam populi partem quæ domum inferiorem Parliamenti constituebat, nullo jure illa id dare potuit, quod ipsa non habuit. Nunquam enim judicarium munus exercuit; nec ullam unquam jurisdictionem suo jure administravit, ac ne delegatam quidem. Deputati erant Civitatum qui ad Senatum ex comitatibus Angliæ mittebantur, postquam mandatum de hoc à Rege cujusque Comitatus Vicecomes accepisset. Si aliquam habuissent juris dicendi facultatem, ab urbibus suis eam mutuati essent, à quibus missi erant,

sed

sed tunc ea delegata jurisdictio fuisset, & propterea non aliis eam dare potuissent. Tunc enim plus vice simplici delegati fuissent, & propterea non aliis eam dare potuissent illi judices qui Regē condemnarunt. Nam à ducibus militum eam potestatem nacti essent, qui eam à delegatis urbium accepissent mutuam. Quodcumque horum fuerit, sine autoritate fuere. Sed ponamus, domum illam inferiorem plenum jus jurisdictionis habuisse, & eam militum ducibus delegare potuisse, qui & ipsi alios judices delegatos ad Regem & Procures judicandos dederint. Quæ omnia cum à jure & æquitate longe absint, ea ponamus tamen. Oportuit domum ipsam quæ id jus dabat quod ipsa non habebat, sed quam habuisse fingimus, integram omnibus numeris & partibus fuisse, non mancā, non mutilā, non præcipua & meliore sui parte defectā. Quadraginta quinque ex his in carcerem conjecerant, centum duobus minus ab ingressu Curiae excluderant. Multi alii metu territi ac fugati sponte abfuerunt. Si quæretur quo jure aut qua autoritate hæc fecerint, eadem respondebitur qua in Regem ex militibus & plebeiis conflatum tribunal

justitiæ constituerunt. Atqui ne tota quidem illa domus & omnibus suis membris constans id potuit facere ut vel ipsa de Rege judicandi jus sumeret aut aliis daret. Quanto minus ergo id juris habuit tot numeri sui partibus diminuta? In his conventibus qui ex deputatis provinciarum & civitatum componuntur ad res publicas tractandas, si vel unius provinciae vel civitatis Missos abesse contigerit, nihil potest definiri. Quod ex more solenni, qui in his fœderatis Provinciis observatur, potest confirmari. Nec aliud servatum fuisse liquet in Anglia, in domo præcipue inferiore Parlamenti, ad quam jussu Regis convenire debebant ex singulis Comitatus duo milites gladio cincti, & ex singulis comitatuum civitatibus duo cives. Etiam in omnibus olim dicasterijs apud Græcos & Romanos, quod & hodie in nostris obtinet, semper obtinuit, ut certus numerus judicum in his esse deberet, ad judicium legitimum ferendum, & sententiam quæ auctoritatem haberet, pronuntiandam. Nam si vel unus deesset ex illo statuto numero, firmum non habebatur quod esset judicatum. In Galliæ Parlamenti ad minimum septem esse debent, ut  
fiat.

fiat Senatusconsultum in singulis, ut vocant, Cameris. Alibi decem. In Anglia duodecim. Unde *duodecim viri* ibi appellantur. Inter Eirenarchas Angliæ quos Rex ad res disceptandas & reos judicandos constituebat numero triginta aut quadraginta, certos ex illis nominabat quos semper adesse oportuit judicio. Multo magis autem, ut dixi, in his confessibus id servatum, qui ad res publicas pertractandas ex deputatis Provinciarum convenire tenebantur, qualis domus inferior Parlamenti Anglicani fuit. Sed hæc juridicam potestatem nullam habuit. In superiori domo Nobilium, quæ ex Episcopis, Abbatibus & aliis Regni Proceribus constabat, aliud erat. Non enim à civitatibus deputabantur nec à provinciis, sed singuli eorum regio mandato vocabantur, cui jus fuit quoscunque vellet, evocandi. Atque hi soli judicaria potestate fuere præditi, ut jam pluries dictum est. Qui ex hac domo erant & hoc jus habebant, pro dignitate illius domus, non poterant si deliquissent, ab aliis judicibus condemnari. Hæc Curia *Parium* fuit, qui non judicabantur nisi à paribus, id est collegis suis. Unicuique autem hominum

con-

conditioni suum forum & sui iudices fuerit semper in omnibus ferme Rebus publicis ac Regnis assignati. Catholicon Romani juris est, *Actorem debere sequi forum rei.* Quod nullum esset, si unum omnibus & commune forum foret. Senatores olim à solo Senatu, cuius pars erant, iudicabantur. Nunc quoque idem fit in Gallia & aliis regnis. Parlamentum Parisiense est, quod competens & commune forum est omnium, qui pro dignitatis qualitate quam obtinent, non possunt ad aliud iudicium vocari, nisi de capite eorum agatur. Senatores quoque non aliud tribunal agnoscere tenentur, si capitalis criminis rei fiant, quam ipsum Senatum in quem fuere cooptati. Nobiles etiam suum & competentem iudicem habent, & plebei suum. Qui *Balivus* in urbibus Galliarum dicitur, nobilium iudex est. Roma *Ædilis* olim de causis lenonum & meretricum cognoscebat. Prætor coram Quæstore conveniri non poterat, nec Consul coram Prætore. Sed Consuebat ut major potestas in hos omnes iudex sedebat. Ipse ut coerceretur aut & puniretur, si deliquisset, vel à collega Consule, cui extra ordinem Senatus hanc potestatem dabat, iudicari debuit, vel etiam Dictator



Orator ad hoc dici ab altero Consule, qui summum imperium in omnes ad tempus habebat. Præsides in Provinciis pedaneos judices dabant qui de minoribus negotiis litigantes audiebant, & personis vilioribus jus reddebant. Milites suum pariter habuere judicem, id est militarem, cui de civibus cognitio erat interdicta. Certos judices semper ad res certas & in certas personas constitutos fuisse constat. Hinc competentis & incompetentis judicis differentia, qui pro qualitate personæ de qua agitur, aut idoneus est, aut non idoneus. Competens cuique est, quem & *suum* dicere, id est sibi proprium, commodum & convenientem. Legibus Romanis & constitutionibus Principum sancitum fuit, sententiam à non suo iudice dictam, id est à iudice incompetente, non valere. In leg. iv. Cod. Si à non competente iudice iudicatum esse dicatur, hæc verba habentur: *Et in privatorum causis huiusmodi forma servetur, ne quemquam litigatorum sententia non à suo iudice dicta constringat.* Quanto magis in publicis causis & capitalibus judiciis id obtinere debuit. Leg. ii. Cod. eodem. Datus iudex à quo dari non debuit, aut non datus à quo dari potuit, & militari in causa à non militari, etiam



etiam citra appellationem, *quod ab eo statutum erat, firmitatem judicati non habebat.* In Regno Angliæ per leges illius regni Optimates & Proceres illius status, ut sunt Duces, Marchiones, Comites, Vicecomites & Barones, non possunt alios habere iudices præter illos qui sibi sunt dignitate pares ut ejusdem curiæ consortes & participes. Hi *sui* sunt illis & competentes. Ab aliis lata contra eos sententia constringi nullo modo debent. Nunc vero, si regem non aliter consideremus, quam ut caput illius curiæ Procerum, præfidemque ac principem Senatus, quem dabimus illi iudicem suum? Cujus sententia eum competenter constringet, si judicandus fuerit & damnandus? An milites vel duces militum, qui non possunt disceptare nisi militares causas, nec de personis aliis quam quæ militiæ sacramento obstrictæ sunt cognoscere? An domus inferior deputatorum urbium, qui nec ipsi umquam de capite minimi vel vilissimi civium potestatem decernendi habuere, utpote qui judiciario munere numquam functi sunt, nec fungi possunt? An ex utrisque compositum iudicium, id est, militibus & plebeiis, de Regis capite iure statuent, qui de nullo statuendi ius habent?

Enim-

Enimvero si Rex judicem suum habere, & ipse judicari potuit, non oportuit alios sortiri judices quam quos nobilibus suos & competentes esse legibus regni definitur. Nec enim causa est cur minore prærogativa censeatur dignus, qui nobilium caput est ac princeps, quam quilibet Procerum illorum, quos dignitate saltem primatus præcellit. Qui potior est auctoritate, cur privilegio esset inferior? Id contra rerum naturam foret & rationem, sensumque communem omnium hominum. Nunc videamus an & isti Proceres Regi suo *sui judices* & competentes esse possint. Dignitates suas hi omnes à Rege consequuti sunt. Nullus est inter hos Ducis titulo insignitus, nullus Comes, nullus Baro, quin à Rege vel codicillis honorariis vel rescripto hunc gradum adeptus fuerit & honoris titulum. Præterea quascunque possessiones habent fundorum, eas tenent in feudum à Rege & sub rege, cum eo nomine *ligii* sint & *vasalli*, ut juris illius quod Romanis ignotum fuit, vocabula usurpemus. Unde & in litteris quibus Rex evocabat proceres ad Parlamentum, hæc verba fuere solenniter posita, *Vobis sub fide & ligeantiis quibus nobis tenemini firmiter injungentes*  
man-

*mandamus ut personaliter, &c.* Cum fideles ergo sint omnes regis & nomine dignitatum quas beneficio regis obtinuerunt, & ex causa patrimonialium feudorum, quæ ejusdem munere possident, nulla ratione & nullo jure fieri potest, ut tam Vasalli de Rege judicium ferant capitis, quam servi de domino, aut clientes de illo cujus in ditione & clientela sunt. Dignitates autem illæ, de quibus diximus, aut honorariæ sunt, ut hoc tempore omnes ferme esse constat, aut patrimoniales & feudales sub titulis Ducum, Comitum & Baronum possessæ, ut olim fuerunt. Utrumque genus à Rege tanquam à causa sua & origine. Certè Rex dominus est summus omnium feudorum quæ in Anglia possidentur, quocunque titulo teneantur jam inde à temporibus Guilielmi Conquestoris. Tantum vero abest ut Vasalli, id est Duces, Comites & Barones & Equites, Regis, id est domini sui, iudices esse, & eum capitis damnare jure possint, ut ne quidem ejus accusatores & delatores esse queant, quin feudum amittant. Ingratus in dominum vasallus, perfidus, contumax, contumeliosus, feudum excidit, quod ad dominum revertitur eo casu, non ad liberos ejus. *Fideles dicebantur*

vir ejusmodi Vassalli, quia fidem domino promittebant, interposito jurejurando. Fideles quoque subditi regis vulgo vocabantur ab eadem fide cum sacramento promittenda & præstanda. Qui utrumque sunt, & subditi & vassalli, duplici fidelitatis sacramento obstricti tenentur, ut fuere Equites qui feuda Equestria possidebant in Anglia, & altiores omnes dignitates quas supra recensuimus, Ducum, Comitum & Baronum. Hæc tamen differentia fuit fidelium, siue feuda sub rege & à rege tenentium, quod alii jurarent fidem, alii non jurarent. Utrique tamen feudum amittunt, si contra dominum aliquid admittant. In conventu judicum qui de Regis capite pronuntiarunt, aliquot Equites fuere. Hi vel Equestria feuda possidebant, qui eo nomine fidelitatem regi debebant, vel Equestri dignitate ab eo fuerant donati. Neutro modo potuerunt in regem judices sedere, cum duplici vice ad fidem regi ac obsequium præstandum obligati essent, & quod subditi, & quod vassalli. Quis ergo judex erit suus Regis? An Populus? Si populus regis, etiam illorum, qui solo rege minores maximam in regno obtinent potestatem & dignitatem, quique domum Parlamenti superiore

riorem constituunt. Ergo non solius regis, sed etiam Parlamenti ipsius dominus & supremus arbiter populus erit? Ergo populus ut Regem elegit, ita etiam Parlamentum? Quod tam falso asseverant duces exercitus rebellis, quam verum est ipsos esse nequissimos ac perditissimos perduelles. Ergo populus erit dominus omnium feudorum & feudalium patrimonialiumque dignitatum quæ in Anglia tenentur? Vasalli cujuscunque generis & conditionis in eum solum peccabunt, & feloniam, quam vocant, committent, si ingrati aut perfidi in eum extiterint? Quod quam absurde, stultè & falso dicatur, omnes vident. Nemo igitur in populo nomine populi intelligetur nisi cerdo-num & opificum turba? Duces, Comites & Barones non erunt de populo? Populus iste rex erit? Principes & optimates populi erunt ejus subjecti & servi, cum suo rege, id est suo capite? Quod asserunt novi sancti & Independentiæ prophetae, Regem à populo eligi, & Parlamentum ab eodem constitui, velim scire an magnates & proceres illi de quibus diximus, nullam partem in ista electione regis habeant, utpote qui pars populi non sint? Quo in numero igitur aut loco habebunt,

unt, si ne quidem in populi appellatione  
artem sint habituri? Si negare non pos-  
sunt & eos populi particulam esse, an ne-  
dabunt ad eos quoque pertinere jus eli-  
gendi regis pro sua virili portione? Si id  
concedant, cur mihi non dabunt, in eo  
quoque abdicando debere suffragium fer-  
re? Cur Rex qui ab universo populo om-  
nium suffragiis debet sumi, si de eode-  
stituendo aut amovendo agatur, non id  
etiam fiet unanimi omnium consensu?  
æpe ad magistratum eligendum tam ci-  
vilem quam Ecclesiasticum, major nu-  
merus requiritur, quam ad eum abdican-  
dum. Quid ergo nobis commenta sua  
anatica obtrudunt, quibus & populum  
educunt, dum populo potestatem tri-  
buunt regem constituendi & eligendi, &  
populo denegant ejusdem amovendi ar-  
bitrium? Non enim populus est nisi to-  
tus. Militum duces regem perdiderunt.  
An illi sunt qui elegerunt? An milites po-  
pulum faciunt soli? Optimates à populi  
motione & nomine removebuntur, &  
eam totam milites in se suscipient ubi de  
rege submovendo quæstio movebitur?  
Numerus iste militum vix decimam par-  
tem populi Auglicani constituit, quid fiet  
reliquis novem partibus? An decima pars  
plus



plus quam ceteræ novem valebit, & populi universi appellationem justius merebitur, quam omnes reliquæ, tam in constituendo rege quam in destituendo? Quis hanc potestatem militibus dedit? Natura an sorte talem habuere, & originaliter conditioni suæ in hærentem possident? Si autem facti sunt cum antea non essent, oportet eos ab aliqua majore potestate factos esse. Si Rex non est qui eos fecit, ergo populus est qui & regem simul & Parlamentum ejus constituit. Ergo & universo populo tam potestate quam numero minores sunt, cum militiæ sacramentum à populo acceperint, & tanto plures sint. Quæ igitur ratio, ut potestate & numero inferiores, quique ipsi id quod sunt à populo acceperunt, plus possint quam sui superiores & domini tam in rege eligendo quam in abdicando? Nam, ut dixi, eadem & eorundem autoritas debet ad abjiciendum regem valere & ad eligendum, vel ipsorum concessione. Si populo dant potestatem regis & parlamenti eligendi & cum videbitur abjiciendi, videant ne in se quoque parem attribuant eidem populo autoritatem, & majore quidem cum ratione. Nam quid sunt milites præ Rege & Parlamento? Quis umquam



quam dubitavit quin subiecti sint, immo  
& mercenarii, utriusque potestatis Regiæ  
& Parliamentariæ? Ergo cum ad sanitatem  
suam revertetur populus, & pœnitentia  
nefarii facinoris eum percipiet, tum ex-  
ercitum illum rebellem & Regi ac Sena-  
tur totique regno perniciosum & exitia-  
lem, decimatū puniet, ducesque ejus  
ita meritos in crucem tollet. Quis tunc  
non fatebitur justitiæ divinæ populum li-  
tasse, cum talem pœnam merentes vi-  
debit expendisse? Alia etiam ratione per-  
pendamus quantum a jure alienum sit  
quod egerunt perfidi latrones. Si Rex  
Angliæ, id est suus, regno expelli ac vita  
merebatur, jusque illi habuerunt dupli-  
cem hanc vindictam de eo sumendi, quid  
juris habuerunt in Regem Scotiæ & Hi-  
berniciæ? De suo poterant statuere quod  
volebant, cum eum in potestate habe-  
rent, regnumque Angliæ illi adimere, in  
quo plus valebant, sed cur vita illum pri-  
vando regnum Scotiæ & Hiberniciæ rege  
suo spoliarent, cum de solo Anglicano  
disponere deberent? Aliud esset, si Scoti  
Hibernique in eandem cum ipsis senten-  
tiam conspirassent, & æque desiderassent  
regem importunum a se amoveri, ut An-  
gli de suo id cupiebant. Contra ea Scoti  
regem

regem suum vindicabant, testabantur non consentire cum rebellibus Anglis ubi resciverunt id illos agere ut supplicium capitali regem sibi & Scotis Hibernisque communem de medio tollerent. Remittere ad Scotos regem suum debuerunt, & ab Angliæ regno eum depellere. At eum occidendo tria regna orbarunt, cum duellum assensum suum non commodarint, se omnibus testificationibus contra niterentur. Sic Rex trium regnorum perfidiosus & nefarie & parricidaliter obtruncatus est sententia judiciali, per carnificem, duobus regnis penitus dissentientibus, & tertii novem partibus renuentibus, in quibus fuere ministri Ecclesiæ, omnes presbyteriani, omnes optimates & populi pars sanior & numero major. Soli Independentium milites cum ducibus suis unius regni Anglicani incolæ, quoniam hæc pestis à cæteris duobus exulat, & qui vix centesimam populi Anglicani partem conficiunt, in expiabili scelere & parricidio vix dictu effabili tria regna uni regi cum vita eripuerunt, non aliam ob causam quam quia sectam in religione sequuntur à regio regimine abhorrentem, & reges detestantem. Cujus sectæ auctores ab eadem disciplina venerunt quam instituit

stituit Johannes Leydenfis & ex ejus pro-  
sapia & hæresi oriundi. Quales autem  
constituerunt ad eum damnandum judi-  
ces, tales ad eum securi percutiendum  
carnifices adhibuere. Nisi verius sit ex nu-  
mero judicum duos illos carnifices sum-  
ptos esse, qui personati egregiam in eo  
decollando operam navarunt. Inter judi-  
ces quippe qui ad eum condemnandum  
confedere, viginti & quatuor tribuni mi-  
litum fuerunt. *Colonellos* nuncupant vul-  
go. Duo similiter *Colonelli* officio car-  
nificis functi sunt, ad hoc, ut apparet, lar-  
vati, ne qui conspecti in subselliis judicum  
fuerant, paulo post conspici in pægmate  
infami fierent, carnificum operam præ-  
bentes. Præses ipse latrocinantis confes-  
sus, homo nihili, pretio redemptus est, ut  
quantum juris & litterularum noverat,  
huic judicio impenderet. Cæteri juris &  
rerum, doctrinæque omnis imperiti. Ter-  
tio loco inter judices sedit Dux Indepen-  
dentium, & ducis exercitus legatus, cum  
genero suo, de quibus dici potest,  
*Socer generque perdidistis omnia.*  
Sed audire visus sum vocem nescio quam,  
sive *filiam vocis*, ex aëre auribus immur-  
murantem, non eam tamen ipsam quæ  
sepe prophetas Independentium ad men-  
daciū

dacium dicendum movit, sed aliam magis veridicam, quæ hunc versiculum subjecerit, *Ipsique vos perdetis & post omnia*. Quod autem in jure dicitur, *neminem posse in sua causa esse judicem* vel jus sibi dicere, quia ut in lege est unica sub illo titulo Codicis, *Admodum iniquum est in re propria alicui licentiam tribuere sententia*, in his hominibus, sive potius hominum monstris, locum plane habet. Nemo enim aliter possit dicere, quin in re propria jus sibi dixerint. Cum ipsi reges se facere voluerint, id alia via consequi non potuerunt, quam Regem legitimum amovendo, qui solus obstabat ne regnare possent. Nec laborare debemus quærendo quo jure & qua autoritate judices ad eum tollendum sederint. Non enim aliter sententiam contra eum tulerunt, quam si sine sententia trucidassent. Certè qui inauditum & indefensum condemnarunt, tametsi in agendi & judicandi modo reliqua omnia recte & ordine processissent, atque is qui damnatus est, objectorum criminum vere reus fuisset, pro insonte tamen hodie haberetur. Atqui nihil in ea accusatione & judicio actum est quod ullo colore vel tenui bractea juris oblitum videri possit. Is est condemnatus qui nec potuit accusari. Inauditus est con-

dem-

demnatus. Judices in eum dati sunt qui judicandi licentiam non habuere. Dederunt illi quibus dandorum judicium jus non erat. Duæ sunt voculæ iisdem ac totidem elementis constantes, solo literarum situ differentes, sed immane quantum significatione differentes, *vis* & *ivs*. Illam arripuit Independentium sanctitas, istud jussit facessere. Ea vis igitur peperit judicium illud in Regem, quod latrocinii & parricidii nomine vero debet appellari. Ut illi qui id reddidere pro latronibus, sicariis & parricidis, quandiu hujus facti memoria inter homines vivet, non pro judicibus, habebuntur.

---

## C A P V T XII.

**I**Am pervenimus ad quintam & ultimam quæstionem, quæ est de criminibus Regis Caroli, ut constare possit jure an injuria sit damnatus. Nullum crimen esse ex quo ille qui Rex est condemnari queat, cum supra demonstratum sit, supervacuum hic videretur quærere quo crimine ceciderit Angliæ Rex. Potius quippe pronum esset pronuntiare injustum illud & iniquum, immo & ipsissimum omnino parricidium fuisse judicium cui succubuit.

Cæterum quo melius de ejus innocentia  
liqueat, fingendum hic nobis est, unum de  
privatis reum fuisse, vel si id non potest,  
saltem magistratum aliquem populi, qua-  
les omnes reges haberi oportere sanctis  
Independentibus placet. Ponamus igitur  
Regem, ut talem, posse accusari & in ju-  
dicio teneri respondere, rationemque suo-  
rum actuum judicibus reddere. Enimvero  
quoniam Rex est, qui condemnatus capi-  
talem subiit sententiam, oportet eum de  
maximis criminibus in judicium vocatū, à  
gravissimis testibus læsū, & sub justissimis  
judicibus capitis supplicio punitum esse.  
Quod attinet ad crimina, duæ partes ejus  
accusationis fieri possunt. Una in repre-  
hensione vitæ versatur, altera in delictis  
quæ tanquam rex potuit committere.  
Prior personam ejus spectat, posterior ma-  
jestatem sive dignitatem regiam, vel po-  
tius administrationem. In primâ quaren-  
dum est quomodo vixerit, in secunda quo-  
modo regnarit. Ita qui magistratum po-  
puli gerit, aut tanquam privatus peccat, aut  
tanquam persona publica. Si furtum com-  
mittit, ut fur alius plectendus est qui arcam  
vicini effregerit ut pecuniã inde auferret,  
aut alio modo compilarit. Si pecuniã publ.  
intervertit cum in magistratu esset, pecu-  
latum

latum facit, & capitali animadversione, sed non tanquam privatus, plectitur. Itē si judex pecuniam ob judicandum decernendumq; acceperit, vel qui magis aut minus quid ex officio suo faceret, repetundarum postulatur, non ut privatus, sed ut magistratus. Adulteria, homicidia in eo qui cum potestate est, non sunt crimina propria magistratus, sed privatae personae, quæ tamen certum est levius animadverti ob dignitatem quæ personae inhæret, quam si nullam haberet. Alia lege reus fit qui ut civis delinquit, alia qui publica abutitur potestate & in crimen majestatis cadit. Si in magistratu positus de nocte & capite tecto in lupanar intraret, intra civem peccaret. Si idem medio die faceret, cum apparitoribus & fascibus & omni pompa quæ comitatur potestatem, majestatem populi imminueret & suam, quæ cum publica in ejus persona conjuncta est. Regum quoque vita, ut & magistratuum interior, & domestica, civium vitiis laborat, quæ nihil habent cum iis criminibus commune, quæ in regnando & administrando imperio committuntur. Aliquis vinosus est & libidinosus & luxuriosus & prodigus & avarus princeps, cui tamen hi mores à bene regendo non obstant. Quid melius Trajano?



Ebrietatis tamē infamia tactus est, & puerorum amore nimio. Alius amicas habuit nec una tori consorte contentus fuit, & nihilosecius inter bonos numeratur principes & magnos. Ulterius ibimus. Davidi homicidium cum adulterio junctum egregii regis famam non abstulit. Parricidium & amores mulierum cultui falsorum Deorum deditarum à quibus & ipse ad eandem insaniam abreptus est, Salomoni non obfuerunt, ne regum sapientissimus suæ ætatis haberetur. Christianorum amor & delictum Constantinus Crispum ex se genitum necavit, & uxorem Faustam Crispi novercā balneo calentis aquæ exanimavit, nec tamen optimi principis famam perdidit. Non alios nominabo veteris & recentis memoriæ reges, quorum vita domestica non solum vitiis, sed etiam sceleribus contaminata erat, qui propterea tamen in numerum malorum principum relati non fuere, quia publica eorundem administratio rectiore talo stetit. Nihil ergo impedit, quin idem domi infamis, foris sit gloriosus. Et multi reges majore bene gubernatæ Reipublicæ quam familiæ recte administratæ laude inclaruere. Aliæ quippe virtutes regię sunt, alię quibus privati commendantur. Ille tamen perfectis-

simus

simus est rector, qui ad regias etiam adjungit quæ privatorum sunt dotes. Si omnes artis numeros non implet orator, qui sola dicendi peritia valet, nisi etiam probitas in eo laudetur, quanto id in rege magis desiderabitur ut vir bonus sit & regendi peritus? Non tamen idē semper qui bene vixit, etiam optime rexit. Nam & artes aliæ ad regnandum sunt necessariae, quibus si careat ille rex qui vir tantum bonus esse & haberi cupiat, numquā officio boni principis, & cui bene commissa sit reipublicæ cura, recte fungetur. Tales multos historie suppeditant, qui hoc ipso peccarunt quod peccare non poterant, hoc est, qui nimia bonitate ac simplicitate publicam rem male gessisse & quodammodo decessisse videri possunt. Si querimus quomodo vixerit Carolus, ne inimici quidem ejus, ac rebelles subjecti, qui caput illi scelerato judicio, quasi homini facinoroso securi carnificis amputarunt, aliter possunt dicere, quin bonus, pius, castus & religiosus princeps fuerit. Innocentia & integritate vite nemini principum qui hodie regnant, concessit. Cum veteribus comparatus, paucos hac in parte similes habuit, nullum ferme superiorem. Morte ipsa ubi nec simulationi nec dissimulationi locus am-

plius ullus est, cum vera rerum redit facies & mimica atque ad scenam facta recedit, planè aperuit qua sanctitate morum præditus, & quanta mensura Christianarum virtutum fuerit cumulatus. Quam multi autem sunt qui histrionicam quam tota vita egerunt etiam mimi clausula finiunt? Nihil autem in morte Regis à vita dissonum ac discrepans visum est. Qui veniam dedit cum extrema hora populum alloqueretur, hostibus suis & perduellibus, & iudicibus illis cruentis à quibus se iniqui neci adjudicatum sibi conscius erat, quam libenter veniam dedisset in alio delicto non in suam necem admissio, deprehensus? Memorant sane incruentum ejus imperium fuisse nec quemquam ab eo neci dari iustum præter unum nobilem aversæ veneris convictum, cui & gratiam fecit meriti & lege ordinati supplicii, quod pœna molliore mutavit. Scires nihil aliud in votis dum in vita & regno fuit habuisse præter populi sui pacem, qui moriens adeo diligenter eam commendavit audientibus & tam horrendo spectaculo assistentibus. Potuitne non ex Christi lege vivere, qui ad ejus normam tam exacte vitam finivit? An ullus privatus ita moritur, in tali loco, & tali mortis genere? An protomartyr ille  
cum

cum lapidaretur ab infano & impio populo, aliter infontem & sanctam animam, atque in aliis verbis efflavit, quam hic primus Angliæ regum martyr, cum sub carnificis securi esset expiraturus? Ambo Deum orarunt ut hoc quod facerent, impunitum esset suis autoribus. Si conferramus & contendamus eum qui damnatus est cum suis accusatoribus, regum trucidatū cum subjectis qui necarunt, videbimus quid inter utrosq; fuerit discriminis. Utri Christi fidem & doctrinam melius & officium exprefferint. Quorum verba Christum ipsum, ut dicam, magis sonuerint. Extant illa quæ Rex ad populum pronuntiavit, cum sub ictu carnificis staret, quibus animam Deo suo jam plane resignatam testatus est, & omnia mundi fastigia calcantem, sceptrum quod gestaverat, & thronum cui insederat, nihili estimantem, & ad illam immarcescibilem coronam quæ sanctis in cælo parata est, toto pectoris ardore properantem, & mortalem quã gesserat non amplius capiti hæsuram, cum capite ipso deponere gestientem, solum regnum Christi anhelantem pro regno terreno quod sceleratis latronibus possidendum relinquebat, sibi ereptum cum vita, cum illis horum omnium veniam dedisset

ut sic Christo placeret. At impie ejus accu-  
satores & condemnatores non contenti  
eum perdidisse capitis & regni, vitam me-  
moriâque defuncti semper victuræ ca-  
lumniæ macula inquinare etiam nunc co-  
nantur. Quasi non sufficeret nocentem  
fecisse, & pro scelerato latrone ad mortem  
condemnasse, crudeliorem Nerone & om-  
nibus modis pejorem traducunt. Quasi  
mors una uni homini & quidem regi pa-  
rum esset, eaque infamis, & per carnificem  
irrogata, decies millenas illi cervices etiâ  
post mortem in scriptis suis optarunt, ut  
totidem defecare potuerint, tanquam si  
decies millia capitalium criminum com-  
misisset, pro quibus totidem supplicia ca-  
pitalia ipsi merito fuissent exhausti.  
Atqui ne unius quidem probati & confessi  
subscriptionem in eum edere potuerunt.  
Votum veteris tyranni fuit ut populus cui  
imperabat, unam cervicem haberet ad li-  
bitum suum abscindendam. Quanto ma-  
gis hoc tyrannicum & crudele uni ho-  
mini tot capita optare quot populum fa-  
cere possunt, aut quot pilos ipse habet in  
capite, ut totidem unus mortes patiatur?  
Saltem illo Caligulae voto unica plaga ad  
mortem populus universus defungi pote-  
rat. Illo vero, quod vovit Advocatus par-  
rici-

ricidarum, ex illorum nempe mente sanguinaria, per decies millenas neces uni homini pereundum fuit. Quid ille Rex de te tantum mali meruit, o maledicte & infamis parricida, ut non exsaturatus sanguine ejus, quo securim carnificis tua accusatione tinxit, decies millia animarum eum habere volueris, ut sic oculos animumq; crudelitate ac immanitate incredibili & qualem nulli umquam tyranni excogitarunt, pasceres & satiares? Ergo totidem reges hodie sic mactatos videre velles si totidem essent, quot uni regi cervices amputandas optasti? O tempora! O mores! O natio! O Religio! O Reformatio! Ubi pietas, non dicam Christiana, sed humana? Sepe fontium miseremur & vilium, & justo supplicio affectorum. Ecce cui dolet regem suum non habuisse innumera- biles vitas, ut omnes posset perdere, & per omnes supplicia expendere. Ultra tot mortes insuper sævire impius voluit, cui tot in uno corpore regio cruciatus ultimi non suffecere. Nec hoc tantum, sed mortis temporalis poena minime contentus, etiam æterna damnandum censuit quem decies millenis mortibus dignum judicavit. Nam in fine sceleratæ Provocationis, qua factum parricidiale & judicium infan-



dum suum defendere iustinuit, Deum introducit Regem ita alloquentem. *Abi, abi, ad animarum institutores Episcopos tuos, qui te fursuribus & veneno aluerunt, at nunc tibi vescendum est igne & sulfure in aeternum.* Hæc mihi revocant in mentem Itali Sicarii detestandum factum, qui hosti suo vitam eripere cum satis non haberet; nisi etiam faceret ut animam simul cum corpore perderet, gladio in jugulum intentato minatus est se occisurum nisi Christum negasset. Ille metu mortis abnegavit. Tū latro protinus ferrum pectori negantis immerisit, ratus uno eodemque ictu vitam simul futuram & præsentem hosti se admisisse. Ita Latronum patronus Regem suum, sed inimicum quia regem, cuperet etiam ad æterna supplicia à Deo condemnatum, sicut ab hominibus nefariis coactus est pœnam subire transituram. Et quia id cupit etiam credere audet. Immo & homo blasphemus non rectum justumque Dei iudicium putat futurum, nisi morte similiter æterna puniat, quem sicarii parricidæ mori temporaliter coegerunt. Ideo comparare ausus est Dei iudicio ultimo hoc iudicium sceleratum, quo Regi vitam eripuerunt. Ergo & iudices qui in Regem confedere, Deo similes æquitate & iustitia fa-



facere sic debuit, vel etiam superiores. Nam nisi eorum sententiam sequatur iudex ille supremus in morte regi æterna infligenda, vix iusti iudicis nomen mereatur, quoniam ad exemplar summi Iustitiæ Anglicani tribunalis non properaverit, cujus votum fuit decies millenas cervices regem suum habere, ut decretoria tabella omnes demeret demeteretque. Fatentur illi quidem tale iudicii exemplum numquam alias auditum, nec visum, sed ideo fuisse instituendum, quia Rex in quem hæc exempla ab iis edita sunt, non habuerit parem sceleribus quæ commiserit. Ne quidem Neronem. Itane? Non nocentem eum fecisse satis habuerunt, nisi etiam Nerone nocentio rem facerent? Age, inspiciamus utri Neroni similiores, Rex accusatus ab his & damnatus, an qui illum accusarunt & damnarunt. Nero matrem necavit, isti patrem patriæ, quod longe majus parricidium esse nemo negaverit. Nero, teste Suetonio, *nullum adhibuit delectum aut modum interimendi quoscunque libuisset, quacunque de causa*. Neget mihi aliquis illos eodem animo fuisse ad interimendos quoscunque suis partibus minus favere suspicarentur, & tum ipsi concessero, non esse hac in parte

te

te Neronis. Cū ille multos jam Senatores  
 necasset, *multas significationes nec dubias*  
*jecit, ut idem ait Suetonius, ne reliquis*  
*quidem parsurum Senatoribus, eumq; or-*  
*dinem sublatiurum aliquando e Republica.*  
 Quid aliud egerunt Regis iudices quam ut  
 Senatum ex Anglia exterminarent, tota  
 domo superiore Procerum sublata, quæ fi-  
 milior Senatui Romano fuit? Idem Nero  
 in auspicando opere Isthmi, eodē autore,  
 magna frequentia, clare dixit, *ut sibi & po-*  
*pulo bene res eveniret.* Nonne etiā populi  
 nomine omnia agūt isti Neronis Anglici,  
 in quo summam potestatem residere ver-  
 bis ajunt, totam vero ad se re ipsa trahunt,  
 cum in eum sæviorem quam Nero um-  
 quam ostendit, tyrannidem exerceant?  
 Nero *nec populo etiam pepercit*, referente  
 Suetonio. Isti cui pepercerunt e populo?  
 Nonne ex domus inferioris Senatoribus  
 quos populi partem esse volunt, cui &  
 summum imperium tribuunt, quadragin-  
 ta quinque in vincula conjecerunt, cen-  
 tum e Senatu pepulerunt? Quo crimine  
 ipsis objecto? Nullo nisi uno cujus nisi  
 rei ab his facti fuissent, scelerati & latro-  
 nes extitissent, & rebellibus illis similes.  
 Nempe quod Regi suo non adeo se ini-  
 quos esse ostenderunt. Quos nunc bello  
 per-

persequuntur, quorum urbes in Hibernia  
exstingunt, quorum stragem ubiq; edunt.  
quid meruere de Rep. mali? Tyrannos fer-  
re non possunt & Regem suum desiderant  
legitimū. Hoc apud novos Neronēs instar  
immanis est flagitii, nulla morte, nullis  
cruciatibus expiandi. *Nero religionum us-  
quequaque contemptor fuit, prater unius  
Dea Syra, quam mox ita spreuit, ut urina  
contaminaret.* Neronēs Anglicani dum  
omnes religiones admittunt, nullam se  
habere probant. Adeo etiam contemnunt  
diu in Anglia receptam, ut nuper mini-  
strum in templo concionantem, & li-  
turgiam legentem qualis sub Elisabetha  
regina approbata fuit, milites Indepen-  
dentium armati, & cum tumultu Ec-  
clesiam ingressi, de cathedra male mul-  
catum atque etiam vulneratum deripue-  
runt, plebem ipsam quæ prædicantem  
audiebat, disperferunt ac dissiparint,  
multis illatis vulneribus. Inde egressi ad  
domum Episcopi Londinensis se contu-  
lerunt, in qua pedissequus nescio cu-  
jus Comitis officio ministriungebatur  
& concionatoris, & populum de suggestu  
alloquebatur, quem attente audierunt, &  
concionantem protexerunt. Relegatur  
vita Neronis, plura ejusdem facinora re-  
perien-

perientur, quæ satis ostendunt, si comparatio eorum fiat cum eorum factis qui hodie Angliam gubernant, Neronianum plane esse istud imperium. Cum hac differentia tamen quod unus Nero totum ferme terrarum orbem quantum patebat habitandus, imperio suo premiebat, hic plures Neronēs unam Romani imperii provinciam & regnum exiguum dira fatigant tyrannide. Tanto deteriore ita regnatorum conditione, quod violentior vis multiplicis tyrannidis in parvum ditionis spatium ingruit, quæ dilutior cadebat ab uno in amplissimam & in totum orbem se pandentem ditionem. Hæc cernitur insuper differentia inter Romanum Neronē & istos novitios prisca Neronis æmulatores Anglicanos, quod ille improbitatem non dissimulabat, sed palam & apertè profitebatur impuritatem & crudelitatem. Quinimmo hoc p̄suasum habebat, neminem esse probum & pudicum, sed omnes calliditate vitium tegere. Neronēs vero Anglicani sanctitatis nomine omnia sua scelera celant, & profanam impietatem puritate adumbrata obtegunt. Idem Regi quem Nerone crudeliorem in omnibus fuisse volunt videri, parricidium Neronis etiam affingere ausi sunt. Quod &

& inter ipsorum scelera numerandum est. Sed ipse & qui eum defenderunt de eo crimine sic illum expurgarunt ut Independentium patronus coactus sit huic defensionis manus dare, & tandem fateri ænigma hoc esse in ultimo demum iudicio revelandum. Atque hæc de vita Regis. In qua nihil non modo puniendum, sed nec reprehendendum quidem, quinimmo omnia laudanda, probitas, pietas, clementia, religio, innocentia & integritas. Has virtutes, & præterea amorem erga Deum, charitatem erga proximum, benevolentiam erga populum suum quamvis magna ex parte immeritum & rebellem, ubique spirat liber ejus postumus. Accusatorum contra ejus & iudicum scripta, quæ pro defensione nefarii facti publicanda curaverunt, nihil nisi violentiam, truculentiam, immanitatem quandam & ferociam militarem, feritatemque molossicam & ἀπὸ νότου *apud νότον* redolent, & præterea mendaciis, imposturis, calumniis undiquaq; referta sunt. Magnum ex eo argumentum probitatis, sinceritatis & fidei quæ in Rege fuit, duci potest, quod cum promittendo quæ ab eo exigebantur, cum populo rebelli pacem posset habere, nihil tamen in ea pacificationis & reconciliationis conventionem, quæ

quæ inter ipsum & subditos tunc agitabatur polliceri sustinuit, quod noller servare. Quis in rege cum subjectis suis ita tractare per vim coacto id desiderasset? Quis non potius simulandi artem illi hac in parte adhibitam condonasset? E contrario accusatores ejus, millies pactam cum eo fidem fregerunt, & foedus ipsum, quod cum Scottis aliisque Anglis pepigerant, quo inter alia de persona Regis protegens cautum erat, nefarie violarunt, parricidaliter trucidato per carnificem, cujus majestatem se esse conservaturos persancte solenni fœderatione inita juraverant. Vi & dolo omnia semper egerunt. Hoc jus eorum & hæc justitia. Ita vere ex his concludi potest, quot virtutes in Rege fuerunt, totidem contraria vitia in ejus accusatoribus & iudicibus esse, adeo ut pro certo pronuntiari debeat, bonum, pium, justum, clementem, pacificum, sanctum regem, ab impiis, sceleratis, nefariis, crudelibus, infidelibus & fœdifragis latronibus & parricidis fuisse condemnatum. Veniamus ad ea crimina quæ male regnando commisisse arguitur, qualia nempe tyrannus facit, & quæ faciunt tyrannum. Sententia contra eum lata à iudicibus partim pretio redemptis, partim furiosis, *Tyranni, Proditoris*



*toris & Homicidae* elogius reum indicta  
causa condemnatum donavit. Priusquam  
hæc per partes diluamus, prima & opti-  
ma ratio purgandi regis hæc videtur, ut vel  
ipforum qui damnandum eum curarunt  
testimonio innocentiam ejus probemus  
& judicium iniquitatem fevincamus. Res  
maxime patens & manifesta est; Tyran-  
nis. Ut alia scelera in operto latent, conje-  
cturis eruenda, argumentis probanda, &  
testibus convincenda, nemini potest igno-  
tum esse an tyrannus sit, de quo omnes  
queruntur. Qui potest negare se tyran-  
num esse, jam probavit id quod voluit. Po-  
puli quibus non placet præsens dominatio,  
quique aliam quærunt, vel eam quæ est  
emendari cupiunt, si arma in rectorẽ suum  
hoc consilio & fini capiant, ne injuste vi-  
deantur se commovisse, solent publicatis  
scriptis causas allegare, quib<sup>9</sup> ad rebellandũ  
adducti sunt. Non semper personam Re-  
gis impetunt, sed de præsidum injuriis que-  
runtur, de ministri alicujus gratiosi & po-  
tentis apud regem nimia autoritate, de  
profusa in eum regis liberalitate, quibus  
exhauriatur ærarium publicum. Sæpe etiã  
onera tributorum obtendunt. Sed raro  
populus ad bellum regi suo inferendum  
quacumq; de causa concitatur, nisi autores  
habeat



habeat seditionis aliquos ex proceribus, qui odia privata publico nomine ulcisci student, aut regnum affectant. Hi populū, id est bestiam per se mobilem & irritabilem impellunt specie boni publici quod ignorat, & tædio regiminis quod molestum & importunum esse de facili ignavis & credulis persuadetur. Ita duces improbos cæcum vulgus & novarum rerum cupidum sequitur. Sic frequenter fit ut optimi & moderati reges pro tyrannis persequendi arripiantur, præcipue si religio quoque in his turbis partes suas agat. Hujus quippe prætextus sæpius transversos agit populos, qui zelo scientia vacuo abrepti, dum suspicionibus indulgent, sanctum etiam & religiosum principem quasi profanum infamant, quia talem esse persuasi sunt à suis ducibus, quorum pro bono factionis interest ita credi. Sic Henricus tertius apud Gallos cum Pontificiæ religioni usque ad superstitionem esset addictus, fidem non potuit invenire apud rebelles quos factio raptabat, sed pro fautore novarum religionum habitus & traductus est. Sic canis instar fuit, quem pro rabioso traducere solent illi qui eum omni modo quærunt tollere. In Angliam de qua nunc est quæstio, redeamus. Conspiratio populi rebel-

rebellis contra Regem suum, quam causam armis suis prætexuit? An, quod sententia capitalis continet qua morti adjudicatus est, se contra *tyrannum, proditorem & homicidam* bellum suscepisse professi sunt? Hi sane debuerunt, si talis ille omnium opinione tunc visus est, in his criminibus constanter & sine variatione accusationem suam defigere, præsertim cum nihil sit apertius, ut jam dictum est, tyrannide. Ad quam convincendam si suspicionibus tantum & conjecturis procedatur, nihil minus est quam quod dicitur. Multo minus tanquam convicta & confessa apprehendi speratur, si varia esse contingat hominum judicia in ea depalanda. Cur ergo in conjuratione quam inter se fecerunt Angli & Scoti contra Regem, non eum pro tyranno & proditore regni infectati sunt? Cur conjurati in eo fœdere contrahendo disertis & conceptis verbis se obligarunt mutuo ad conservandam & defendendam Regis personam & Majestatem? Tyrannum eum tunc esse & proditorem non sentiebant, de cujus autoritate & persona tuenda tertium articulum sui fœderis fecerunt. Independentēs non minus quam Presbyteriani, participes & socii fuere non ejusdem cum jusjurando initæ pactionis, quæ  
inter

inter conjuratos convenit. Non alia autem illo in tempore ad eam conspirationem inter partes faciendam causa prætendebatur, quam reformatæ curæ religionis, quantum ad doctrinam, cultum disciplinam & regimen Ecclesiasticum. Nihil aliud tum visi sunt à Rege postulare vel in regis gubernatione desiderare præter hanc reformationem, quæ in schismate extirpando, hæresibus tollendis, & Episcopali regimine submovendo præcipuè consistebat. Duo priora Rex facile concedebat, ad tertium quo Episcoporum abolitio petebatur, repugnabat. Nec immerito. Episcopos invenit cum regnare cœpit. Ideo tuendos eos sibi esse credidit, ut alia omnia quæ in regni ingressu promisit se esse servaturum. Nullæ mutationes in regno fieri possunt absque perturbatione plurium rerum, eaque summæ rei plerumque perniciosa. Sed de hoc jam non disputamus. Hoc tantum volumus cum arma contra Regem ab illis initis & post illam conjurationem sumpta sunt à presbyterianis, nullam de Regis tyrannide & proditione institutam à partibus quærimoniam fuisse. An ab eo tempore horum criminum affinis esse cœpit & in tyrannum descivit? Cur ita? An quia se ipsius

armis

armis quoque defendere contra rebelles  
tentavit: Qua defensione haud scio an ali-  
quid possit esse justius & naturæ legibus  
convenientius, ne quid dicam de regum  
jure. Atqui etiam post exercitus conscri-  
ptos & copias militares in unum contra-  
stas quibus Regi vis inferretur, presby-  
teriani sæpius testati sunt, hæc se non fa-  
cere, ut justo ipsius honori & auctoritati  
quicquam detraherent. Rediret modo  
ad Parlamentum suum, se eum cum om-  
ni honore & reverentia esse excepturos,  
veramque ei obedientiam, subjectionem  
& fidelitatem esse exhibituros. Domini  
& Communes in Parlamento congre-  
gati Octobris xx. anno c l o l o c x l i i i .  
hanc testificationem se facere declararunt  
coram Deo omnipotente. Nondum  
suus Rex illis tyrannus erat & proditor.  
Multis alijs subsequentibus declaratio-  
nibus, ut vocant, hoc idem sæpius testati  
sunt. Quando igitur tyrannidem auspi-  
catus est & in grande illud crimen incur-  
rit, quo capitale pœnam promeruit? An  
bello fervente, cum hinc inde exercitibus  
ad certamen acie directa compositis &  
paratis ausus est Rex subditorum suorum  
irma contrariis armis propulsare? Ne tum  
quidem tyrannum esse factum probabimus  
vel

vel hostium ipsorum iudicio. Pergamus porro ut perveniamus ad illud tempus quod tantum nefas ingredi cœpit. Pugnavere conflictu publico contra eum rebelles: victus ille est. An eum tyrannum tenemus? Nondum. Persequamur eum vestigiis ut ad tyrannidis ipsa latibula accedamus. Oxoniam fugit, obsessus est; cum desperaret, urbe clanculo egressus ad Scotos se recepit atque in eorum fidem & tutelam se dedit. Quid illi? An tyrannum tunc declararunt? Immo ut regem decuit accipi; eum omni scilicet reverentia exceperunt. Sed paulo post quoniam conjunctionis fœdere se ita obligatos esse ajebant, captivum Anglis Parlamentariis transmiserunt. An tanquam tyrannum? Certe potuerunt tunc libere ita de eo sentire & loqui tam Angli quam Scoti. Nullum tamen adhuc verbum inter conjuratos de Regis tyrannide & proditione. Ipsi quin etiam Independentes cum viderent regem suum de captivitate in captivitatem desultorio modo trajici, quiritabantur, indignum esse facinus clamitabant, regem suum ita captum detineri contra expressam fœderis pactionem & fidem. Regiam majestatem nimis irreverenter & contemptim conteri, cum ipso Rege totum regnum

summam, regium imperium, & veram  
*Independentiam* numerisque omnibus &  
partibus perfectam. Exercitum jam in po-  
testate habebant & Regem ipsum. Resta-  
bat ut Parlamentum & civitatem Londi-  
nensem sibi subjicerent. Utrumque vi &  
armis obtinuerunt, Domo Dominorum  
penitus sublata & Communium domo  
omnibus illis qui erant sibi contrarii, re-  
purgata, parte in vincula data, parte fuga-  
ta. Lupum tamen auribus tenebant, Re-  
gem videlicet, quem neque dimittere vo-  
lebant, neque diutius servare poterant.  
De modo quo eum perderent, delibera-  
bant. Jure id efficere se cum non posse  
viderent, justitiæ nomen & judicii spe-  
ciem sufficere visum est. Ita de carcere ex-  
tractum ad supplicium rectâ duxerunt.  
Sciebant enim non responsurum coram  
judicibus quos illi dederant, quia ne mini-  
mus quidem nobilium eos agnoscere vo-  
luisset. Atque hoc de industria captarunt,  
ut Regem inauditum & indefensum sup-  
plicio afficere possent. Satis ergo credide-  
runt si diceretur, à Tribunali supremo ju-  
stitiæ fuisse condemnatum. Crimina fa-  
cile factu fore & multa & grandia objecta-  
re, quæ Rex diluere nec posset nec veller,  
quia coram tali judicem confessu nulla au-

E c                      tori-

toritate nec jure subnixo, sibi esse respondendum neutiquam putaret. Ita Tyrannus & proditoris titulis ea sententia notatus est, quæ in autores suos tam jure poterat pronuntiari, quam in regem injuste prolata est. Si quis ergo quærat quæ causa Tyrannum fecerit Carolum, in promptu est dicere, Exercitum victorem Independentium qui nec regem nec magistratum volunt, urbem captam ab illis & armis occupatam. Parlamentum ex parte sublatum partim subactum & fugatum, tyrannidem notam Regi inussisse, & pro tyranno eum neci dedisse. Mense Aug. qui præcessit ejus supplicium, anno dñi 1648, domus Communium quæ sola jam tum regnabat & Independentibus erat obnoxia nondum de Carolo ut de Tyranno judicaverat. Scripsit enim literas III. Augusti datas & Prolocutoris nomine subsignatas ad Scotorum Parlamentum, quibus testabatur nunquam sibi in animo fuisse mutare statum qui hucusque in Anglia obtinuerat, qui debeat esse sub uno rege, domo Dominorum & Communium. Injuriam sibi ab illis fieri maximam ibidem conqueruntur, qui hos rumores de se differebant. Has literas nuper Scoti publicandas curarunt, ut de eorum hominum levitate & infania omni-



omnibus constaret. Nam priusquam an-  
nus se convertisset, mutatio status ea fa-  
cta erat quam videmus, Rex condemna-  
us & securi percussus tanquam tyrannus  
& proditor. Si talis fuit, talis etiam vide-  
ri debuit omnibus & semper. Cur igitur  
non idem de eo senserunt Scoti, qui ad  
Independentes miserunt literas & nun-  
tios, quibus testabantur se ea omnia de-  
testari quæ contra Regem meditabantur,  
& quæ hætenus egerant? Nuper etiam in  
literis quas miserunt ad filium Carolum  
secundum regem suum, *sacratissimum*  
*regem* appellant parentem ejus, & *sa-*  
*cerrimum facinus* quo necatus est. An id  
facerent si pro tyranno eum unquam ha-  
buissent? Cur etiam non omnibus An-  
glis idem visum est, cum vix decima pars  
eorum, immo vix centesima, in illud de  
rege sententiæ elogium consenserit? Cur  
deniq; non ipsi Independentes semper ita  
judicarunt? Cur indignitatem captivita-  
tis Regiæ proclamabant, cum à Presby-  
terianis detineretur in carcere? An Rex  
tam brevi spatio in tantum mutatus est ut  
de rege repente tyrannus extiterit? Quid  
fecit pro tyranno quandiu in carcere vixit?  
Diversos de re eadem & persona aliter o-  
pinari quoquo modo ferendum est, & fie-

ri sæpe solet. Quis ferat eosdem de regis captivitate querentes & probra jacientes in rebelles qui eum detinebant, & mox eosdem eundem duriorē clausum carcere ad supplicium inde raptum duci jubentes? Neronis tempore fuerunt, quibus ille non videretur Nero esse & qui mortuum desiderarent. Quis putet eorundem hominum esse captivi misereri, & paulo post illum ipsum captivum carnifici tradere? Præterea quis fidem haberet arcuato morbo laboranti si de coloribus vellet judicare, qui omnia quæ videt, ejusdem esse coloris existimat? Quis similiter magni faciat judicium hominum de tyranno sententiam ferentium, quibus omnes reges tyranni sunt? Unus ex illis Independentium ducibus, qui omnia quæ regem & regium regimen spectant, alba linea signant, nulloque habent discrimine si reges legitimi sint, si tyranni pro sententia dixit in domo Communium 111. Januarii anno c1o 1o c1o XLVIII, se non curare rege sublato, quæ regiminis forma constitueretur in Anglia, *Modo non sit*, inquebat, *sub regibus aut Diabolis*. Ita Diaboli & reges isti honesto homini eodem loco fuere? Ut nullus Diabolus bonus, sic nullum, ut apparet, putavit

tavit esse bonum regem, proinde omnes esse tollendos. Non ergo mirum si in sententia capitali contra Carolum regem lata, Tyrannum eum esse pronuntiarunt, quia omnes reges pro Tyrannis habent ex sectæ suæ idiomate, & ubicunque sunt omnes statuunt exterminandos. Quia Rex erat, Tyrannus quoque ipsis fuit, quia omnis Rex tyrannus. Jam igitur dispiciamus verba sententiæ, quam in Regem tulerunt egregii iudices, quibus crimina Regis summatim expresse-  
*IV* runt. *Tyrannus, proditor & homicida* in ea appellatur. Verebantur præclari ad-  
*III* fectores ne peritiores viderentur quam iniquiores. Profecto imperitia eorum in hoc elogio concipiendo summa, cum improbitate pari certavit. Nesciverunt igitur quid esset tyrannus, & quem hoc nomine condemnarunt, etiam qualis esset, ea ratione videntur ignorasse. Cur aliquis in eo tot perfidorum & perditorum latronum conventu non repertus est, qui cæteros docere potuerit, *tyranni* appellatione omnia mala quæ facere potest quisquis injuste, impotenter & crudeliter imperat, comprehendit. Ergo qui tyrannus est, etiam proditor est & homicida, & omnium scelerum, quæ male re-

gnando committuntur, reus. Quid opus igitur fuit, ad illud elogium *tyranni* addere *proditoris* & *homicida* titulos? Nisi si fortasse hoc intellexerunt, Tyrannidem omnem Caroli in proditione & homicidio consistere. Sed de proditione & homicidio paulo post, de tyranni nomine nunc agamus. Sic enim liquido probabimus ex vi & proprietate hujus vocis veros fuisse tyrannos, qui contra regem suum arma ceperunt, qui bello illum persecuti sunt, qui in carcerem conjecerunt, & qui postremo capitis eum damnarunt. Ipsum vero tam longe vita abfuisse à tyrannidis crimine, quam morte prope accessit ad gloriam Martyrii. *Tyrannum* antiquissimi Græci quorum hoc vocabulum est, de omni rege dixerunt. Tyrannus eo sensu revera fuit Carolus primus, ut ille de quo Virgilius,

*Pars mihi pacis erit dextram tetigisse  
Tyranni.*

Postea iidem Græci de eo solo id nomen proprie usurparunt qui vi occupatum imperium vi retinebat. Quo malo cum multæ civitates in Græcia olim laborarint, præmia proposita sunt tyrannicidis summo ferme omnium urbium & populorum consensu. Nemo dixerit hoc significatu

Caro-

Carolus tyrannum esse appellandum, qui tot Regibus in regno patrio, ex eadem familia quæ initium & originem habuit in Guilielmo Conquæstore, sexcentis circiter ab hinc annis retro, successerit. Nam & hac nota discernit reges Orientis despotice regnantes à tyrannis Aristoteles, quoniam in potestate non dissimili, illi hæreditaria regna possiderent, isti virapta. Præter has duas notiones, *Tyrannos* Græci & Romani sub Imperatoribus, eos dixerunt qui contra Regem legitimum insurrexissent, ut se in ejus locum ponerent. Unde sæpe consequabatur ut quamvis pessimus Imperator deturbatus solio foret ab optimo viro, nihilominus tamen hic tyrannus tanquam juris & imperii alterius incubator nuncuparetur. Idem etiam *Perduelles* nominati sunt, nempe *qui hostili animo in principem animati sunt*, ut ait Ulpianus leg. ult. D. ad leg. Juliam Majestatis. A *πέρδωξ* eos Græci recentiores appellarunt quod contra principem legitimum arma capiant & insurgāt. Posteriores Latini *Intartas* voce inde corrupta dixerunt, & verbum inde finxerunt *Intartizare*, pro rebellare adversus regem & majestatem ejus violare. Quod qui faciunt læsæ majestatis crimen incurrunt ac perduel-

duellionis, quia ut majestas in imperio est  
ita non læditur, nec violatur, nisi in ejus  
persona, qui imperium & potestatem ha-  
bet, siue Rex sit, siue populus. Hac posita  
& explicata tyranni significatione, quæ  
omnium apud Romanos usitatissima est;  
haud erit nunc difficile judicare & statuere  
cui potius id nomen conveniat, Regi an  
exercitus ducibus, qui vitam illi cum re-  
gno abstulerunt, quique nunc ejus loco  
regnant. Non alias hic probationes hujus  
rei afferam, quam ex ipsis regni Anglicani  
legibus, quæ hac in parte non discrepant  
ab antiquis Romanis, ut ex jure nostro  
constat. Bractonus qui ante annos quadrin-  
gentos scripsit, jurisconsultus & judex in  
Anglia per ea tempora celeberrimus, Lib.  
ii. Tit. de crimine læsæ Majestatis, scribit  
in hæc verba: *Si quis ausu temerario ma-  
chinatus sit mortem regis, aut aliquid ege-  
rit vel agi procurarit ad seditionem domini  
regis vel exercitus sui, vel procura verit  
auxilium, vel consilium præstiterit aut con-  
sensum, licet id quod in voluntate habue-  
rit non perduxerit, tenetur tamen reus cri-  
minis læsæ majestatis. Si quis igitur vel in-  
tra se agitaverit de Rege occidendo, id est  
hostili animo, ut loquitur Ulpianus, ad-  
versus regem fuerit animatus, quanvis*  
non



non id effecerit quod voluit, hic crimen  
 læsæ majestatis contraxit. Item si quid e-  
 -gerit aut agi procuraverit quo seditio mo-  
 -veatur contra Regem vel contra exercitū  
 ejus, idem crimen incurrit, si vel auxi-  
 -lium ad hoc vel consilium vel consensum  
 præbuerit. Legibus quoque Romanis &  
 præcipue Julia de majestate, idem omni-  
 -no cautum fuit, ut liquet ex Tit. Dig. ad  
 leg. Jul. Majestatis. Ea de populi majesta-  
 -te lata fuit à Julio Cæsare primum Confu-  
 -sile, cujus tunc imperium erat, eademque  
 -valuit & pro principe postquam in eum à  
 -populo translata est majestas. In judicium  
 -de hoc crimine veniebant ut scribit Tacit.  
 -Annalium, *Si quis proditione exercitum*  
 -*aut plebem seditionibus denique re male*  
 -*gesta majestatem populi Romani minuisset.*  
 -Idem quoque juris Imperatori competere  
 -cepit postquam imperium accepit. Atque  
 -idem nunc de omnibus regibus, & princi-  
 -pibus, ut etiam de Angliæ Rege dicendum.  
 -Quis ergo in hoc crimen apud Anglos in-  
 -cidit? Alii quā qui exercitus contra Re-  
 -gem conscribere, qui populum ad seditio-  
 -nem contra Regē concitavere, qui deniq;  
 -in necem Regis machinati sunt, quique tam  
 -hostili animo in eum fuerūt ut bello aper-  
 -to eum persequuti sint, vicerint, ceperint,



incarceraverint, supplicio capitali affecerint? Hæcine à subditis committi potuerunt, sine crimine majestatis, sine prodicione, sine perduellione? Nunquid dicunt Leges Romanæ populum aut principem læsæ majestatis teneri, si exercitus prodicione aut plebis seditionibus aut re male gesta suam ipse majestatem minuerit? Non id sanè cadere potest in sensum communem, estquæ illud unum ex rebus quas fieri non posse datur. In lege etiam Anglicana non dicitur, idem crimen regem incurrere si procuraverit seditionem contra se, vel exercitum suum, vel populum suum. Non etiam distinguit inter regem & regem, nec dicit hoc crimine tantum obligari qui mortem regis boni machinatus sit, non verò eum qui malum & molestum dominum tollere tentaverit. Radulphus de Glanvilla qui ante Britonem vixit, & primus Angliæ ac principalis fuit Justiciarius sub Henrico II, lib. XIV. dicit, *Si quis machinatus fuerit vel aliquid fecerit in mortem regis, vel seditionem regni vel exercitus vel consenserit, consilium ve dederit, vel auctoritatem præstiterit, crimen prodicionis esse.* Brito in titulo de Appellationibus scribit: *Si quis machinetur mortem patris aut matris regis aut liberorum*  
*ejus,*

*ejus, aut hæreditario regno eum excluserit, aut prodiderit ejus exercitum, quamvis res ad effectum perducta non sit, proditio est.* An quæri vel dubitari potest quis patrem Regis, cujus hodie regnum est, morti dederit, quis liberos ab hæreditate paterna excluserit, quis exercitum ejus ad seditiōnem concitarit, quis Parlamentum sustulerit, potiore & digniore & majore sui parte quam faciebat ordo Nobilium, inde ejecta & abolita? Non unum nec simplex majestatis crimē commiserunt scelerati latrones qui nunc imperio incubant, sed plura simul, immo omnia quæ possunt dici vel cogitari. Glanvillanus lib. xiv, & Bractonus lib. ii. Tit. de crimine læsæ Majestatis, scribunt, *Si quis conspiret contra Regis domum, id esse proditionem.* Qui totam domū regiā everterunt, Rege interempto, Regina dotario suo, ut vocāt, spoliata, filio majore natu non solum hæreditate regni patrii privato, sed etiā patrimonio proprio & omnibus bonis suis cū reliquis fratribus & sororibus exuto, an hujus criminis affines non esse videntur? An quisquam est qui de hoc ambigere queat? Statuto xxv. ann. Eduardi III. c. ii. sancitum est: *Si quis bellum moveat contra Regem intra regni fines, aut inimicis regis se socium adjunxerit &*  
*auxi-*

*auxilium iis aut consilium dederit, intra  
 vel extra regnum, idque fecisse testibus sua  
 conditionis convictus fuerit, crimine prodi-  
 tionis teneri. Eodē Statuto similiter crimen  
 id incurrit, qui mortē regis meditatus fuerit,  
 aut regina aut filii natu majoris. Cum au-  
 tem duas perduellionis species esse con-  
 stet, prior ea & maior est, qua regis salus,  
 status & dignitas attentatur: altera qua ma-  
 gistratus & iudices à principe constituti,  
 quiq; ejus vices gerunt, violantur. Utram-  
 que speciem complexus est Henricus viii.  
 Imperator Germaniæ constitutione ab eo  
 promulgata cum Pisis esset anno dñi mccc.  
 xii. Cui titulus, *Qui sint rebelles.* Angli-  
 canis quoq; Statutis, & præcipue illo, quod  
 jam diximus, anni xxv. Eduardi iii. san-  
 citum est, si quis Cancellarium, magnum  
 Thesaurarium, aut Justitiarium cujuscun-  
 que Tribunalis occiderit, dum muneribus  
 suum exercent, crimen proditionis esse &  
 ad læsionem regiæ Majestatis pertinere. Si  
 is qui magistratum aut iudicem quem Rex  
 constituerit, vel quemcunque ejus officia-  
 lem, ut vocant, violarit, in crimen Maje-  
 statis cadit; quanto magis huic culpæ tene-  
 tur obnoxius qui Regem ipsum? Statuto  
 anni xxxv. Henrici viii. cap. ii. & xiii.  
 Elisabethæ cap. i. pariter continetur: Si  
 quis*

quis intra regni terminos aut extra, machinatus fuerit, mente conceperit, cogitaverit, meditatus sit, mortem regis & perniciem aut aliquam corporalem noxam quæ tendat ad mortem & perniciem regis aut reginæ, aut ejusdem privationem vel depositionem à regno & imperiali corona, aut honoris & majestatis imminutionem, aut belli contra eum commotionem ad invadendum regnum, aut externorum militum ad hoc ipsum evocationem, proditoris esse damnandum. Statuto anni xlv. Eduardi III. cavetur, si quis occiderit *qui Regi suppetias ad bellum ferre parabat, eum proditione teneri.* Quis de rebellibus Angliæ non dixerit eos hoc crimine supra quicquid est sceleratorum damnari oportere, dum ministros omnes Regis & amicos, qui maximo infidelitatis scelere se obstrinxissent nisi regem in extremo suo discrimine vitæ & regni adjuvissent, tanquam proditores & hostes publicos persecuti sunt, & quoscunque capere potuerunt, capitali supplicio affecerunt. Vassalli præterea legibus feudorum, & jure clientelarum, si dominos suos deseruerint in periculum capitis adductos, pro proditoribus puniendos & feudo privandos esse quis nescit? Atqui omnes qui Regi opi-

tulati

tulati sunt, non solū subjecti ejus fuerunt, sed etiam Vasalli ligii, quiq; gemino sacra-  
menti vinculo tenebantur Regem suum  
& Dominum defendere. Hostis semper in  
hoste probavit fidem dominis servatam.  
Immo & perfidiam proditionemque ve-  
teres detestati sunt si qui æquiores fuere,  
etiam illam quæ in suum commodum mi-  
laret. Ubi æquitas illa & justitia Ro-  
manorum qui medicum capitalis sui ho-  
stis ad se venientem & promittentem re-  
gis eadem qui jam duos exercitus Reipu-  
blicæ ceciderat, non solum repulerunt,  
sed etiam Pyrrho de eo indicium fecerunt,  
ut caveret insidias. Idem illi Romani, non  
certè Christiani, Ludimagistrum Falisco-  
rum qui ex urbe obseffa pueros nobilium  
omnes quos fidei suæ & disciplinæ com-  
missos habebat, per speciem lusus emissos  
in castra hostium deduxit, ut iis quod vel-  
lent facere possent, manibus post tergā  
revinctis in urbem remiserunt nudum,  
pueris pone sequentibus, & proditoris sui  
tergum virgis lacerantibus. Tanti non pu-  
taverunt urbem capere tali scelere, cujus  
ipsi se immunes posse videri non putarunt,  
nisi illud in hoste etiam improbarent. At  
his naturæ monstris quæ Anglia fert & pa-  
titur, crimen proditionis est non prodere  
Regem.

Regem suum, & fidelem esse domino idem apud illos quod infidelitatem morte plectendam committere. Statutum anno xxi. Elisabethæ, crimen summæ proditionis impingit illi qui Reginam dominam suam quocunque modo appellaverit, inclamaverit, affirmaverit, dicto ullo aut scripto publicaverit, *Schismaticam* esse, *Hæreticam*, *tyrannam*, *infidelem* aut *usurpatricem coronæ Anglicanæ* aut *Hibernicæ*. Quid illis faciendum qui Regem suum Carolum primum, Jacobi regis filium pro tyranno mactandum carnificis securi tradiderunt? Atqui malefacta tanto sunt maledictis gravius vindicanda, quanto graviora sunt. Verba autem illa Statutorum de his qui regis mortem *conantur* & *imaginantur*, ut est in Statutis xxv. Eduardi III, laxius esse interpretanda jurisprudentes Anglici veteres affirmant, ut notavit Richardus Cromptonus in libro de Banco Regio. Nam quisquis apud se meditatur & mente volutat sua quo modo & qua via Rex neci dari possit, vi & armis, an dolo vel veneno, litterarum missitatione aut nuntiorum, proditionis nomine id esse appellandum. Item qui de rege destituendo aut regno privando cogitarit, idem crimen committere, ac si mortem ejus machi-



chinatus esset. Item qui castella ejus & oppida munita detinent contra ejus voluntatem, censentur quasi bellum regi intulissent & Statuti verbis comprehenduntur quo declarantur proditoris rei qui arma in regem moverint. Qui Hullæ oppidum portas Regi venienti occluserunt, videant an non hac lege teneantur, & an possint tam qui fecerunt quam qui fieri mandarunt, evitare ne proditoris & rebellionis crimen incurrerint. Sed hæc minora jam non sunt alleganda, cum ad illud extremum venerint, quo nullum majus & atrocius perduellionis crimen fingi potest. Nam cum per leges Angliæ vel sola cogitatio de nece Regi inferenda scelus sit quod lege de Majestate vindicandum est, ubi factum accessit & per suas quidem circumstantias omni tali facinore sceleratius, non est de crimine dubitandum. Idem jurisconsulti Anglici ajunt prodicionem in duabus partibus consistere, priorem vocant imaginationem, quæ cogitatio est vel meditatio qua quis intra se voluit an & quomodo scelus proditoris patrare debeat ac possit. Secunda est determinatio quædam ad scelus faciendum & in eo proposito perseveratio donec executioni datum sit, quæ licet effectum non sortiatur, nihilominus



minus proditiōis crimen habet cum quæ-  
stio est de morte Regis. In aliis quippe fa-  
ctum scelus tantum punitur, non cogita-  
tum. His omnibus proditiōis generibus  
sefe obligarunt rebelles Angliæ. Nā multo  
ante scelus animo agitaverāt, diu meditati  
sunt qua vi aut via, aut qua arte id perfice-  
rent, postremo perfecerunt. Idque contra  
leges omnes Regni & Parliamenti; contra  
omnes constitutiones regū quæ de crimine  
læsæ majestatis aliquid statuerunt, quæque  
auctoritate Parliamentorum confirmatæ  
sint. Et cum omnia ea Statuta loquantur de  
proditiōe quæ in regem committitur,  
nulla omnino est quæ sanciat proditiōis  
crimen in populum vel Parlamentum cō-  
mitti. Qui regis iudices & officarios vio-  
lat, læsæ majestatis & proditiōis reus agi-  
tū, ut habetur in Statuto xxv. Eduardi iir.  
Nulla Parliamenti vel Parlamentariorum  
mentio ullibi extat in ulla lege, quæ viola-  
ta majestas Senatus dicatur vel populi, aut  
proditiō in eum commissā. Et sane nullus  
belli motus, nullus tumultus, nulla seditiō  
à quoquam subjectorum regis excitari po-  
test aut fieri, quin eo ipso lædi majestas  
Regis intelligatur, cum Parlamentum ip-  
sum Regis sit, & ita semper in omnibus  
Statutis regum appelletur. Cum igitur

Par-

Parlamentum non fit sine Rege, quia à rege convocatur, si quando de rebus arduis & summis tractare vult, ideo Parlamentū non consideratur absq, rege, qui ejus anima est & forma, sine qua non est quod est. Ideo non potest in Parlamentum per se sumptum, hoc est in duas domos ex quibus constat, proditiōis vel læsæ majestatis crimen suscipi, quia non habet majestatem quæ in rege solo est, & quia non magis in tale Parlamentum crimen committi potest majestatis, quā in populum, quando non dominatur, sed subjectus est. Quinimmo recte affirmari potest, si tale quid prætendatur à Parlamento, & majestatem ad se traducere conetur quæ est regis, & quam non habet nisi cum rege, dum Rex cujus majestas est, in eo præsens est eique præsidet, admittere ipsum contra regem crimen majestatis. Nec enim minoris est rationis Parlamentum totum proditiōis in Regem & læsæ majestatis insimulari posse dum à rege suo deficit, & regium jus & imperium usurpat, quam cum exercitus totus cum ducibus suis à rege defectionem facit & se hostibus tradit. Nunquam sane effugiet Parlamentum hodiernum Anglicanum, quin in istud crimen inciderit, cum ejusmodi Statuta sine regis

auto-

autoritate & assensu fecit, quibus declara-  
 vit, *Omnes proditores esse secundum funda-*  
*mentales leges Regni, & quod puniri de-*  
*beant ut tales, qui arma sumpserunt con-*  
*tra Parlamentum Anglia, aut eis affue-*  
*runt in tali bello.* Quæ sunt illæ leges fun-  
 damentales Regni, quibus hoc constitu-  
 tum est: Ubinam illæ extant, aut quibus in  
 Codicibus reperiuntur? Sed quinam illi  
 sunt qui arma ceperunt contra Parlamen-  
 tum? An aliquis bellum inferre potest Par-  
 lamento quin eadem via illud Regi simul  
 inferat, sine quo non est Parlamentum,  
 aut nullam certe habet autoritatem? At  
 illi de rege ipso intellexerunt, quia ut se à  
 rebellibus defenderet & jura sua vindica-  
 ret, vim vi propulsare conatus est. An ideo  
 crimen commisit proditionis & læsæ ma-  
 jestatis contra subditos suos, quos rebel-  
 lantes coërcere voluit? An ullius Parla-  
 menti statutum citare possunt in quo de-  
 cretum fuerit, arma ab aliquibus, nedum  
 ab rege capta contra Parlamentum fuisse  
 capitalia? Multo minus queant producere  
 aliquod actum anteriorum Parlamento-  
 rum à Guilielmi usque temporibus in quo  
 statutum fuerit, *Duas Domos sine rege esse*  
*Parlamentum, & in illis esse majestatem,*  
*& proditionem adversus illas committi*  
 posse;

posse; quemadmodum in nupero novitio Parlamento, postquam perduellionis crimine sese inquinavit, constitutum esse constat. Sed quæ proditio fieri potest contra Parlamentum, vel quod læsæ majestatis crimen in ejus domos committi? Tres ejus præcipuas species recenset Tacitus in 1. Annalium, *Si quis exercitum proditiōe, plebem seditione, & re male gesta majestatem vel Principis vel Reipublica minueret.* Hæc genera proditiōis non cadunt in Parlamentum, nec contra illud committi possunt. An ejus est exercitus? An plebs Parlamento subjecta est? An aliquis rem male potest gerere & læsæ majestatis postulari qui à Parlamento potestatem ducendi exercitum non acceperit? Castella, oppida munita an sunt in potestate Parlamenti, ut quis eorum detentione possit incurrere crimen Majestatis adversus hunc conventum? Atqui si eorum regnum & imperium est, non potest esse perpetuum, quum ad libitum Regis convocetur, & tandiu duret donec ab eo dimitti jubeatur qui vocavit. Quis interim quando non est Parlamentum, regnat & regit omnia? Nonne is Rex est? An ille potest cum regnat, committere crimen majestatis contra Parlamentum, quod tunc non est? Quod esse

esse in rerum natura non potest, nisi ab ipso formetur & constituatur? Ponamus Regem posse Majestatis reum fieri de proditione quam adversus Parlamentum commiserit, id est, adversus corpus à se creatum & formatum, quis de hoc crimine regis cognoscet? An illi ipsi Judices quos solet constituere ad cognoscendum de omnibus criminibus læsæ Majestatis? Certe *Bancus Regis*, quod est regium Tribunal ut vulgo vocatur, de his omnibus cognitionem habuit. Definiunt quippe Jurisconsulti Anglici eam supremam fuisse Curiam in qua omnia negotia ad Coronam pertinentia tractabantur & examinabantur. Nempe omnia proditionis & læsæ Majestatis & felonix crimina ibi judicabantur, idque ex communi Lege, absque speciali Regis mandato. An Judices illi Regi & a Rege constituti de regis crimine judicabunt? An cum majestas regis proditione lædi soleat, de majestate alia læsa que non extat alibi nisi in sua persona, accusabitur rex ipse & condemnabitur? An dicent Parlamentum de tali casu & causa cognoscere debere? Sola Parlamenti domus superior judicariam habuit potestatem, & de paribus suis tantum cognoscere debuit, siquando in hoc crimen læsa Majestatis  
inci.

inciderent. Atqui non est ex numero illorum Parium Rex, qui supremus eorum est Dominus, & duplici quidem titulo, quatenus ei subiecti sunt ut regi, eidemque vassalli ligii id est fideles ut Domino. Sic duplici obstricti juramento obsequium, fidē & servitium regi debent, generali, ut subiecti regis, particulari, ut Vassalli domini sui. Si Vassallus in dominum suum iudex sedere potest de crimine capitali, & subditus in regem, Parlamentum quoque de rege id jus sibi potest vindicare. Hodiernum autem Parlamentum quod nihil habet par aut simile cum antiquis, qualia fuere quando ab anterioribus regibus convocabantur, nec caput habet, nec pedes, nec etiam pectus. Primum sine capite est, quia regem sustulit, & sic caput suum sibimet ipsi abscidit. Pectus non habet, quia partem suam resecuit, id est alteram domū quæ erat Dominorum: Nempe Ecclesiasticorū ac sæcularium procerum. Pedes etiam vix habere censendum, cum & alteram domum plebeiorum, maxima sui parte truncarint, quadraginta quinque ex his in carcerem coniectis, & centum circiter fugatis & exclusis. Quod reliquum est, Parlamenti nomen habet & speciem sub ducibus exercitus rebellis, qui ejus autoritate abuti

tandiu



tandiu statuerunt, donec finem optatum consequuti sint & tyrannidem suam stabilierint, tum & ipsum abolituri. In Declaratione sua, qua factum impium defendere conati sunt, præ se ferunt, tale Parlamentum *aggressum esse mutare gubernationem Status Tyrannici, vel Tyrannidis, in Reipublicæ formam & statum liberum.*

Apparet his verbis eos regium omne regimen tyrannidem esse velle, qualecunque sit, & sic bonos etiam reges pro tyrannis habere, quia nullos possunt tolerare. Si enim tyrannum solum amovere voluissent, talemque vere esse credidissent quæ pro tyranno sustulerunt, satis habuissent, eo submoto qui tyrannidis fuisset accusatus & convictus, alterum ex stirpe & familia regia quæ plures habet principes regno idoneos, in solio collocare. Si non placebat aliquis ex hac domo regnatrice, poterant alterum quemlibet ex principibus & proceribus eligere cui regni gubernationem mandarent. Sed dum dicunt se tyrannidē ex Anglia voluisse extirpare, regalem statum tyrannidis appellatione intellexere. Quod certum est. Ex quo colligitur, tyranni elogio Regem Carolum donasse, & sub hujus criminis titulo eum morte multasse, non quod tyrannicè regnasset, sed quod



quod rex esset, quia rex omnis istis tyrannus est & tollendus. Non obscuris indiciis & argumentis ostenderunt hanc sibi mentem fuisse, sed longe clarius ex eorum dogmate id elucescit, quo statuunt ita se regnum Christi in hoc mundo posse stabilire & confirmare, si reges omnes inde excindantur. Hæc ratio plane Carolum absolvit, quia patet ex his, nullum aliud crimen causam mortis ejus & supplicii fuisse vel iudicio Independentium, quam quia regnum teneret. Ideo & tyrannum in elogio capitalis sententiæ vocarunt, ut jam dictum; quia Rex & tyrannus illis synonyma sint. Cur enim istis solis Independentibus Tyrannus fuit, & non aliis subditis? Cur cæteri Angli Presbyteriani non Tyrannum eum nuncuparunt? Cur nec Scoti qui Presbyterio pariter addicti sunt, tyranni appellationem huic regi impegerunt? Secta est igitur quæ de regibus omnibus hoc idem pronuntiat quod tyranni sint. Non etiam vident quantopere sibi ipsis contradicant. Tyrannum quippe appellando fatentur regem fuisse, quem necarunt. Cur ergo alibi asserunt se non regem securi percussisse, sed magistratū, immo ministrum tantum populi? Ita certè Magistratus omnes quos creat populus & quos

quos tanquam ministros habet, etiam tyranni erunt, & multa millia sic fuerint tyrannorum. Ergo omnes etiam tollendi erunt tanquam tyranni, & *αὐτοκρατία* ubique terrarum instituenda. Quod sanè non dubito eorum esse votum. Sin verò soli reges qui regna habent, & qui capita Draconis efficiunt, pro tyrannis ipsis sunt, tum Carolus non fuit magistratus primarius vel etiam minister populi, sed ex eorum regum genere, qui exterminandi sunt, ut regnum Christi in terras de cælo possit retrahi. De Tyranni titulo vidimus, de Proditoris elogio quod eadem sententia continetur, videamus. Jam diximus eum qui tyrannus est, hoc est qui de rege justo ac legitimo in tyrannum deflexit, hoc est in regem injustum & superbum crudelemque, etiam proditorem esse, quia omnia id nomen scelera complectitur & nefaria facta, quæ aliquis injustè regnando committere potest. Uno verbo, si populi majestas sit, ut isti perduelles volunt, nullum est crimen majestatis, ut plura sunt ejus genera, quo non teneatur is qui tyrannus vere dicitur, minimum, medioximum & maximum. In his ergo & proditio erit. Et videndum quid proprie hoc nomen significet, & an de eodem genere criminis ac-

cipiatur veteribus Romanis & Anglis. Le-  
 ges Angliæ & Statuta Parliamentaria om-  
 nia quæ Normannica lingua sub Norman-  
 nis regibus facta sunt, *Proditionem* sua lin-  
 gua vetere vocarunt *Treason*, quod nos  
 dicimus *Trahison*. Quæ *traditio* est. Qua  
 voce Latini infimæ ætatis usi sunt, cum  
*proditionem* intelligerent. Hoc nomine  
 Normannicæ omnes illæ leges Anglorum  
 quodcunque crimen læsæ majestatis desi-  
 gnant. Species duas faciunt, unam quæ  
*alta*, id est suprema, *proditio* dicitur. Hæc  
*perduellioni* Romanorum respondet, &  
 significat subditorum adversus regem  
 suum hostilem animum. Nam *perduel-*  
*les*, prisco Romanorum sermone, hostes  
 vocabantur. Minima proditio est in iis-  
 dem legibus Anglorum, quæ scriptæ sunt  
 Normannica lingua vetere. *Petite Treas-*  
*on* vocatur. Quæ servi est adversus do-  
 minum. Perduellio vero, sive *alta prodi-*  
*tio* Anglorum, quæ Gallis est crimen Ma-  
 jestatis *in primo capite*, hoc est, in primo  
 & summo gradu, subdividitur etiam in a-  
 lias duas species, ut jam supra attigimus.  
 Nam aut regis ipsius salutem & caput res-  
 picit, aut consiliariorum ejus ac judicum.  
 De his duabus lex v. Cod. ad Leg. Juliam  
 Majestatis sic habet: *Quisquis cum mili-*  
*tibus*

tibus vel privatis, vel barbaris scelestam inierit factionem aut factionis ipsius suscepit sacramentum vel dederit, de nece etiam virorum illustrium qui consilio & consistorio nostro intersunt, Senatorum etiam, nam ipsi pars sunt corporis nostri, vel cujuslibet postremo qui nobis militat, cogitaverit. Videtur hæc facta lex contra rebelles Anglos, qui hac lege utriusque prodicionis, ut vocant, sive perduellionis, convicti planè deprehenduntur. Nam & factionem scelestam inierunt cum militibus privatis, & factionis ipsius susceperunt invicem & dedere mutuum sacramentum. Præterea multos de Senatoribus Parlamenti quod Regis semper appellatum est, partim incarcerarunt, partim relegarunt, quosdam etiam necarunt, totamque domum Dominorum, id est majorum gentium Senatorum, sustulerunt. Hæc quæ dicitur *proditio* in legibus Normannorum, quamque esse *perduellionem* Romanorum docuimus, *crimen Majestatis* etiam appellatur, tam Romanis quam Anglicanis Jurisperitis. Ranulphus de Glanvilla in tractatu de legibus & consuetudinibus Angliæ lib. i. c. ii. de placitis quæ pertinent ad Curiam Regis. *Crimen*, inquit, *quod in legibus dicitur crimen lese Majestatis, ut de*

*nece vel seditione persona Domini Regis, vel regni, vel exercitus. Quod lib. XIV. c. I. latius explicat de eo, Qui machinatus fuerit vel aliquid fecerit in mortem Regis vel seditionem Regni, vel exercitus, vel consenserit, vel consilium dederit, vel auctoritatem praestiterit. In legibus Normannicis Anglorum quibus hæc ipsa lex refertur, proditio vocatur. In quo crimine non solum patratum scelus, sed etiam cogitatum capite punitur. In aliis factum tantum, non etiam cogitatio crimen habet. Cur igitur proditorem in sententiæ Caroli elogio iudices sanguinarii eum vocarunt, aut quid per proditorem intellexerunt? Certè proditor secundum leges Anglicanas, prodicionis est reus, id est læsæ Majestatis. Atqui jam diximus, Majestatis reum fieri non posse qui ipsa majestas est. Tyrannum etiam appellaverat sententia qui per duellum est & majestatis crimine tenebatur. Nam is verè tyrannus qui in regem insurgit legitimum, ut ei vitam eripiat & regnum. Hoc est hostilem planè animum adversus regem gerere. Si vero distingui placeat prodicionem à crimine læsæ Majestatis, cum utrumque idem sit apud Anglos, videndum erit an proditio in regem cadere queat. Certè proditio etiam criminibus læsæ*

læsæ Majestatis accensetur, sed tanquam species, cum majestatis crimen generis appellatio sit. Qui dux exercitum hostibus prodit, qui castella & præsidia regni curæ suæ commissa tradit in manum hostium, qui rem malè gerit dolo vel ignavia fraudi proxima; qui cum possit debellare copias hostium, illæsas dimisit, qui urbem obsessam cum posset capere, non cepit, proditoris postulari possunt, in qua etiam læsæ majestatis crimen versatur. Ita Miltiades, cum urbem in Insula Paro copiis è navibus eductis obsidere cœpisset, & re infecta Athenas cum classe rediisset, proditoris accusatus est, teste Æmilio Probo. Hinc Tacitus in Majestatis crimine explicando, *prodizione exercitus* committi illud dicit, plebis seditione, ac re malè gesta. Cum his tribus majestas Principis vel populi minuatur, *proditio* propriè sumpta alia est ab eo scelere quo plebs ad seditionem incitatur contra regem. In legibus & Statutis Anglicanis proditoris crimen vel læsæ majestatis est, cum quis magnum aut privatum regis sigillum effingit aut falsam monetam cudit. Quæ propriè non est proditio. Ita de aliis multis casibus, quos longū esset & nihil attinet referre. Videamus igitur an proditio propriè sumpta in regem

cadat. Ut majestatis crimen in eum non competit, quia majestas in imperio est & principis dignitate, quam ipse proinde non posse lædere & imminuere intelligitur, multò minus proditio in eum cadere putanda est. Nam videri posset utcunque propriæ majestatis reus, ut jam supra monstravimus, qui sua jura dignitatemque non defenderet, sed eam lædi aut minui pateretur. At qua ratione proditionis contra se argui possit non video, qui rex sit. Incredibile quippe est proditorem sui regni posse videri, nisi insaniat. Magis capit ut quis vim sibi afferat & necem consciscat. Nam vel fastidio vitæ hoc facere solent interdum homines, vel ex desperatione, vel ex nimio desiderio suorum quos amiserint, vel ex amore. Fuere & sapientes, qui ut senii molestias evitarent, vel ignominiam superbi victoris, vel morbi impetibilis cruciatum, vitam ejurarunt & ad mortem tanquam ad portum confugerunt. Si cui vero regnum grave esset & onus imperii non ferendum videretur, posset illud deponere eodem modo quo quis vitam gravem abjicit, vel eo se abdicare, ut quosdam reges fecisse constat, olim Diocletianum, & nostra ætate Carolum Quintum. Certe qui morte quasi leviori vitam importu-

nam



nam & molestam commutare sponte vellet, non mortis genus eligeret crudele & per tormenta diu trahendum. Simplici plaga defungi optaret. Similiter qui regnum relinquere destinabit, simpliciter & semel id faciet, se detrudendo in privati fortunam. Non illud sibi extorqueri cupiet per partes, & cum crimine, prodendo interim exercitus suos, interim oppida munita hostibus tradendo, & populum suum ejus furori exponendo, eundemque in media penetralia aulae suae admittendo. An quis ita regno se privari præoptaret, ut ignominiam insuper sua sibi voluntate accerferet, & cum scelere illud mallet amittere, quam innocenter & sponte sua se eo exuere? Compos suae mentis non esset. Qui ad mortē tanquam ad remedium miseriarum volens currit, non per carnificem sibi caput resecari, aut se laqueo suspendi patitur, sed sua manu uti solet. Idem est de regno quod à volente deponitur. Non igitur cadit in regem suae mentis compotem ut populum seditionibus distrahat, exercitus suos hostibus debellandos tradat, factiones contra se procerum suscitet, atque ut postremo semet ipsum arbitrio inimicorum permittat. Quomodo ergo proditor sui populi Carolus, sui Parlamenti?

Bellum, inquit rebelles, contra Parliamentum suscepit. Parlamento populus representatur. Ergo. Inimò vos contra ipsum prius. An ille rebellis in Parliamentum suum fuit, & populi sui perduellis? Hoc unum supererat scilicet ut elogio sententiae adderetur. Atqui proditor & tyrannus, idem qui & rebellis. Scilicet societate cum hostibus externis Rex inlit, ut populum Angliae opprimeret & excinderet? Hæc enim proditio quoque est. Quis de hoc illum vel cogitasse arguit? Plebem seditione incitavit & armavit, ut Parliamentum everteret? Hoc scelus vestrum est, ô Rebelles! Numquid Nobilitatis ordinem cum Ecclesiastico sustulit? Criminis hoc vestri opus, ô Perduelles. Ergo ille proditor qui nullam fecit proditionem, vos innocentes & sancti qui hæc omnia admistis, & pro cumulo & fastigio sceleris adjecistis mortem ignominiosam regi vestro manu carnificis illatam? Quod Rex fecit non rebellio fuit, non enim reges rebellant, sed rebellionis reprimendæ conatus. Sed Standardum suum, hoc vexillum est regium, in signum belli extulit. Quando aut quare? Ubi arma contra se mota rebellantium subditorum vidit, tum se cogi passus est ad defensionem sui juris & dignitatis.

tatis. Nec diffitentur perduelles se primos ad arma contra regem ivisse, sed eum bello causam dedisse affirmant. Quo modo? Eo certè quo latroni causam dat viator cum crumena sibi & vitam auferendi, quia crumenam petentibus non statim traderit, aut se defendere tentaverit. Quinque rationes afferunt quibus videri volunt grandes isti latrones. Regem in bello sumendo priores partes occupasse, aut saltem occasionem ad id dedisse. Primam, quod diceret militiam terra marique absolute sui juris esse. Secundam, quod intenderet potestatem se habere vocandi quando vellent Senatus, ejusque dissolvendi. Tertiam, quod vocis, ut vocant, negativæ copiam sibi vindicaret. Quartam, quod de Equestri ordine judicandi, dignitates conferendi majores minoresque quibus vellet, auctoritatem sibi defenderet, item burgos erigendi & *corporationes*, ut loquuntur. Quintam, quod eas prærogativas arrogaret sibi quæ ipsi per leges non debebantur. Sed hæc omnia jura esse Angliæ regalia, & coronæ adnexa, quibusque adeo omnes anteriores reges usi liberè & plenè fuerunt, jam supra abunde demonstratum est. Ergo si pacatos habere Rex voluit regni sui rebelles, debuit omnia

nia in quibus regia majestas consistit, pro-  
jicere, & ipsis conculcandam præbere au-  
toritatem suam solo nomine regio reten-  
to. Quasi dicerent; aut depone omnem  
regiam potestatem quam accepisti à ma-  
joribus, aut pugnemus. At Rex cui vi-  
ta ipsa carior debuit esse sua dignitas,  
quam naturæ jus, successionis lex, & pa-  
terna hæreditas ipsi dederunt, signa cane-  
re jussit. Hæc belli causa fuit, quia rebel-  
les subditos, ut sceptrum sibi de manibus  
extorquerent, arma contra se capere au-  
fos, conatus est armis repellere. Pari ratio-  
ne & Carolum II. primi filium natu mayo-  
rem, hæredemque legitimum, quia regnū  
hæreditarium & paternum armis repeti-  
tum venit, similis arguent criminis, & si  
eum tenerent, eodem quo patrem suppli-  
cio, quasi & ipsum quoque ejusdem scili-  
cet rebellionis & læsæ majestatis reum af-  
ficerent. Quid reperiri potest iniquius ho-  
minibus imperitis, præcipue si improbitas  
ad inscitiam accesserit? An ignorarunt te-  
rerrimæ istæ belluæ, quando Vasallo quod  
promisit dominus non præstat, id feloniam  
non vocari, si vero fidem sacramenti fallat  
Vasallus, quam domino dedit, id esse pro-  
ditionem, id est feloniam? Atqui majore  
fidelitatis vinculo tenetur subditus regi,  
quam

quam Vasallus domino. Utroque vero tenentur vinculo Anglici regnicolæ, tanquam Vasalli regis, & tanquam subditi. Quomodo ergo illi qui nullum non genus proditionis erga regem suum dominumque commiserunt, proditores non erunt, & Rex eorum & dominus proditionis crimine arguetur, & tanquam proditor capite plectetur à suis Vasallis & subditis, cum is per feudi & subjectionis naturam non possit proditionem in eos committere qui Vasalli ipsius & subiecti fuere? Tertium e-logium trucidis sententiæ fuit, regem esse *homicidam*. Quomodo ille homicida? An ut David, cum adulterium cum homicidio conjunxit? An ut Salomon, cum & fratrem majorem natu interemit & Joabum in Tabernaculo ipso cornu altaris tenentem trucidari jussit? An ut Saul qui primus Rex Judæis à Deo datus cum octoginta quinque sacerdotes in veste Pontificali necasset, & eorum civitatem exscidisset, viris mulieribus, & pueris lactentibus in ea occisis, nihilominus *Vinctus domini* in scriptura vocatur? An, ut ad Christianos veniamus, ut Constantinus qui Crispum naturalem filium & uxorem Faustam occidit? Hæc parricidia sunt, non simplicia homicidia. Constantius ejus filius, à cognatorum sanguine par-

particidales manus non abstinuit, Constantino patruo necato & Dalmatio Cæsare. Multos alios è proceribus curavit interficiendos. Quid, ut alios in medio relinquam, de Theodosio dicendum, qui septem hominum millia immissis in civitatem Theſſalonicam cohortibus interfecit? Punire quidem hoc modo voluit seditionem Theſſalonicensium qui præfectum urbis ob capitale supplicium unius aurigæ cui favebant, ab eo decretum, occiderant, sed excessit medicina modum. Ad nostra tempora ut descendamus, quid Iuliana Parisiensi crudelius? Redeamus ad Imperatores non Christianos. Quot millia sæpe letho dederunt hominum hanc fidem profitentium, cum nemo tamen Christianorum quorum parentes & propinqui pro fide martyrium passi fuerant, Cæsares qui id fecerant tyrannos umquam aut proditores aut homicidas appellaverit? Theodosium toties homicidam non alia poena affecit Christianus Episcopus, quam à mensa Domini removendo. Non malis aliorum exemplis defendere postularem si quid tale actum esset à Carolo, sed in comparationem ea affero, ut ostendam, nihil ipsum tale patrasse quod pii & sapien-



sapientes & Christiani etiam reges sine  
convitio & querela subditorum suorum  
perpetrarunt. Sed Carolo imputant mul-  
torum millium Reformatorum cædem in  
Hibernia per Pontificios peractam. Illam  
vero nec jussu ejus nec mandato commis-  
sam fuisse constat. Rexque ipse tot firmis  
argumentis hujus lætentiæ conscientiam  
ab se removit, & innocentiam de hoc facto  
suam probavit, ut nemo, nisi falso & inju-  
ste eam illi possit tribuere. Remitto super  
his lectorem ad opus illud regium & in-  
comparabile Iconis Basilicæ, ubi se de isto  
crimine egregie purgavit, ut de aliis quæ  
ei objecta ab inimicis fuere & rebellibus.  
Hoc enim artificio jam inde ab initio ha-  
rum turbarum usi sunt perduelles, ut om-  
nia dicta factaque regis in crimen & accu-  
sationem traherent, quo eum odiosum  
redderent suis, ut sic facilius ad id exeque-  
dum, quod jam pridem animo concepé-  
rant, venirent. Numquam enim potuif-  
sent id scelus perfectum dare quod diu  
moliti fuerunt, nisi per populi in regem  
odium, & eas criminationes quibus ad Pa-  
pismum eum inclinare, & religionis mu-  
tationem meditari, rumoribus falsis &  
malevolis distulerunt. Hinc magna in il-  
lum invidia confata, & aversi ab eo om-  
niaque

nium.



nium animi. Novæ quædam formulæ Liturgiæ receptis insertæ jactabantur, & alię indifferentes cæremoniæ, quæ fidem hujus rei facere videbantur. Quod tamen falsum esse postea constitit, vel ipsorum Independentium judicio, qui nihil ei tale, cum omnia crimina facta fictane in eum conquirerent & congererent, quibus quasi jure condemnatus videri posset, exprobrarunt. Ad horam ipsam mortis Rex testatus est, se nihil tale cogitasse, & in ea se mori religione quam à teneris unguiculis imbibisset & cum lacte suxisset. Quod non factorum genus in crimen traxissent ad regem reum peragendum, cum ei Rupellam captam objectarint inter scelera capitalia quæ arguitur commisisse. Ex hoc uno capite cætera discantur. Rupellenses rebelles Galliæ Rex Ludovicus in suam potestatem redegit. An eos rebellare coëgit Carolus? Quid igitur ipsi istic imputatur? Recepta scilicet urbs à rege suo, & non defensa ab eo qui nihil juris in ea habuit. An quia Reformati erant, Rex eos reformatus protegere debuit & rebellionis suffragari? Sane auxilium eis rogatū submisit. Si nō satis bene res gesta est, quid hoc ad regem, ut inter crimina ipsi deputetur à subditis suis eque rebellibus, capite luen-

Iuendum? Historia vero sic se habet, ut ex fide dignis eam accepi. Rex Carolus statim post contractum cum Filia Franciæ matrimonium, commodavit Regi Ludovico ex sua classe navem unam cum adversus Italos & Genuenses bellum ille moliretur, & concessit præterea, ut sex aut septem naves de mercatoribus Anglis conductas haberet, si modo earum domini vellent, hac tamen conditione nominatim imposita, ne illæ naves contra Reformatos, à rege militare cogerentur. Una ergo tum navis à Carolo Britanniaë rege Ludovico regi Franciæ commodata, sexq; aliæ de mercatoribus conductæ per eum qui regis negotia ibi curabat. *Agentem* vocant. Sub idem tempus viginti naves bellicæ ab Hollandiæ Ordinibus regi Galliaë subministratæ fuerunt, sub Amiralio Hautanio. Hæ sociatæ cum navibus illis Anglicis, præter Regis Caroli voluntatē, & promissa Regis Ludovici, impetum cum fecissent in classem Rupellensem, eam disturbarunt & dissiparunt, pluribus navibus captis, partim demersis. Quæ de re questus est per Legatum suum Rex Angliæ, quod sibi pacta fides servata non esset à Rege Franciæ. Contra hæc Rex Ludovicus transferre culpam in Rupellenses, qui pacem

tur-

turbassent foedusque fregissent quod secum fecerant, conciliante ipso. Proinde nō debere ea re affici, cum potius ejus iracundia justior esset in Rupellenses, qui pacem per ipsum inter partes firmatam ruptum iverant. Repetiit nihilominus naves suas Rex Angliæ, quæ & restitutæ sunt. Nec sic tamen ille placatus bellum Franciæ ultro indixit & Rupellensibus petentibus auxiliares naves submisit, quæ bisterve ex Angliæ profectæ nihil adjuvare obsessos potuerunt, sed irritæ recessere. Ejusmodi enim opera ab obsidentibus Gallis facta sunt, ut intercludendum ad Rupellam aditum molibus constructis, & aggere miræ firmitatis in mari jacto, quem naves Anglicæ nulla vi percurrere potuerunt. Quid ergo in his quod vitio verti Regi Magnæ Britanniæ queat? Rumor tum in Gallia per ora omnium ibat, Regem Angliæ non alia conditione voluisse auxilium quod miserat Rupellensibus, efficax esse, nisi se illi in clientelam & fidem darent. Quod cum illi facere abnuissent, ita ostentatam potius quam datam opem. De hujus rumoris veritate nihil possum promittere. De quo tamen nihil dubitandum foret, non tamen flagitium capitale Rex commisisset, aut suppetias in totum non ferendo.

rendo Rupellenſibus regi ſuo rebellibus,  
aut ſolum conatum eis auxiliandi oſten-  
dendo potius quam præſtando. Aliud eſt  
magnum crimen quod obijcitur Regi,  
nempe quod è ſacramento præberi à regi-  
bus ſolito, cum coronam accipiunt, verba  
quædam ſolennia detracta fuerint cum hic  
rex coronandus iuraret. Sciendum eſt, hoc  
ſacramentum quod reges in multis locis  
præſtare ex antiquo ſoliti ſunt, non magis  
eos obligare poſſe, quam leges quas ipſi  
ferunt, vel quas latas confirmant. Nam in  
legibus ferendis ſemper præ ſe ferunt ſe ſe  
iis devinciri velle & ſecundum eas vivere,  
cum tamen revera iis ſoluti ſint. Ita eſſe ut  
dico, vel illud oſtendit, quod reges qui ſine  
controverſia merum imperium habent &  
potestatem nullis legibus coërcitam, ju-  
rare etiam nunc conſueverunt populo ſuo,  
ut populus viciffim regi. Sed hæc duo ju-  
ramenta diverſæ naturæ ſunt. Populus re-  
gi jurat fidelitatem, non populo Rex. *Fideles*  
dicti inde ab eo ſacramento, quo fidẽ  
& obedientiam promittunt regi ſuo ſub-  
jecti. Rex vero nec fidem, nec obſequium,  
nec obedientiam ſubditis ſuis jurat, ſed ſe  
eos eſſe deſenſurum & conſervaturum &  
ſecundum leges regnaturum. Et certum  
eſt reges multos ut beneyolentiam & gra-  
tiam

tiam acquirerent populorum quos sibi bello subjecerant, sponte sua ad hoc iusjurandum se demisisse. Et quia de Angliæ regibus sermo est, an credibile est Guilielmum qui armis imperium Britanniae sibi quaesivit, à populo coactum fuisse ad tale sacramentum, quale ipse exegerat, concipiendum? Certe ab illo tempore & regno Gulielmi repetenda est formula sacramenti, quo reges Angliæ cum coronabantur, usi fuere. Nec tamen credendum est eandem semper fuisse, aut nihil in ea immutatum sub diversis regibus. Nam cum à regum voluntate plane penderet quomodo jurarent, non potuit certa verborum solennitas ab omnibus exigì, quā non liceret mutare. Scribit Aristoteles ex illis antiquorum regibus, quibus *μοναρχικῶς* potestatem tribuit, alios jurasse, alios non. Sed illud iusjurandum tunc videntur tantum præstitisse cum ius dicerent. Sic enim scribit lib. iii. de Republica cap. xiv. *Καὶ πρὸς τοῖς δίκαις ἔχειν, τὸ δ' ἐπὶ οἱ μὲν σὺν ὁμνύοντες, οἱ δ' ὁμνύοντες, ὁ δὲ ὅρκῳ σὺν ἡπείρ ἐπανάτασις.* Præterea & causas iudicabant, sed hoc faciebant quidam iurejurando interposito. Alii non jurabant. Iusjurandum autem erat sceptri elevatio. Videntur eo modo hi jurasse reges, quomodo

modo sub posterioribus regibus iudices & magistratus jurare soliti erant, se nempe secundum leges esse judicatu-  
ros. Priscorum quippe regum præcipuum fuit officium, iudiciorum exercitio. Ad hoc exemplum & reges posterioris ævi jurare consueverant, cum coronationis eorum celebraretur solennitas, ubi majores annis facti fuerant, & juris reddendi capaces. Quod præcipue usurpatum in regnis hæreditariis. Inde etiam proditus mos, à iudicibus sive magistratibus, quibus aut populus aut princeps jurisdictionem mandabat, tale jusjurandum postulari quo jurabant se *judicatu-  
ros esse secundum leges*. Boni principes Romæ cum consulatum inibant, prisco more jurare solebant, ut de Trajano testis est Plinius in ejus Panegyrico, his verbis: *Peracta erant solennia comitiorum si principem cogitares, jamque se omnis turba commoverat, quum tu mirantibus cunctis accedis ad consulis sellam, adigendum te præbens in verba principibus ignota, nisi cum jurare cogunt alios*. Nam tum magistratus & iudices omnes jurabant in verba principis, cum principes injurati essent. At Trajanus tum Consul renuntiatus more privatorum Consulatum auspicantium jurare voluit. Idem Plinius  
ibidem;



ibidem: *Imperator ergo & Caesar & Augustus & Pontifex maximus, stetit ante gremium consulis, seditque consul, principe ante se stante, & sedit inturbatus, interritus, & tanquam ita fieri soleret. Quin etiam sedens praeiuravit, id est verba iurandi suggessit, & ille iuravit, expressit, explanavitque verba quibus caput suum, domum suam si sciens fefellisset, Deorum ira consecrat. Subjicit protinus idem autor: Ingens Caesar, & pro gloria tua, si ve fecerint illud postea principes, si ve non fecerint. Certe non fecerunt, nec ante Trajanum alius fecit. Nec minor propterea ille fuit neque ita iurando magis quam alii principes iudicio populi aut Senatus se obnoxium fecit. Antiqui iudices Justiniano teste, leg. xiv. Cod. de iudiciis, priusquam iudicalem calculum acciperent, iurabant, omnino se secundum veritatem & legum observationem iudicium esse disposituros. Postea ut in Novellis scriptum est, iurabant, Se facturos secundum quod sibi melius & iustius visum esset. Atque ita etiam soliti iurandum praestare in Anglia iudices à Regibus dati. Si contra iurandi fidem, non secundum leges iudicium exercuissent, ab ipso rege qui eos constituerat, poterant removeri, atque etiam*



etiam removebantur, sicut & moris in Anglia fuit. Nam cum iudices omnes ille creabat, tum summum regni *justitiam*, ut vocabant, qui dignitate omnes regni proceres, potestate ceteros magistratus antecellebat. Hic etiam à Rege ponebatur & destituebatur. Regem vero si contra leges judicasset & iusjurandum non servasset, quis poterat ideo accusare, condemnare & abjicere. De his regibus præcipue loquor, qui non populi suffragiis regnum debent, sed legi successionis. Certe iusjurandi hodierni obligatio, quod præstare solent qui hæreditate accepta regna possident, non magis eos iure adigit, si contra id faciant, ad deponendum imperium, quam antiquos illos, de quibus Aristoteles, iusjurandum quod causas ex tribunali disceptaturi præstabant. Nam cum soluti legibus sint quas faciunt, etiam iusjurandi obligatione non tenentur, qua promittunt se secundum leges esse imperaturos. Pari quippe modo obligantur ad leges quas faciunt observandas & ad iusjurandum quod præstant. Officium quidem suum si facere velint, utrumque tenentur implere, sed si non fecerint, superiorem non habent à quo judicari possint. Legibus se dicunt solutos esse, & tamen legibus

*legibus vivere*, ut est in Institutis. Similes his voces Cæsarum passim in jure Romano occurrunt : *Proprium esse Imperatoris legibus vivere. Principem decere leges servare.* Penè etiam divinum est quod Theodosius & Valentinianus Imperatores scripsere leg. iv. Cod. de Legibus & Constitutionibus Principum. *Digna res est*, inquiunt, *majestatem regnantis, legibus obligatum se principem profiteri. Adeo de autoritate juris nostra pendet autoritas. Et revera majus imperio est submittere legibus principatum.* Aurea plane verba, quæ utinam Principibus frequenter inculcarent qui eos accedunt, & qui in aulis eorum versantur. Quid autem majus aut melius possunt in sacramento quod præstant promittere ac profiteri, quam se *legibus esse obligatos, & supra se leges esse, non se supra leges?* Sed si ve jurent hoc, si ve non jurent, officii sui ratio ad hoc eos penitus adstringit, non vis sacramenti. Boni viri in his quæ se decet facere, non magis jurisjurandi virtute se teneri existimant, quam simplici promissione. Lubentius quinimmo ad jurandum proni sunt, qui fallendi animum habent. In regibus autem mos ille jurandi qui hodie receptus est, caremonialis est tantum, nec plus præstat quam illa professio,

festio, de qua loquuntur Imperatores lege  
supra citata. Quod enim percussores regis  
Angliæ ex eo sacramento quod reges hu-  
jus Insulæ tempore coronationis suæ præ-  
stare soliti sunt, probare contendunt re-  
gnum hoc hæreditarium non esse, fallere  
potius videntur voluisse, quam falli po-  
tuere. Non enim possunt ignorare omniū  
hodie regum Europæ hunc esse morem.  
Sciunt etiam, aut scire debuerunt, non ab  
illo sacramento reges regnum auspica-  
ri, sed etiam regnare solitos antequam  
juraverint. Ut coronatio solennitas est  
quæ non facit regem, sed decorat, ita  
nec sacramentum quod in ea præstatur,  
regnum regi dat, quod successio de-  
fert vel infanti. Isque Rex dicitur & ha-  
betur etiam antequam coronam capiat,  
quæ adulto demum imponitur cum so-  
lennitate aliqua; quæ ornamentum po-  
tius censetur & honoris accessio, quam di-  
gnitatis regiæ vel imperii collatio in re-  
gnis hæreditariis. Et sic statutum est ab  
omnibus Angliæ iudicibus primo anno  
Regis Jacobi. Hodie extant exempla re-  
gum nondum coronatorum, qui tamen  
reges sunt. Eodem autem tempore quo  
corona donantur reges, etiam jusjurandū  
præstant. Et sic constat pro regibus etiam  
habitos

habitos qui nondum sacramentum præstiterunt. Hujus jusjurandi ratio alia in regnis quæ suffragio populi dantur, alia in illis quæ dat successio. Qui regem eligunt, conditiones interdum ei proponere regnandi solent, de quibus observandis jusjurandum quoque ab eo exigunt, ut ex sua parte illud & ipsi præstant. Si talis pactio non interveniat eligentes inter & electū, quæ mutuo sacramento firmanda sit, tamen is qui eligitur, quasi perpetuus iudex à populo creatus debet jusjurando cavere, leges regni quæ latæ sunt, & quas ex consilio primorum populi laturus sit, se esse servaturum. In hæreditariis regnis alia causa est sacramenti quod præstant reges. Ut enim hæc imperia ut plurimum armis quæsitæ, ab usurpatione initium ceperunt victores, ut cum bona gratia genti victæ possint imperare, plura eis privilegia concessuerunt indulgere, quæ ut populo perpetua maneant beneficia, non solum ipsi se ad ea servanda propria voluntate jurati obligant, sed etiam successores suos ad simile sacramentum adigunt. Tale sane fuit sacramentum à Guilielmo Conquæstore Angliæ à se subjugatis suoque imperio subjectis præstitum. Successores ejus idem sequuti sunt, quorum sacramenti præstan-

di

di hæc præcipua fuit ratio, ut populo Angliæ confirmarentur leges & privilegia ab anterioribus regibus ei concessa, nominatimq; *Leges, consuetudines & immunitates Clero datas per gloriosum regē Sanctum Edwardum*, secundum Dei legem & veram professionem Euangelii stabilitam in regno & congruentem regum prerogativa. Sequebatur & articulus in eo sacramento, *De pace & concordia custodienda, secundum ipsius vires, Deo, Sanctæ Ecclesiæ Clero & populo*. Tertius erat quo se curaturum promittebat ut *iustitia in veritate in omnibus suis judiciis administraretur*. Quartus & ultimus clausulam habuit quam truncatis aliquot vocibus immutatam fuisse in sacramento quod Rex Carolus præstitit, crimini ipsi datum est, *Quod populo concederet tenere & observare leges & iustas consuetudines quas regni communitas habet*, & quod eas defenderet & conservaret quantum in ipso esset. Hic obicitur Regi, quod loco *Legum & consuetudinum quas communitas habet*, esse oportuerit *consuetudines & leges quas vulgus elegerit*. Quæ verba sensum idoneum non efficiunt, aut habent contrarium legibus ipsis regni & statutis Parlamento. Quid est enim *leges eligere*? An possunt probare in populi arbitrio fuisse legū

eligendarum licentiam? Nam ne condenda quidem ullius legis populus habuit potestatem nisi in Parlamento à Rege vocato. Nec sane ulla lex ab ipso Parlamento lata vigorem legis habuit vel auctoritatem nisi assensu regis approbata & firmata. Privata acta Parlamenti quæ sine rege fiebant, neque cives neque peregrinos constringebant, ut constitutum est Statuto anni xxxvii. Henrici vi. cap. xv. & decimi tertii Eduardi iv. cap. viii. Falsissimum ergo est quod ex illa clausula commentitia arguunt, potestatem populo fuisse leges habendi & sibi faciendi quas vellet. Quod an stare possit, ex his quæ supra diximus, probari potest. Ajunt regis defensores, fieri posse ut ea clausula in aliquot antiquis exemplaribus formularum regii sacramenti extiterit, sed in desuetudinem abiisse, quod commodam significationem non haberet. Certe non aliter accipi potest quam de legibus quas populus in Parlamento legitimo per regem convocato sanciverit vel elegerit, accedente Regis ipsius consensu stabilitas. Ut hoc crimen ad regis necem ea verborum formula valeret, debuerunt ostendere jussu ejus illa fuisse detracta. Ponatur & hoc, an crimen capitale id Regi? Atqui ne capitale quidem ei fuerit contra leges fecisse, cum nec judices

dices ipsi qui sub regibus constituti jurarāt  
 se secundū leges esse judicatuos, si id non  
 fecissent, capitis supplicio umquam lue-  
 rint. Multominus id regi sit capitale qui su-  
 pra leges est, vel hoc ipso quod earum pœ-  
 nam remittere noxiis potest, vel in atro-  
 cissimo scelere deprehensis & convictis, ut  
 est *summa*, quam vocant, *proditio*. Per eas  
 ipsas leges ut sit superior legibus accepit,  
 quarum gratiam facere potest in multis  
 casibus per suum illud, *Non obstante*. Quod  
 in omnibus legibus à Parlamento factis  
 obtinuit. Capitalium, ut dixi, delictorum  
 remissio, quæ à voluntate regis pende-  
 bat, & illud axioma juris Anglicani, *Regem non  
 posse facere injuriam*, satis evincunt legi-  
 bus eum solutum fuisse, haud secus quam  
 alios principes qui *μνησχηρὸν* imperium  
 obtinent. Inter jura Regis Angliæ hoc e-  
 tiam fuit, ut ex proprio placito & absoluta  
 autoritate posset quemlibet in carcerem  
 conjici jubere, & tandiu ibi retinere quan-  
 diu veller, ut ostendit Richardus Crompto-  
 nus in libro de Parlamento. Cum civis in  
 civem litigat, per actionem & processum,  
 ut loquuntur, cum eo experitur, si contra  
 regem in simili casu agere velit, id fit per  
 petitionē, jure quo Angli semper usi sunt.  
 Sed ipse in persona non est subjectus exa-  
 mini nec judicio, nec legibus interrogari



potest. Legibus ille quidem, ut alii reges, vivere debet, sed si non fecerit, & jusjurandum non servet, non tenetur alteri rationem reddere nisi Deo. Fréquētissimæ subditorum querelæ contra reges ex onere tributorum oriuntur, quibus se gravari quiritantur. Salomon ingentia tributa populo Israëlitico imposuerat, quibus ingentem opum vim quæsit, contra expressum Dei mandatum, quo Regibus Israëuitarum interdictum erat divitias amplas adgregare. Nihilominus Rex mansit & sapientissimus mortalium audiit. Regi Carolo si tale quid in mentem venisset facere, quid plus fuit dicturus accusator ejus, qui in defensione parricidii ab illis tyrannis commissi, non dubitavit affirmare, *Si regem non modo decollassent, sed & in quatuor partes corpus ejus secuissent, nihil facturos fuisse pro merito flagitii, quod admiserat?* Certe cum Rex vellet tributum Classi imponere, sapientes regni sui, id est legum & consuetudinum peritos ad se vocavit, ut rogaret an id sibi liceret. Cum illi respondissent licere, sic fecit. Sed mox cum intellexisset id populo non placere, per actum Parlamenti, non coactus sed volens id revocavit. Hoc tamen quasi grave crimen illi impingitur ab accusatoribus. Si peccatum ullum ejus hac in re fuit, statim

statim monitus & pœnitentia ductus id e-  
 mendavit. Quid ergo mali commeruit?  
 An necem, quia pœnituit? Beneficii potius  
 loco & gratiæ hoc illi fuit imputandum.  
 Sed quid de ejus accusatoribus & percussio-  
 ribus hic dicemus? Nōne eos regem suum  
 dices ideo sustulisse, ut possent sine ulla  
 lege, sine jure, sine autoritate tributum  
 Anglicano populo imponere hebdomada-  
 tim solvendum triginta trium millium  
 quingentarum & decem librarum. Præter  
 istas actiones etiam extorserunt à civibus  
 Angliæ vigesimam & quintam partem om-  
 nium suorum bonorum, & præterea ve-  
 ctigal superindixerunt omnibus rebus,  
 quarum usus aliquis est, intolerandum.  
 Postremo omnium honestorum virorum  
 bona & possessiones sequestrarunt, tam  
 in Ecclesia quam in Republica, sub præ-  
 textu *Malignantium*, quos vocabant, &  
 delinquētium, quos & inauditos condem-  
 narūt, contra jura omnia & leges Angliæ.  
 Ita corvi lupique raptores in fabula facile  
 sibi ignoscunt, columbasque & agnos ra-  
 pacitatis insimulant. Catilinas & Cethe-  
 gos, Claudios, Antonios & Cæsares audi-  
 re videor Cicerones & Catones tyranni-  
 dis arguentes. Nonne tempus est, si um-  
 quam fuit, ut Angli clament, *Porro*  
*Quirites, libertatem perdimus.* Adeo hoc

tempore exulat ab illa Insula, ut ne verba quidem libera sint. Nam mutire nō solum plebeiis, sed etiam quibuscunque periculum est. Et cui non mirum videatur cum rege amissam fuisse libertatem & cum Republica natam tyrannidem? Ut ad hoc venirent, qui scelus istud jam pridem meditati fuerant, hac arte usi sunt, ut criminationes varias contra Regem in vulgus spargerent, quibus eum in odium & invidiam adducerent. Quæ machinationes dolique non prius patuerunt, quam res in execrandum parricidium desit. Levia quæque vitia ita exaggerabant, ut de his crimina maioris abollæ facerent. Ne post mortem Regis quidem cum omnia sedulo conquississent, per quæ merito supplicio ab his affectus Rex videri posset, quicquam morte vel in privato dignum protulerunt, nedum in rege. Omnia inania, frivola, vel non probata, vel in crimen maligna interpretatione detorta, vel solis suspicionibus & conjecturis subnixa, vel etiam millies refutata. Nonnulla etiam in medio belli æstu commissa, quæ justius in rebelles retorqueri possent, quibus causa omnium malorum, quæ Anglia hætenus perpeffa est, & in posterum est perpeffura, tribui debet. Quis non rideat, quod impedita inter Londinū

dinum & Oxonium commercia, inter Re-  
 gis crimina recensetur? Cur non adjunxe-  
 runt cum hoc actum est, tum Oxonium  
 regis arcem & præsidium fuisse, & Lon-  
 dinum rebellium? Debit ergo annonam  
 ultro submittere suis hostibus Rex & se  
 ipsum commeatu intercludere, ut tanto  
 citius in eorum potestatem qui eum erant  
 trucidaturi, venire posset! Adeo autem  
 veris & idoneis accusationis causis deficie-  
 bantur, ut hanc etiam pro maxime cri-  
 minosa posuerint, quod sanctos illos viros,  
 à quibus postea condemnatus est & neca-  
 tus, non *Sanctos* soleret appellare, sed  
*Brunistas & Sectarios & Independentes*.  
 Grande hoc sane crimen in rege. Debit  
 enim sanctos illos venerari & adorare pro  
 eo quod rebellionis in ipsum autores &  
 flabellatores fuerant. Si verum fateri vel-  
 lent aut possent, hæc gravissima omnium  
 causa fuit, vel etiam unica, quæ Regi ca-  
 put amputavit. Hoc enim eum tyrannum  
 fecit, hoc proditorem & homicidam.  
 Noluit Rex concedere tali sanctitati nec  
 sceptrum ei suum tradere, quæ sola re-  
 gnare merebatur, utpote quæ Christi re-  
 gnum in terris constituit, cum quo re-  
 gnum mundi non potest consistere. Qui-  
 cunque igitur ubicunque terrarum re-  
 ges erunt qui tales sanctos regnare pro-

hibebunt, simili poena luere id debent, & capite deposito, non corona tantum, locum facere sanctis & cum his Christo regnatura. Eodem crimine cum rege, id est nullo, concidit etiam Nobilitatis ordo, qui domum superiorem Parlamenti & dominorum constituebat. Quid enim proceres meruerunt, ut nihil loci amplius nec ullam partem in Reipublicæ administratione haberent, quam aliquando soli secundam à rege habuere, semper præcipuam? Si universa Nobilitas in unum corpus coire & conflari potuisset, cervicem ei æque audacter dempsissent ut Regi defecerunt, ut ea esset forma status quam optarunt, populus sub tyrannis sine rege & nobilitate. Nuper enim illi Angliæ tyranni decretum fecerunt de novo fidelitatis ab omnibus sacramento præstando, & Reipublicæ, sicut nunc est constituta sine Rege, & Dominis, hoc est Optimatibus. Debuerunt addere, & cum quadraginta tyrannis. Quo enim alio nomine merentur appellari, qui re & factis se id esse probarunt? Nam quis eos constituit in populo supremo iudices & duces? An Populus? An Parlamentum? An Rex? Immo ipsi semet ipsos, vi & armis. Ita tyranni sunt & usurpatione & administratione. Quis etiam jus illis dedit Status Rei-

Reipublicæ immutandi, & pro regali haud scio qualem, popularem an militarem, instituendi? An quia meliorem esse judicant popularem? Unde homines rerū imperiti hoc didicerunt? Si hoc revera est, cur militaris est, non popularis quem fecerunt? An quia liberū statū habere voluerunt? Quasi liber sit qui sub militibus est, & militum ducibus. Cur igitur libertas nunc minor est in Anglia quam sub regibus fuit? Omnis mutatio præterea tametsi videatur in melius fieri, semper pessima est. Sed unde nobis probabunt id esse melius quod elegerunt, quamvis veræ & liberæ Reipublicæ regimen instituissent? Non disputabo hic quodnam ex tribus gubernandi generibus optimum sit, cum sua incommoda singulis adsint. Non etiam rationes ab aliis allatas repetam, quibus multi pro suo quisque judicio & gustu meliorem eum esse qui magis placebat, probare contenderunt. Possem enim & alia proferre argumenta quibus ostenderem non esse pessimum regium, immo & optimum, cum bene administratur. Dicam obiter tantum, non simpliciter hunc aut illum esse præferendum, sed prout nationes sunt, popularem illis aut regalem magis esse conducibilem. In Oriente semper reges fuere. Unde



hoc, nisi quia Orientales populi ad hoc regimen magis facti videntur, utpote ad servitium magis nati. In Europa ut variae gentes eam inhabitaverunt, ita aliae etiam aliis ad statum regalem aut accipiendum aut respuendum magis habiles. Anglia semper reges habuit. Ex quo manifestum est illius gentis ingenia non posse aliter gubernari. Præter genium & naturam populorum alia etiam ratio est, cur popularis in aliis locis commodior sit, in aliis regalis, & contra. Experientia docuit, parvas civitates aptius gubernatione populari contineri. Amplissimis autem diticibus regalem melius convenire. Quandiu Romana potentia intra pomeria urbis suæ, vel ad summum intra Italix fines, stetit, Respublica eorum viguit & à populo bene administrata est. Ubi imperii sui terminos extra Italiam promovit, tum populus coactus est ob multitudinem plebis nimis abundantem Senatui se regendum permittere. Et sic ad paucos rediit regimen quod populi erat. Nam ubi populus major est quam ut in concionem convenire totus possit, imperii ejus exercendi ratio necessaria ad pauciores referenda est. Inde natus optimatum Status. Pomponius de Origine Juris: *Deinde quia difficile plebs conveni-*



*venire cœpit, populus multo difficilius in tanta turba hominum, necessitas ipsa curam Reipublica ad Senatum deduxit. Ubi vero tantum evasit illud imperium ut penè totum orbem comprehenderet, tum eadem necessitatis ratio, quæ à populo ad Senatum traduxerat regendi curam, à Senatu ad unum transtulit. Tanta enim mole imperii in tam frequentibus magnatum opibus, clientelisque adeo potentium, dissensionibus non potuit ab ipsis Optimatibus regi, qui quotidie in partes scindebantur. Sic in unius potestatem recidit respublica discordiis procerum & bellicis civilibus fessa. Quod alicubi testatur Tacitus, & idem Pomponius eodem loco his verbis: No vissime sicut ad pauciores juris constituendi via transisse ipsis rebus distantibus videbatur, per partes evenit ut necesse esset Reipublica per unum consuli. Nam Senatus non perinde omnes provincias probe gerere poterat. Igitur constituto Principe datum est ei jus, ut quod constitueret, ratum esset. Omnes ferme antiquorū respubl. aut singularum fuere civitatum, aut paucarum minorum sub una principali. Hodieq; aliquot in Europa nostra Civitates liberæ reperiuntur. Paulo amplioris territorii Venetorum Status ab optimatibus gubernatur, non à populo. Fœderatæ istæ*

Pro-

Provinciae jam olim à suis Comitibus sive  
Grafionibus, id est rectoribus, liberè admi-  
nistratae sunt cum imperium esset penes  
Ordines. Ad Angliam quod attinet, non  
tam magnitudo Insulae, quamvis & hæc  
quoque adjuverit, quam genius gentis fe-  
cit, ut reges semper haberet. Hunc non  
mutassent qui hodie in ea tyrannicè re-  
gnant, nisi id propriae ambitionis gratia  
fecissent. Nulla quippe de regio regimine,  
in illud quod nunc obtinet, alia transitio  
facta est, nisi quod pro rege tyrāni sunt. Sic  
semper regalis est ille status, sed in excessu  
regiae dominationis, quæ *tyrannis* vocatur.  
Quod autem volunt videri tyranni illi ad  
instar Batavorum Rempublicam liberam  
constituisse, & horum exemplo factū suum  
tueri conantur, hoc quoque illis telum e-  
ripiendum est. Tam quippe simile est quod  
ipsi fecerunt & quod Batavi, ut lac atra-  
mento non magis dissimile videri queat.  
Nam sive res ipsas spectemus, sive rerum  
causas, sive finem, sive personas tam agen-  
tes quam patientes, & alias omnes circum-  
stantias, quæ facti qualitatem spectant &  
agendi modum, si contraria contrariis si-  
milis sunt, Batavorum & Anglorum fa-  
cinus gemella facie inter se pariabunt.  
Priusquam comparisonem utriusq; facti  
ingrediamur, causæ justioris in Batavis.

magnum argumentum est Rex ipse, cui obsequium renuntiare coacti sunt, ut cum quo bellum tot annos pro libertate gesserunt. Nam duobus fœderum solennibus tractatibus, nihil se in eos habere juris vel imperii testatus est; sed cum his tanquam cum liberis populis inducias primo duodecennales, mox & pacem fecit. Quando erit, ut legitimus hæres Caroli primi, aut quicumque ex regia domo successores in jus idem orituri quandocunque sunt, patricidas parentis sui, & rebelles, pro legitimis possessoribus agnoscat regni ad se pertinentis? Hoc nunquam ullò in ævo futurum est, neque fiet. Nunc conferamus & contendamus invicem causam Anglorum & Batavorum, & dispiciamus, an Batavorum exemplum Anglis prodesse queat. Batavi semper liberi fuere, Angli semper sub Regibus Romanis illi numquam subjecti sunt, isti jugum subiere Romanorum. Quo tempore duces & comites in Imperio Romano dicebantur provinciarum rectores & civitatũ, quorum idem nomen & potestas sub Francorum in Galliis regnantium prima stirpe. Habuere & isti suos comites, Grafiones vocabant, id est rectores qui Ordinum nomine gubernabant. Ubi vero illi duces & comites qui sub regibus erant,

erant, titulo feudi à suis dominis ac regibus eas dignitates obtinuerant & hæreditarias possidere cœperunt, comites quoq; Batavorum, quia sæculi hic mos erat, præfecturas suas quas quoad viverent, antea tenebant, suis hæredibus reliquere, permittentibus vel conniventibus Ordinibus provinciarum quibus præsidebant. Ex isto genere Comitatum Hollandia fuit, cujus comes non supremam habuit auctoritatem, sed ipsi Ordines. In domum Burgundicam cum transisset hæc dignitas per matrimonium, à domo Burgundica similiter in Austriacam per aliud matrimonium translata est, Maria Caroli Maximiliano nupta, quibus Philippus natus Caroli Burgundi nepos, Comes Hollandiæ, qui ducta Infante Hispaniæ regnum hoc adeptus est. Ita non Rex Hispanus factus est Hollandiæ Comes, sed Hollandiæ Comes evasit Rex Hispaniæ, manente semper penes Ordines Provinciæ, sive Comitatus Hollandiæ, ut semper fuerat, principali auctoritate. At quicumque duces & comites in Anglia extitere, aut à rege eas dignitates honorarias acceperere, aut feudales & patrimoniales ejusdem beneficio tenere. Batavi non regem abdicarunt sed Comitem. Causas perspiciamus abdicationis in Anglis & Batavis. Non Batavi regis-

gis Hispaniarum jura imminuere unquam tentarunt. Contra Hispanus peculiare immunitates, jura & consuetudines Belgarum evertere contendit, jam inde à Caroli V. temporibus, imperiumq; quod Ordinum erat, ad se trahere. In Anglicana rebellionē alia omnia, & adversis frontibus pugnantiā. Non enim Rex populi privilegia abrogare studuit, sed populus jura omnia regalia Regi eripere, majestatem ejus imminuere modis omnibus conatus est. Batavi non primi regi bellum intulerunt, sed per quadraginta annorum spatium pro obsequio erga principem retinendo luctati sunt contra crudelitatem & avaritiam rectorum suorum & regis præfidum. Angli quod regem præviderent non libenter esse passurum se sua potestate à subjectis exui, ut cogi posset, bellum in eum moverunt, portas oppidorum clausurunt, omnia denique in eum hostilia moliti sunt, nulla ab eo provocati injuria, non cædibus, non violentia in conscientiarum & religionis libertatem, non tributorum oneribus. In Batavia spatio quadraginta annorum plus quam centum hominum millia, igne, gladio, laqueo necata, & aquis hausta ob religionem memorantur. Unus Dux Albanus gloriatus est se tempore suæ administrationis plusquam.

quam decem & octo hominum millia variis tormentis prius excruciatæ, neci dedisse. Angli omnibus suis admonitionibus aut declarationibus quas ad Regem mittebant, nihil nisi rebellionem, seditionem, & hostilem animum minasque spirabant. Batavi supplicationibus solis cum rege agentes de solis ejus ministris querebantur. Angli non solum Regi, sed etiam Parlamento bellum indixerunt, quod nobiliore sui parte mutilarunt. Batavi Ordinibus auctoritatem qualem habere sub suis ducibus conservarunt. Angli nobilitatem regni, quæ sola post Regem olim maximam habuit auctoritatem & semper præcipuam, exterminarunt. Batavi sua nobilibus jura & privilegia facta intacta reliquerunt, partemque in rebus gerendis quam semper sub Comitibus obtinuerunt. Angli Rege sublato libertatem non reddiderunt populo, sed tyrannidem qualis non fuit sub ullo priorum regum, introduxerunt, quadraginta tyrannis qui supremum imperium tenerent, e corpore militari constitutis. Batavi non rege, sed Comite, qui nunquam potestatem habuit absolutam, abdicato vel destituto, veram Reipublicæ liberæ formam instituerunt, vel potius restituerunt per deputatos generales provinciarum foederatarum.



rum, & particulares civitatum administrandam. Ad summam, Batavi non regem, ne Comitem quidem suum ad iudicium vocarunt, non accusarunt, non supplicio capitis per carnificem affecerunt. Ne quidem extrema passi prius eum deseruerunt, quam ab eo deserti sunt, & perditioni edicto regis dediti & addicti, atque hostes publici pronuntiati, & hoc nomine exterminari iussi. De rege Angli omnia hæc fecerunt, & nullum genus ignominiae & contumeliae rerum & verborum præterminifere, quod non addiderint ad mortem infamem qua regem suum quasi latronem & proditorem & ficiarium, carnificis ferro confecerunt. Idque patrarunt contra omnia vetustatis & novitatis exempla, contra jus & fas, contra omnium gentium etiam barbararum morem. Dionysius Tyrannus cum multa infanda & crudelitatis inaudita facinora edidisset in cives suos, ab his expulsus, quod reliquum vitae fuit, Corinthi exegit in ludo literario, cuius magister erat. Unum rebellibus Anglis Neronis exemplum placet, quem Senatus condemnavit. Quantum huic iudicio tribuendum sit, vel inde liquet, quod idem ille Senatus paulo ante in gratiam illius sævissimi tyranni, honestissimos & sanctissimos in illa ætate hominum, & Senatores



natores gravissimos Thraseam Pætum & Soranum aliosque infinitos ad mortem damnaverit. Ipse ille Galba qui ex ordine Senatorum erat & à Nerone desciverat & cuius gratiæ dedit tum Senatus, ille hanc Neronis condemnationem, fatetur apud Tacitum, *non extare ante Neronem exemplum damnati principis*. Neque sane postea extitit. Sed nec illud iudicium executioni mandatum est. Quod de Maximino quasi simile memorant, non est simile. A Senatu ille quidem hostis pronuntiatus est, sed non per carnificem publice securi percussus. Is de corpore militari primus imperium invaserat, à militibus factus sine assensu Senatus, Alexandro Mammeæ optimo principe & à quo promotus fuerat & universo exercitui præfectus, nefarie interempto. At id præterea factum in imperio non hæreditario, ut & alia duæ sequuntur. Ante annos centum sexaginta septem viri Electores Venceslaum se abdicare imperio adegerunt. Christiernus secundus Daniæ Rex, electione regnum adeptus, cum impotenter & tyrannicè regnasset, multos e proceribus inauditos atque etiam infantes à Senatu pronuntiatis trucidasset, alios bonis indicta causa exuisset, contra jus gentium multa fecisset, in carcerem conjectis Sueciæ legatis,

gatis, & aliis qui è Polonia venerant, etiam interfectis, à suis subjectis destitutus est, qui filium ejus Iohannem regi sibi sum-  
pserunt. Richardo II. Angliæ Regi plura longe objecta fuere crimina quam Carolo, atqui abdicatus tantum est, non judi-  
catus, nec capitis damnatus, nec per car-  
nificem decollatus. Henricus sextus pa-  
rem fortunam in eodem regno expertus  
est, & se regno abdicare coactus. De his lo-  
quor qui in potestate populi sui aliquando  
fuerunt, ut de his quod vellent statuerent.  
Aut destituti sunt, aut coacti imperio ab-  
ire, numquam damnati. Sic duos reges  
Gallia sibi vidit ademptos, Ordinum re-  
gni consensu. Hoc ergo maneat fixum  
tanquam jus numquam movendum, & ab  
omnibus gentibus, paganis, Judæis, Chri-  
stianis semper observatum, Regem judi-  
cari non posse, & proinde male à suis ju-  
dicatum fuisse Carolum. Immo iudices  
ejus non iudices fuisse, sed perduelles,  
latrones, sicarios, parricidas dicendos.  
Scitum est & vere dictum à quodam de se-  
cta Independentium, regem in Carolo  
primum perdidisse Presbyterianos, dein-  
de & Carolum ipsum trucidasse Indepen-  
dentes. Ita regem justum & sanctum ex-  
tinxere Presbyteriani, Carolum vero vi-  
rum probum & pium, non tantum inno-  
cen-

centem, Independentes condemnarunt. Et sic quamvis accusari & judicari potuisset, ita tamen constat vitam egisse, & sic in regni administratione sese gessisse, ut nihil in utraq; reprehendendum aut poenitendum, nedum puniendum, occurrere sit passus. Tyrannum non fuisse constat, sed tyrannidem contra se surgentem frustra opprimere voluisse à qua oppressus est. Constat denique à proditoribus & parricidis fuisse falso proditoris accusatum, & scelere antea numquam audito nec cognito necatum. Ab illis damnatum ad mortem, qui nullam auctoritatem judicandi vel iudices dandi habuerunt, tametsi vel minimus opifex ad eorum tribunal fuisset vocatus. Sic Rex insons perit, nec tantum insons, sed indefensus & inauditus, qui ne omnium quidem criminum quæ ei objecta sunt, convictus perire debuit, quia nec judicari potuit. Si privatus fuisset, ut Rex fuit, ne quidem ab istis objectionibus & accusationibus quicquam pati æquiorum iudicum sententia potuisset. In fine porro hujus Defensionis Deum testabor, me hanc causam tuendam suscepisse non tantum quia rogatus, sed quia meliorem & justiore nullam ea me potuisse defendere conscientia mea mihi suggessit, ratio & veritas docuit, resque ipsa

ipsa dictavit. Eadem porro veritatis ratione ducente profiteor, me & plenum & liberum regibus afferuisse imperium, quibus id naturæ jure & successionis lege debetur. Primo, quia & causa Regis Angliæ poscebat, quæ communis est ipsi cum reliquis regibus. Deinde, quia & populorum qui reguntur, maxime interest non obnoxiam subjectis habere potestatem qui eos regunt. Namque haud satis liquet utrum hominum Reipublicæ, ut ranarū, minus expediat habere hydram pro re-ctore, an tigillum, id est tyrannum, quam regem inertem. Hinc calcanda majestas cum contemptum pariat, inde nimis elata odium, utrumque ex æquo ad pessima quæque populos provocat. Nemo etiam credat me voluisse latum ubique terrarum campum regnantium aperire tyrannidi in qua libere decurrat, cum solo Deo minores eos esse dixi, cum solum Deum agnoscere vindicem suorum factorum, & cum à nemine mortalium judicari posse, legibusque solutos esse pertendi. Hæc omnia quidem verissima esse, multis solidisque argumentis probavi, sed non propterea regum loco tyrannos sedere volui. Quod amplissimam eos habere potestatem defendi, & nullis finibus circumscriptam, non ex eo sequi intellexi, ea etiam illos

illos uti debere, & velle quod possunt, vel sibi licere credere quod ipsis libet. Unusquisq; potestatem habet se occidendi, pejerandi, mentiendi, fallendi. Mulier omnis potest corpore merere, vir omnis hystro-nia in facere & lenocinium. Summa tamen in his omnibus facientiū versatur turpitu-do, partim & scelus. Nec minus turpe est regi quæ sunt regibus inhonesta velle, quamvis possint impune jure suo uti. In-terdum etiam ne impune quidem id fa- ciunt. Nam Deo permittente non raro accidit, ut populorum sæpius tentata ac tandem victa patientia furor fiat, qui per calcatum regem ad regnum quoque de- struendum viam vi sibi faciunt & ad regi- men regium abolendum contendunt. Si Deum solum habere eos judicem asserui, tanto magis formidare illos decet, & ca- vere ne tradantur tam severi vindicis justo judicio, qui non in personas tantum pec- cantes suo jure animadvertit, sed delicta eorum sæpenumero in totam posterita- tem vindicat unius ob noxam patris. Præ- terea judices mortales de solis apud se probatis aut confessis pronuntiant crimi- nibus. At judex æternus corda ipsa rima- tur, & in secreto conscientiarum, scelera inquirat quæ deprehensa puniat. Tanto magis propterea cavendam ejus iram sibi  
scire

scire debent reges, quem latere ne quidem sola mente conceptum malum facinus potest. Si legibus solutus est, non ad hoc se esse supra leges debet judicare ut solutius cæteris vivat qui his teneri soli videntur. Quomodo eas servandas curabit, si prior ipse non illas observet? Si quod sui est officii non facit, quo jure ab illis quibus imperat, officii rationem exiget? Quomodo bonos postulabit sibi esse subditos, nisi se illis bonum præbeat regem ac dominum? Ut enim ad exemplar Regis properant omnes; si bonus est, imitantur, si malus, similiter. Meminerint igitur non solum se homines esse, sed & imperium in homines habere ex iisdem constantes elementis, à quibus introitu in vitam & exitu non differunt, sed solo personæ mimo quam in hoc mundi theatro sustinent. Ubi eam deposuerunt, ut ex pulvere facti in eundem quoque cum aliis pulverem revertuntur. Meminerint etiam cum bene imperant, onus esse regnum; si male, periculum: quasi tenui filo supra cervicem sibi semper impendente gladio. Cogitent etiam suæ fidei & custodiæ tanquam pastoribus commissos esse à summo numine populos, non tanquam lupis aut lanionibus traditos mactandos & deglubendos, sed ad pascua ducendos & tendendos



dendos tantum. Post omnia videant, quid malis regibus metuendum sit, cum arcano Dei iudicio & imperscrutabili profunditate abditis causis, bonus, pius, iustus, innocens Princeps, incredibili & immani partis populi furore ac scelere, regni gubernaculis dejectus & vitæ curriculo decussus per carnificem fuerit. Nec tamen sperandum est justam Dei vindictam evasuros qui tale parricidium commiserunt. Nam ubi ira Dei defævierit, & delicta populi opera eorum satis sibi punivisse visus fuerit, tum quoque eos dubio procul dirumpet & perdet, ut pater flagra sæpe solet, quibus filium castigavit.


F I N I S.













f

